

# চুলমনি ও কন্দার বিদ্যুৎ


হানা ক্যাথেরিন ম্যুলেন্স



বাংলা ভাষায় প্রথম মুদ্রিত উপন্যাস (১৮৫২)

# ফুলমণি ও কক্ষণাব বিবরণ

হানা ক্যাথেরিন মুলেন্স



# *Life by the Ganges*

Hannah Catherine Mullens

১৮৬৭, ইংরেজি (আমেরিকা) সংক্রন্তের প্রচন্দ

# ফুলমণি ও করণার বিবরণ

প্রথম প্রকাশ: ১৮৫২

## হানা ক্যাথেরিন ম্যালেন্স

(জন্ম: ১৮২৬

মৃত্যু: ১৮৬১)

ফুলমণি ও করণার বিবরণ প্রকাশিত হয় কোলকাতা থেকে ১৮৫২ সালে। এটি বাংলা ভাষায় প্রথম মুদ্রিত উপন্যাস। কাঞ্চন বসু সম্পাদিত ‘রিফ্লেক্ট পাবলিকেশন। কলিকাতা’ থেকে প্রকাশিত ছৃষ্টাপ্য সাহিত্য সংগ্রহ প্রথম খণ্ড (পঞ্চম মুদ্রণ)। ২জানুয়ারি ১৯৯৫)-এর ভূমিকায় লেখা হয়েছে হানা ক্যাথরিন ম্যালেন্স-এর মৃত্যুর আগেই উপন্যাসটি বারোটি ভাষায় অনুদিত হয়েছিল; যদিও এখানে লেখকের মৃত্যুর সাল লেখা হয়েছে ১৮৬৯। কিন্তু অন্যান্য উৎস অনুসারে লেখকের মৃত্যুর সাল ১৮৬১। আমেরিকার মিসিগান ইউনিভার্সিটির লাইব্রেরিতে বইটির ইংরেজি সংস্করণ আছে যেটির গুগল (google.com)-এর ডিজিটাল সংস্করণ অনলাইনে পাওয়া যায়। সেখানে মূল ইংরেজি বইটির প্রকাশ সাল দেখা যায় ১৮৬৫ এবং লেখকের নামের আগে মৃত (Late) যুক্ত করা হয়েছে। ফলে কাঞ্চন বসুর বক্তব্য ভুল তথ্য ভিত্তিক।

১৮৬৫ সালে প্রকাশিত ইংরেজি বইটি ([Faith and victory: a story of the progress of Christianity in Bengal.](#)) বাংলার অনুবাদ নয়, স্বতন্ত্র বই, ইংরেজি ভাষায় লিখিত, হানা ক্যাথরিন ম্যালেন্স নিজেই লিখেছেন; যদিও বইটি শেষ হবার আগেই তিনি মারা যান। পরে তাঁর পরিবারের অন্য দুই নারী সদস্য

বইটি শেষ করেন, তাঁরই নির্দেশনা মোতাবেক এবং কোলকাতার ব্রিটিশ মিশনারী কর্তৃক প্রকাশিত হয়।

আরেকটি ইংরেজি ভাস্ন পাওয়া যায়, ১৮৬৭ সালে মার্কিন যুক্তরাষ্ট্র থেকে প্রকাশিত। এটি কতকটা সম্পাদিত, সম্পাদক ছিলেন Jhon W. Dulles। তাঁর ভাষ্যে জানা যায়, হানা ক্যাথরিন ম্যুলেঙ্গ-এর স্বামী কোলকাতায় ডাক্তার ছিলেন। এই সম্পাদক কোলকাতায় ম্যুলেঙ্গ দম্পতির বাসায় এক সপ্তাহ অতিথি হিসেবে ছিলেন। এই বইটি গুগোল থেকে পাঠ করা যাবে। এই সংস্করণে বইটির নাম রাখা হয়েছে—‘[Life by the Ganges, or, Faith and victory](#)’।

## প্রথম অধ্যায়।

কএক বৎসর হইল আমি বঙ্গদেশের মফঃশলে নদী তীরবর্তি এক নগরে বাস করিতাম। সেই নগরের নাম এই স্থানে লিখিবার আবশ্যক নাই। তথা হইতে প্রায় অর্ধ ক্রোশ দূরে এদেশীয় খ্রীষ্টিয়ান লোকদের এক গ্রাম আছে; ঐ গ্রামস্থ ভাতা ও ভগিনীদের সহিত আমার যে সুখজনক আলাপ এবং ধর্মের বিষয়ে কথোপকথন হইত, তাহা আমি অদ্যাবধি স্মরণে রাখিয়া স্বর্গস্থ পিতার ধন্যবাদ করিয়া থাকি; কারণ তৎকালে তাহাদের চরিত্র দেখিয়া ও কথা শুনিয়া আমার বিশ্বাসের বৃদ্ধি হইল, এবং খ্রিষ্টের শিষ্যদের কি ২ করা কর্তব্য এ বিষয়ে আমি পূর্বাপেক্ষা সুশিক্ষিতা হইলাম।

ধর্মপুস্তক পাঠ করিলে আমরা দেখিতে পাই যে পরমেশ্বর প্রাচীন ধার্মিক লোকদের চরিত্র বর্ণনা করণদ্বারা আপন মণ্ডলীস্থ লোকদিগকে বিশেষরূপে শিক্ষা দেন, তাহাতে যেন তাহারা ঐ ধার্মিক ব্যক্তিদিগকে নির্দশন স্বরূপ জানিয়া তাহাদের ন্যায় সদাচারী হইতে চেষ্টা করে। ইহা জ্ঞাত হইয়া আমি বিবেচনা করিলাম, যদি উক্ত খ্রীষ্টিয়ানদের চরিত্রের বিষয়ে কিঞ্চিৎ ২ লিখি, তবে ঈশ্বরের আশীর্বাদে বঙ্গদেশস্থ ভগিনীরা তাহা পাঠ করিয়া পারমার্থিক লাভ ও সন্তোষ পাইতে পারিবে। এই অভিপ্রায়ে আমি এ ক্ষুদ্র পুস্তক রচনা করিতেছি।

আপন পরিবারের সহিত উক্ত নগরে পৌঁছিবামাত্র আমি প্রথমে সেই স্থান নিবাসি মিশনরি পাদরী সাহেবের সহিত সাক্ষাৎ করিতে গেলাম। পরে অন্যান্য বিষয়ে নানা প্রকার কথা কহিয়া আমি

সাহেবকে বলিলাম; মহাশয় এই নগরের মধ্যে আমি নৃতন আসিয়াছি, এখানে কাহাকেও চিনি না। অনুগ্রহ করিয়া বলুন, আপনার বিবেচনাতে কোন্ ২ সাহেবে ও বিবিরা ধার্মিক বোধ হয়, কারণ আমি এমত লোকদের সহিত মিত্রতা করিতে চেষ্টা করিব। অন্যের সহিত বড় একটা আলাপ করিতে চাহি না।

পাদরী সাহেব উত্তর করিলেন; হায়! এই স্থানে যে ইংরাজ লোকেরা আছে তাহাদের মধ্যে দুই এক জন মাত্র ঈশ্বরকে ভয় করিয়া তাঁহার আদেশ পালন করে, অন্য সকলে সাংসারিক কার্য্যেতেও ও নানা প্রকার কৌতুকাদিতে মন্ত্র আছে। কিন্তু নিকটবর্তি বাঙালি খ্রীষ্টিয়ানদের যে গ্রাম আছে, তাহাতে কএক জন এমত ধার্মিক লোক বাস করে যে তাহাদের বিষয়ে যথার্থ বলিতে পারি, তাহারা খ্রীষ্টের মণ্ডলীর অলঙ্কার স্বরূপ হইয়াছে।

ইহা শুনিয়া আমি ঐ খ্রীষ্টিয়ান লোকদের বিষয়ে অনেক কথা জিজ্ঞাসা করিয়া মনে স্থির করিলাম, যে অবকাশ পাইবামাত্র আমি তাহাদের নিকটে গিয়া তাহাদের সহিত আলাপাদি করিব।

পর দিবসে দৈবাং আমার স্বামীকে কোন ডাকাইতের দলের বিষয়ে তত্ত্ব করিবার কারণ গৃহ ত্যাগ করিয়া পল্লীগ্রামে যাইতে হইল, তাহাতে সন্ধ্যাকালে আমার মনে বড় ঔদাস্য হইলে খ্রীষ্টিয়ান গ্রামে গিয়া তথাকার লোকদের সহিত পরিচয় ও কথোপকথন করিতে মনে স্থির করিলাম। আমার বাটী হইতে উক্ত গ্রাম প্রায় অর্দ্ধ ক্রোশ দূর; কিন্তু সে দিন বড় উত্তম এবং শীতল বায়ু বাহিতেছিল, এই কারণ আমি গাড়িতে না চড়িয়া একজন চাপরাসিকে সঙ্গে লইয়া পদ্বর্জে চলিলাম।

গ্রামে প্রবেশ করিয়া প্রথমে চারি পাঁচখানা কুঁড়ে ঘর দেখিতে পাইলাম। তাহাদের উঠান অপরিষ্কার এবং তাহাদের সমৃথে উলঙ্গ বালকেরা কাদা ও ধূলা দিয়া খেলা করত পুত্রলাদি গড়িতেছিল। সেই সকল ঘর যে খ্রীষ্টিয়ান লোকদের বাসস্থান তাহার একটিও চিহ্ন দেখিলাম না, বরং হিন্দু লোকদের বাটী তাহাদের অপেক্ষা পরিষ্কার ও শোভিত ছিল। এই কারণ আমি তাহাদের মধ্যে প্রবেশ না করিয়া অগ্রে চলিয়া গেলাম।

কিঞ্চিৎ দূরে গিয়া একটি অতি পরিষ্কার ও পরিপাটী খেলার ঘর দেখিয়া বড় সন্তুষ্ট হইলাম, এবং ঐ ঘর নিবাসিদের পরিচয় লইতে উত্তম সুযোগ পাইলাম; অর্থাৎ আমি দেখিলাম যে ঐ ঘরের নিকটবর্তী কোন বৃক্ষের ডালের উপরে এক লোহার ডাঁড় ঝুলিতেছে, তাহাতে একটি হরিদৰ্ণ টিয়া পাখী শিকল দ্বারা বাঁধা থাকাতে কাক সকল তাহাকে চঞ্চুদ্বারা অতিশয় ক্লেশ দিতেছে। ইহা দেখিবামাত্র আমি পাখিকে ডাঁড় সহিত নামাইয়া উঠানের মধ্যে উপস্থিতা হইলাম। আমার আগমনের শব্দ শুনিয়া এক জন অর্দ্ধবয়স্ক স্ত্রীলোক বাহিরে আইল। তাহার মাথার চুল সুন্দররূপে বাঁধা ও তাহার পরিধেয় শাড়ি অতিশয় পরিষ্কার ছিল।

আমি তাহাকে জিজ্ঞাসা করিলাম, ওগো এটা কি তোমার পাখী? কাক সকল ইহাকে বড় দুঃখ দিতেছিল, এজন্যে আমি ইহাকে বাটীর ভিতরে আনিয়াছি। স্ত্রীলোক উত্তর করিল, বিবি সাহেব, আপনকার বড় অনুগ্রহ। এ আমার পাখী বটে, আমার পুত্র ভুলিয়া বাহিরে ফেলিয়া গিয়াছে। ইহা বলিয়া সে পক্ষীর সকল এলোমেলো পালখ গুলিতে হাত বুলাইয়া সমান করিল, এবং বোধ হইল যে পক্ষী তাহার কর্তৃকে ভালরূপে চিনিত, কারণ সে তাহাকে না কামড়াইয়া তাহার বন্দের মধ্যে লুকাইতে চেষ্টা করিল।

পরে ঐ স্ত্রী আমার প্রতি ফিরিয়া জিজ্ঞাসিল, মেম সাহেব, আপনি আমাদিগের পাড়ার মধ্যে কি দেখিতে আসিয়াছেন? পাদরী সাহেবের মেম ভিন্ন আর কেহ এখানে আইসেন না। তাহাতে আমি উত্তর করিলাম, এ বড় দৃংখের বিষয়, কারণ বাঙালি শ্রীষ্টিয়ানদের হিত চেষ্টা করা বিলাতীয় লোকদের অবশ্য কর্তব্য। আমি নৃতন মেজিষ্ট্রেট সাহেবের বিবি, যিনি গত মাসে আত্মতলায় বড় দোতলা বাটী ভাড়া লইয়াছেন। কল্য আমি তোমাদের পাদরী সাহেবের নিকটে এই শ্রীষ্টিয়ানদের গ্রামের বিষয় শুনিয়া অদ্য তোমাদের সহিত সাক্ষাৎ করিতে আসিয়াছি। ইহা শুনিয়া সেই স্ত্রীলোক বলিল, বোধ হয় বিবি সাহেব, আপনি গাড়ী চড়িয়া আসিয়াছেন?

আমি উত্তর করিলাম, না, আমি নদীর শীতল বায়ু সেবন করিতে ইচ্ছা করিয়া চাপরাসিকে সঙ্গে লইয়া হাঁটিয়া আসিয়াছি; কিন্তু তোমাদের গ্রাম যে এত দূরস্থ তাহা আমি জানিতাম না, এই কারণ চলিতে ২ বড় শ্রান্তা হইয়াছি। তুমি যদি আমাকে একটি আসন খুজিয়া দিতে পার, তবে আমি কিঞ্চিৎকাল বসিয়া বিশ্রাম করি। তাহাতে সে ঘরের ভিতরে শীত্র গিয়া একখান পুরাতন চৌকি বাহির করিয়া আনিল। বোধ হয় ঐ চৌকি কেবল মান্য লোকদের নিমিত্তে তোলা থাকিত, কারণ তাহার উপরে কিঞ্চিৎ ধূলা ছিল; কিন্তু এক নিমিষের মধ্যে ঐ স্ত্রী সকল ধূলা অঞ্চল দ্বারা ঝাড়িয়া অতি সুশীলতা পূর্বক আমাকে বলিল, মেম সাহেব, আপনি অনুগ্রহ করিয়া বসুন, আমি আপনাকে আগেই চৌকি দিতাম, কিন্তু মেজিষ্ট্রেট সাহেবের বিবি এমত দরিদ্রের গ্রহে কখন বসিবেন না; এই অনুমান করিয়া পূর্বে কিছু বলিতে সাহস করিলাম না।

আমি তখনি দাবাতে চৌকি লইয়া বসিতেছি, এমত সময়ে  
সেই স্তৰীর একটি ছোট বালক গৃহের মধ্যে কান্দিয়া উঠিল। তখন  
সে তাহাকে আনিবার নিমিত্তে ঘরের ভিতরে যাওয়াতে আমি  
কিঞ্চিৎকাল একা থাকিয়া উঠানের মধ্যে যাহা ২ ছিল তাহা দৃষ্টি  
করিতে সুযোগ পাইলাম। তাহার চতুর্দিগের বেড়া নৃতন দরমা ও  
নৃতন বাঁশ দিয়া বাঁধা ছিল, এবং তদুপরি একটি সুন্দর ঝিঙা লতা  
উঠিয়াছিল। উঠানের এক পার্শ্বে গোরূর একখানি ঘর দেখা গেল,  
তাহার মধ্যে একটি গাভী ও বৎস ধীরে ২ জাওনা খাইতেছে।  
গোশালার ছাতের উপরে অনেক পাকা লাউ দেখিলাম। উঠানের  
অন্য দিকে পাকশালা ছিল, এবং তাহার দ্বার খোলা থাকাতে আমি  
দেখিতে পাইলাম তনুধ্যে তিন চারিটি সুমার্জিত থালা ও ঘটি  
এবং কএকখান পরিষ্কার পাথরও রাশীকৃত আছে। উঠান  
সুন্দররূপে পরিষ্কৃত ছিল, তাহাতে যেমন প্রায় সকল ঘরে রীতি  
আছে তেমন কোন কোণে জঙ্গলের রাশি দেখিতে পাইলাম না;  
সকল সমান পরিষ্কার ছিল। দাবার সমুখে ঘরের ছাঁচির নীচে দশ  
বারটি চারা গাছ গামলাতে সাজান দেখিলাম; তাহার মধ্যে তিন  
চারটি ঔষদের গাছ ছিল, অন্য সকল গ্যাঁদা তুলসী গন্ধরাজ  
ইত্যাদি। একটি অতিসুন্দর চীন গোলাপের চারাও ছিল, তাহাতে  
কুঁড়ি ও ফুল ধরিয়াছিল।

এই সকল দেখিতেছি এমত সময়ে বাটীর গৃহিণী পুনর্বার  
বাহিরে আসিয়া আমার চৌকির নিকটে দাঁড়াইল; পরে আমি  
তাহাকে বসিতে বলিলে সে আপন দ্বারের চৌকাঠের উপরে বসিয়া  
ছেল্যাকে দুঃখ পান করাইতে লাগিল। সেই পুত্র সন্তান দেখিতে  
সুন্দর; এবং অনুমান হইল তৎকালে তাহার বয়ঃক্রম প্রায় এক  
বৎসর হইবে। তাহার গায়ে গরম কাপড়ের কুর্তী ছিল, এবং  
তাহার মাতাও একটা কোর্তা পরিয়াছিল। বোধ হয় যদ্যপি সকল

খ্রীষ্টিয়ান স্ত্রীলোক এইরূপ উপযুক্ত বস্ত্র ব্যবহার করে তবে ভাল হয়; দুই আনা পয়সাতে একটা কোর্টার কাপড় ক্রয় করা যায়, তাহার মূল্য অধিক নয়, এবং কিঞ্চিৎ শিল্প বিদ্যা শিক্ষা করিলেই তাহা অনায়াসে ঘরে প্রস্তুত করা যায়।

সে যাহা হউক, ঐ স্ত্রীলোক বসিলে আমি তাহার সহিত কথোপকথন করিতে ২ জিঞ্চাসা করিলাম, তোমার নাম কি? তোমার স্বামী কি কর্ম করে ও তোমার কয়টি সন্তান? সে উত্তর করিল, আমার স্বামী পাদরী সাহেবের নিকটে হরকরার কর্মে নিযুক্ত থাকিয়া চিঠী লইয়া বেড়ান, এবং সাহেবেরা স্কুলের কার্য নির্বাহ করিবার কারণ যে ২ দান করিয়া থাকেন, সে টাকা তাঁহাকে মাসে ২ সংগ্রহ করিতে হয়; এবং কখন ২ বা পাদরী সাহেবের নিমিত্তে নানা প্রকার দ্রব্য ক্রয় করিতে কলিকাতায় যাইতে হয়। আমার নাম ফুলমণি, আমার দুই পুত্র ও দুই কন্যা আছে।

ফুলমণি আরও কথা বলিত, কিন্তু এমন সময়ে আর একজন স্ত্রীলোক বহির্দ্বারে শক্তরূপে আঘাত করিয়া ভিতরে আইল। তাহার কাপড় বড় ময়লা, এবং চুল বাঁধা না থাকাতে মস্তকের চতুর্দিগে পড়িয়াছিল। সে আমার মুখ পানে কিঞ্চিৎকাল অসভ্যরূপে তাকাইয়া ফুলমণির প্রতি ফিরিয়া ফুসফাস করিয়া জিঞ্চাসা করিল, উনি কে? ফুলমণি বলিল, ইনি নৃতন মেজিষ্ট্রেট সাহেবের বিবি।

এই কথা শুনিয়া ঐ স্ত্রীলোক কিঞ্চিৎ ভয় পাইয়া আমাকে অতি নম্রতা পূর্বক সেলাম করিল; পরে সে ফুলমণিকে ধীরে ২ বলিতে লাগিল, ফুলমণি, তোমার কপাল বড় ভাল। সকল সাহেব লোকেরা তোমাকেই ভালবাসেন, আমার প্রতি কেহই দয়া করেন

না। তাহাতে ফুলমণি কোন উত্তর না দিয়া বলিল, সে যাহা হউক, করুণা তুমি এই স্থানে এমত ব্যস্ত হইয়া কেন আইলা? করুণা বলিল, চড়চড়ি রঞ্জন করিবার নিমিত্তে কিছু তৈল তোমার নিকটে চাহিতে আসিয়াছি, ঘরে একটিও পয়সা নাই, আমার পুত্র এখনি কতকগুলিন চুনামাছ ধরিয়া আনিয়া দিল, সেইগুলিন এই বেলার মত রঞ্জন করিব। আমার স্বামীকে তো জান; সে আমাকে কিছু খরচ দেয় না, তথাপি খাইতে না পাইলে সমস্ত রাত্রি তিরঙ্কার করিতে থাকে।

ফুলমণি বলিল, এ বড় মন্দ বটে, কিন্তু তোমার পয়সা নাই এই বা কেমন কথা? আমি প্রাতঃকালে শুনিলাম যে রমানাথ উপদেশক তোমাকে ডাকিয়া বলিলেন, আজ আমি পল্লীগ্রামে ঘোষণা করিতে যাইব; তুমি যদি আমার পীড়িত স্ত্রীর নিকটে থাকিয়া সাগু-দানা ইত্যাদি রঞ্জন করিয়া দেও, তবে আমি তোমাকে ছয়টি পয়সা বেতন দিব।

করুণা হাসিতে ২ উত্তর করিল, আমাকে যে ডাকিয়াছিল সে সত্য বটে, কিন্তু আমি যাই নাই। মধুর স্ত্রী যে পলাইয়া গিয়াছিল, তাহার সকল কথা শুনিতে ২ সময় গেল; তাহাতে বাবু আপন স্ত্রীর কাছে প্যারীকে রাখিয়া চলিয়া গেলেন। মধুর স্ত্রীকে কালীপুরে পাওয়া গেল; সেখানে সে কাঠ কুড়াইয়া বেচিতেছিল, এবং তাহার যত গহনা ছিল তাহা একটিও তাহার নিকটে নাই। সে এই কথা বলে, যে একটি বৃক্ষ স্ত্রীলোক প্রথমে আমার প্রতি বড় দয়া প্রকাশ করিয়া পাঁচ সাত দিন আমাকে ঘরে রাখিয়া খাইতে দিল। পরে এক রাত্রিতে আমি যখন ঘোরতর নিদ্রা গিয়াছিলাম, তখন কে আসিয়া আমার সমুদয় গহনা গাত্র হইতে খুলিয়া লইল। প্রাতঃকালে উঠিয়া গহনা না দেখিয়া আমি কান্দিতে ২ টি বুড়া

স্ত্রীকে কহিলাম, তুমই অবশ্য আমার গহনা লইয়াছ; তাহাতে সে আমাকে গালি দিয়া ঘর হইতে বাহির করিয়া দিল। তখন আমি বলিলাম, তবে আমি কি ক্ষুধায় মরিব? আমি নালিশ করিতে যাই। এই কথা শুনিয়া বুড়ি বলিল, তোর সাঙ্গী নাই, তোর টাকা নাই, তুই কি প্রকারে নালিশ করিবি? এই লও, আমি দয়া করিয়া তোকে দুইটি টাকা দিলাম; কিন্তু যদি তুই এই বিষয় প্রকাশ করিস তবে আমি তোর নামে নালিশ করিব।

করণা আরও বলিল, এই সকল রাণীর কথা; কিন্তু আমার বোধ হয় তাহা সকলি মিথ্যা। মধু তো বলে, যদি সে আমার গহনা আনিয়া না দেয়, তবে আমি তাহাকে চোরের ন্যায় কয়েদ করাইব।

ফুলমণি বলিল, মধু তাহা কখন করিতে পারিবে না। বিবাহের সময়ে ঐ গহনা রাণীকে দান করিয়াছিল কি না? আর সকল গহনা কিছু মধুর দত্ত নয়, কতকগুলি গহনা রাণীর মাতা মৃত্যুকালে তাহাকে দিয়া গিয়াছিল। আমার বোধ হয় রাণী সত্য কথা বলিয়াছে। ঐ বুড়ি গহনার লালসায় তাহাকে স্থান দিয়া থাকিবে, তাহা না হইলে এমত দয়ালু কে আছে যে খীষ্টিয়ানীকে আপন ঘরের ভিতরে আনিয়া আহারাদি দেয়? রাণী পলাইয়া যাওয়াতে বড় অজ্ঞানের কর্ম করিল বটে, তথাপি তাহারই সম্পূর্ণ দোষ নয়; তাহার স্বামী এবং শাশুড়ি তাহাকে যে বড় দুঃখ দেয়, তাহা আমি ভালুকপে জ্ঞাত আছি।

করণা উত্তর করিল, তুমি তো রাণীর পক্ষে অবশ্য বলিবা, কারণ সে স্কুলের মেয়ে ছিল, আর সে তোমার সুন্দরীর বন্ধু। কিন্তু ফুলমণি, আমি তোমাকে যথার্থ বলি, লোকেরা আর স্কুলের

মেয়েদের সহিত আপন পুত্রদিগকে বিবাহ দিবে না। স্কুলের মেয়েদের দ্বারা বার ২ এইরূপ গোলমাল উপস্থিত হইয়া থাকে।

ফুলমণি বলিল, সে অনর্থক কথা মাত্র; মেয়েদের তো চৌল্দ বৎসর না হইতে ২ সর্বদা বিবাহ হইতেছে; এবং পাদরী সাহেব যে বর অন্বেষণ করেন তাহাও নয়, লোক সকল আপনারা আসিয়া কন্যা যাঞ্চিয়ো বিবাহ করে। আর শুন, এই গ্রামের মধ্যে এই স্কুলের মেয়েরা প্রায় সকলে ভদ্র ২ ঘরে দণ্ডা হইয়াছে। আমাদের রমানাথ বাবুর স্ত্রীকে দেখ; এবং কোমল সরকারের স্ত্রী ও শশিভূষণ মুখোপাধ্যায়ের দুই বউ, ইহারা সকলেই স্কুলের মেয়ে, তথাপি তাহদের বিরংদ্বে একটিও কথা কেহ বলিতে পারে না। যদি রাণীর বিষয়ে বল, তবে আমার কিছু কথা আছে। সাহেব প্রথমাবধি তাহার বিবাহ দিতে অনিচ্ছুক ছিলেন, আমরাও তাহাতে অনেক বাধা দিয়াছিলাম; কিন্তু রাণীর মাতা বড় অজ্ঞান ছিল। এই তিন খান সোনার গহনার জাঁকজমক দ্বারা তাহার দৃষ্টি এমত রোধ হইয়াছিল, যে মধুর একটিও দোষ তাহার চক্ষে পড়িল না। তুমি তো উত্তমরূপে জান যে মধু অতিশয় মূর্খ লোক, ক খ পর্যন্ত জানে না; কিন্তু রাণী সকল মেয়েদের মধ্যে লেখা পড়াতে বড় নিপুণা, কেবল ঘরে কর্ম করিতে বড় একটা ভালবাসে না। এমত বিপরীত স্বভাব বিশিষ্ট লোকদের বিবাহেতে কি কখন সুখ উৎপন্ন হইতে পারে? কিন্তু সে যাহা হউক, পরের কর্মে আমাদের হাত দেওয়া অকর্তব্য। আইস, আমি তোমাকে চড়চড়ির নিমিত্তে কিছু তৈল দিই।

অনন্তর করণা ফুলমণির পশ্চাতে ঘরের মধ্যে যাইতেছিল, এমত সময়ে তাহার আঁচলে একটি বড় ছিদ্র থাকাতে সেই উক্ত চীন গোলাপের গাছে জড়িয়া ধরিল; তাহা করণা না দেখিয়া

অঞ্চলিকে বলপূর্বক টানিয়া লওয়াতে চারাটি প্রায় মূল পর্যন্ত ভাঙিয়া গেল। তখন আপন কৃত ঐ ক্ষতি দেখিয়া করুণার বদন বড় বিষগ্ন হইল, তাহাতে সেখানে বসিয়া সে ফুল পত্রাদিকে সংগ্রহ করিতে লাগিল। এমত কালে ফুলমণি কিছু না জানিয়া তৈলের ভাঁড় হাতে করিয়া বাহিরে আইল, কিন্তু আপন প্রিয়তম গাছটির অবস্থা দেখিয়া সে অতিশয় দুঃখিত হইয়া বলিতে লাগিল, হায় করুণা! তুমি কি করিলা? আমার সুন্দরীর চারাটি গেল! করুণা বলিল, আমাকে ক্ষমা কর। ফুলমণি, আমি এই বিষয়ে বড় দুঃখিত হইয়াছি। তুমি ঐ গাছটিকে তোমার সুন্দরীর নিশান স্বরূপ জ্ঞান করিয়া অত্যন্ত ভালবাসিতা, তাহা আমি জানি।

ইহা শুনিয়া ফুলমণির ক্রোধ নিরৃতি হইল, পরে সে হাস্য মুখে বলিল, ক্ষতি নাই। ইহাতে ধর্মপুস্তকের একটি অতি সান্ত্বনাদায়ক পদ আমার স্মরণ হইতেছে। হায় করুণা! তুমি যদি আপন মনে এই কথার বহুমূল্যতা জ্ঞাত হইতা, তবে তোমার দুঃখ অনেক ন্যূন হইত। সে কথা এই, “তৃণ শুক্র হয়, ও পুষ্প ম্লান হয়, কিন্তু আমাদের ঈশ্বরের বাক্য নিত্যস্থায়ী।” যিশুয়িয় ৪০। ৮।

করুণা নিশাস ত্যাগ করিয়া কিছু উত্তর করিল না, কিন্তু আমি তাহার মুখপানে চাহিয়া অনুমান করিলাম, সে ফুলমণির স্বভাবপ্রাপ্তি হইতে ইচ্ছা করিতেছিল। অবশেষ করুণা আপন সুশীলা বন্ধুর নিকটে বিদায় লইয়া আমাকে সেলাম দিয়া তৈলপাত্র হাতে করিয়া চলিয়া গেল।

উক্ত কথোপকথন শুনিয়া আমি অনুমান করিলাম, ফুলমণি অতি ধার্মিকা ও ন্যায়মনা বটে, সেই হেতুক আমি পুনর্বার তাহাকে বসিতে বলিয়া তাহার আত্ম বিবরণ কর্তৃতে অনুমতি দিলাম।

তাহাতে সে বলিল, মেম সাহেব, আমার বিষয়ে আপনাকে আর কি জানাইব? সকলি তো জ্ঞাত করিয়াছি। তাহাতে আমি বলিলাম, ঐ সুন্দরী যাহার বিষয়ে এখন করণার সহিত কথা হইল, সে কে? তাহা আমাকে বল; কেননা তাহার দণ্ড ফুলগাছটিকে যদি তুমি এমন প্রিয় জ্ঞান কর, তবে বোধ করি সে তোমার আত্মীয় ব্যক্তি হইবে।

ফুলমণি উত্তর করিল, মেম সাহেব ভাল বুবিয়াছেন। সুন্দরী আমার জ্যেষ্ঠা কন্যা; তাহার বয়স প্রায় পোনের বৎসর হইয়াছে। দুই বৎসর গত হইল তাহার পিতা ছয় মাস পর্যন্ত অতিশয় পীড়িত ছিলেন, তজ্জন্য আমাদের বড় দুঃখ ঘটিয়াছিল। সত্যরূপে বলিতেছি, আমরা ঐ ছয় মাসের মধ্যে কেবল অন্ন ও শাক বিনা আর কোন ভাল দ্রব্য এক দিবসও খাইতে পাইতাম না; তথাপি আমি এক পয়সা মাত্র কর্জ করি নাই, কারণ আমি কর্জকে সর্পের ন্যায় ভয় করি। ইহাতে আমাদের আহারের বড় ক্লেশ হইয়াছিল বটে, কিন্তু এক দিবস এলিয় ভবিষ্যদ্বক্তার বিবরণ পাঠ করিয়া দেখিলাম যে পরমেশ্বর আপন আশ্রিত লোকদিগকে আকালের কালেও ক্ষুধায় মরিতে দেন না, বরং তাহাদের বাঁচাইবার কারণ আকাশের পক্ষিগণকেই অহারাদি আনিতে আজ্ঞা করেন। ১ রাজাবলি ১৭। ১-৭। ইহা পড়িয়া দুঃখ ভোগের সময়েও আমাদের মনোমধ্যে যথেষ্ট সান্ত্বনা জন্মিল।

তৎপরে আমি জিজ্ঞাসা করিলাম, ফুলমণি, তবে তোমাদের দিন নির্বাহ কিরূপে হইত? ফুলমণি, বলিল, ইংরাজি স্কুলের প্রধান শিক্ষক মহেন্দ্রবাবুর ঘরে এক রন্ধনের কর্ম উপস্থিত ছিল; আমি ভাবিলাম, কর্জ করা অপেক্ষা পরের সেবা করা ভাল। অতএব সেই স্থানে গিয়া ঐ কর্মে নিযুক্ত হইলাম। তাহাতে

আমাকে প্রতিদিন প্রাতঃকালে যাইতে হইত কিন্তু সায়ংকালে ঘরে আসিবার অবকাশ পাইতাম। সুন্দরী সে সময়ে স্কুলে ছিল, ফলতঃ ঐ বিপদকালে তাহাকে ঘরে আনিতে হইল, কারণ আমি কর্মে গেলে তাহাকেই আপন পিতার সেবাদি করিতে হইত। বাবুর নিকট প্রতিমাসে তিন টাকা বেতন পাইতাম, এবং দুঞ্চ বিক্রয় দ্বারা গোরুর খাদ্যাদির খরচ বাদে প্রায় প্রতিমাসে আর দুই টাকা লাভ করিতাম। এইরূপে মোটা ভাত খাইয়া মোটা কাপড় পরিয়া ছয় মাস পর্যন্ত দিনপাত করিলাম। সুন্দরীর পিতার পীড়া হওনের পূর্বে আমরা ঘোলটি টাকা জমা করিয়াছিলাম, তাহাতে পাঁচ টাকায় গোরুর ঘর বানাইলাম, আর এগার টাকা দিয়া গোরু বাচুর কিনিলাম। আমাদের এমত দুঃখ হইবে, তাহা যদি পূর্বে জানিতাম, তবে বোধ হয় ঐ টাকা খরচ করিতাম না। তথাপি এক প্রকার ভাল হইয়াছে, কারণ সেই অবধি আমি সর্বদা দুঞ্চ বিক্রয় করিয়া কিছু লাভ করিয়া আসিতেছি।

ফুলমণি আরও বলিল, ছয় মাস গত হইলে ঈশ্বরের প্রসাদ হেতুক সুন্দরীর পিতা কিঞ্চিৎ সুস্থ হইয়া পুনর্বার কর্মেতে গেলেন, কিন্তু তখন কবিরাজ মহাশয়কে বিদায় করিতে হইল। তিনি বলিলেন, ছয় মাস পর্যন্ত আসা যাওয়া করিয়াছি, সেই হেতুক চরিশ টাকার কম লইব না। ইহা শুনিয়া আমাদিগের বড় ভাবনা হইল, কারণ তাহাকে পাঁচটি টাকা দি, তৎকালে আমাদের এমত সঙ্গতি ছিল না। কিন্তু ঈশ্বর যখন আপন সেবকদিগকে নিরূপায় দেখেন, তখন তিনি সর্বদা তাহাদিগকে রক্ষা করেন, এ কথা যে সত্য তাহা আমরা পরে ভালুকে বুঝিতে পারিলাম।

আমাদিগের পাদরী সাহেবের ভগিনী সেই সময়ে আপন ভাইয়ের ঘরে কিছুদিনের নিমিত্তে আসিয়াছিলেন। তিনি অতিশয়

ধার্মিকা; তাহার সাহেব কলিকাতায় ডাক্তরের কর্ম করেন। ঐ বিবি আমার কন্যাকে স্কুলে দেখিয়া তাহাকে বড় ভালবাসিতেন, তাহাতে তিনি আমাদের দুঃখের কথা শুনিয়া আমাকে ডাকাইয়া এই কথা কহিলেন, ফুলমণি তুমি সুন্দরীকে আমার সহিত কলিকাতায় যাইতে দেও। আমি তাহাকে আয়ার কর্ম শিখাইব। বোধ করি সে ধার্মিকা মেয়ে, এবং এমত ব্যক্তি আমার বাবাদিগের নিকটে থাকে, ইহা আমি বড় অভিলাষ করি। যদ্যপি সুন্দরী এখন কোন কর্ম না জানে, তথাপি আমি তাহাকে খাদ্য বস্ত্রাদি ও প্রতিমাসে দুই টাকা বেতন দিতে স্বীকার করিতেছি; পরে কর্মে পারক হইলে আরও বৃদ্ধি করিয়া দিব। এই কথাতে যদি সম্মতা হও, তবে আমি এখনি সুন্দরীর এক বৎসরের বেতন অর্থাৎ চৰিশ টাকা তোমার হাতে দিই; তুমি টাকা লইয়া কবিরাজকে দিলে তোমাদের সকল দুঃখের শেষ হইবে।

তদন্তর ফুলমণি আমাকে বলিল, মেম সাহেব আমি ঘরে আসিয়া এই সকল কথা সুন্দরীর পিতাকে জানাইলাম; কিন্তু তিনি কন্যাকে ছাড়িয়া দিতে অনিচ্ছুক হইলে আমি পাঁচ সাত দিন পর্যন্ত কিছু স্থির করিতে না পারিয়া ডাক্তর সাহেবের বিবির নিকটে গেলাম না। আমাদের প্রতিবাসি সকলে কহিল, এমত কর্ম কখনও করিও না। কেহ ২ বলিল, ছি ছি! লোকে লজ্জা দিবে; কেহ ২ বলিল, না না, মেয়ে ভষ্টা হইবে; কেহ বা বলিল, তোমরা অতিশয় টাকা লোভী; টাকার লালসায় কন্যাকে বিদেশে চাকরি করিতে পাঠাইতে চাও; টাকা ধার কর, আপন মেয়েকে কখন ছাড়িয়া দিও না।

ফুলমণি বলিল, মেম সাহেব, প্রতিবাসিদের এই রূপ কথা শুনিয়া আমিও ভাবিতে লাগিলাম, যে একবার মাত্র ধার করিলে

কিছু ক্ষতি নাই, চেষ্টা করিলে টাকা শীত্র পরিশোধ করিতে পারিব। কিন্তু সুন্দরী বলিল, না মা! কোথা হইতে পরিশোধ করিবা? কারণ কবিরাজ বলেন, যদ্যপি পিতা এখন উভম ২ তেজস্কর দ্রব্যাদি না খান, তবে তাহার পূর্বমত বল হইবে না। এবং মা, তুমি দুঃখদায়ক কর্ম করিয়া অতিশয় শীর্ণ হইয়াছ। তোমরা এখন ভাল খাও ও ভাল পর, এবং আমাকে কলিকাতায় যাইতে দেও। লোকের কথা শুনিও না, কারণ আমি ঈশ্বরকে ভয় করি; তিনি সকল আপদ হইতে আমাকে রক্ষা করিবেন।

ফুলমণি আরও বলিল, সুন্দরীর যাওনের বিষয় স্থির হইবার পূর্বে একজন বৃন্দা স্ত্রীলোক অহঙ্কার করত আমার নিকটে আসিয়া এই কথা কহিল; ভাল, ফুলমণি, গত বৎসরে তুমি আমার মধুর সহিত তোমার কন্যাকে বিবাহ দিতে সম্মতা ছিলে না। এখন তোমাদের দুঃখ উপস্থিত হইয়াছে; তুমি আমাদের পায়ে ধরিয়া ঐ কর্ম যেন হয় এমত নিবেদন করিবা। ভাল, তাহাই হউক, আমি সকল ক্ষমা করিলাম। সুন্দরীকে কলিকাতায় না পাঠাইয়া আমার পুত্রের সহিত বিবাহ দেও, দিলে তোমার জামাতা কবিরাজের টাকা গুলিন পরিশোধ করিবেন। আমি বলিলাম, না গো, সে কখন হইবে না। আমি তোমার পুত্রকে শিশুকালাবধি চিনি বটে, এবং সে আমাকে মা বলিয়া থাকে; কিন্তু দুই তিন বৎসরাবধি আমি স্বচক্ষে দেখিতেছি সে বার ২ শুঁড়ির দোকানে গিয়া মদ্য পান করে। অতএব সুখাবস্থায় যেরূপ বলিয়াছিলাম, সেইরূপ এখনও বলিতেছি, যে মদ্যপায়ী ব্যক্তির সহিত আমার কন্যাকে কখন বিবাহ দিব না। এমত বিবাহ অপেক্ষা আয়াগিরি চাকরি সহস্র গুণে ভাল। এই কথা শুনিয়া ঐ বুড়ি মহা ক্রোধান্বিতা হইয়া আমাদের বিষয়ে নানা প্রকার হিংসার কথা কহিতে লাগিল। সে প্রতিবাসিদিগের নিকটে বলিল, যে সুন্দরীর গর্ভ হইয়াছে; অতএব

তাহা গোপনে নষ্ট করিবার কারণ ফুলমণি তাহাকে কলিকাতায় পাঠাইতেছে। সুন্দরীর পিতা এবং আমি এইরূপ মিথ্যা অপবাদ শুনিয়া দুঃখিত হইলাম বটে, কিন্তু “যে জিহ্বা তোমার সহিত বিবাদ করে, তাহাকে তুমি বিচারে দোষী করিবা”, ঈশ্বরের এই অঙ্গীকার আমাদের প্রতি তখন সফল হইল; কারণ সুন্দরী যে দুষ্টা তাহা কেহ বিশ্বাস না করিয়া প্রতিবাসি সকলে বুড়িকেই দোষ দিতে লাগিল।

তদন্তের আমি জিজ্ঞাসা করিলাম, যে যুব পুরুষ তোমার কন্যাকে বিবাহ করিতে অভিলাষ করিয়াছিল, শেষে তাহার কি ঘটিল?

ফুলমণি বলিল, মেম সাহেব ঐ স্ত্রীলোক যে ব্যক্তির কথা এক্ষণে এই স্থানে কহিতেছিল, সেই বুড়ির পুত্র মধু আমার সুন্দরীকে বিবাহ করিতে চাহিয়াছিল। এক বৎসর পরে সে রাণীকে বিবাহ করিল; কিন্তু রাণী এই প্রকারে তাহার নিকট হইতে দুইবার পলায়ন করিয়াছে। রাণী আমার সুন্দরীর সঙ্গে এক স্কুলে পাঠ করিত, তাহাতে উভয়ের অত্যন্ত প্রণয় হইয়াছিল। এই কারণ সুন্দরী গেলে পরে রাণী আমার নিকটে কখন ২ আসিয়া কিছু কাল বসিয়া সকল দুঃখের কথা বলিত; কিন্তু প্রায় তিন মাস হইল সে আমাকে বলিয়াছিল, আমি যখন তোমার নিকট হইতে ঘরে যাই তখন স্বামী কিংবা শাশুড়ী বড় মারেন। এই কথা শুনিয়া আমি তাহাকে আসিতে বারণ করিলাম, কেন না পরিবারের মধ্যে যাহাতে বিবাদ জন্মে, এমত কর্ম করা অনুচিত।

আমি বলিলাম, তুমি ভাল বুঝিয়াছিলা, ফুলমণি। এই মধু ও রাণীর বিষয়ে পশ্চাতে আরও কথা জিজ্ঞাসা করিব; এখন সুন্দরীর কি গতি হইল, তাহা বল।

ফুলমণি হাসিয়া কহিল, মেম সাহেব, আপনাকার বড় অনুগ্রহ যে আপনি আমার কন্যার বিষয় শুনিতে এমত ইচ্ছুক আছেন। তাহাকে ছাড়িয়া দিব কিনা, এ বিষয় আমরা কোন প্রকারে মনে স্থির করিতে না পারিয়া আমি পাদরী সাহেবের নিকট পরামর্শ লইতে গেলাম। সে সময়ে তিনি বাজারে সুসমাচার প্রচার ও বহি বিতরণ করিতে গিয়াছিলেন, কিন্তু মেম সাহেব আপনার কুঠরীতে বসিতে অনুমতি দিলে আমি সাহেবের আগমন পর্যন্ত অপেক্ষা করিলাম। পরে তিনি বাটীতে আসিবা মাত্র আমি তাঁহাকে সুন্দরীর কথা কহিয়া নিবেদন করিলাম, হে মহাশয়, এ বিষয়ে আপনি কি পরামর্শ দেন? তাহাতে তিনি বলিলেন, বাঙ্গালিদের মধ্যে যুবতী মেয়ে যে আপন পিতা মাতাকে ত্যাগ করিয়া দূর দেশে চলিয়া যায়, তাহা প্রায় ভাল বুঝি না। কারণ যুবতীরা অতিশয় চঞ্চলা এবং নির্বোধ হইয়া থাকে, ও দুষ্ট লোকেরা তাহাদিগকে যে পরামর্শ দেয় সেই পরামর্শ মতে চলে। কিন্তু সুন্দরীর প্রতি এই কথা অত্যন্ত অনুপযুক্ত। আমি দুই বৎসর পর্যন্ত তাহার ব্যবহার দেখিতেছি, তাহাতে সম্পূর্ণরূপে জ্ঞাত আছি যে সে ঈশ্বরকে ভয় করিয়া আপনার শক্তির উপরে নির্ভর না দিয়া বার ২ ঘীণ্ডারীষ্টের নিকটে বল ও শিক্ষা যাঞ্চও করে; এই জন্যে বলি তাহাকে যাইতে দেও, তাহার প্রতি কেহই কিছু ক্ষতি করিতে পারিবে না। পাদরী সাহেব আরও বলিলেন, দেখ সুন্দরীর মা, তোমরা দুরবঙ্গ্য আছ, এবং তোমাদের রক্ষার্থে পরমেশ্বর এই উপায় দর্শাইয়াছেন। তুমি কন্যার নিমিত্তে চাকরি অন্বেষণ কর নাই, এবং আমি ও আপনার ভগিনীকে এ বিষয়ে কিছু বলি নাই। অতএব ঈশ্বর আপনি যখন

উপযুক্ত দ্বার খুলিয়া দেন, তখন সে দ্বারে প্রবেশ করা তাঁহার  
ভক্তদের অবশ্য কর্তব্য।

ফুলমণি বলিল, মেম সাহেবে, পাদরী সাহেবের এই কথা  
শুনিয়া আমরা সুন্দরীকে কলিকাতায় পাঠাইতে স্থির করিলাম। পর  
দিবসে ডাক্তর সাহেবের মেম অঙ্গীকার অনুসারে সুন্দরীর এক  
বৎসরের বেতন অগ্রে দিলেন; তদ্বারা আমরা কবিরাজকে বিদায়  
করিয়া আট দিন পর্যন্ত বড় সুখে কাল যাপন করিলাম। কিন্তু  
সুন্দরী কলিকাতায় গেলে পর আমি অত্যন্ত দুঃখিত হইলাম,  
তাহাতে সুন্দরীর পিতা আমাকে বার ২ বলিতেন, ফুলমণি কান্দিও  
না, তুমি ঈশ্বরের অভিমত ক্রিয়া করিলা, ইহাতেই তোমার সান্ত্বনা  
হউক।

যাওনের আট দশ মাস পরে সুন্দরী আপন মেমের সঙ্গে  
একবার ঘরে আসিয়াছিল, তাহাতে দেখিলাম সে সর্ব প্রকারে  
ভাল আছে। তাহার পিতাও একবার কলিকাতায় তাহাকে দেখিতে  
গিয়াছিলেন, এবং পৌষমাসে ডাক্তর সাহেবের মেমের এই স্থানে  
পুনর্বার আসিবার কথা আছে। হায় মেম সাহেব! যদ্যপি আপনি  
সুন্দরীকে দেখেন, তবে অবশ্য তাহাকে ভালবাসিবেন।

ঐ ফুল গাছটি যে নষ্ট হইল, তজ্জন্যে এত খেদ কেন করিলাম,  
তাহাও বলি। সুন্দরী যখন কলিকাতা হইতে ফিরিয়া আসিয়াছিল,  
তখন সেই চারাটি হাতে করিয়া আনিয়া আমাকে বলিল, এই লও  
মা। মেম সাহেবের মালী এই চারাটি আমাকে দিয়াছে; সে এখন  
ছোট চারা বটে, কিন্তু তুমি যদি ইহাকে ভাল করিয়া রাখ, তবে  
ইহাতে ফুল ও পত্রাদি ধরিবে; তাহা হইলে তুমি যীশুরীষ্টের এই  
দয়ালু কথা স্মরণ করিও,—

“অদ্য বর্তমান ও কল্য চুলাতে নিষ্পিণ্ঠ হইবে এমন যে ক্ষেত্রের তৃণ, তাহাকে যদি ঈশ্বর এতাদৃশ্য বিভূষিত করেন, তবে হে অল্প প্রত্যয়িরা, তোমাদিগকে কি বস্ত্র দিবেন না।” ফুলমণি বলিল, এই জন্মে মেম সাহেব, আমি ঐ গাছটিকে বড় প্রিয় জ্ঞান করিতাম, কারণ সে আমার কন্যার নিশান স্বরূপ ছিল; এবং দুঃখের সময়ে তাহা দেখিয়া আমার অনেকবার সান্ত্বনা হইয়াছে, কেননা আমি ভালুকের জানি যে বৃক্ষ ও পুষ্পাদি হইতে ঈশ্বরের লোকেরা তাঁহার সাক্ষাতে বহু মূল্য হয়।

পাঠক বর্গেরা উক্ত কথা পাঠ করত অবগত হইবে, যে আমি এই ধার্মিকা স্ত্রীর চরিত্র সকল শুনিয়া অতিশয় আহুদিত হইলাম, এবং সময় থাকিলে আমাদের অধিক আলাপ হইত; কিন্তু তখন বেলা গিয়াছিল, তাহাতে চাপরাসি আমার আরামের নিমিত্তে ভাবিত হইয়া আসিয়া বলিল; মেম সাহেব আপনকার বিলম্ব দেখিয়া আমি কুঠিতে গিয়া গাড়ী সঙ্গে করিয়া আনিয়াছি, কারণ আপনি অন্ধকারে হাঁটিয়া যাইতে পারিবেন না, এবং এখন ঘোড়া যাইবার নিমিত্তে বড় ব্যস্ত হইতেছে, আর স্থির হয় না। ইহা শুনিয়া ফুলমণির নিকটে কিছু খেদ করিয়া বিদায় হইলাম। আমি যে দুই ঘণ্টা তাহার বাটীতে ছিলাম তাহা অতিশয় আমোদে যাপন করিলাম; তাহাতে আমি পুনর্বার শীত্র আসিব, এই কথা বলিয়া গাড়িতে চড়িলাম।

পথে যাইতে ২ মনের মধ্যে অনেক চিন্তা উপস্থিত হইতে লাগিল। ফুলমণি বিরক্ত প্রতিবাসিদের প্রতি কিরণ কোমল আচরণ করিয়াছিল, তাহা সুরণ করত আমি ভাবিলাম, হায়! এই দরিদ্রা স্ত্রী অপেক্ষা আমার অধিক জ্ঞান আছে বটে, তথাপি আমি

সর্বদা তাহার ন্যায় প্রেম ও সহিষ্ণুতা প্রকাশ করিয়া থাকি কি না, তাহা কহিতে পারিনা। আর যখন ঈশ্বরের প্রতি ফুলমণির দৃঢ় বিশ্বাস ও ভরসা স্মরণ করিলাম, তখন আমার নিজ অবিশ্বাস ও অনর্থক ভাবনা সকল অতিশয় নিষ্পত্তি ও দোষযুক্ত বোধ হইল, তাহাতে আমি লজ্জিতা হইয়া এই প্রার্থনা করিতে লাগিলাম, “হে প্রভো, প্রত্যয় করি, আমার অপ্রত্যয়ের প্রতিকার করুন!” এতদ্বিন্দি আর একটি চিন্তা মনে উপস্থিত হইল, যথা; আমি খ্রীষ্টিয়ান পল্লীতে অল্পকাল ছিলাম বটে; তথাপি ইহার মধ্যে স্পষ্টরূপে বুঝিলাম যে সকল ঘর ফুলমণির ঘরের মত নয়, এবং সকল স্ত্রীলোক তাহার ন্যায় সম্ব্যবহারিণী নহে। ইহাতে আমি ঈশ্বরের স্থানে অতিশয় বিনয় পূর্বক এই প্রার্থনা করিলাম, তে স্বর্গস্থ পিতঃ! আমাকে ধর্ম্মাত্মাতে পূর্ণ করিয়া আমার মনে পাপী লোকদের প্রতি দয়া জন্মাইয়া দেও, তাহাতে এই পল্লীর মধ্যে যতদিন পর্যন্ত একটি অধার্মিক পরিবার বাস করিবে, ততদিন পর্যন্ত তোমার বিষয়ে যেন শিক্ষা দিতে ক্ষমতা না হই।

ঘরে উপস্থিত হইয়া আমি আপন মুসলমানী আয়াকে ডাকিয়া খ্রীষ্টিয়ানদের মধ্যে যাহা ২ দেখিয়াছিলাম, তাহা তাহাকে বিস্তারিত রূপে কহিলাম। তাহাতে আয়া সন্তুষ্টা হইয়া কহিল, আপনি যখন পুনর্বার সেই স্থানে যাইবেন, তখন আমাকে অনুগ্রহ করিয়া লইয়া যাইবেন। আমি তাহাতে স্বীকৃতা হইয়া আপন শয়নাগারে প্রবেশ করিলাম। কিঞ্চিৎকাল পরে অতিশয় ঝড় ও তুফান আরম্ভ হইল। তৎকালে আমার স্বামী পল্লীগ্রামে তাম্বুতে আছেন, ইহা জানিয়া আমি শোকাকুল ও ভাবিতা হইতে লাগিলাম, কিন্তু ঈশ্বরীয় যে বাক্য সুন্দরী আপন মাতাকে স্মরণ করিতে বলিয়াছিল, তাহা

হানা ক্যাথেরিন ম্যালেন্স

আমার মনে পড়িলে আমি তদ্বারা সান্ত্বনা পাইয়া স্বচ্ছন্দে শয়ন  
করিলাম।

## দ্বিতীয় অধ্যায়।

পূর্ব অধ্যায়ের লিখিত ঘটনার দশ বার দিন পরে আমি পুনর্বার ফুলমণির গৃহে যাইতে বাসনা করিলাম। সে দিবস শনিবার, অতএব মনে ভাবিলাম, অদ্য যদি যাই, তবে বোধ হয় আমি ফুলমণির ছেল্যাদের দেখা পাইব; কারণ ফুলমণি আমাকে বলিয়াছিল যে শনিবারে ছেল্যারা বেলা থাকিতে বাটিতে আইসে। ইহা স্মরণ করিয়া আমি আয়াকে ও চাপরাসিকে সঙ্গে করিয়া চলিলাম। চাপরাসির হাতে একটি টবে অতি সুন্দর লালবর্ণ বিলাতি ফুলগাছ ছিল; তাহা চিন গোলাপ চারার পরিবর্তে ফুলমণিকে দিতে মানস করিলাম, কেননা সে ফুল সকলকে কেমন ভালবাসে এবং তাহাদ্বারা কিরূপ উত্তম ২ উপদেশ প্রাপ্তা হয়, ইহা দেখিয়া আমি বড় সন্তুষ্ট হইয়াছিলাম।

ইহা আশ্চর্যের বিষয় বটে, যে কোন ২ শ্রীষ্টিয়ান লোক প্রথিবীর সৌন্দর্য দেখিয়াও তাহারা সৃষ্টিকর্তার বিষয়ে কিছু শিক্ষা করে না, এবং তাঁহার হস্তকৃত কার্য্যের সহিত পারমার্থিক বিষয়ে কিরূপ তুলনা হয় তাহাও বুঝিতে পারেনা। এই কথা দেশস্থ স্ত্রীলোকদের প্রতি বিশেষরূপে খাটিতে পারে, যে হেতুক তাহাদের মধ্যে ঈশ্বরের কর্মের বিষয়ে যাহারা ভাল রূপে মনোনিবেশ করে এমত লোক অত্যল্প পাওয়া যায়। বস্তুতঃ আমি ফুলমণি বিনা এরূপ সৎবিবেচিকা এতদেশীয়া স্ত্রীলোকদের মধ্যে আর কাহাকেও দেখি নাই। সে যাহা হউক, ফুলমণির এইরূপ স্বভাব দেখিয়া বুঝিলাম যে তাহার সহিত আমার উত্তম প্রণয় হইবে, কারণ আমি যে সকল বিষয়ে মনোনিবেশ করিয়া থাকি সে সকলেতে তাহারও মনঃসংযোগ হইয়া থাকে।

অনেক বৎসর অবধি আমি মনের মধ্যে একটি রীতি স্থাপন করয়াছি, যথা; যে সময়ে আমি ক্ষেত্রেতে কিঞ্চিৎ নদীতীরে অথবা বাগানে একাকিনী ভ্রমণ করি, সেই সময়ে কোন দৃষ্টি বস্তু অর্থাৎ বন্য ঘাস কি ফুল কিঞ্চিৎ প্রস্তর ইত্যাদি ইহার মধ্যে কোন একটাকে মনোনীত করিয়া, সে কি প্রকার কার্যে লাগে, এবং সে কেমন সুন্দর, কিঞ্চিৎ তাহার কি ২ গুণ, এই সকলেতে মনোনিবেশ করিয়া তদ্বারা ঈশ্বরের শক্তি ও জ্ঞান ও দয়ার বিষয়ে সুশিক্ষিতা হই। কখন ২ বা সাংসারিক বস্তুর বিষয় ধ্যান করিতে ২ পারমার্থিক বিষয়ে জ্ঞানপ্রাপ্তি হই; ইহার উদাহরণ বলি। আমি যখন বাগানের মধ্যে মালীকে বৃক্ষের ডাল ছাঁটিয়া পরিষ্কার করিতে দেখি, তখন ধর্মপুস্তকে লিখিত এই কথার ভাব ভালুকপে বুঝিতে পারি, যথা; “পরমেশ্বর যাহাকে প্রেম করেন তাহাকেই শান্তি প্রদান করেন, এবং যে প্রত্যেক পুত্রকে গ্রাহ্য করেন তাহাকেই প্রহার করেন।” ইতীয় ১২। ৬। কিঞ্চিৎ “যে সকল শাখাতে ফল ধরে না তা পিতা ছেদন করিয়া ফেলেন, এবং ফলবত্তী শাখা সকলেতে যেন আরও ফল ধরে এই জন্যে পরিষ্কার করেন।” যোহন ১৫। ২।

কখন ২ বা সূর্যকে অন্ত যাইতে দেখিয়া এই বোধ করি, যে সূর্যের সহিত সত্য খ্রীষ্টিয়ান লোকের মৃত্যুর তুলনা দেওয়া যায়; ফলতঃ যেমন নির্মল দিবসে সূর্য সমস্ত দিন অতিশয় তেজ প্রকাশ করিলে অন্ত হওনের সময়ে তাহাতে প্রায় কেহই মনোযোগ করে না; তেমনি কোন খ্রীষ্টিয়ান লোকেরা যাবৎ জীবন ঈশ্বরের সেবাতে ও মনুষ্যদের হিতার্থে কাল ক্ষেপণ করিয়া মৃত্যুর সময়ে বড় একটা সাহস ও জয় প্রকাশ করিতে না পারিয়া কেবল সুস্থিররূপে আপন ২ আত্মা প্রভুর হস্তে সমর্পণ করে। তাহারা

“সান্ত্বনাতে কাল ক্ষেপে, সান্ত্বনাতে মরে”,

সুতরাং নির্মল দিনের সূর্যাস্তের ন্যায় অনেকেই তাদের মরণেতে বড় মনোযোগ করে না। আর সূর্য কখন ২ দিনের মধ্যে অনেকবার মেঘ দ্বারা আচ্ছাদিত হইলেও সন্ধ্যার সময়ে মেঘ হইতে বাহির হইয়া অতিশয় উজ্জ্বল রূপে অস্তগত হয়, তদ্বপেই কোন ২ খ্রীষ্টিয়ানেরা অনেকবার পরীক্ষাতে পতিত হয়, এবং ধর্মেতে বড় একটা সান্ত্বনা না পাইয়া মনের দুঃখ প্রযুক্ত চিন্তাতে কাল যাপন করে; কিন্তু নিদান সময়ে তাহাদের মেঘরূপ দুঃখ সকল উচ্ছিন্ন হইলে তাহারা অতিশয় সাহস ও আহ্লাদযুক্ত হইয়া দেহত্যাগ করে। পুনশ্চ বর্ষাকালে যেমন সূর্য সমস্ত দিবস মেঘ দ্বারা ঢাকা থাকে, এবং মেঘাচ্ছন্ন হইয়া অস্তগত হয়; তেমনি কতকগুলিন খ্রীষ্টান লোক আছে, তাহারা ঈশ্঵রের গুণ্ঠ সন্তান হইয়াও স্বাভাবিক ভীরুৎপ্রযুক্তি কিম্বা আর কোন কারণবশতঃ জীবনাবস্থায় আপন ধর্ম বড় প্রকাশ করে না বটে; কিন্তু সর্বান্তর্যামি প্রভু তাহাদের মনের অভিপ্রায় জানেন ও তাহাদের নাম জীবন পুস্তকে লিখিয়া রাখেন। ফলতঃ সূর্য যে রূপে অস্ত হউক না কেন, সে যেমন পুনর্বার অবশ্য উদিত হয়, সেইরূপে উক্ত প্রকার খ্রীষ্টাশ্রিত লোকসকলের যে পুনরুত্থান হইবে, ইহাতে সন্দেহ নাই।

ফুলমণির গৃহে গমনকালে নদীর তীর দিয়া যাইতে হইল, তাহাতে আমি সেই নদীর বিষয় উক্তরূপে ধ্যান করিতে করিতে চলিলাম। মনোমধ্যে এই প্রকার ভাবিলাম; যেমন গঙ্গা অত্যুচ্চ হিমালয় পর্বত হইতে নামিয়া আসিতেছে, তেমনি ধর্মাত্মা স্বর্গ হইতে নামিয়া মনুষ্যদের মনে অবস্থিতি করেন। নদীর উন্মুক্ত যেমন কখন শুক্ষ হয় না, সেই মত ঐ আত্মা মানুষের অস্তঃকরণে

উনুইস্বরূপ হইয়া অনন্ত পরমায়ু পর্যন্ত উথলিয়া উঠেন। নদীর জল দ্বারা শরীর পরিষ্কার হয় বটে, কিন্তু তাহা অন্তঃকরণেতে কিছু মাত্র সংলগ্ন হয় না, অতএব তাহাতে স্নান করিলে মনুষ্যদের পাপরূপ মলিনত্ব ধোত হয় না; কিন্তু অন্তর্যামি পরিত্র আত্মা সর্বপ্রকার পাপ মনুষ্যদের অন্তঃকরণ হইতে পরিষ্কৃত করেন। পুনশ্চ নদীর জল দ্বারা যেমন ভূমি উর্বরা হয়, তেমনি ধর্মাত্মাদ্বারা শ্রীষ্টিয়ান লোকদের ধর্মাক্ষেত্র উর্বরা হইয়া সৎকর্মরূপ ফল উৎপন্ন করে। আরও যাহার ইচ্ছা হয় সে যেমন আসিয়া নদীর জল স্বচ্ছন্দে পান করিতে পারে তদ্বপে যে জন তৃষ্ণার্ত হয় এবং যে কেহ ইচ্ছা করে সে আসিয়া বিনামূল্যে অমৃত জল গ্রহণ করুক। কোটি ২ মনুষ্যের ও পশ্যাদির জীবন গঙ্গাজল দ্বারা যেমন রক্ষা পায়, তেমনি পাপেতে মৃতপ্রায় যে আমরা, আমরা ধর্মাত্মাদ্বারা পরমায়ু প্রাপ্ত হই। গঙ্গার স্রোত যেমন বাধা সকল উল্লজ্জন করিয়া বেগবান হয়, তেমনি মনুষ্যদের অন্তঃকরণে যে মহা বাধা (অর্থাৎ পাপের প্রতি অনুরাগ) তাহা ধর্মাত্মা দমন করিয়া মনকে ঈশ্বরের বশীভূত করান। অবশ্যে, যেমন নদীর স্রোত কিছুতে বাধিত না হইয়া মহাসাগরে গিয়া মিলিত হয়, তেমনি ধর্মাত্মা মনুষ্যদের অন্তঃকরণে ধর্মসিদ্ধি করিয়া অনন্ত পরমায়ুরূপ সুখসাগরে তাহাদিগকে পৌছিয়া দেন।

উক্ত বিষয় আন্দোলন করত চলিতে ২ আমার পথশ্রম কিছুই বোধ হইল না, তাহাতে আমি প্রায় অজ্ঞাতসারে ফুলমণির গৃহে উপস্থিত হইলাম। পৌছিবামাত্র দুইটি ছেল্যা দৌড়িয়া আসিয়া আমাকে দ্বার খুলিয়া দিল। পরে তাহারা সেলাম করিয়া গৃহের মধ্যে শীত্র গিয়া আপন মাতাকে ডাকিতে লাগিল। ফুলমণি পূর্বে যেরূপ আমাকে চৌকি আনিয়া দিয়াছিল, সে রূপে তাহার কন্যাও চৌকি আনিয়া দিয়া আমার নিকটে দাঁড়াইল। বোধ হইল

তৎকালে ঐ মেয়ার বয়ক্রম সাত বৎসর মাত্র। তাহার মুখ গোল আর অতিশয় প্রফুল্ল ও হষ্ট ছিল, এবং তাহার সুন্দর লস্বা কেশ উত্তমরূপে বাঁধা ছিল। আমি তাহার সুশীল ব্যবহার দেখিয়া অত্যন্ত সন্তুষ্ট হইলাম; কারণ সে অন্য গ্রামস্থ বাঙালী বালিকাদের ন্যায় পলায়ন না করিয়া আমার আয়াকে একটি পিঁড়া আনিয়া দিয়া শিষ্টরূপে আমাদের সহিত আলাপ করিতে লাগিল।

আমি তাহাকে জিজ্ঞাসা করিলাম, তোমার নাম কি? তাহাতে সে বলিল, আমার নাম সত্যবতী, এবং আমি সর্বদা সত্য কথা কহিতে চেষ্টা করি। ইহা শুনিয়া আমি বলিলাম, সত্যবতী অতিশয় সুন্দর নাম বটে, কিন্তু তোমার নামের সহিত যেন তোমার কথা মিলে, কেবল এই জন্যে কি তুমি সত্য কথা কহিয়া থাক? সে হাসিতে ২ বলিল, না না, মেম সাহেব, এমত নয়। ঈশ্বর আমাদিগকে সত্য কথা কহিতে আজ্ঞা দিয়াছেন, এই জন্যে আমি সত্য কথা কহিয়া থাকি। তিনি বলিয়াছেন, “তাবৎ মিথ্যাবাদিরা অগ্নি ও গন্ধকের প্রজ্বলিত হৃদে নিক্ষিপ্ত হইবে।” প্রকাশিত ভবিষ্যদ্বাক্য। ২১। ৮।

আমি জিজ্ঞাসা করিলাম, ধর্মপুস্তকের ঐ কথাটি তোমাকে কে শিখাইল? সত্যবতী উত্তর করিল, পিতা শিখাইয়াছেন। রাত্রিকালে আমাদের আহার হইলে তিনি নিত্য ২ আমাদিগকে ধর্মপুস্তকের দুই একটি পদ শিখাইয়া স্পষ্টরূপে বুঝাইয়া দেন। বোধ হয়, সত্যতার বিষয়ে যত পদ আছে, সে সকল আমি মুখস্থ বলিতে পারি; এবং ঐ সকলের মধ্যে এই পদটি বড় ভালবাসি, “আমিই পথ ও সত্যতা ও জীবন।” যীশুর্খীষ্ট ইহা বলিলেন; এবং তাহার অর্থ পিতা আমাকে গত রবিবারে বুঝাইয়া দিয়াছেন। মেম সাহেব,

আমরা যদি খীঁষকে ছাড়িয়া অন্য পথে চলি, তবে স্বর্গে না  
পৌঁছিয়া নরকে পড়িব।

ঐ ছোট বালিকা এই কথা বলাতে তাহার ভাই ঘরের ভিতর  
হইতে বাহিরে আসিয়া কহিল, মেম সাহেব, মা ঘর লেপন  
করিতেছেন, তাহা সমাপন করিয়া এখনই আসিবেন, কেবল  
একটি কুঠারী লেপন করিতে বাকী আছে। আমি বলিলাম, তোমার  
মাতা সকল কর্ম্ম সঙ্গ করিয়া আইলে উত্তম হয়; কিন্তু তোমার নাম  
কি? তাহা আমাকে বল।

বালক উত্তর করিল, আমার নাম সাধু। সাধু আপন ভগিনী  
হইতে দুই তিন বৎসরের বড়, এবং তাহার মুখাবলোকন করিয়া  
অনুমান হইল সে বুদ্ধিমান বালক বটে।

তখন সত্যবতী বলিতে লাগিল, মেম সাহেব, আমি যেরূপ  
সত্যতার বিষয়ে ধর্মপুস্তকের সকল প্রমাণ অভ্যাস করিয়াছি,  
সেইরূপে দাদা সাধুতার বিষয় সকল কথা শিক্ষিত হইয়াছেন।  
পাদরী সাহেবের মেম আমাদিগকে অদ্য বলিলেন, সাধুতা ও  
সত্যতা সর্বদাই ভাই ও ভগিনীস্বরূপ বিখ্যাত হয়, তাহাদিগকে  
কোন মতে পৃথক করা যায় না। আহা, আমরা দুইজনে অত্যন্তম  
নাম পাইয়াছি। ইহা বলিয়া সে উঠানের মধ্যে লম্ফ দিয়া  
বেড়াইতে লাগিল।

ইহার পূর্বে আমি অনেক বাঙালির ছেল্যাদিগকে  
দেখিয়াছিলাম বটে, কিন্তু এমত সুমতি ও মিষ্টভাষী কাহাকেও  
দেখি নাই। তাহাতে আমার চক্ষু জলেতে পরিপূর্ণ হইল, এবং “হে  
পিতঃ, তুমি বালক ও দুঃখপোষ্য শিশুদের মুখদ্বারা আপন স্তব

প্রকাশ করিয়াছ, এই জন্যে তোমার ধন্যবাদ করিতেছি”, এই শাস্ত্রীয় কথা আমার মনে তৎক্ষণাৎ উদয় হইল। কিন্তু সাধু ও সত্যবতী আমার অশ্রুজল না দেখিয়া যে পর্যন্ত তাহাদের মাতা না আইসে সেই পর্যন্ত আমি যাহাতে সন্তুষ্ট থাকি, কেবল এই চেষ্টা করিতে লাগিল।

সাধু আমাকে বলিল, মেম সাহেব, ঐ দৃষ্টা করুণা যে দিনে দিদির গাছটি নষ্ট করিল, বোধ করি সেই দিনে আপনি আসিয়াছিলেন। মাতা আপনকার বিষয়ে আমাদিগের নিকটে অনেক কথা বলিয়াছেন, এবং আপনিও আমার দিদির সমুদয় বৃত্তান্ত শুনিয়া থাকিবেন।

আমি বলিলাম, হাঁ, আমি তাহা শুনিয়া অতিশয় সন্তুষ্ট হইয়াছিলাম, এই জন্যে তাহার গাছটির পরিবর্তে আর একটি বিলাতীয় ফুলের চারা তোমার মাকে দিবার নিমিত্তে আনিয়াছি। এই কথা বলিয়া আমি চাপরাসিকে ভিতরে ডাকিয়া তাহার হাত হইতে ফুলের চারা লইয়া তাহাদিগকে দেখাইলাম, তাহাতে দুইজনে বড় সন্তুষ্ট হইয়া ফুলের অতিশয় প্রশংসা করিল।

পরে সাধু বলিল, আইস সত্যবতী, আমরা দিদির শুক্ষ গাছটি ফেলিয়া দিয়া তাহার স্থানে এই টুবটি রাখি, তাহা হইলে ইহা কোথা হইতে আইল তাহা সবিশেষ না জানিয়া মাতা বড় আশ্চর্য্যাবিতা হইবেন।

সত্যবতী উত্তর করিল, না না, সাধু, বিবি সাহেব যে চারা আনিয়েছেন তাহা অন্য টবের নিকটে রাখ; কিন্তু দিদির চারাটি কখন ফেলিয়া দেওয়া হইবেক না, কারণ মা তাহাকে বাঁচাইবার

নিমিত্তে বড় চেষ্টা করিতেছেন, এবং আজি আমাদের পিতাকে  
বলিলেন, যদ্যপি এইটি শুক্ষ হইয়া থাকে, তথাপি আমি তাহাকে  
চিরকাল রাখিব, কেননা ইহার শুক্ষ শাখা দ্বারা আমার মনের  
চেতনা হইবে।

সাধু জিজ্ঞাসা করিল, সে কি প্রকারে হইবে, মা কি তাহা  
বলিয়াছিলেন?

সত্যবতী কহিল, হাঁ, মাতা বলিলেন, ঐ শুক্ষ গাছটিকে দেখিয়া  
পাপ করিতে আমার মনে ভয় জনিবে, পাছে আমি শুক্ষ  
শাখাস্বরূপ হইয়া অনির্বাণ অগ্নিতে দণ্ডা হই। ইহা শুনিয়া সাধু  
অতি গভীর হইয়া বলিল তবে সত্যবতী, দিদির চারাটি থাকুক;  
এই ভয়ানক উপদেশ আমাদেরও মনে রাখা কর্তব্য, কারণ তুমি  
এবং আমি অনেকবার দোষ করিয়া থাকি।

অতঃপর সত্যবতী উঠিয়া আয়াকে ডাকিয়া রঞ্জনঘরে লইয়া  
গেল। পরে আমি সাধুকে বলিলাম, গতবারে এমত সন্ধ্যার সময়ে  
আমি আসিয়াছিলাম তাহাতে দেখিলাম যে তোমার মাতার সকল  
কর্ম সারা হইয়াছিল। অদ্য সে কি নিমিত্তে এত ব্যস্তা আছে?

সাধু উত্তর করিল, মেম সাহেব, আজি শনিবার, এই নিমিত্তে  
মাতা ব্যস্তা আছেন। সপ্তাহের শেষদিনে তাঁহাকে সর্বদাই অনেক  
কর্ম করিতে হয়, কারণ রবিবারে প্রায় কোন কর্মই করেন না।  
আজি আমরা দুই প্রহরের সময়ে স্কুল হইতে ফিরিয়া  
আসিয়াছিলাম; ইহারি মধ্যে মাতা কি ২ কর্ম করিয়াছেন, তাহা  
আমি বলি। প্রথমে তিনি সত্যবতীকে পুক্ষরিণীতে লইয়া  
বেসনদ্বারা মাথা ঘসিয়া দিলেন; পরে গৃহে আসিবার সময়ে

আমাদের ধৌত বস্ত্র আনিবার জন্যে ধোপার নিকটে গেলেন। অনন্তর গৃহে আসিয়া মাতা দেখিলেন, পিতার চাদর ও আমার জামা ছিঁড়িয়া গিয়াছে, অতএব পরদিনে গীর্জায় যাইতে হইবে, এই নিমিত্তে তিনি সেই কাপড়গুলিকে তৎক্ষণাত্ম সিলাই করিলেন। তাহা হইলে পর মাতা সত্যবতীর মাথায় তেল দিয়া চুল সকল উত্তমরূপে বাঁধিয়া দিলেন। পরে উঠান ঝাঁটি দিয়া গৃহ লেপন করিতে আরস্ত করিলেন, সে কর্ম এখনও শেষ হয় নাই। পিতা কখন ২ মাতাকে বলেন শনিবারে অনেক কর্ম হয়, এইজন্যে আর কোন দিনে গৃহ লেপন করাই ভাল; কিন্তু মাতা শনিবারে তাহা করিতে চাহেন, কেননা রবিবারে গীর্জার পরে কতকগুলি পুরুষ এখানে আসিয়া দাবায় বসিয়া পাদরী সাহেবের উপদেশ কথার ভাব পরম্পর বিবেচনা করে, ও দুই একটি গান গায়, পরে জলপানাদি করিয়া বিদায় হয়। ঐ লোকেরা যেন সকলি পরিষ্কার ও পরিপাটি দেখিতে পায়, এই অভিপ্রায়ে মাতা শনিবারে তাবৎ ঘর লেপন করেন; কেননা তিনি বলিয়া থাকেন, ভাল গৃহিণী হওয়া শ্রীষ্টিয়ান স্ত্রীলোকদের অবশ্য কর্তব্য।

এমন সময়ে ফুলমণি আপনি উপস্থিতা হইল, তাহাতে সাধু সত্যবতীর নিকটে রঞ্জনশালায় গেল। ফুলমণির শাড়ি পূর্বাপেক্ষা কিছু মলিন ছিল, এবং বোধ হইল সে তখন বড় শ্রান্তা হইয়াছে, তথাপি সে আমাকে সেলাম করিয়া হস্তচিত্তে বলিল; মেম সাহেব, আজি যদি শনিবার না হইত তবে আমি সকল কর্ম ছাড়িয়া আপনকার নিকটে আসিতাম; কিন্তু আপনি জানেন যে শনিবারে কর্ম সমাপ্ত না করলেই নয়।

আমি বলিলাম, হাঁ ফুলমণি, এ অতিশয় ভাল রীতি বটে, এই রীতি পালন করিলে রবিবারে ঈশ্বরের আজ্ঞানুসারে বিশ্রাম করা

যায়। এখন সত্য করিয়া বল, তোমার সমস্ত কার্য্য শেষ হইয়াছে কি না? যদি না হইয়া থাকে, তবে আমি অন্য দিন আসিয়া তোমার সহিত কথোপকথন করিব। এখন তুমি যাইয়া কর্ম কর, এবং তোমার সন্তানদিগকে আমার নিকটে পুনর্বার পাঠাইয়া দেও। আমি তাহাদের কথা শুনিয়া অতিশয় সন্তুষ্টা হইয়াছি।

ফুলমণি বলিল, আপনি যদি অনুমতি দিলেন, তবে তাহাই করিব; কারণ কল্যের নিমিত্তে এখন ব্যঙ্গন রঞ্চন হয় নাই।

আমি জিজ্ঞাসিলাম, তুমি কল্যের জন্যে কি ব্যঙ্গন পর্যন্ত আজি রাঁধিয়া রাখিবা?

ফুলমণি বলিল, হাঁ মেম সাহেব, যে কর্ম শনিবারে করা যায়, তাহা ফেলিয়া রাখিব কেন? আমরা প্রত্যেক শনিবারে কিছু মাংস বা মৎস কিনিয়া রাখি, এবং শীতকাল প্রযুক্ত তাহা একদিন রঞ্চন করিলে পর দিবস পর্যন্ত ভাল থাকে। গ্রীষ্মকালে তাহা করা যায় না; অতএব সে সময়ে কেবল শাক ডালাদি শনিবারে কিনিয়া রাখিতে হয়। আর কি করিব? রবিবারে রাঁধিয়া দিই, কিন্তু সেদিনে বাজার হাট আমরা কোনরূপে করি না।

ইহা বলিয়া ফুলমণি রঞ্চন গৃহে যাইতেছিল, এমন সময়ে তাহার দৃষ্টি আমার বিলাতীয় ফুলচারাটির উপরে পড়িল; তাহাতে সে আমার প্রতি ফিরিয়া বলিল, সেলাম মেম সাহেব, বোধ করি আপনি এই সুন্দর ফুল গাছটি আমাকে আনিয়া দিয়াছেন। আহা! সলেমান এত ঐশ্বর্যবান् হইলেও ইহার ন্যায় বিভূষিত ছিলেন না। ইহা বলিয়া সে যাইয়া আয়াকে ও ছেল্যাদিগকে আমার নিকটে পাঠাইয়া দিল।

তাহারা আসিবামাত্র আয়া বলিতে লাগিল, মেম সাহেব, এই ছেল্যারা আমাকে খ্রীষ্টিয়ান করিতে চেষ্টা করিতেছিল তাহাতে আমি ছেল্যাদের প্রতি ফিরিয়া হাসিয়া বলিলাম, তোমরা আমার আয়াকে কি করিলা? বোধ করি ইহাকে তোমাদের কিঞ্চিৎ সুব্যঙ্গন জোর করিয়া খাওয়াইতে চাহিয়াছিলা?

আয়া বলিল, না না, মেম সাহেব, ইহারা সেরূপ ব্যবহার করে নাই; বরং একটি নৃতন ছকা আনিয়া তাহাতে তামাক সাজিয়া আমাকে খাইতে দিল, আর খ্রীষ্টিয়ানদের শাস্ত্র হইতে অত্যুত্তম কথা বলিয়া তাহা আমাকে স্পষ্টরূপে বুঝাইয়া দিয়াছে।

তখন আয়া সত্যবতীর প্রতি ফিরিয়া বলিল, সত্যবতী, তুমি যে কথা আমার সাক্ষাতে বলিলা, তাহা আমার মেম সাহেবকে বল দেখি, তিনি একবার শুনুন।

তাহাতে সত্যবতী কহিল, মেম সাহেব, আয়া এই কথাটি শুনিয়া বড় সন্তুষ্টা হইল, যথা, “মিত্রদের নিমিত্তে আপনার প্রাণ দান পর্য্যন্ত যে প্রেম তদপেক্ষা আর বড় প্রেম কাহারো নাই;” আর “যে ২ আজগা আমি দিতেছি তাহা যদি পালন কর, তবে তোমরাই আমার মিত্রগণ।”

যীশুখ্রীষ্ট কি প্রকারে পাপী লোকদের প্রায়শিত্ব করিলেন; আয়া তাহা আমার নিকটে অনেকবার শুনিয়াছিল, তথাপি তাহাতে বড় একটা মনোযোগ করে নাই; কিন্তু এখন ঐ কথা শিশুদের মুখে শুনিয়া সে চিন্তিতা ও গন্তীর হইয়া বসিল, তাহাতে বোধ হইল যে খ্রীষ্টের উক্ত বচন তাহার মনে দৃঢ়রূপে লাগিয়াছিল। আমি

দেখিলাম তাহার চক্ষু জলেতে ছল্ ২ করিতেছে, কিন্তু সে আপনার কোন কথা বলিতে না পারিয়া আমাকে বলিল, মেম সাহেব, আপনি এই ছেল্যাদের সহিত ধর্ম বিষয়ে কথোপকথন করুন।

সপ্তাহের শেষ দিনে এই ধার্মিক পরিবার যেরূপ ব্যবহার করিত, তাহা জ্ঞাত হইয়া আমি বড় সন্তুষ্ট হইয়াছিলাম, অতএব তাহারা কি প্রকারে রবিবার পালন করে ইহাও শুনিতে বড় ইচ্ছুক হইলাম। এই জন্যে আমি সাধুকে বলিলাম, সাধু, বিশ্রামদিনে প্রাতঃকালাবধি সন্ধ্যা পর্যন্ত তোমরা কি করিয়া থাক, তাহা আমাকে বল।

সাধু উত্তর করিল, মেম সাহেব, যদি প্রথম অবধি শুনিতে চাহেন, তবে অগ্রে শনিবারের রাত্রির কথা বলিতে হয়; কেননা পিতা কহিয়া থাকেন, শনিবার রাত্রিতে আমাদের বিশ্রাম দিবসের আরম্ভ হয়। শনিবারে সন্ধ্যাকালে মাতার তাবৎ কর্ম সাঙ্গ হইলে পর, আমরা সকলে বসিয়া কএকটি গান গাই। পরে পিতা উশ্বরের স্থানে এইরূপ প্রার্থনা করেন, হে পরমেশ্বর, তুমি আপন বাক্য ফলবান কর, ও লোকেরা কল্য যে ২ উপদেশ কথা শুনিবে, তাহা তাহাদের মনে দৃঢ়রূপে রোপিত করিয়া দেও। এবং বিশেষ রূপে আমাদের পাদরী সাহেবের প্রতি প্রসন্ন হও, ও আমাদের মণ্ডলীর প্রতি আশীর্বাদ কর।

মাতা রবিবারে অতি প্রত্যয়ে ভাত রাঁধিয়া দেন পরে আমাদের খাওয়া হইলে পর পিতা পুনর্বার প্রার্থনা করেন। তখন আমরা সকলে পরিষ্কার কাপড় পরিয়া দ্বারে চাবি দিয়া গীর্জাতে যাই। গীর্জা সাঙ্গ হইলে পর, যেমন পূর্বে বলিয়াছিলাম, কএক জন পুরুষ হেথায় উপদেশের বিষয়ে কথোপকথন করিতে আইসে।

এমত সময়ে সত্যবতী এবং আমি ধর্মপুস্তকের একটি পদ আর একটি গান অভ্যাস করি। সকল লোক গৃহে গেলে পরে, পিতা আমাদের পড়া শুনেন, ও ধর্মপুস্তকের কথা বড় স্পষ্টরূপে বুৰাইয়া দেন; অথবা ঘূষফ বা দানিয়েল কিঞ্চিৎ শিমুয়েল ইত্যাদির ইতিহাস বলেন। এই জন্যে আমরা রবিবারকে অন্য সকল দিবস হইতে অতিশয় প্রিয় জ্ঞান করি।

তখন আমি এই কথা শুনিয়া মনের মধ্যে ভাবিলাম, হায়! বাঙালাদেশে যদ্যপি এই পরিবারের মত সকল খ্রীষ্টিয়ান লোক ধার্মিক হইত, তবে দেব পূজকদের মধ্যে, আমাদের ধর্ম অবশ্য সুগ্রাহ্য হইতে পারিত। কিন্তু দুঃখের বিষয় এই, যে অনেক ভক্ত খ্রীষ্টিয়ান লোকেরা হিন্দু ও মুসলমানদের ন্যায় মন্দ আচার ব্যবহার করিয়া খ্রীষ্টের নামে কলঙ্ক দেয়।

পরে আমি সত্যবতীর প্রতি ফিরিয়া বলিলাম, ভাল সত্যবতী, পড়া সাঙ্গ হইলে তোমরা রবিবারে আর কি ২ কর, তাহা তুমি আমাকে বল।

সে উত্তর করিল, পাঁচ ঘণ্টার সময়ে পিতা ও ভাতা পুনর্বার গীর্জায় যান, কিন্তু মাতা গৃহে থাকিয়া অন্য পাক করেন। পরে আমি আপন ছোট ভাই প্রিয়নাথকে লইয়া বেড়াই; সে আমাকে বড় ভালবাসে, এবং আমাকে দেখিয়া করতালি দেয়। পিতা গীর্জা হইতে সাত ঘণ্টার সময়ে আইসেন, পরে তোজনাদি সাঙ্গ হইলে আমরা আরবার গান গাই, কিঞ্চিৎ দাদা যাত্রিকের যাত্রাপুস্তক পড়েন, আমরা সকলে বসিয়া শুনি। শেষে প্রার্থনা করিয়া শয়ন করিতে যাই।

ইহা শুনিয়া আমি বলিলাম, ভাল তোমাদের পিতা তোমাদিগকে ধর্মের বিষয়ে কিরূপে শিক্ষা দেন, আমি তাহা জানিতে বড় ইচ্ছুক আছি; অতএব এই স্থানে যদি কোন রবিবারে তাহা শুনিতে আইসি, তবে কি তিনি অসম্ভুষ্ট হইবেন?

সাধু বলিল, না মেম সাহেব, পিতা তাহাতে বড় আহুদিত হইবেন; কিন্তু বোধ হয়, আপনার সাক্ষাতে আমাদিগকে পড়াইবেন না। আপনি যেন আমাদিগকে শিক্ষা দেন, তিনি এমত প্রার্থনা করিবেন, আমি তাহা নিশ্চয় জানি।

সত্যবতী বলিল, ও দাদা! তাহা হইলে বড় উত্তম হয়। পরে সে আমার প্রতি চাহিয়া কহিল, আপনি বড় ভাল বিবি; আমি আপনার নিকটে একবার পড়া দিতে চাহি, কিন্তু তাহা কি প্রকারে হইবে? আপনি তো বাঙালা পড়িতে পারেন না।

তাহাতে আমি হাসিয়া জিজ্ঞাসিলাম, হাঁ সত্যবতী, এমত কথা তোমাকে কে বলিল? যদি তোমা অপেক্ষা আমি ভাল পড়িতে পারি, তবে কি হয়?

সত্যবতী এই কথাতে কিঞ্চিৎ লজ্জিতা হইয়া উত্তর করিল, আমি মনে করিয়াছিলাম যে কেবল পাদরীদের বিবিরাই বাঙালা পড়া শিক্ষা করেন, কিন্তু আপনি তো পাদরীর বিবি নহেন।

আমি বলিলাম, এ কথা সত্য বটে, কিন্তু যদ্যপি পাদরীর মেম নহি তথাপি আমি বাঙালিদিগকে বড় দয়া করি, এবং যেন তাহাদিগকে শিক্ষা দিতে পারি এই জন্যে অতিশ্রমপূর্বক বাঙালি ভাষা শিক্ষা করিয়াছি। অতএব তুমি যেমন ইচ্ছা করিলা, তেমনি আমি একদিন আসিয়া তোমার পাঠ শুনিব। তখন আমি কেমন

পণ্ডিত, তাহা তুমি জানিতে পারিবে। কিন্তু বড় বিলম্ব হইল, এখন আমাকে গৃহে যাইতে হইবে; ইহা বলিয়া আমি শিশুদের হাতে একটি ২ সিকি দিলাম, তাহাতে তাহারা বড় সন্তুষ্ট হইয়া গ্রামের সকল কুকুর তাড়াইয়া দিতে ২ প্রান্তভাগ পর্যন্ত আমাকে রাখিয়া গেল।

সেই রাত্রিতে আমি শয়নকালে এমত প্রার্থনা করিলাম; ওহে পরমেশ্বর! প্রভুর দিনেতে আমি আত্মাতে অবিষ্টা হইয়া যেন উঠি, আমার প্রতি এই অনুগ্রহ কর। এবং যতদিন পর্যন্ত স্বর্গের অক্ষয় সুখ ভোগ করিতে না পাই, ততদিন পর্যন্ত এই সংসারে বিশ্রাম দিবস উত্তমরূপে পালন করিতে আমাকে শক্তি দেও।

## তৃতীয় অধ্যায়।

পর দিবস প্রত্যুষে আয়া আসিয়া আমাকে এই সমাচার দিল; মেম সাহেব, খ্রিষ্টিয়ানদের পল্লী হইতে একজন স্ত্রীলোক আসিয়া বলিতেছে, মেমের নিকটে আমার একটি নিবেদন আছে। কিন্তু মেম সাহেব যে খ্রিষ্টিয়ান লোকদিগকে কল্য দেখিয়াছিলেন, এ ব্যক্তি তাহাদের মত নয়। এতো বড় ময়লা ছেঁড়া কাপড় পরিয়া আসিয়াছে, এই জন্যে তাহাকে ভিতরে না আনিয়া বারাণ্ডায় বসিতে বলিয়াছি। আমি আয়াকে কহিলাম, ভাল করিলা, আমি তথায় গিয়া তাহার সহিত কথা কহিব। পরে বারাণ্ডায় উপস্থিত হইয়া দেখিলাম, যে স্ত্রীলোকের সঙ্গে ফুলমণির গৃহে প্রথমবার সাক্ষাৎ হইয়াছিল, সেই বসিয়া আছে।

করুণা আমাকে অন্বেষণ করিতেছে ইহা দেখিয়া আমি প্রথমে আশ্চর্য জ্ঞান করিলাম, কিন্তু শেষে শুনিলাম যে সাধু ও সত্যবর্তী আহুদ প্রযুক্ত আমার দক্ষ দুই সিকি পাড়ার মধ্যে সকল লোককে দেখাইয়াছিল, তাহাতে করুণা মনে করিল, আমি যদি মেম সাহেবের নিকটে গিয়া দুঃখ জানাই, তবে অবশ্য কিছু পাইব। এমত মনে ভাবিয়া সে আমাকে দেখিবামাত্র বড় কাঁদিয়া কহিতে লাগিল, মেম সাহেব, আপনি দুঃখি লোকদের মা বাপ, আপনি আমাদের আশ্রয়, আপনি ব্যতিরিকে জগতে আমাদের আর কেহ নাই। দেখুন আপনি কল্য ধনী লোকের ছেল্যাদের প্রতি দয়া করিলেন; আমি দীন দুঃখি লোক অতএব আমার প্রতিও কিছু মনোযোগ করিতে হইবে।

করুণার এই সকল দুঃখের কথা শুনিয়া আমিও দুঃখিতা হইলাম; কিন্তু ফুলমণির সহিত পূর্বে তাহার যে কথা হইয়াছিল,

তাহা স্মরণ করিয়া অনুমান করিলাম, করুণা অবশ্য অলসা স্ত্রী, এবং আপন দোষ প্রযুক্ত সে এরূপ দুর্দশাতে পতিত হইয়াছে। আরও ভাবিলাম যদি আমি এখন বিবেচনা না করিয়া এবং বিশেষ না জানিয়া এই খ্রীষ্টিয়ান লোকদের টাকা দিতে আরম্ভ করি, তবে তাহাদের উপকার না হইয়া বরং ক্ষতি হইবে; কারণ তদ্বারা তাহাদের মধ্যে হিংসা ও লোভ অবশ্য জনিতে পারিবে।

ইহা বুঝিয়া আমি করুণাকে বলিলাম, দেখ করুণা, তুমি যে এই স্থানে রবিবারে এমত মলিন কাপড় পরিয়া আসিয়াছ, ইহাতে আমি বড় অসন্তুষ্ট হইলাম, কারণ এখন গীর্জা যাইবার জন্যে প্রস্তুত হওয়া তোমার উচিত ছিল। আরও বলি, প্রতিবাসিদের নিকটে তোমার আচার ব্যবহারের বিষয়ে তত্ত্ব না করিলে আমি তোমাকে কিছু ভিক্ষা দিতে পারিব না।

করুণা এই কথা শুনিয়া আর একবার কাঁদিয়া বলিতে লাগিল; ও মেম সাহেব, আমি বড় দুঃখি লোক, আমার স্বামী আছে বটে, কিন্তু সে দুষ্ট ও মাতাল। যদ্যপি সে ছুতার মিস্ত্রির কর্মেতে বড় নিপুণ, এবং কর্ম করিলে প্রতিদিন স্বচ্ছন্দে চারি আনা পয়সা উপায় করিতে পারে, তথাপি সে এমত অলস যে আমাকে কখন কিছু আনিয়া দেয় না। আর দেখ, মেম সাহেব, আপনি যদি ময়লা কাপড়ের বিষয়ে দোষ দেন, তবে বলিতে হয়, এই বন্ধু ব্যতিরেকে আমার কেবল একখান মোটা শাড়ি আছে, সেখানি পয়সা না থাকাতে প্রায় এক মাস পর্যন্ত ধোপার ঘরে পড়িয়া আছে।

তখন আমি এই কথা শুনিয়া বলিলাম, করুণা, তুমি যদি একটি পয়সার অভাব প্রযুক্ত পরিষ্কার কাপড় পরিতে পাও না, তবে আমি সে পয়সাটি তোমাকে দিই। তুমি ধোপার নিকটে গিয়া

ধৌত শাড়ি পরিয়া শীত্র গীর্জায় যাও। কিন্তু করুণার মুখ দেখিয়া বোধ করিলাম, তাহার গীর্জায় যাইবার ইচ্ছা ছিল না। সে পয়সাটি হাতে করিয়া বলিতে লাগিল, ও বিবি সাহেব, দয়া করিয়া আমাকে আর কিছু দেও। ঘরেতে আমার একটি সন্তান বড় পীড়িত আছে, এবং তাহাকে কোন খাদ্যদ্রব্য আনিয়া দি, এমত আমার কিছু সঙ্গতি নাই।

পরে আমি বলিলাম, এ বড় দুঃখের বিষয় বটে। একথা আমাকে পূর্বে জানাইলা না কেন? তখন আমি একটি রুটী ও কিছু মিসরী ও সাগুদানা তাহার হাতে দিয়া কহিলাম, এখন শীত্র গৃহে যাইয়া এই সকল তোমার ছেল্যাকে খাইতে দেও; এবং কল্য সন্ধ্যাকালে আমি আপনি পাড়ায় গিয়া কি প্রকারে তোমার উপকার করিতে পারি, তাহা বিবেচনা করিব।

ইহা শুনিয়া করুণা অসন্তুষ্ট চিত্তে চলিয়া গেল; তাহাতে আমি বোধ করিলাম রুটী ও মিসরীর পরিবর্তে যদি তাহাকে কিছু পয়সা দিতাম, তবে সে অধিক আহ্লাদিতা হইত। কিন্তু বিশ্রাম দিবসে যেন তাহাকে কোন দ্রব্য ক্রয় করিতে না হয়, এইজন্যে আমি তাহাকে পয়সা না দিয়া উক্ত দ্রব্য সকল দিলাম।

পর দিবসে আমি প্রতিজ্ঞানুসারে খ্রীষ্টিয়ান গ্রামে উপস্থিত হইলাম, এবং কিঞ্চিৎ কাল অনুসন্ধান করিয়া করুণার বাটীর উদ্দেশ পাইলাম। হায় ২! ফুলমণির গৃহ এবং করুণার গৃহ এ দুয়ের কত বিশেষ দেখিলাম। করুণার উঠানের মধ্যে একটি ছোট রান্না ঘর ছিল বটে, কিন্তু তাহার চাল সমস্ত ভাঙ্গিয়া পড়াতে উনুন ও রন্ধন করিবার দ্রব্য সকল বড় গৃহের দাবায় রাখিয়াছিল। আমার আগমনের পূর্বে করুণা অন্ন পাক করিতেছিল, তাহাতে

ধুঁয়া প্রযুক্তি আমি গৃহের মধ্যে প্রবেশ করিতে না পারিয়া দেখিলাম সে গৃহও ভগ্ন প্রায় হইয়াছে। তাহার উঠানটি বড় অপরিষ্কার ছিল, তথাপি আমাকে সেইখানে দাঁড়াইয়া থাকিতে হইল; কেননা করুণা বলিল, মেম সাহেব, আমার যে মোড়াটি ছিল, তাহা আজি ছেল্যারা ভাঙ্গিয়া ফেলিয়াছে।

যদ্যপি করুণা এমত দুঃখিতা ছিল, যে প্রায় আপনার পরিবারের আহারাদি যোগাইতে পারিত না, তথাপি তাহাদের ঘরে একটি নেড়ি কুকুর পোষা ছিল। সে আমাকে দেখিয়া উচ্চেঃস্বরে ডাকিতে লাগিল, তাহাতে কিছুকাল পর্যন্ত কুকুরের শব্দ বিনা আর কিছু শুনা গেল না। শেষে করুণা তাহাকে বিস্তর ধর্মকাইয়া চুপ করাইলে পর আমি বলিলাম করুণা, তুমি আজি আমার অপেক্ষাতে ছিলা, ইহাতে বোধ করিয়াছিলাম যে তুমি আপন ঘরটিকে কিছু পরিষ্কার করিয়া রাখিবা। আরও জিজ্ঞাসিলাম তোমার ধৌত শাড়ি কোথায়? তুমি যে ময়লা কাপড় পরিয়া আমার গৃহে গিয়াছিলে, এখন সেই কাপড় তোমার গায়ে দেখিতেছি।

করুণা উত্তর করিল, মেম সাহেব, আপনি যে পয়সাটি দিয়াছিলেন, তাহাতে পান তামাক কিনিয়া আনিলাম। কাপড়ের দুই এক দিন বিলম্ব হইলে ক্ষতি নাই; কিন্তু আমরা তামাক না খাইলে মারা পড়ি।

আমি কহিলাম, তোমাদের তামাক খাওয়াটা বড় মন্দ; কিন্তু সে এক প্রকার ক্ষুদ্র বিষয়। তুমি যে বিশ্রামবারে ঈশ্বরের আজ্ঞা লঙ্ঘন করিয়া বাজারে গিয়াছিলে, ইহা শুনিয়া আমি বড় দুঃখিতা হইলাম।

করণা বলিল মেম সাহেব, আমরা দুঃখি লোক, পেটে খাইতে পাই না; তাহাতে ধর্মকর্ম কি প্রকারে করিব? এবং আমি যে একালা রবিবার দিনে হাট বাজার করি, তাহা তো নয়; এমত আর দশ জন খ্রীষ্টিয়ান লোককে দেখাইয়া দিতে পারি।

আমি বলিলাম, হইতে পারে; তথাপি দশ জন যাহা করে তাহাই করা উচিত নহে। তুমি যদি ঐ দশ জনের মতে না চলিয়া তোমার প্রতিবাসিনী ফুলমণির মতো চলিতা, তবে ভাল হইত।

করণা বলিল, ও মেম সাহেব, ফুলমণিতে ও আমাতে অনেক বিশেষ আছে, তাহার মত মানুষ পাওয়া ভার। এবং আর একটি কথা আছে; তাহারা ধনী লোক, তাহাদের কাপড়ের ও টাকাকড়ির অভাব নাই, তাহাতে তাহারা স্বচ্ছন্দে শনিবারে সকল দ্রব্য কিনিয়া রাখিয়া রবিবারে পরিষ্কার কাপড় পরিয়া গীর্জায় যাইতে পারে।

আমি কহিলাম, দেখ করণা, এখন তুমি দুইবার আমার সাক্ষাতে ফুলমণিকে ধনী লোক বলিলা। তাহার স্বামী কেবল সাত টাকা মাহিনা পাইয়া থাকে; তবে তাহারা কি প্রকারে ধনী হইল? কিন্তু সে পরিবার কেমন করিয়া এমত সুখে কাল কাটায়, তাহা আমি সুন্দরপে জ্ঞাতা আছি; অর্থাৎ সে ফুলমণির পরিশ্রম ও পরিমিত ব্যয়ের দ্বারা হয়, বিশেষতঃ স্পষ্টরূপে বোধ হইতেছে যে ঈশ্বরের আশীর্বাদ তাহার উপরে বর্তিয়াছে। ঈশ্বর আপন আজ্ঞা পালনকারি ইস্রায়েল লোকের প্রতি যে অঙ্গীকার করিয়াছিলেন, সেই অঙ্গীকার ফুলমণির প্রতি সফল হইয়াছে; যথা “তোমরা চুপড়িতে ও রুটীর পাত্রে আশীর্বাদ পাইবা।” দ্বিতীয় বিবরণ ২৮। ৫। ফুলমণি ঈশ্বরের আজ্ঞা সকল পালন করিয়া তাঁহার বাকেয়তে অতি যত্ন পূর্বক মনোযোগ করে, এই জন্য সে

আশীর্বাদ পায়। যীশুর্ত্রীষ্ট সত্য বলিয়াছেন, যথা “প্রথমে ঈশ্বরের রাজ্য ও ধর্মের বিষয়ে সচেষ্ট হও, তাহা হইলে আর সকল দ্রব্য তোমাদিগকে দণ্ড হইবে।” মথি ৬। ৩৩।

করুণা কহিল, হাঁ মেম সাহেব, এমত হইতে পারে বটে, কিন্তু আমার দশাপেক্ষা ফুলমণির দশা সর্বপ্রকারে ভাল। দেখুন তাহার স্বামী কেমন ধার্মিক লোক, কিন্তু আমার স্বামী দুষ্ট ও বড় মাতাল। ও মেম, সে আমাকে যে দুঃখ দেয়, তাহা যদি আপনি দেখিতেন, তবে আমার প্রতি আপনকার মনে কিছু দয়া হইত।

ইহা শুনিয়া আমি করুণার প্রতি বড় দৃঢ়িতা হইয়া বলিলাম, দেখ করুণা, তোমার স্বামী যদি তোমাকে দুই একটি কঠিন বাক্য কহে, তবে কোন প্রকারে তাহা সহ্য করিতে হইবে; কেননা বিবাহিত স্বামী হইতে তোমাকে কেহ পৃথক করিয়া দিতে পারিবে না। কিন্তু সে যাহা হউক, তোমার পীড়িত সন্তান কেমন আছে? তাহা আমাকে বল।

এই কথাতে করুণা কিছু ভয় পাইল, পরে সে কহিল, মেম সাহেব, আজি সে কিঞ্চিৎ ভাল আছে; এজন্যে আমি তাহাকে অনেকবার বারণ করিলেও সে বাহিরে খেলা করিতে গিয়াছে। মেম সাহেব, সে বড় চঞ্চল বালক, কাহারো কথা মানে না।

আমি বলিলাম, কল্য সে অতিশয় পীড়িত ছিল, আজি খেলা করিতে বাহির গিয়াছে, এই কথাতে আমার বড় আশ্চর্য বোধ হইতেছে। হায় করুণা! বোধ হয় তুমি এই বিষয়ে আমার নিকট সম্পূর্ণরূপে সত্য কথা কহ নাই।

করণা লজিতা হইয়া উত্তর করিল, মেম সাহেব, গত মাসে তাহার কেমন শক্তি ব্যামোহ হইয়াছিল, তাহা সকলেই জানে; কিন্তু এখন স্টশুরের অনুগ্রহেতে সে কিঞ্চিৎ ভাল আছে বটে। করণা এই কথা কহিতেছে, এমত সময়ে একটি ছোট বালক গৃহের ভিতরে দৌড়িয়া আইল। তাহার বর্ণ অতিশয় কাল, এবং ধূলা ও কাদাতে খেলা করিয়া আসিয়াছিল, এই জন্যে তাহাকে আরও মলিন বোধ হইল। সে প্রায় উলঙ্গ, কেবল তাহার কোমরে একখানি ছেঁড়া কানি বাধা ছিল। ঐ ছেল্যাকে দেখিয়া তাহার মা তাহাকে হঠাৎ বলিল, নবীন এখানে আসিয়া মেম সাহেবকে সেলাম কর। এই মেম সাহেব অতিশয় দয়ালু; ইনি কল্য তোমাকে রুটী ও মিসরী পাঠাইয়া দিয়াছিলেন। কিন্তু নবীন আপন মাতাকে উত্তর করিল, আমি মেম সাহেবকে কেন সেলাম করিব? তুমি তো তাঁহার রুটী ও মিসরী আমাকে খাইতে দিলা না।

তাহাতে আমি জিজ্ঞাসা করিলাম, এই কেমন কথা! তবে সে রুটী কি হইল? নবীন তাড়াতাড়ি করিয়া কহিল, মেম সাহেব, আমার নিকটে শুন, আমি তোমাকে বলি। বকুল নামে একজন স্ত্রী এই পাড়াতে থাকে, তাহার মেয়্যার ব্যামোহ হইয়াছে, এই জন্যে সে দুই পয়সা দিয়া মায়ের নিকটে ঐ রুটী কিনিয়া লইল; এবং মা সেই পয়সাতে তখনই তামাক কিনিয়া আনিল। ও মেম সাহেব তুমি যদি তাহার তামাক খাওয়া দেখ, তবে আশ্চর্য জ্ঞান করিব। সমস্ত দিন তার আর কোন কর্ম নাই, এবং রাত্রির মধ্যে সে আমাকে এক শত বার জাগাইয়া বলে, তামাক সাজ ২, এই কারণে পিতার নিকটে কত বার মার খাইয়াছে, তবু তাহার জ্ঞান হয় না।

বালকের এই সকল কথাতে তাহার মাতা বড় রাগান্বিতা হইয়া তাহার গালে শক্তরূপে একটা চড় মারিয়া বলিল, নবীন, তুই বড় মিথ্যা কহিস্। কিন্তু আমি ভালরূপে মনে ২ জানিলাম, যে নবীন সত্য কথা বলিল, করণা কেবল আপন দোষ লুকাইবার নিমিত্তে আমার সাক্ষাতে তাহাকে শাস্তি দিল।

মায়ের এবং সন্তানের পরস্পর এমত অনুচিত ব্যবহার দেখিয়া আমি প্রায় নিরাশ হইয়া বোধ করিলাম, এই ব্যক্তিরা বুঝি কখন ধর্ম পথে চলিবে না; কিন্তু তখন পরমেশ্বরের এই বাক্য আমার স্মরণে হইল, “আমি লোকদের প্রস্তরময় অন্তঃকরণ দূর করিয়া তাহাদিগকে নন্ত্র অন্তঃকরণ দিব, তাহাতে তাহারা আমার লোক হইবে।” যিহিষেবল ১১ । ১৯ । এই দয়ালু অঙ্গীকারদ্বারা কিঞ্চিৎ আশ্বাস পাইয়া স্থির করিলাম যে আমি করণাকে এখন কোন প্রকারে ত্যাগ করিব না, বরং উপদেশ ও প্রার্থনাদ্বারা তাহাকে ধর্মের পথ অবলম্বন করাইতে সাধ্য পর্যন্ত যত্ন করিব।

এমত মনে করিয়া আমি প্রথমে তাহাকে জিজ্ঞাসিলাম, করণা, তুমি কোন কর্ম করিতে পার কি না? সে উত্তর করিল, মেম সাহেব, আমরা গৃহস্থ লোক, কি কর্ম করিব? আমি পুনর্বার জিজ্ঞাসিলাম, তুমি কি বন্ধাদি সিলাই করিতে পার? করণা কহিল, হাঁ মোটা সিলাই কিছু ২ করিতে পারি।

আমি কহিলাম, যদি এমত হয় তবে এখনি তোমাকে কর্ম দিতে পারি। শনিবারে আমি ৭২ খানি ঝাড়ন কিনিয়াছি, দরজীকে তাহা দিলে সে সিলাই করিতে প্রত্যেকে এক পয়সা করিয়া লইবে; কিন্তু তুমি যদি তাহা সিলাই কর, তবে আমি তোমাকে

প্রত্যেক ঝাড়নেতে দুই পয়সা করিয়া দেব, সর্বসুন্দর ২১০ নয় সিকা হইবে, তাহা লইয়া তুমি দুইখান উত্তম শাড়ি কিনিতে পারিবা।

ইহা শুনিয়া করণা কহিল, আপনি ধনবান् লোক, দীনহিনকে একটা টাকা অমনি ফেলিয়া দিলে আপনকার কিছু ক্ষতি হইবে না। আমি যে সিলাই করিয়া পয়সা রোজগার করিব, এমত আমার অবকাশ নাই, এখন যদি ঘরের কর্ম্ম সকল সামলাইতে পারি না, তবে সিলাই করিতে গেলে খাওয়া দাওয়া একেবারে ত্যাগ করিতে হইবে।

তাহতে আমি বলিলাম, ভাল করণা, যেমন তোমার ইচ্ছা হয় তেমনি কর; কিন্তু ধর্মাপুস্তকে লেখা আছে, ‘যে কেহ কার্য্য করিবে না সে ভোজন না করুক।’ থিষলনীকীয় মণ্ডলীর প্রতি পত্র ৩। ১০। এই জন্যে আমি যে তোমাকে ভিক্ষা দিব এমত ভরসা করিও না; সেলাম, এখন আমি যাই।

এই কথাতে করণার মুখ বড় ম্লান হইয়া গেল, ইহা দেখিয়া আমি পুনর্বার বলিলাম, করণা ঝাড়নগুলিন যদি চাও তবে আমি বেহারার হাতে পাঠাইয়া দিব। তথাপি সে অলসা স্তৰী উত্তর করিল, না না, তাহা করিতে পারিব না; ঈশ্বর যেমন আমাদিগকে বরাবর একমুঠা ভাত দিয়া আসিতেছেন তেমনি দিবেন, তোমার সিলাই না করিলে আমরা কিছু মারা পড়িব না।

আমি এই কথা শুনিয়া কহিলাম, আমি তোমার সাহায্য করিতে চাহিয়া ছিলাম বটে, কিন্তু তুমি যদি এমন কথা কহ, তবে আমি আর কি করিতে পারি? পরে আমি নবীনের প্রতি ফিরিয়া বলিলাম,

আমার এই স্থানে আসা অদ্য বিফল হইল, কিন্তু এখন বেলা আছে, এই জন্যে মধুর বাটীতে যাইতে ইচ্ছা করি; অতএব তুমি যদি আলস্য না করিয়া আমার সঙ্গে গিয়া পথ দেখাইয়া দিতে পার, তবে আমি তোমাকে চারিটি পয়সা দিব।

নবীন এই কথাতে বড় সন্তুষ্ট হইয়া আমার অগ্রে ২ লক্ষ দিয়া গমন করিতে লাগিল। কিঞ্চিৎ পরে আমরা একটা বড় উচ্চ খোলার ঘরের নিকটে পৌঁছিলে নবীন বলিল, মেম সাহেব, এই বাটী মধুর। তাহাতে আমি তাহাকে বিদায় করিলে, সে পয়সা পাইয়া আনন্দ প্রযুক্ত দৌড়িয়া বেড়াইতে লাগিল; আমি তাহা দেখিয়া বোধ করিলাম, এই বালক যে কল্য পীড়িত ছিল ইহা নিতান্তই মিথ্যা।

পরে আমি উক্ত গৃহের উঠানের নিকটে দাঁড়াইয়া একজন স্ত্রীলোকের ক্রন্দন এবং কোন পীড়িত ব্যক্তির বড় কোঁকানি শব্দ শুনিতে পাইলাম। যদ্যপি তাহাদের সহিত আমার পূর্বে পরিচয় ছিল না, তথাপি আমি নিশ্চে বহির্দ্বার খুলিয়া ভিতরে গেলাম, কারণ আমি জানিতাম, যে বাঙালা দেশস্থ লোকদের পীড়া হইলে যদি বাহিরের কোন মানুষ আসিয়া তাহাদের নিকটে বৈসে ও তাহাদের দুঃখে দুঃখিত হয়, তবে তাহারা বড় সন্তুষ্ট হয়। বিলাতে এমত নয় বটে, বরং সেখানে যদি কোন অপরিচিত ব্যক্তি হঠাৎ গিয়া রোগগ্রস্ত মানুষের নিকটে উপস্থিত হয়, তবে সেই পীড়িত ব্যক্তির বন্ধু বান্ধবেরা তাহাকে অশিষ্ট লোক জ্ঞান করে।

সে যাহা হউক, আমি ভিতরে গিয়া দেখিলাম, উঠান ও দাবা লোকেতে প্রায় পরিপূর্ণ আছে। আমাকে দেখিয়া কেহই আশ্চর্য

জ্ঞান করিল না, কারণ আমি পাড়তে যাতায়াত করিতাম, তাহা  
সকলে জ্ঞাত ছিল।

পরে যে বৃন্দা স্তীর ক্রন্দনের শব্দ আমি শুনিয়াছিলাম, সে  
উপস্থিতি হইয়া বলিল, মেম সাহেব, বোধ করি আপনি আমার  
চেল্যার পীড়ার বিষয় শুনিয়া আসিয়া থাকিবেন? আমি কহিলাম,  
না, তাহা শুন নাই, কেবল তোমাদের সহিত সাক্ষাৎ করিতে  
আসিয়াছি। কিন্তু তোমার পুত্র কোথায়? আমি যদি কোন প্রকারে  
তাহার উপকার করিতে পারি, তবে অবশ্য করিব।

এই কথাতে প্রতিবাসি লোক সকল আমার জন্যে পথ ছাড়িয়া  
দিল, এবং বুড়ি আপন পুত্রের খাটের নিকটে একখানা চৌকি  
আনিয়া বলিল, মেম সাহেব, আপনি ইহাতে বসুন। হায় ২! যে  
মাতাল ও দুষ্ট যুবপুরুষের বিষয় আমি ফুলমণির নিকটে  
শুনিয়াছিলাম, সেই মধুকে এখন মৃতপ্রায় দেখিতে পাইলাম। সেই  
দিবস প্রত্যুষে তাহার ভয়ানক উলাউঠা রোগ হইয়াছিল, আমি  
তাহাকে দেখিবামাত্র জানিতে পারিলাম, তাহার বাঁচিবার কোন  
ভরসা নাই। পরে আমি বুড়িকে জিজ্ঞাসিলাম, তোমরা উহারে কি  
ওষধ দিয়াছ? সে উত্তর করিল, মেম সাহেব, অনেক প্রকার ওষধ  
দিয়াছি, যে যাহা বলিয়াছিল তাহা সকলই দিয়াছি। আমি  
বলিলাম, এ বড় অনুচিত কর্ম করিয়াছ, কারণ এক ওষধ অন্য  
ওষধের গুণ নষ্ট করে, তাহা কি তুমি জান না?

কবিরাজ বুড়ির নিকটে চারি টাকা লইয়া মধুকে এক পান  
ওষধ দিয়া দাবাতে তামাক খাইতেছিল, সে আমার কথা শুনিয়া  
ভিতরে আসিয়া বলিতে লাগিল, মেম সাহেব, আপনি যথার্থ  
কহিলেন। আমি ইহাদিগকে পূর্বেই বলিয়াছিলাম, তিন চারি

প্রকার গুষ্ঠি একেবারে খাওয়াই ও না, কিন্তু ইহারা আমার কথা মানিল না। মেম সাহেব, বাঙালি স্ত্রীলোকদিগের জ্ঞান নাই, আপনারা যেমন বিবেচনা করেন, তেমন তাহারা পারে না। দেখুন, রোগী যদি মারা পড়ে, তবে ইহাদেরই দোষ হইবে, আমার কোন দোষ নাই। যদি আর কোন গুষ্ঠি উহাকে না দিত, তবে অবশ্য আমার গুষ্ঠি ভাল হইত, কারণ এই গুষ্ঠি দ্বারা পীড়িত মানুষ সর্বদাই সুস্থ হয়। অল্পদিন হইল এক ব্যক্তি আপন স্ত্রীকে দেখাইবার জন্যে আমাকে ডাকিয়া লইয়া গিয়াছিল, আমি তাহার গৃহে গিয়া দেখিলাম, সে রোগীর ধাতু নাই, এবং কথা কহিতে পারে না, এমন ব্যক্তিকেও আমি সুস্থ করিলাম।

আমি কহিলাম, না, না, কবিরাজ মহাশয়, এমত কথা বলিও না, তুমি তাহাকে সুস্থ কর নাই, কিন্তু পরমেশ্বর তোমার গুষ্ঠি আশীর্বাদ দেওয়াতে তদ্বারা সে আরোগ্য হইয়াছিল।

কবিরাজ উত্তর করিল, হাঁ মেম সাহেব, তাহাই বটে; পরমেশ্বরের অনুগ্রহ ব্যতিরেকে আমরা কি করিতে পারি?

এই কথাতে আমি মধুর হস্ত ধরিয়া বলিলাম, ওগো? তুমি কি এ ব্যক্তির কথা শুনিতেছ? ইনি হিন্দুলোক হইয়াও বলেন, পরমেশ্বরের কৃপা ব্যতিরেকে আমরা কি করিতে পারি? অতএব আমি ভরসা করি, যে এই ভয়ানক সময়ে পরমেশ্বর তোমার সহিত থাকিয়া তোমাকে সান্ত্বনা করিতেছেন।

মধু উত্তর করিল, না না, ঈশ্বর আমার সহিত নাই। হায় ২! তিনি যদি আমার সহিত থাকিতেন তবে আমার সকল ভয় দূর হইত; কিন্তু তিনি এখানে নাই। বোধ হয় যেন শয়তান আমার

কর্ণের নিকটে বসিয়া ফুস ২ করিয়া বলিতেছে, এখন তোকে  
সকল দুষ্ট ক্রিয়ার ফল ভোগ করিতে হইবে।

এই কথা শুনিয়া প্রতিবাসি লোকেরা বড় ভয় পাইল, এবং দুই  
তিন জনে বলিল, জাঁতি কিম্বা ছুরি কোন একখান লোহার দ্রব্য  
শীত্র করিয়া উহার মাথার নিকটে রাখিয়া দেও।

কিন্তু মধু আপন চক্ষু খুলিয়া বলিল, হায় ২ বন্ধুরা! তোমরা  
খীটিয়ান হইয়াও কি এই সকল মিথ্যা গল্পে মান? লৌহদ্বারা  
আমার কোন উপকার হইবে না। পরে সে আপন বক্ষঃস্থলে  
করাঘাত করত বলিতে লাগিল, শয়তান এখানে আছে, এখানে  
আছে, সে আমার মনের মধ্যেই আছে। হায় ২ দুর্ভাগ্য মনুষ্য যে  
আমি! আমি যদি ভূতরাজকে সেবা না করিয়া পরমেশ্বরের সেবা  
করিতাম, তবে এখন আহুদ পূর্বক মরিতে পারিতাম।

মধু মনের অতিশয় যন্ত্রণা প্রযুক্ত উক্ত কথা উচ্চেঃস্বরে  
কহিয়াছিল, তাহাতে তাহার যে যৎকিঞ্চিং বল ছিল, তাহা হ্রাস  
হইলে সে বালিশের উপরে মাথা রাখিয়া বার ২ জল চাহিতে  
লাগিল; কিন্তু তাহার বন্ধুরা বলিল, না না, জল দিলে ব্যামোহ  
বাঢ়িবে। এ কথা যথার্থ নহে, ইহা আমি ভালুকপে জ্ঞাতা ছিলাম,  
তথাপি আমাকে যেন পশ্চাতে কেহ দোষ না দেয় এইজন্যে  
কবিরাজের প্রতি ফিরিয়া জিজ্ঞাসিলাম, ইহাকে কিঞ্চিং জল দিলে  
কি কোন ক্ষতি হইবে? তাহাতে কবিরাজ আমাকে ধীরে ২ বলিল,  
এ কোনপ্রকারে বাঁচিবে না, অতএব যাহা খাইতে চাহে তাহা  
দেও।

এই কথা শুনিয়া আমি একবাটি জল মধুর মুখের কাছে ধরিলাম, তাহাতে সে তাবৎ জল খাইয়া কিঞ্চিৎ আরাম বোধ হইল; পরে অতি ক্ষীণ স্বরে জিজ্ঞাসা করিল, রাণী কোথায়? গোলমাল প্রযুক্ত আমিও রাণীর বিষয় নিতান্ত বিস্মৃতা হইয়াছিলাম, কিন্তু মধুর কথা শুনিয়া আমি তাহার মাতাকে জিজ্ঞাসা করিলাম, হাঁ গো, তোমার বউ কোথায়? সে যে এখানে নাই, ইহা বড় আশ্চর্য্য। এমন সময়ে আপন স্বামীর নিকটে থাকা তাহার কর্তব্য ছিল বটে।

বুড়ি উত্তর করিল, বউ এখানে ছিল, কিন্তু অল্পক্ষণ হইল সে ফুলমণিকে ডাকিতে গিয়াছে; কারণ সে বলিল, ফুলমণি যদি আসিয়া আমার স্বামীর সহিত কিছু ধর্মের কথা কহে তবে তাহার মঙ্গল অবশ্য হইতে পারিবে। বুড়ি এই কথা বলিবা মাত্র ফুলমণি ও রাণী উভয়ে আসিয়া উপস্থিতা হইল।

ফুলমণি একেবারে মধুর খাটের নিকটে গিয়া কাঁদিতে লাগিল। পূর্বে তাহাদের পরম্পর যে কিছু বিচ্ছেদ ছিল, তখন তাহার চিত্তমাত্র দৃশ্য হইল না; বরং ফুলমণি আপন হাত তাহার মাথায় নীচে দিয়া তাহাকে কিঞ্চিৎ তুলিয়া বলিতে লাগিল, হায় ২ মধু! তুমি যখন শিশুকালে আমাকে মা বলিয়া আমার গৃহে মিঠাই খাইতে আসিতা, তখন আমি কতবার তোমাকে ক্রোড়ে করিয়া বেড়াইয়াছিলাম। হায় ২ বাচ্চা! এখন তোমার কি অবস্থা হইল। ও মধু, তুমি সম্পূর্ণরূপে প্রভু যীশুখ্রিষ্টের উপরে বিশ্বাস রাখ। তুমি পাপরূপ সাগরে ডুবিতেছ বটে, কিন্তু যীশু তোমাকে রক্ষা করিবার নিমিত্তে আপন হস্ত বিস্তার করিতেছেন। ও মধু, তুমি যীশুর হাত ধর, তিনি তোমাকে তুলিয়া লইবেন। হে বাচ্চা, তুমি তাঁহার নিকটে একটি ক্ষুদ্র প্রার্থনা কর।

এই সকল কথা শুনিয়া মধু আপনার মনের যাতনা আর সহ্য করিতে পারিল না, তাহাতে সে অতিশয় ব্যাকুল হইয়া উচ্চেঃস্বরে বলিতে লাগিল, হায় ২ ফুলমণি মা! আমার পরিত্রাণের দিবস বহিয়া গিয়াছে। শয়তান কাল সর্পের মত আমাকে দংশন করিয়াছে, তাহাতে আমার মরণ অতি নিকট, ইহা আমি বিলক্ষণ জানিতেছি। ওগো ফুলমণি মা, ধর্মপুস্তকে কি শয়তানকে বৃহৎ সর্প বলা যায় না?

তাহাতে ফুলমণি বলিল, হাঁ, শয়তানকে পুরাতন ও বৃহৎ সর্প বলা যায় বটে, কেননা সে সর্পরূপে আমাদের আদি মাতার ভ্রান্তি জন্মাইয়া তাহার বংশ সকল নষ্ট করিতে চেষ্টা করে। কিন্তু ওহে মধু, তাহাতে তুমি নৈরাশ হইও না, পিতলের সর্পের কথা স্মরণ করিয়া প্রভু যীশুর আশ্রয় লও। তিনি আপনি কহিয়াছেন, “মূসা যেরূপ প্রান্তরে সর্পকে উর্দ্ধে উঠাইল, মনুষ্য পুত্রকেও তদ্দপ উখাপিত হইতে হইবে; তাহাতে যে কেহ তাঁহাতে বিশ্বাস করিবে, সে বিনষ্ট না হইয়া অনন্ত পরমায়ুঃ পাইবে।”

মধু বলিল, যীশু আমার প্রার্থনা শুনিবেন না, এবং আমিও তাঁহার কাছে প্রার্থনা করিতে পারি না; কিন্তু আমি রাণীর নিকটে ক্ষমা চাহিব। হে প্রিয়ে রাণী, আমি তোমার বিরুদ্ধে অনেকবার বড় দোষ করিয়াছি, কিন্তু এখন আমি মরিতেছি, আমাকে ক্ষমা করিতে হইবে। আমার ঘর ও ভূমি ইত্যাদি যে কিছু আছে সে সকলি তোমার, কিন্তু আমার মাতা যতদিন বাঁচিবেন, ততদিন তুমি তাঁহাকে খাইতে পরিতে দিও। তিনি তোমার প্রতি কখন ২ অন্যায় ব্যবহার করিলেও তুমি তাঁহাকে ত্যাগ করিও না, তিনি তোমার স্বামীর মাতা হন, ইহা স্মরণে রাখিও।

পরে মধু ফুলমণির প্রতি ফিরিয়া বলিল, মা! আমি রাণীকে তোমার হাতে সমর্পণ করিলাম। তুমি যেমন সত্য খ্রীষ্টিয়ান তেমনি তাহাকেও সত্য খ্রীষ্টিয়ান করিও, এবং তুমি যেমন অদ্য আপন শক্রদের প্রতি প্রেম প্রকাশ করিয়াছ, তেমনি তাহাকেও আপন শক্র প্রতি প্রেম করিতে শিক্ষা দিও।

আর কিঞ্চিং কাল পরে মধু পুনর্বার বলিতে লাগিল, ও মা ফুলমণি! রাণী প্রসব হইলে পর তুমি অনুগ্রহ করিয়া তাহার প্রতি ভাল চেষ্টা করিও; আর আমার ছেল্যাটি কিছু বড় হইলে যাহাতে সে ধর্মের বিষয়ে শিক্ষা পায়, তজন্যে তাহাকে পাদরী সাহেবের মেমের স্কুলে দিও।

এই কথা বলিয়া তাহার বড় জল পিপাসা হইল, তাহাতে সে কাঁদিতে ২ কহিতে লাগিল, হায় ২! আমি যদি এখন এই জল ত্বক্ষণ সহ্য করিতে না পারি, তবে নরকের জ্বালা অনন্তকাল পর্যন্ত কি প্রকারে সহিতে পারিব? আমি আপন সাংসারিক বিষয় সকল নির্ধার্য করিলাম, কিন্তু ধিক ২! পারমার্থিক বিষয়ে কি করিব? হায়! আমাকে নরকে যাইতে হইবে।

মধুর স্ত্রী এই কথা শুনিয়া তাহার বক্ষঃস্ত্রলে পড়িয়া অতিশয় উচ্চেঃস্বরে কাঁদিয়া বলিল, আপনি কি জন্যে নরকে যাইবেন? না না, ঈশ্বর তোমাকে নরকে ফেলিয়া দিবেন না। ফুলমণি মাতা যাহা বলে তাহাই কর, যীশুর হস্ত শক্তরূপে ধর, তিনি তোমাকে অবশ্য রক্ষা করিবেন। কিন্তু মধু আপন মাথা লাড়িয়া বলিল, না রাণী, না, যীশু আমাকে গ্রাহ্য করিবেন না, আমার পরিত্রাণের দিবস বহিয়া গিয়াছে। হায়! আমি কি করিব? ইহা বলিয়া সে অচৈতন্য হইল,

এবং কিঞ্চিৎ কাল পরে তাহার অপ্রস্তুত আত্মাকে প্রথিবীর বিচারকর্তার বিচারস্থানে দাঁড়াইতে হইল।

হায়! আমি যখন আপন বাটী হইতে সে দিবসে বাহির হইয়াছিলাম, তখন এমত ভয়ানক ও দুঃখজনক ঘটনা দেখিতে পাইব, তাহা আমি কিছুমাত্র বোধ করি নাই, ফলতঃ তদ্বারা আমার মন অত্যন্ত শোকাকুল হইল।

রাণী ও তাহার শাশুড়ী মধুর মৃত দেহে পড়িয়া বাঙালি স্ত্রীলোকদের যেমত রীতি আছে তদ্বপ উচৈঃস্বরে ক্রন্দন করিয়া আপনারদের মস্তকে আঘাত করিতে লাগিল, এবং যে ২ উভ্রম গুণ বাস্তবিক মধুর কখন ছিল না, এমত গুণের বর্ণনা করত তাহার প্রশংসা করিতে লাগিল। ফুলমণি দাবাতে বসিয়া আঁচল দিয়া আপন মুখ আচ্ছাদন করিয়া কাঁদিতে ছিল। এমত সময়ে একজন পুরুষ উঠানের মধ্যে উপস্থিত হইল; তাহার মস্তকে দুই একটি পক্ষ কেশ দেখা গেল, এবং তাহার মুখ অতিশয় দয়াশীল বোধ হইল। পূর্বে আমি তাহাকে দেখি নাই, তথাচ দেখিবামাত্র তাহার প্রতি আমার মনে সম্মত জন্মিল। ঐ পুরুষ ফুলমণির নিকটে গিয়া তাহার সহিত মৃদু স্বরে কথা কহিতে লাগিল, এবং ইহাও দেখিলাম সে আপন বন্ধুদ্বারা তাহার চক্ষের জল মুচাইয়া ফেলিল। ইহাতে আমার বোধ হইল এ ব্যক্তি ফুলমণির স্বামী হইবে।

প্রতিবাসি লোকেরা গৃহের মধ্যে পরস্পর কথা কহিয়া বড় কোলাহল করিতেছিল, এই জন্যে সেই পুরুষ তাহাদিগকে শিষ্টরূপে বলিল, হে ভাই ভগিনীরা, এখন তোমরা এখান হইতে প্রস্থান করিলে ভাল হয়, কারণ তোমরা মধুকে আর কোন প্রকারে

উপকার করিতে পারিবা না। এই কথা শুনিয়া লোকেরা বাহিরে যাইতে লাগিল।

তাহাদের যাওন কালে আমি নানাজনের নানা প্রকার কথা শুনিতে পাইলাম। এক জন বলিল, মধু কেবল, মদ্যপান দ্বারা নষ্ট হইল; আর এক জন কহিল, এমত নয়, তাহার ব্যামোহ হইলে পর সে এক ভাঁর দধি কিনিয়া খাইয়াছিল তাহাতেই তাহার মৃত্যু হইল। পরে একজন বুড়ি কহিল তোরা কি জানিস্? কবিরাজ রোগ তো দমন করিয়াছিল, কিন্তু মেম সাহেবে সেথায় থাকাতে ঝাড় ফোঁক কিছু করা গেলনা, এইজন্যে ভূত তাহাকে চাপিয়া মারিল।

আমি এই সকল কথা শুনিয়া মনের মধ্যে ভাবিলাম, হায় ২! এই লোকেরা কত অনর্থক চিন্তা করে। কিন্তু তাহাদের মৃত বন্ধুর মনস্তাপ শুনিয়াও পরলোকে তাহার কি গতি হইবে? এ বিষয়ে কেহই ভাবিত হইল না।

যে পুরুষ এমত সুশীলনুপে লোক সকলকে বিদায় করিয়াছিল, তাহার বিষয়ে শুনিলাম, সে ফুলমণির স্বামী বটে। কিছুকাল পরে সে মধুর দুই জন পিসতুত ভাইকে লইয়া তাহার কবর দেওনার্থে সকল প্রস্তুত করিতে লাগিল। তখন আমি বিবেচনা করিয়া দেখিলাম, যে মধুর মায়ের টাকাকড়ির কোন অভাব নাই, অতএব আর কোনুপে তাহাদের উপকার করিতে না পারিয়া, আমি পুনর্বার আসিব, এই কথা বলিয়া বিদায় হইলাম।

আমি আপন গৃহে পৌঁছিয়া উক্ত ঘটনা সকল মনে আন্দোলন করত মৃত্যুর এবং পরলোকের বিষয়ে এইরূপ চিন্তা করিতে

লাগিলাম; যথা, আমার সাক্ষাতে একজন বলবান্ যুব পুরুষ  
যৌবনাবস্থায় প্রাণ ত্যাগ করিয়াছে, ফলতঃ সে পাপগ্রস্ত হইয়াও  
ঈশ্বরের নিকটে ক্ষমা না চাহিয়া পরলোকে গমন করিয়াছে;  
তাহাতে আমি ভাবিলাম, হায়! তাহার আত্মার সর্বনাশ হইয়া  
থাকিবে।

কোন ব্যক্তির আত্মার সর্বনাশ হওয়া কেমন ভয়ানক ও  
গুরুতর বিষয়, তাহা বলা অসাধ্য; কিন্তু ধিক ২! মনুষ্যেরা ঈশ্বরের  
নিয়ম জানিয়াও মনে করে, যদ্যপি আমরা পাপ করি, তথাপি  
তিনি দয়ালু হইয়া পরলোকে আমাদিগকে আবশ্য ভাল স্থান  
দিবেন। পরমেশ্বর দয়ার সাগর বটেন, এই জন্যে তিনি আপনার  
পুত্রকে রক্ষা না করিয়া আমাদের সকলের জন্যে তাঁহাকে প্রদান  
করিলেন; কিন্তু যে ব্যক্তি তাঁহার অসীম অনুগ্রহ তুচ্ছ করিয়া  
ইহকালে আপন মন্দাভিলাস পূর্ণ করে, এমত ব্যক্তির প্রতি ঈশ্বর  
কোন প্রকারে পরকালে দয়া প্রকাশ করিবেন না। এই বিষয়ে  
তিনি আপনি স্পষ্টরূপে এই নিয়ম করিয়াছেন, যথা ‘পাপী  
লোকেরা ও ঈশ্বর বিস্মৃত সর্বদেশীয় লোকেরা নরকে নিষ্ক্রিয়  
হইবেক।’ দায়ুদের ৯ গীত ১৭। আর “যে কেহ পুত্রকে না মানে,  
সে পরমায়ুর দর্শন পায় না, কিন্তু ঈশ্বরের ক্রোধপাত্র হইয়া  
থাকে।” যোহন ৩। ৩৬। পরমেশ্বর পাপকে ঘৃণা করেন, এই  
জন্যে মনুষ্যদের পাপ হইতে উদ্ধার হইবার উপায় করিয়াছেন,  
কিন্তু যে মনুষ্য তাঁহার প্রেমিক নিমন্ত্রণ অগ্রাহ্য করে, সেই তাহার  
ক্রোধের পাত্র হয়।

হায়! যে ব্যক্তি ঈশ্বরের এবং তাঁহার অভিষিক্ত পুত্রের  
ক্রোধপাত্র হয়, সে পরকালে কেমন দুর্দশাপ্রিত হইবে; তথাচ

খ্রীষ্টিয়ান নামধারী অনেক লোক আছে, যাহারা এই ভাবি বিষয়ে কিছুমাত্র মনোযোগ করে না। সুস্থ লোকদের চিকিৎসা করার প্রয়োজন নাই, কিন্তু অসুস্থ লোকদের প্রয়োজন আছে; তথাপি সহস্র ২ মনুষ্য পাপরোগগ্রস্ত হইয়াও আপনাদিগকে সুস্থ বোধ করে, এবং যে মহাচিকিৎসক তাহাদিগকে ঐ রোগ হইতে মুক্ত করিতে পারেন, তাহারা তাঁহার নিকটে যাইতে অসম্মত হয়।

কোন ২ লোক কেবল আলস্য প্রযুক্ত এমত করে। তাহারা বলে, আমরা পৃথিবীতে অনেকদিন বঁচিব, অতএব সংপ্রতি মন ফিরাইবার আবশ্যক নাই। তাহারা ফীলিকসের ন্যায় স্থির করে, আমরা অবকাশ পাইলে ধর্মের বিষয়ে মনোযোগ করিব; কিন্তু অবকাশের সময় উপস্থিত হইবার পূর্বে তাহাদের মৃত্যু উপস্থিত হয়। আহা! এইরূপ বিলম্ব করা নির্বোধের কর্ম।

সাংসারিক বিষয়ে এমত অজ্ঞানতা কেহই প্রকাশ করে না। বৈশাখ মাস উপস্থিত হইলে, চাষারা ভূমিতে চাষ করে, ও বীজ বপন করে; এবং যে জন বীজ বপন না করিয়া ঐ শুভ সময় বহিয়া যাইতে দেয়, এমত নির্বোধ ব্যক্তি এই জগতের মধ্যে প্রায় দৃষ্ট হয় না। কিন্তু পরিত্রাণের দিবস যে বহিয়া যায়, তাহাতে মনুষ্যেরা কিছু মাত্র ভয় না করিয়া অমনোযোগ প্রযুক্ত আপন ২ অমূল্য আত্মাকে নষ্ট করে।

আরও এমত কোন লোক আছে, যাহারা উক্ত মধুর ন্যায় ঈশ্বরের মঙ্গল সমাচার উত্তমরূপে জানিয়াও তাহা গ্রাহ্য করে না। পাপ যে বড় মন্দ ইহা তাহারা সুজ্ঞাত আছে, তথাপি তাহারা পাপ করে। তাহারা জানে যে খ্রীষ্টের নিকটে গেলে আমরা ক্ষমা পাইব, তথাপি তাহারা খ্রীষ্টের নিকটে যায় না। তাহাদের সম্মুখে নরক

আছে, তাহার প্রতি তাহারা চক্ষুঃমুদিয়া থাকে, এরূপে তাহারা শেষে আচম্ভিতে আপনাদের সর্বনাশ ঘটায়। যীশুখ্রীষ্টের মঙ্গল সম্বাদ তুচ্ছ করণাপেক্ষা আর ভারি দোষ নাই, কিন্তু হায়! কত জন এইরূপ পাপ প্রতিদিন করিয়া থাকে। “যে ব্যক্তি প্রভুর আজ্ঞা না জানিয়া প্রহারের যোগ্য কর্ম করে, সে অল্প প্রহার পাইবে; কিন্তু যে দাস প্রভুর আজ্ঞা জ্ঞাত হইয়াও প্রস্তুত থাকে না, এবং তাঁহার আজ্ঞানুসারে কর্ম করে না, সে অনেক প্রহার পাইবে। কেননা যাহাকে বাহ্যিকরূপে দত্ত হইয়াছে, তাহার নিকট হইতে বাহ্যিকরূপে লইতে হইবে।” লুক ১২। ৪৭। ৪৮। আহা! যদি লোকেরা জ্ঞানবান् হইয়া এই সকল কথা বুঝিত, ও আপনাদের শেষ দশা বিবেচনা করিত, তবে তাহাদের ইহকালে ও পরকালে পরম লাভ হইত।

## চতুর্থ অধ্যায়।

মধুর কবর দেওনের দুই দিবস পরে আমি আপন প্রতিজ্ঞানুসারে পুনর্বার তাহার মাতার গৃহে উপস্থিতা হইলাম। এই বার আমি ঈশ্বরের আশীর্বাদ দ্বারা ঐ দুর্ভাগ্য লোকেরদের কিঞ্চিৎ উপকার করিতে পারিয়া বড় সন্তুষ্টা হইলাম। বিশেষতঃ সেথায় গিয়া আমি দেখিতে পাইলাম, যে রাণী প্রসব বেদনায় অতিশয় ব্যাকুল হইতেছে। তাহার শাশুড়ী আমাকে দেখিয়া বলিল, বউ এক দিন এক রাত্রি পর্যন্ত এইরূপ অত্যন্ত যাতনা ভোগ করিতেছে, তথাপি যে খালাস হয় এমত কোন লক্ষণ দেখিতে পাই না।

রাণীর স্বামীর মৃত্যুর সময়ে যেরূপ গোলমাল হইয়াছিল, এখনও স্ত্রীলোকেরা সেইরূপ গোলমাল পুনর্বার করিতেছে; বিশেষতঃ দশ বারো জন মেয়ে আসিয়া রাণীর চারিদিগে দাঁড়াইতেছিল। যদি এক জন কথা কহে, তবে অন্য জন আর একটা কথা কহে, এক জন তাহাকে বসিয়া থাকিতে কহে, আর এক জন বলে, না না, তুমি হাঁটিয়া বেড়াও; এবং তৃতীয় জন কোন অজ্ঞান বুড়ির ওষধ আনিয়া তাহাকে খাওয়াইয়া দেয়। এই সকল বৃথা উপায়দ্বারা ছেল্যা শীত্র না জনিয়া বরং অনেক বিলম্ব হইতে লাগিল, তাহাতে রাণীর যন্ত্রণা অতিশয় বৃদ্ধি হইল।

এতদ্বিতীয়েরকে আমি আর এক বিষয়ে বড় দুঃখিতা হইলাম, অর্থাৎ যদ্যপি এই সকল লোকেরা নামে খ্রীষ্টিয়ান তথাপি ইহাদের মধ্যে এক অমূলক ধর্ম দেখিতে পাইলাম। অমূলক ধর্ম ইহাকে

বলা যায়, যথা; কোন কর্ম করিবার সময়ে যদি কেহ হাঁচে, তবে সে কর্মে প্রবর্ত হয় না; যদি যাত্রা কালীন টিকটিকীর রব শুনিতে পায়, তবে সে দিবস যাত্রা করে না; প্রত্যুষে উঠিয়া বানরের মুখ দেখে না, ও তাহার নাম উচ্চারণ করে না; চন্দ্ৰগ্ৰহণ কালীন কোন দ্রব্যাদি কাটে না; রোগ হইলে গলায় একটি মন্ত্রযুক্ত মাদুলি বাঁধে, ইত্যাদি। এইরূপ অনৰ্থক ব্যবহার কেবল মধুর পরিবারের মধ্যে দেখিলাম তাহা নহে, অনেক খ্রীষ্টিয়ানদের মধ্যে এই প্রকার ব্যবহার চলিত আছে। হে ধৰ্মাত্মা! এমত অজ্ঞান লোকদের মনের চক্ষুঃ প্রসন্ন কর, যেন তাহারা উক্ত অমূলক ও হাস্যজনক আদেশ সকলকে শয়তানের বিধি বোধ করিয়া একেবারে ত্যাগ করে।

রাণী দুই তিন মাস পূৰ্বে আপন শাশুড়ীর সাক্ষাতে এমত কথা বলিয়াছিল, যে গত রাত্রিতে একটা পেচা কিম্বা ভূতল পক্ষী ডাকিতে ২ আমার মাথার উপর দিয়া উড়িয়া গেল। এই কথা এখন তাহার শাশুড়ীর মনে পড়াতে সে বলিতে লাগিল, যদি এমত হয়, তবে সে পক্ষী ফিরিয়া না আইলে পোয়াতি প্রসব হইতে পারিবে না। এ কথাতে অন্য সকল স্ত্রীলোকেরা স্বীকার করিল, কেবল একজন বুড়ি ইহাতে সম্মতা না হইয়া বলিল, আমার বোধ হয় পেচাতে কোন ক্ষতি হয় না, কেননা একবার আমি পাঁচ সাত জন স্ত্রীলোকের সহিত উঠানে বসিয়াছিলাম, এমত সময়ে একটা পেচা আমাদের মাথার উপর দিয়া উড়িয়া গেল; তখন আমার ছোট ভাগিনীর প্রায় নয় মাস গৰ্ভ ছিল, এই জন্যে তাহার নিমিত্তে আমরা সকলে বড় ভাবিতা হইয়াছিলাম, কিন্তু তাহার কোন প্রকার ক্ষতি না হইয়া অল্পদিন পরে সে এক ঘণ্টা মাত্র দুঃখ পাইয়া এক পুত্র সন্তান প্রসব করিল।

ইহা শুনিয়া আর একজন স্ত্রীলোক বলিল, ও কথা আমি কখন বিশ্বাস করিব না। সকল লোকেরা জানে যে ঐ পক্ষী ফিরিয়া না আইলে পোয়াতি প্রসব হয় না; হয়তো সে ফিরিয়া আসিয়াছিল, কিন্তু তোমরা তাহাতে মনোযোগ করিলা না।

প্রথম বক্তা উত্তর করিল, না গো না, কখন ফিরিয়া আইসে নাই; আমাদের কি চক্ষুঃ ছিল না? এবং দিনের বেলা দুই প্রহরের সময়ে ছেল্যা হইল, তখন কি পেচা থাকে? কিন্তু রাণীর কি হইয়াছে, তাহা আমি সুন্দররূপে বলিতে পারি। অল্প দিন হইল সে পলাইয়া কালীপুরের কোন বুড়ির ঘরে ছিল, ঐ বুড়ি কোন মন্ত্রদ্বারা তাহাকে নির্দিতা করাইয়া তাঁহার গহনা সকল খুলিয়া লইয়াছিল; তাহার মন্ত্র না থাকিলে রাণী অবশ্য জাগিয়া উঠিত। অতএব আমার বোধ হয় সে ব্যক্তি ডাইনী, এবং রাণী যেন প্রসব হইতে না পারে, এই জন্যে সে তাহার প্রতি কোন কিছু করিয়া থাকিবে। পূর্ব কথা হইতে একথা আশ্চর্য হওয়াতে সকল স্ত্রীলোকেরা একত্র হইয়া বলিতে লাগিল, হাঁ ২, ইহা হইয়া থাকিবে বটে।

মধুর মাতা বার ২ বলিতেছিল, হায়; আমার পুত্রের ছেল্যাকে আমি কখন কোলে করিব? কিন্তু তার বউর কি গতি হয়, তাহাতে সে কিছুমাত্র ভাবিতা হইল না; শেষে প্রতিবাসিদের কথাদ্বারা সে বোধ করিল, যদ্যপি আমি বউর তত্ত্ব না করি, তবে ছেল্যা সুন্দ নষ্ট হইবে। এই জন্যে সে ডাইনীর বিষয় শুনিয়া কহিল, তবে আমি এক জন মানুষকে কালীপুর পাঠাইয়া দিই, সে ঐ বুড়ির পায়ে পଡ়িয়া প্রার্থনা করুক, যেন আমার বউর গর্ভের বন্ধন মুক্ত করিয়া দেয়।

এই কথাতে রাণী কাতর হইয়া আমার প্রতি ফিরিয়া বলিল, ও মেম সাহেব, আপনি কি আমার এ বিষয়ের কোন ঔষধ জানেন না? কালীপুর এখান হইতে দুই দিবসের পথ; অতএব সেথা হইতে মানুষ ফিরিয়া না আসিতে ২ আমি মারা পড়িব। ও মেম সাহেব, আপনি অনুগ্রহ করিয়া ইহাদিগকে বলুন, যেন ইহারা আমাকে আর জলপড়া ও তৈলপড়া না দেয়, কারণ তাহাতে আমার বমি হইতেছে, আর খাইতে পারিব না। এ কথা শুনিয়া একজন স্ত্রীলোক বলিল, না গো, তোমাকে আর পড়াতেলাদি দেওয়া যাইবে না, কেননা দেখিলাম তাহাতে কোন উপকার হইল না।

তখন আমি কহিলাম, এমত অনর্থক উপায়দ্বারা কাহারো কি কখন উপকার হইয়া থাকে? ইহা না করিয়া রাণীকে যদি কিছু খাইতে দেও, তবে বোধ করি ভাল হইতে পারে। এই কথাতে তাহার শাঙ্গড়ী উত্তর করিল, ভাল ২! তাহার খাওয়ার বিষয় পশ্চাং হইবে, প্রথমে আমাকে ছেল্যা দিউক। বুড়ির এমত বাক্য শুনিয়া আমি বড় রাগান্বিতা হইয়া বলিলাম, তুমি অতিশয় দুষ্টা ও নির্বোধ স্ত্রী, তোমার বউর মুখের প্রতি চাহিয়া দেখ, সে এখনি মৃচ্ছা যাইবে, তাহা হইলে তুমি কোথা হইতে ছেল্যা পাইবা?

পরে আমি প্রতিবাসিদের প্রতি ফিরিয়া বলিলাম, তোমাদের মধ্যে যদি কেহ একটু মাছের ঝোল আনিয়া দিতে পার, তবে বড় উপকার হয়। এই কথাতে একটি যুবতী স্ত্রী ঝোল আনিতে আপন গৃহে দৌড়িয়া গেল; কিন্তু সকল বুড়িরা মাথা লাড়িয়া বলিতে লাগিল, এই প্রকার রীতি ইংরাজ বিবিদের পক্ষে ভাল হইতে পারে, কিন্তু বাঙালিদের নিমিত্তে বাঙালিদের রীতি ভাল। পোয়াতিকে ঝোলটোল খাওয়াইলে সে অবশ্য মারা পড়িবে।

এমত সময়ে ঐ যুবতী স্ত্রীলোক ঝোল লইয়া ফিরিয়া আইল, তাহাতে আমি সে ঝোলের বাটি ধরিয়া রাণীকে পান করিতে দিলাম। রাণী ব্যগ্রতাপূর্বক তাহা সকল খাইয়া বলিল, মেম সাহেব, ইহাতে আমার বিষ্ণুর শক্তি হইল; এখন যদি উহারা কেবল আমাকে শুইতে দেয়, তবে বোধ করি আমি ভালুকপে ব্যথা খাইতে পারিব।

ঐ নির্বোধ স্ত্রীলোকেরা তাহাকে তিনঘণ্টা পর্যন্ত হাঁটু গাড়িয়া রাখিয়াছিল, তাহাতে সে সুতরাং শ্রান্তা হইয়া একেবারে বলহীনা হইয়াছিল; ইহা দেখিয়া আমি ধাইকে বলিলাম, ওগো ইহাকে কিঞ্চিৎকাল শুইতে দিলে কি ক্ষতি আছে? বিলাতে তো সকল স্ত্রীলোকেরা শুইয়া প্রসব হয়। এই কথাতে ধাই কিছু অসন্তুষ্টা হইয়া বলিল, বিলাতিয় বিবিদের এবং বাঙালি স্ত্রীলোকদের মধ্যে অনেক বিশেষ আছে; আপনি যদি ইংরাজি ধারামতে ইহাকে প্রসব করাইতে আসিয়াছেন, তবে তাহাই করুন; আমি তাহার ভাল মন্দ কিছুই জানি না। আমি উত্তর করিলাম, তাহাই হউক। এমত সময়ে কি করা কর্তব্য, এ বিষয়ে আমি সুন্দরুকপে সুশিক্ষিতা আছি, অতএব ঈশ্বরের আশীর্বাদ দ্বারা ইহার কোন ক্ষতি হইবে না।

এই কথা বলিয়া আমি রাণীকে বাম পার্শ্বে শোয়াইয়া এক ঘণ্টার মধ্যে তিন চারিবার তাহাকে কিছু তপ্ত দুঃখ পান করিতে দিলাম। পরে দেখিলাম যে ধাই তাহার গর্ভের উপরে একখানা কাপড় অতিশয় শক্তরূপে বাঁধিয়া রাখিয়াছিল, ইহা দেখিবামাত্র আমি সে বন্ধন খুলিয়া দিলাম, তাহাতে সকল স্ত্রীলোকেরা আমাকে বলিতে লাগিল, এমত করিলে ছেল্যা পুনর্বার উপরে সরিয়া

যাইবে। কিন্তু রাণী কহিল, না না, মেম সাহেব এ বিষয়ে ভাল জানেন, তিনি আপন ইচ্ছামত করুন।

এই রূপে কিছুকাল যাপন হইলে সকলেই জানিতে পারিল রাণীর প্রসবের সময় নিকট হইয়াছে; তাহাতে ধাই কিঞ্চিৎ প্রশংসা পাইবার আশা করিয়া বলিল, ও মেম সাহেব, আপনি যদি আমাকে অনুমতি দেন, তবে আমি এই দণ্ডে পোয়াতিকে খালাস করিয়া দিতে পারি। কিন্তু আমি বলিলাম, না না, তুমি তিনবার এইরূপ ঘাঁটিয়া রাণীকে কেবল অধিক যন্ত্রণা দিয়াছ; থাকিতে দেও, ঈশ্বর আপনি ইহাকে উদ্বার করিবেন। আমি ইহা বলিবামাত্র রাণীর একটি জীবন্ত কন্যা জন্মিল, তাহাতে আমার বড় আশ্চর্য বোধ হইল, কারণ সকল স্ত্রীলোকেরা মিলিয়া রাণীর যেরূপ অবস্থা করিয়াছিল তাহা দেখিয়া আমি অনুমান করিয়াছিলাম, যে অবশ্য তাহার মৃতসন্তান জন্মিবে। বাঙালি স্ত্রীলোকদের ছেল্যারা অনেকবার ধাইদের অজ্ঞানতা প্রযুক্ত গর্ভে নষ্ট হয়, তাহা আমি স্বচক্ষে দেখিয়াছি। কিন্তু সে যাহা হউক, ঈশ্বর রাণীর প্রতি প্রসন্ন হইয়া তাহাকে জীবৎ সন্ততি দান করিলেন।

রাণী প্রসব হইলে পর সকলে আমাকে অতিশয় প্রশংসা করত আশীর্বাদ করিতে লাগিল, এবং রাণীর শাশুড়ী আপন পুত্রের ছোট কন্যাকে ক্রোড়ে করিয়া তাহার পিতাকে স্মরণ করত ক্রন্দন করিতে লাগিল। তথাচ সেও আমাকে বলিল, ও মেম সাহেব, আপনি আমাদের মা বাপ, আপনি আমাদের রক্ষাকর্তা। কিন্তু আমি তাহাকে বলিলাম, এমত নয়, ঈশ্বর মহৎ অনুগ্রহ করিয়া তোমার বউকে যাতনা হইতে উদ্বার করিয়া এই সন্ততি দান করিলেন, অতএব তাঁহারই নামের ধন্যবাদ কর।

পরে আমি মনের মধ্যে ভাবিলাম, অনেক স্ত্রীলোক এখানে উপস্থিতা আছে, যদি ইহাদের সাক্ষাতে উক্ত অমূলক ধর্মের অর্থাৎ কুলক্ষণ ও সুলক্ষণ মান্য করণের বিষয় এখন কিছু উপদেশ দিই, তবে ভাল হইতে পারিবে; কারণ এই সকল ভাস্তিমূলক নির্বোধ কথা বিশেষরূপে স্ত্রীলোকদের মধ্যে চলিত আছে। তাহাতে আমি তাহাদিগকে বিনয়পূর্বক বলিলাম দেখ, তোমরা শ্রান্তিয়ান ধর্ম গ্রহণ করিয়াছ, অতএব দেবপূজকেরা যাহা মান্য করে, তাহা তোমাদিগের মান্য করা কর্তব্য নহে। বিশেষতঃ এই সকল কুলক্ষণ ও সুলক্ষণাদি মান্য করাতে ঈশ্বরের অপমান হয়। তোমরা যদি স্বীকার কর, যে পরমেশ্বর সর্বশক্তিমান्, ও তাঁহার হস্তে আমাদের প্রাণ আছে, তাহাতে তাঁহার অনুমতি ব্যতিরেকে কেহই নষ্ট হইতে পারে না; তবে একটি সামান্য পক্ষী গর্ভবতি স্ত্রীর মাথার উপর দিয়া উড়িয়া গেলে, তাহাতে তোমাদের এত ভয় জন্মে কেন? তোমরা বলিলা, পেচা ইহার উপর দিয়া উড়িয়া গিয়াছে, এই জন্যে পোয়াতি প্রসব হইতে না পারিয়া প্রসূতি ও ছেল্যা দুই জনেই মারা পড়িবে। তবে পেচা তোমাদের ঈশ্বর হইল, যেহেতু সে এক দিগে উড়িয়া গেলে মানুষের প্রাণ নষ্ট করে, এবং পুনর্বার ফিরিয়া আইলে প্রাণ রক্ষাও করিতে পারে। আর তোমাদের মধ্যে কেহ ২ বলিল, পোয়াতি কালীপুরের ডাইনী দ্বারা মারা পড়িবে। হায় ২; পরমেশ্বর কি এই দুষ্টা ব্যক্তির হস্তে আপন প্রজাদের প্রাণ সমর্পণ করিয়াছেন? এমত কুচিত্তা দূরে থাকুক। পরমেশ্বর জাঞ্জল্যমান ঈশ্বর, অতএব যে ব্যক্তি বলে ভূত কি পেত কি মনুষ্য কি পশু কি পক্ষী পরমেশ্বরের গৌরব ও পরাক্রম ও গুণবিশিষ্ট হয়, সেই ব্যক্তির ভারি শাস্তি হইবে। ঈশ্বর বিশেষরূপে শ্রীষ্টাশ্রিত লোকদের পিতা হন, অতএব যেমন সন্তানের কোন দুঃখ উপস্থিত হইলে সে যদি আপন দয়ালু পিতার নিকটে দুঃখ না

জানাইয়া পরের নিকটে রক্ষা যাওয়া করে, তবে পিতার অপমান ও দুঃখ অবশ্য জন্মিতে পারে; তেমনি তোমরা পরমেশ্বরকে সর্বাপেক্ষা উত্তম পিতা জানিয়া তাঁহাকে ত্যাগ করিয়া যদি কোন সৃষ্ট বস্তুকে ভয় কিম্বা মান্য কর, তবে তোমাদের প্রতি ঈশ্বরের ক্রোধ প্রজ্বলিত হইবে, ইহাতে সন্দেহ নাই। আরও একটি কথা বলিতে হয়, যাহারা এই সকল লক্ষণাদি মানে তাহারা সহস্র ২ বার ভ্রান্তিতে পতিত হয়। দেখ, আদ্য এই বিষয়ে তোমরা দুইটি প্রমাণ পাইলা। তোমাদের একজন প্রতিবাসিনী বলিল, যে আমার ভাগিনীর উপর দিয়া পেচা উড়িয়া গেলেও তাহার সন্তান স্বচ্ছন্দে জন্মিল। তদ্রপ রাণীও মন্ত্রাদি ব্যতিরেকে খালাস হইয়াছে। ফলতঃ আমি আপনার বিষয়ে তোমাদের সাক্ষাতে একটি প্রমাণ দিতে পারি। আমি যখন প্রথমে গর্ভবতী হইয়াছিলাম, তখন অতিশয় গ্রীষ্মকাল, এ প্রযুক্ত রাত্রে প্রায় নিন্দ্রা যাইতে পারিতাম না, অতএব আমি খড়খড়িয়ার নিকটে একখান খাট পাতিয়া তাহার উপরে শয়ন করিতাম, তথাপি প্রায় সমস্ত রাত্রি জাগিয়া থাকিতাম। এমন সময়ে প্রত্যেক রাত্রিতে একটা পেচা আসিয়া খড়খড়িয়ার উপরে বসিত তাহাতে যদি খড়খড়িয়া বদ্ধ থাকিত, তবে যতক্ষণ পর্যন্ত আমি তাহা খুলিয়া না দিলাম ততক্ষণ ঐ পক্ষী বাহিরে ছটফট করিত। কিন্তু এই রূপ হইলেও আমার কিম্বা আমার সন্ততির প্রতি কোন প্রকারে আপদ ঘটিল না। এই কথা যে সম্পূর্ণরূপে সত্য, ইহা আমি সাহসপূর্বক বলিতে পারি। অতএব যাহারা এই সকল জানিয়াও পেচাকে কিম্বা অন্য কোন কুলক্ষণকে ভয় করে, তাহারা অতিশয় নির্বোধ ও অজ্ঞান হয়। এই জন্যে আমি তাহাদিগকে বিনতি করিয়া বলি, তোমরা এমত নির্বোধ না হইয়া সকল ভ্রান্তি ত্যাগ করিয়া কেবল পরমেশ্বরের প্রতি ভয় ও বিশ্বাস রাখ।

আমি স্ত্রীলোকদিগকে এইরূপ উপদেশ দিয়া বিদায় হইলাম কিন্তু যাইবার পূর্বে ঈষৎ হাস্য করিয়া বলিলাম, সাবধান, আমি যেন পুনর্বার এই স্থানে আইলে প্রসব গ্রহে লোহা কিম্বা জুতা কিম্বা ঝাঁটা ইত্যাদি টাঙ্গান না দেখিতে পাই। আর ভূতের ভয় ত্যাগ করিয়া রাণীকে ও তাহার মেয়েটিকে অতিশয় যত্নপূর্বক রাখিবা।

পরে আমি বাটী যাইবার সময়ে একটি ক্ষুদ্র পরিপাটি খড়ুয়া ঘরের নিকট দিয়া যাইতে ২ স্পষ্টরূপে শুনিতে পাইলাম, যে একজন ছেল্যা ধর্মপুস্তকের মধ্যে ঘোহনের ছয় অধ্যায় পড়িতেছে। আমি ঈশ্বরের বাক্য সর্বদা প্রিয় জ্ঞান করি; বিশেষতঃ ঐ ছোট ছেল্যার মৃদু রব আমার কর্ণে তখন এমত মিষ্ট বোধ হইল, যে আমি তৎক্ষণাত্ম ঘরের দ্বার কিঞ্চিৎ খুলিয়া জিজ্ঞাসিলাম, ওগো, আমি কি ভিতরে যাইতে পারি? কোন ব্যক্তি ভিতর হইতে উত্তর করিল, আসুন! তাহাতে আমি গৃহের মধ্যে প্রবেশ করিয়া একজন অতি বৃদ্ধা স্ত্রীলোককে দেখিলাম; তাহার চুল নিতান্ত পাকা, এবং তাহাকে বড় দুর্বল বোধ হইল। সে আমাকে দেখিবা মাত্র উঠিয়া দাঁড়াইল, পরে সেলাম করিয়া বলিল, মেম সাহেব, আমার নিকটে কি আপনকার কোন প্রয়োজন আছে?

আমি উত্তর করিলাম, না, এমত কোন প্রয়োজন নাই; কিন্তু বাহির হইতে ধর্মপুস্তকের কথা শুনিয়া আমি বোধ করিলাম, যদ্যপি এই গৃহে প্রবেশ করি তবে ঈশ্বর ভয়কারী কোন লোকদের সাক্ষাৎ পাইব, এবং আমার প্রিয়তম ত্রাণকর্তার বিষয়ে অবশ্য কিছু কথোপকথন করিতে পারিব।

ইহা শুনিয়া ঐ বৃদ্ধা স্ত্রী কহিল, যদি এমত হয় তবে মেম সাহেব আপনি বসুন; কেননা ধর্মপুস্তকে লেখা আছে “আতিথ্য

ব্যবহারেতে কেহ কেহ না জানিয়া দিব্য দৃতগণকেও অতিথি  
করিয়াছে।” ইব্রীয় ১৩। ৩।

এই দিনহীনা বাঙালি স্ত্রীলোকের মুখে এরূপ উত্তম সভ্যতার  
কথা শুনিয়া আমি মনের মধ্যে ভাবিলাম, এমত শিষ্টাচার নিতান্তই  
শ্রীষ্টধর্মের ফল; কেননা সে ধর্মের এমত এক গুণ আছে, যে  
তদ্বারা যে কোন দেশে হউক যাহারা তাহার সত্যরূপে অবলম্বন  
করে, তাহারা পূর্বে অসভ্য ও অজ্ঞান হইলেও তৎপরে প্রেমী ও  
দয়ালু ও সন্তানী হইয়া উঠে।

আমি গৃহে প্রবেশ করিবামাত্র উক্ত ছোট পাঠক ধর্মপুস্তক  
রাখিয়া শীত্র পলায়ন করিল, তাহাতে আমি প্রথমে তাহাকে  
চিনিতে পারিলাম না বটে; কিন্তু সে যখন একখানি চৌকি হাতে  
করিয়া ফিরিয়া আইল, তখন দেখিলাম যে সে ফুলমণির কন্যা  
সত্যবতী। বুড়ির গৃহে চৌকি নাই, ইহা জানিয়া সে দৌড়িয়া  
আমার নিমিত্তে আপন বাটী হইতে পূর্বোক্ত পুরাতন চৌকি  
আনিল।

তাহাতে আমি তাহাকে বলিলাম, সত্যবতী, তুমি যে এই বৃন্দা  
স্ত্রীলোকের নিকটে ধর্মপুস্তক পাঠ কর, সে বড় ভাল কর্ম, আমি  
তাহাতে বড় সন্তুষ্টা আছি। কিন্তু সত্যবতী এই প্রশংসা শুনিয়াও  
কিছুমাত্র অহঙ্কার না করিয়া কহিল, মেম সাহেব, প্যারী দিদি চক্ষে  
আর ভাল দেখিতে পায় না, এই জন্যে আমি কখন ২ ইহার  
নিকটে ধর্মপুস্তক পড়ি। খেলা অপেক্ষা আমি পড়া বড় ভালবাসি।

তখন প্যারী কহিল, হ্যাঁ মেম সাহেব, সত্যবতী বড় ভাল  
মেয়ে; এই আমার অনেক কর্ম করিয়া দেয়, এই সকলের জন্যে

ঈশ্বর ইহাকে অবশ্য পুরস্কার দিবেন। মেম সাহেব, ইহার মাতা ইলীশেবার ন্যায় নির্দোষরূপে পরমেশ্বরের সমস্ত আজ্ঞা ও বিধি পালন করিয়া ঈশ্বরের দৃষ্টিতে ধার্মিকা আছে। সে আপন মেয়েকে এই সুশিক্ষা দিয়াছে, যে জন দরিদ্রের নিমিত্তে ভাবনা করে সেই ধন্য।

ধর্মপুস্তকের বাকেয়ের বিষয়ে এই বৃন্দা স্ত্রীলোকের জ্ঞান দেখিয়া আমি চমৎকৃতা হইলাম; কিন্তু পশ্চাত্ তাহার সহিত বার ২ আলাপ করিয়া জানিতে পারিলাম, যে প্যারী সেই বাক্য আপন আহার স্বরূপ জ্ঞান করিয়া দিবারাত্রি কেবল সে সকল বিষয় চিন্তা করিত।

হায় ২! এতদেশীয় খ্রীষ্টিয়ান স্ত্রীলোকদের মধ্যে অনেকেই ধর্মপুস্তক না পড়িয়া অবহেলা করে; এ বড় দুঃখের বিষয় বটে! তাহারা যদি ধর্মশাস্ত্রের মনোরঞ্জক ইতিহাস পড়িত, তবে তাহাদের বিস্তর আমোদ ও ধর্মজ্ঞান জন্মিত; এবং তাহারা যদি ঐ সকল ইতিহাস ভালুকপে জানিত, তবে আপন সন্তানদিগকে ভূত ও রাক্ষসাদির বিষয়ে অনর্থক গল্প না বলিয়া ঐ সুন্দর হিতজনক বিবরণ বর্ণনা করিতে পারিত। আর তাহারা দায়ুদের গীত ও ভবিষ্যত্বকৃতগণের লিপিদ্বারা দুঃখের সময়েও সান্ত্বনা প্রাপ্তা হইত; বিশেষতঃ যীশুখ্রীষ্টের চরিত্র ও প্রেরিতদের পত্র পড়িয়া অতি হিতজনক নির্দর্শন ও শিক্ষা পাইত।

অতঃপর প্যারী আমাকে বলিল, মেম সাহেব, আপনি যখন গৃহে আসিয়া উপস্থিতা হইয়াছিলেন, তখন আমরা ধর্মপুস্তকের যে পদটি পড়িতেছিলাম, তাহা ভালুকপে বুঝিতে পারি নাই; অতএব আপনি যদি অনুগ্রহ করিয়া তাহা আমাকে বুঝাইয়া দেন, তবে আমার বড় উপকার হয়; সে বাক্য এই, যথা “যে ব্যক্তি আমার

মাংস ভোজন করে এবং আমার রক্ত পান করে, সে আমাতে বাস করে, এবং আমিও তাহাতে বাস করি।” যোহন ৬। ৫৬। দেখ, মেম সাহেব, ইহুদীয়েরা যেমন বচসা করিয়া বলিল, এ ব্যক্তি ভোজনের জন্যে আপন মাংস আমাদিগকে কেমন করিয়া দিবে? আমি তেমনি বলি না; কেননা আমি জানি যে যীশু এ কথাই দৃষ্টান্তভাবে বলিলেন; তথাচ তাহার যথার্থ অর্থ কি, তাহা আমি ভালুকপে বুঝিতে পারি নাই।

এই কথা শুনিয়া আমি মনের মধ্যে ঈশ্বরের নিকটে এই প্রার্থনা করিলাম, হে ঈশ্বর! উক্ত বাক্য সাংসারিক ব্যক্তির বোধগম্য নয়, কিন্তু তোমার বৃক্ষ দাসীকে যেন তাহা স্পষ্টরূপে বুঝাইয়া দিতে পারি, এমত জ্ঞান ও শক্তি আমাকে প্রদান কর। তাহার পর আমি বুড়িকে বলিলাম, দেখ, আত্মার মধ্যে যদি ধর্মকে বাঁচাইয়া রাখিতে চাহি, তবে তাহাকে আহার দিতে হইবে, এবং যে আত্মার পুনর্জন্ম হইয়াছে, তাহার কেবল এক আহার মাত্র আছে, সেই আহার যীশুখ্রীষ্ট। ঈশ্বরের সন্তানদের এইরূপ খাদ্য না হইলেই নয়, তাহা পাইতে তাহাদের লালসা আসে, এবং যদি তাহারা তাহা খাইতে না পায়, তবে দুর্বল ও দুঃখিত হইয়া নিরাশ হয়। কিন্তু এমত দুর্ঘটনা হইতে উত্তীর্ণ হইবার নিমিত্তে যীশুর নিকটে গিয়া বিশ্বাসদ্বারা তাঁহাকে সম্পূর্ণরূপে গ্রহণ করা আবশ্যিক। আত্মা শরীরের মত নয়, ফলতঃ শরীর মুখদণ্ডাদির দ্বারা ভোজন করে, কিন্তু আত্মা প্রার্থনা ও নৃতা ও ধ্যান ও বিশ্বাস ও কৃতজ্ঞতা এবং প্রেমদ্বারা খ্রীষ্টকে গ্রহণ করিয়া তৃপ্ত হয়। যদি কোন মনুষ্য আসিয়া আমাদিগকে বলে, অমুক স্থানে অদ্য বড় একটি ভোজ প্রস্তুত হইয়াছে, এবং আমরা যদি গিয়া সেই ভোজ আহার না করিয়া কেবল তাহার প্রতি দৃষ্টি করি, তবে আমরা

তাহাতে কোনরূপে তৃপ্তি হইব না। খাদ্য- দ্রব্য ভোজন না করিলেও তাহা পরিপাক না হইলে, তদ্বারা শরীরের কিছুমাত্র পুষ্টি হয় না; সেই মত খীঁষ্টকে ভক্তিপূর্বক অন্তঃকরণের মধ্যে গ্রহণ এবং বিশ্বাসদ্বারা তাঁহার মাংস ও রক্তকে নিত্য ২ ভোজন ও পান না করিলে আমাদের আত্মা ধর্মে বৃদ্ধি পাইতে কিঞ্চিৎ স্থির থাকিতে পারেনা।

এই সকল কথা শুনিয়া প্যারী বলিল, মেম সাহেব, এখন আমি যীশুশ্রীষ্টের ঐ বাক্যের অর্থ ভালরূপে বুঝিতে পারিয়াছি, এবং তদ্বারা আমার মন বড় আহ্লাদিত হইতেছে, কারণ আমি নিশ্চয় জানিলাম, যে আমি কেবল বুদ্ধির সহিত খীঁষ্টের উপর বিশ্বাস করিয়াছি তাহা নয়, কিন্তু তাঁহাকে অন্তঃকরণের মধ্যে গ্রহণ করিয়া তাঁহার বাক্যদ্বারা নিত্য ২ প্রতিপালিতা হইতেছি। প্যারী আরও বলিল, ও মেম সাহেব, আমি কখন ২ সমস্ত দিন এই ক্ষুদ্র গৃহে একা বসিয়া থাকি; সে সময়ে আমার প্রিয় ত্রাণকর্তা যদি আমার নিকটে না থাকিতেন, তবে আমার কেমন ভারি দুঃখ হইত। কিন্তু তিনি আমাকে কখন ত্যাগ করেন না, বরং আমি সর্বদা তাহার সহিত আলাপ করিতে পারি; এইজন্যে সুদৃশা বা দুর্দশা হউক, আমি নিরন্তর মনের সুখ ও সান্ত্বনা ভোগ করি।

ইহা শুনিয়া আমি বলিলাম, প্যারী, যদি এমত হয়, তবে আমি অনেকবার তোমার সহিত সাক্ষাৎ করিতে আসিব, কারণ আমি নিশ্চয় জ্ঞাত হইলাম, যে খীঁষ্টেতে আমরা দুইজনে ভগিনীস্বরূপ হইয়াছি, এবং দুইজনে মৃত্যুর পরে এক স্বর্গের অধিকারিণী হইব। পরে আমি তাঁহাকে জিজ্ঞাসিলাম, হে প্যারী, তোমার কি কোন কুটস্বাদি নাই? বোধ হয়, দরিদ্রতা প্রযুক্ত তুমি বড় ক্লেশ পাইয়া থাক।

তাহাতে সে উত্তর করিল, না মেম সাহেব, এমত নয়। আমার আত্মীয় কুটুম্ব কেহ নাই বটে, কিন্তু কলিকাতায় একজন সাহেব আছেন, তিনি আমাকে এই ক্ষুদ্র গৃহখানি বাঁধিয়া দিয়াছেন, এবং প্রতিমাসে তিন টাকা করিয়া পাঠাইয়া দেন। আমি তাঁহাকে শিশুকালে দুঁপ্তি পান করাইয়াছিলাম। আমার নিজ গ্রাম এখান হইতে অনেক দূর, কিন্তু এই স্থানে কিরণপে আইলাম তাহা আপনি শুনুন।

এখন প্রায় বাওয়ান্ন বৎসর হইল আমি আপন দেশ হইতে আসিয়া কলিকাতায় এক ইংরাজের বাটীতে ধাইর কর্ম করিতে লাগিলাম। সে পরিবারের মধ্যে একজন বড় ধার্মিকা মিস বাবা ছিলেন। তিনি আমাকে খ্রীষ্ট ধর্মের বিষয়ে অনেক সুশিক্ষা দিতেন, তাহাতে আমি ক্রমে ২ বোধ করিলাম যে খ্রীষ্ট ধর্ম সত্য বটে; তথাচ হিন্দু লোকদের সাক্ষাতে ইহা স্বীকার করিতে এবং জাতি ত্যাগ করিতে আমার বড় লজ্জা হইল। যে শিশু বাবাকে আমি দুঁপ্তি দিতাম সে দেড় বৎসরের হইলে আমার মেম সাহেব আমাকে বলিলেন, ও ধাই, আমার পুত্র বড় হইয়াছে, অতএব আগত মাসে আমি তোমাকে বিদায় করিব।

আমাকে যাইতে হইবে, ইহা শুনিয়া আমি বড় দুঃখিতা হইলাম, কারণ আমার জনি বাবাকে আমি অতিশয় প্রেম করিতাম। সেই সময় অবধি আমি সমস্ত দিন তাহার নিকটে থাকিয়া তাহাকে নানা প্রকার খেলা করাইতাম ও ছবি দেখাইতাম, তাহাতে সে পূর্বাপেক্ষাও আমার প্রিয় হইল। আর আমি ভাবিতে লাগিলাম, গৃহে গেলে আমাকে পুনর্বার প্রতিমাপূজা করিতে হইবে; কিন্তু প্রতিমাপূজা নিতান্ত অনর্থক তাহা আমি জানিতে পারিয়াছিলাম, অতএব আমার ভয় হইল তাহা করিলে কি জানি

ঈশ্বর আমাকে একেবারে নষ্ট করিবেন। এই সকল মনের মধ্যে বিচার করিয়া আমার বড় ভাবনা জন্মিতে লাগিল।

এমত সময়ে, এক দিবস আমার শিশু বাবার উলাউঠা রোগ হইল, তাহাতে তাহাকে অনেক প্রকার ঔষধাদি দেওয়া গেল, তথাপি রোগের প্রতিকার হইল না, এবং সন্ধ্যাকালে ডাক্তর সাহেবে বলিলেন, ছেল্যার বাঁচিবার কিছুমাত্র ভরসা নাই। ও মেম সাহেব, এই কথা শুনিয়া আমার হৃদয় বিদীর্ণ প্রায় হইল। সে সময়ে আমি হিন্দু দেবতাগণের নাম উচ্চারণ না করিয়া কেবল শ্রীষ্টিয়ানদের ঈশ্বরের নিকটে উচ্চেঃস্বরে প্রার্থনা করিলাম, যেন তিনি আমার প্রিয়তম বাবাকে রক্ষা করেন।

পূর্বোক্ত মিসি বাবা ইহা শুনিয়া আমাকে বলিলেন, ধাই, তুমি যদি কিছু তাড়নার জন্যে মানুষের সাক্ষাতে যীশুখ্রীষ্টের ধর্মাস্তীকার করিতে ভয় কর, তবে এখন দুঃখের সময়ে ঈশ্বর যে তোমার প্রার্থনা শুনিবেন, ইহা কি প্রকারে ভরসা করিলা? এই কথা সেই সময়ে উপযুক্ত হওয়াতে ধর্মাত্মার পরাক্রম দ্বারা আমার শোকাকুল মনে শক্তরূপে লাগিল, তাহাতে আমি সেই দণ্ডে হিন্দু আয়া এবং বেহারার সাক্ষাতে উচ্চেঃস্বরে বলিলাম, হে আমার ঈশ্বর! আমি তোমাকে বিশ্বাস করিয়া শ্রীষ্টিয়ান হইলাম, অতএব এখন আমার প্রার্থনা শুন, কারণ তুমি আপন সন্তানদের প্রার্থনা শুনিতে অঙ্গীকার করিয়াছ। সেই সময় অবধি আমার বাবা সুস্থ হইতে লাগিল, এবং আমিও সেই অবধি আপনার অঙ্গীকার পালন করিলাম।

এই কথাতে ঐ বৃন্দা স্ত্রীলোকের চক্ষুঃ জলেতে পরিপূর্ণ হইলে সে আরও কহিল, হাঁ! মেম সাহেব, সেকাল অবধি আমি পঞ্চাশ

বৎসর পর্যন্ত খীঁষ্টের সেবা করিয়া আসিতেছি। তাঁহার নামের জন্যে আমি আপন পিতা ও মাতা ও স্বামী এবং তিন জন প্রিয়তম সন্তানকে ত্যাগ করিয়াছি; কিন্তু তাহাদের বিরহে অদ্যাবধি আমি কখন খেদ করি নাই, কেননা যীশু পরিবার হইতেও ভাল; তিনিই আমার সকল প্রয়োজনীয় দ্রব্য যোগাইয়াছেন।

পরে জনি বাবা সম্পূর্ণরূপে সুস্থ হইলে আমি মেম সাহেবের নিকট বলিলাম, আপনি অনুগ্রহ করিয়া আমার স্বামীকে ডাকাইয়া বলুন, তোমার স্ত্রী খীঁষ্ট ধর্ম অবলম্বন করিতে নিতান্ত মানস করিয়াছে। অনন্তর মেম সাহেব সেইরূপ করিলেন, কিন্তু আমার স্বামী তাহা শুনিয়া বিশ্বাস না করিয়া বলিল, আমার স্ত্রী কোথায়? এ কথা সত্য কি মিথ্যা, তাহা আমি তাহার নিজ মুখে শুনিব। তখন আমি বড় ভয় পাইয়া তাহার সম্মুখে গেলাম, কিন্তু কিঞ্চিৎ পরে ঈশ্বর আমাকে সাহস ও অনুগ্রহ প্রদান করিলেন, তাঁহাতে আমি স্পষ্টই কহিলাম, হাঁ গো, আমি বিবেচনা করিয়া দেখিয়াছি যে খীঁষ্ট ধর্ম সত্য, অতএব আমি সেই ধর্ম গ্রহণ করিব।

হায়! এই কথা শুনিয়া তাঁহার অতিশয় রাগ হইল, তাহাতে তিনি বলিলেন, তোর ধর্ম বিষয়ে কিছুই চেষ্টা নাই, কেবল তুই বিলাতি ভাতার করিতে চাস্। এই কথা বলিয়া তিনি আমাকে কত শাপ ও গালাগালি দিতে লাগিলেন, পরে আমার মুখে থুথু দিতে আমার সন্তানদিগকে বলিয়া দিলেন; কিন্তু তাহারা তাহাদের পিতা অপেক্ষা কিঞ্চিৎ নতুন হইয়া আমার গলা ধরিয়া কাঁদিতে লাগিল। একজন বলিল ও মা! খীঁষ্টিয়ান হইও না, তোমার জাতি গেলে কেহ তোমার সঙ্গে বসিয়া খাইবে না। আর একজন বলিল, মা, আজি তোমার জন্যে আয়ি বড় উত্তম পিঠা গড়িয়া রাখিবেন; কেননা তিনি কহিলেন, মেম সাহেব যখন তোমাদিগকে ডাকিয়া

পাঠাইয়াছেন, তখন তিনি অবশ্য তোমাদের মাতাকে বিদায় দিবেন। ও মা, সে পিঠা তোমাকে খাইতে হইবে; আমাদের সঙ্গে চল মা! চল।

স্বামীর সকল শক্ত কথা ও নিন্দা আমি স্বচ্ছন্দে সহ্য করিতে পারিয়াছিলাম, কিন্তু সন্তানদের এরূপ প্রেমিক ব্যবহার দেখিয়া আমার মন অতি ব্যাকুল হইল। আমি একবার মনে করিলাম, যদি ঘরে যাইয়া স্বামীর সাক্ষাতে ঠাকুর পূজা করি, ও সন্তানদিগকে গোপনে খ্রীষ্টের বিষয়ে শিক্ষা দিই, তবে তাহারা বয়ঃপ্রাপ্ত হইলে আমি সন্তান সুন্দর খ্রীষ্টিয়ান হইতে পারিব। কিন্তু ধর্মাত্মা দয়ালু হইয়া শয়তানের এই কুমন্ত্রণা আমার মন হইতে দূর করিলেন, তাহাতে আমি সাহসপূর্বক সন্তানদিগকে বলিলাম, আমি তোমাদের সহিত যাইতে প্রস্তুত আছি, কিন্তু আমি ঠাকুর পূজা করিতে পারিব না। আমি খ্রীষ্টিয়ান হইব, তাহা হইলে বোধ হয় তোমাদের পিতা আমাকে কখন গৃহে লইয়া যাইবেন না।

আমার স্বামী এই কথা শুনিয়া আরও রাগান্বিত হইয়া বলিলেন, তোকে আর কে লইয়া যাইবে? তোর মৃত্যু হইলেই আমার প্রাণ জুড়ায়। পরে তিনি ছেল্যাদের হাত ধরিয়া তাহাদিগকে টানিয়া লইয়া গেলেন। মেয়্যাটি আমার নিকটে থাকিতে বড় ইচ্ছা করিয়া আমার গলা ধরিয়া কাঁদিতে লাগিল, কিন্তু তাহার পিতা আমাকে ঠেলে ফেলিয়া আমার কোল হইতে তাহাকে কাড়িয়া লইলেন। সেই দিন অবধি আজ পর্যন্ত তাহাদের মধ্যে আমি কোন একজনের দর্শন পাই নাই।

ও মেম সাহেব, আমি আর কি বলিব? দশ বারো দিন পর্যন্ত আমি প্রায় হতজ্ঞান হইয়া আহারাদি ত্যাগ করিয়াছিলাম, তাহাতে

সে সময়ে যদি মেম সাহেবের পরিবার আমার প্রতি প্রেমিক  
ব্যবহার না করিতেন, তবে বোধ হয় আমি শয়তানের ফাঁদে  
পতিতা হইয়া আপন ছেল্যাদের নিকটে ফিরিয়া যাইতাম। কিন্তু  
আমার মেম সাহেব ও মিসি বাবা অনেক প্রবোধ দিয়া আমাকে  
সান্ত্বনা করিলেন, তাহাতে কিছুদিন পরে প্রভুর মহা অনুগ্রহদ্বারা  
আমার মন সুস্থির হইলে আমি খ্রীষ্টিয়ান মণ্ডলীতে গৃহীতা হইলাম।

পরে আমাদের মিসি বাবা একজন পাদরী সাহেবকে বিবাহ  
করিলে আমি তাঁহার নিকটে প্রায় পঁচিশ বৎসর পর্যন্ত আয়ার কর্ম  
করিলাম। তাহার পর আমি যে শিশুবাবাকে দুঃখ পান  
করাইয়াছিলাম, তিনি যুবা হইয়া বিলাত হইতে ফিরিয়া আসিয়া  
এক উচ্চ পদে নিযুক্ত হইলেন; তথাচ তিনি আপন ধাইকে ভুলিয়া  
গেলেন না, বরং তাঁহার বিবাহ হইলে তিনি আমাকে আপন গৃহে  
লইয়া গেলেন, এবং আমার সাক্ষাতে তাঁহার সাতটি সন্তান  
জন্মিল।

দুই বৎসর হইল তিনি আমাকে বলিলেন, ধাই, এখন তুমি  
অতিশয় বৃদ্ধা হইয়াছ, তোমাকে আর কর্ম করিতে হইবে না।  
অতএব বোধ হয় তোমাকে কোন খ্রীষ্টিয়ান লোকদের নিকটে  
বসতি করিতে দিলে ভাল হয়, কেননা তোমার পীড়াদি হইলে  
তাহারা তোমার প্রতি প্রেমিক ব্যবহার করিয়া তোমার সেবা  
করিবে। আমি এই কথায় স্বীকৃতা হইলাম, তাহাতে আমার বাবা  
সাহেব আমাকে এস্থানে আনিয়া এই ঘরখানি বাঁধাইয়া দিলেন,  
এবং পাদরী সাহেবের নিকটে সবিশেষ জানাইয়া তাঁহার সমীপে  
আমাকে সমর্পণ করিয়া গেলেন।

পাদরী সাহেবের মেম আমার প্রতি বড় দয়া প্রকাশ করেন। বাবা সাহেব যে তিনটি টাকা আমার জন্যে পাঠাইয়া দেন, তাহা তিনি মাঝে ২ আপনি আমাকে দিতে আইসেন, এবং আমাকে অনেক প্রবোধ ও সান্ত্বনার কথা কহেন। আর ফুলমণি ও তাহার স্বামী ও ছেল্যারা আমার প্রতি যেরূপ প্রেমিক ব্যবহার করে, তাহা আমি প্রায় বর্ণনা করিতে পারি না। সত্যবতীর পিতা আমাকে মা বলে, ও ছেল্যারা আমাকে দিদি বলে; ইহা যে নামমাত্র তাহাও নয়, বরং তাহারা গর্ভজাত পুত্র ও কন্যার ন্যায় আমার প্রতি স্নেহ করে।

আমার বাবা সাহেব বায়ু সেবনার্থে একবার পশ্চিম দেশে যাইতেছিলেন, তাহাতে তিনি আমাকে দেখিতে আইলেন, এবং এই ক্ষুদ্র ঘরে অনেকক্ষণ বসিয়া আমার সহিত ধর্মের বিষয়ে কথোপকথন করিলেন, ও বিদায় হইবার সময়ে তিনি প্রার্থনা করিয়া গেলেন।

এই সকল কথা শেষ হইলে প্যারী আরও আমাকে বলিল, মেম সাহেব আপনি যদি আজি যাইবার পূর্বে একটি ক্ষুদ্র প্রার্থনা করেন, তবে আমি বড় আহ্বানিত হই। আমি এই কথাতে একেবারে সম্মতা হইলাম, তাহাতে আমরা দুই জনে ঈশ্বরের সমুখে হাঁটু পাতিয়া প্রার্থনা করিলাম। প্রার্থনার মধ্যে আমি এই নিবেদন করিলাম, হে প্রভো! ইহার পরে আমাদের দুই জনের পরস্পর যে আলাপ হইবে, তাহাতে তুমি আশীর্বাদ দেও, যেন তদ্বারা আমাদের উভয়ের ধর্মবৃদ্ধি হয়।

প্রার্থনা হইলে পর প্যারী উক্ত কথা মনে করিয়া বলিল, হে মেম সাহেব এ দরিদ্রা বুড়ির গৃহে কখন ২ আসিয়া ইহার সহিত

ধর্মের বিষয়ে কথা কহিবেন, ও ইহাকে শাস্ত্র বুকাইয়া দিবেন, আপনি যদি এমত মানস করিয়াছেন, তবে আমার কত বড় সৌভাগ্য! এমন হইলে আমি দায়ুদ রাজার ন্যায় বলিতে পারিব, “আমার আশীর্বাদ রূপ পানপাত্র উথলিয়া পড়িতেছে।” ২৩ গীত।

খ্রীষ্টের এই বৃন্দা সেবিকা আপনার মনোরঞ্জক ইতিহাস আমাকে যেরূপে কহিয়াছিল, সেইরূপে আমি লিখিয়াছি, এবং আমার এ বিষয়ে আর কিছু বলিবার কোন আবশ্যক নাই। আমি সে দিবসে তাহার নিকটে যে প্রকার প্রেমভাবে বিদায় হইলাম, তাহা পাঠকবর্গেরা স্বচ্ছন্দে অনুমান করিতে পারিবেন। বালুকাময় অরণ্যেতে তৃষ্ণিত ও পথশ্রান্ত পথিক জন যেমন জলস্ন্তোত পাইয়া তৃপ্ত হয়, তদ্রূপ আমিও এই মিথ্যা দেবগণের অন্ধকারময় রাজ্যের মধ্যে এমত ধর্মরূপ উজ্জ্বল দীপ্তি দেখিয়া অতিশয় আনন্দিতা হইলাম, এবং তৎক্ষণাত্ম আমার মন তাহার প্রতি আসক্ত হইয়া প্রেমরজ্জুদ্বারা বদ্ধ হইল। আহা! আমরা যদি খ্রীষ্টীয় লোকদের প্রতি এই রূপ আকর্ষিত হই, এবং যে ব্যক্তিতে আমাদের স্বর্গস্থ পিতার সাদৃশ্য দেখিতে পাই তাহাকে যদি স্নেহ করি, তবে তদ্বারা সুন্দররূপে জানা যায় যে আমরাও খ্রীষ্টের লোক বটে। কিন্তু যদি খ্রীষ্টের সেবকদের প্রতি আমাদের ক্রোধ, দ্বেষ ও হিংসা থাকে, তবে আমরা কোন প্রকারে ঈশ্বরের লোক নহি। সংসারের মধ্যে ভাই ভগিনীরা আপনাদিগকে এক পিতার সন্তান সন্ততি জানিয়া পরস্পর প্রেম করে, তদ্রূপ সত্য খ্রীষ্টিয়ানেরা এক ঈশ্বরকেই পিতা বলিয়া এক ব্রাহ্মকর্ত্তাকেই জ্যেষ্ঠ ভাতারূপ জ্ঞান করিয়া প্রেম করঢক।

খীষ্টিয়ান লোকদের পরম্পর যে বন্ধুতা জন্মে, সকল সাংসারিক প্রীতি হইতে সে বন্ধুতা শ্রেষ্ঠ, কেননা সেই প্রীতি কেবল ইহকালের জন্যে না হইয়া পরকালে স্বর্গেতে আরও দৃঢ় হইবে। বৃদ্ধা প্যারীর প্রতি আমার এইরূপ প্রেম জন্মিয়াছিল, এবং অল্প দিনের মধ্যে আমরা দুইজনে স্বর্গরাজ্যে একত্র বসিয়া আপন ত্রাণকর্তার উদ্দেশে গান গাইব, ইহা নিশ্চয় বোধ করিয়া আমার মন অতিশয় আনন্দযুক্ত হইল।

## পঞ্চম অধ্যায়।

উক্ত ঘটনার কিছুকাল পরে আমি একদিন করণার বাটীতে পুনর্বার যাইতে মানস করিলাম। ইহার মধ্যে তাহার বিষয়ে নিতান্ত বিস্মৃতা ছিলাম এমত নয়, বরং তাহার ভাঙ্গা ঘর ও মলিন বস্ত্রাদি প্রায় প্রতি দিবস আমার মনে পড়িলে আমি নিত্য ২ দয়ার সিংহাসনের সমুখে তাহাকে স্মরণ করিয়া প্রার্থনা করিতাম, যেন ঈশ্বর তাহার মন ফিরাইয়া তাহাকে সুপথে আনেন। করণার দুঃখ যাহাতে শেষ হয়, আমি এমত একটি উপায় চেষ্টা করিতেছিলাম, এই নিমিত্তে আমি তাহার নিকটে হঠাৎ না গিয়া কিঞ্চিৎ বিলম্ব করিলাম। তাহার ছোট পুত্র নবীনের যে প্রকার আচার ব্যবহার দেখিয়াছিলাম, তদ্বারা আমি বোধ করিলাম, যদি কেহ তাহাকে সুশিক্ষা দিয়া বাধ্য রাখে, তবে কি জানি সে চতুর ও উত্তম বালক হইয়া উঠিতে পারে। আমি লোকদের মুখে শুনিয়াছিলাম করণার এক জন বড় সন্তানও আছে, অতএব মনে করিলাম, যদ্যপি এই দুই জন বালককে কোন কর্ম দিয়া উদ্যোগী ও পরিশ্রমী করাইতে পারি, তবে তদ্বারা তাহাদের কিছু লাভ হইতে পারে, এবং তাহাদের দুঃখিনি মাতারও উপকার সন্তান হয়। এই জন্যে আমি মনে স্থির করিলাম, করণা ইহাতে স্বীকৃতা হইলে আমি তাহার দুই পুত্রকে নিজ বাটীতে আনিয়া বেহারার এবং খানসামার কর্ম শিক্ষা করিতে দিব।

এমত অভিপ্রায়ে আমি এক দিবস করণার গৃহে যাইয়া উপস্থিতা হইলাম। হায় ২! সেখানে কেমন খেদজনক ব্যাপার দৃশ্য হইল। করণা আপন দ্বারের শিড়ীর উপরে বসিয়া অতিশয় ক্রন্দন করিতেছিল, এবং তাহার মন্তকের একটা বড় ক্ষত হইতে দুই গাল বহিয়া রক্ত পড়িতেছিল। সে আমাকে দেখিবা মাত্র বলিতে

লাগিল, আ! মেম সাহেব, আজি আপনি ভাল সময়ে আসিয়াছেন। আমার এই দুর্দশা আপনি স্বচক্ষে দেখিলেন। বিবেচনা করুন আমি অতি দুর্ভাগ্য, আমি কোথা হইতে সুন্দর ঘর ও পরিষ্কার বস্ত্র পাইতে পারি? ও মেম সাহেব, যদি ঘরের মধ্যে মিষ্টি বাক্য বলে, তবে দুইদিন অনাহারে থাকিলেও থাকা যায়; কিন্তু এইরূপ নিত্য ঝকড়া মারামারি ইত্যাদি আমি আর সহ্য করিতে পারি না। হায়! আমার মৃত্যু হইলে ভাল হয়।

আমি উঠানের মধ্যে এক গামলা শীতল জল দেখিতে পাইয়া তৎক্ষণাৎ তাহাতে আপন ঝুমাল ডুবাইয়া করুণার মাথার ক্ষতস্থানে দিলাম, এবং পুনঃ ২ এইরূপ করিলে ক্রমে ২ রক্তপ্রোত নিবারণ হইল। পরে আমি প্রেমভাবে তাহাকে জিজ্ঞাসিলাম, করুণা, তুমি কি প্রকারে এমত ক্ষতবিক্ষত হইলা?

করুণা উত্তর করিল, মেম সাহেব বলি, শুনুন। আজি আমি তাবৎ দিন কিছু খাইতে না পাইয়া তিনটা বেলার সময়ে ফুলমণির নিকটে দুইটি পয়সা চাহিয়া আনিলাম; পরে তদ্বারা কতকগুলিন ছোট ২ মাছ কিনিয়া রাত্রিতে ইহা রান্ধিব এমত মনে করিয়া সেই মাছ কুটিয়া ধুইয়া রাখিতেছি, এমত সময়ে আমার স্বামী আর দুইজন পুরুষকে সঙ্গে লইয়া ঘরে আইল। তাহারা সকলে কিঞ্চিৎ মত ছিল, তাহাতে আমার স্বামী বড় রাগান্বিত হইয়া জিজ্ঞাসা করিতে লাগিল, ওগো, তাত তৈয়ারি আছে কিনা? আমি উত্তর দিলাম, চারিটার সময়ে কি ভাত হয়? মাতাল হইয়া কি বলিতেছ, তুমি তাহা জান না; আর তুমি কে, যে তুমি ভাত চাহিতে আসিয়াছ? খরচের নিমিত্তে তুমি কি পয়সা দিয়াছিলা? সে এই কথা শুনিয়া কোটা মাছের চুপড়িকে মাছ সুন্দ লাথি মারিয়া নর্দমাতে ফেলিয়া কহিল, তুই এমত কথা বলিস? আমি যদি

পয়সা না দিই, তবে এই মাছ কি প্রকারে আপনার জন্যে যোগাইয়া রাখিয়াছিল? আমাকে এইরূপে ভর্তসনা করিয়া সে আপন মাতওয়ালা সঙ্গিদের প্রতি ফিরিয়া কহিল, চল ভাই, আজি আমাদের পয়সার অভাব নাই; অতএব এ বেটী যদ্যপি খাইতে না দিল, ভাবনা কি? অন্য স্ত্রীলোকদের সহিত আমাদের পরিচয় আছে কি না? এই কথা কহিয়া সে আমাকে অত্যন্ত মারিল, পরে তাহারা সকলে চলিয়া গেল।

আমি ইহা শুনিয়া জিজ্ঞাসিলাম, করুণা, তোমার স্বামী মাছ ফেলিয়া দিলে তুমি কি তাহাকে কিছু কহিলা না? করুণা উত্তর করিল, হাঁ মেম সাহেব, কহিব না কেন? আমি তাহাকে যথেষ্ট গালি দিলাম। এমত কর্ম ও এমত কথা কি সহ্য করা যায়? যে দিনে তাহার কাছে কিছু টাকা কড়ি না থাকে, সে দিনে আমি যাহা দিই তাহা সে চুপ করিয়া খায়; কিন্তু যখনি চারি পাঁচ আনা উপায় করে, তখনই আমার এই প্রকার দশা হয়। কল্য প্রাতে তাহার নিকটে একটিও পয়সা থাকিবে না, রাত্রের মধ্যেই মদ্য পান ও বেশ্যাগমনাদি দ্বারা সকলি ব্যয় করিবে।

পরে আমি বলিলাম, দেখ করুণা, তোমার স্বামী মাতওয়ালা ছিল, অতএব কি করিল, কি বলিল, সে সময়ে তাহার কিছু জ্ঞান ছিলনা; এমত কালে তাহার প্রতি অনুযোগ করা কেবল অনর্থক, এবং গালি দেওয়া সর্বদা মন্দ, তদ্বারা কখনও ভাল ফল হয় না। তুমি যদি তাহাকে গালি দিয়া তাহার রাগ বৃদ্ধি না করিতা, তবে তোমাকে এত মার খাইতে হইত না।

করুণা কহিল, মেম সাহেব, ফুলমণি ও আমাকে একথা বলিয়া থাকে, তাহাতে আমি কখন ২ মনে স্থির করি, যে আমি স্বামীর

প্রতি মিষ্টি বাক্য বলিলে তদ্বারা সে নম্ন হয় কিনা, তাহা দেখিব; কিন্তু সে যখন বড় মাতওয়ালা হইয়া ঘরে আইসে, তখন মিষ্টি বাক্যসকল আমার মনে আর পড়ে না, কেবল রাগের কথা মনে উঠে। লোকেরা এই সকল বিবেচনা না করিয়া কেবল আমাকেই দোষ দেয়, এবং আমার স্বামীকে উত্তম পুরুষ বোধ করে, ইহাতে আমার মনে বড় দুঃখ হয়। আজি কেবল দুইদিন হইল ফুলমণি আমাকে বলিল, ওগো করুণা! তোমার স্বামীর স্বভাব কোমল ও প্রেমিক, অতএব তুমি যদি তাহাকে কিঞ্চিৎ আদর করিতা, তবে সে অবশ্যই তোমাকে ভালবাসিত। ফুলমণি কি দেখিয়া এমত কথা বলিল, তাহা আমি বুঝিতে পারি নাই, কেননা আমার প্রতি স্বামী কোন দিন কোমল ব্যবহার করে নাই। আর ফুলমণি আমার দুঃখের বিষয় কি জানে? তাহার স্বামীর অতিশয় সৎ স্বভাব, আপনার স্ত্রী যাহা চাহে তাহাই আনিয়া দেয়; কিন্তু ফুলমণি যদি আমার মত আপদগ্রস্তা হইত, তবে সে অন্য প্রকার কথা কহিত।

তাহাতে আমি কহিলাম; করুণা! তোমার স্বামী যে দুষ্ট ব্যক্তি তাহা স্পষ্ট দৃশ্য হইতেছে; তথাপি তোমাকে এইরূপ স্থির বিবেচনা করিতে হয়, যে সে তোমার বিবাহিত স্বামী, অতএব তাহা হইতে তুমি কোন প্রকারেই পৃথক হইতে পারিবা না; ইহা নিশ্চয় জানিয়া সে যাহাতে ক্রমে ২ ভাল হয়, এমত একটি উপায় চেষ্টা করা তোমার কর্তব্য। কিন্তু করুণা, যাহারা আমাদের প্রতি কদাচার করে তাহাদের প্রতি প্রেম করা অতিশয় দুর্কর, ইহা আমি জানি। যিনি শক্রদের হস্তে আপন প্রাণ সমর্পণ করিলেন, তাঁহার স্বভাব অর্থাৎ খ্রীষ্টের স্বভাব প্রাপ্ত না হইলে আমরা কখন এমত প্রেম প্রকাশ করিতে পারিব না। হায় করুণা! তুমি যদি সত্য খ্রীষ্টিয়ান হইতা, তবে আমার মনে কিঞ্চিৎ ভরসা জন্মিত, যে তোমার স্বামী দুষ্টতা ত্যাগ করিয়া ক্রমে ২ ভাল হইবে; কেননা এই সকল

ঈশ্বরীয় বচন অবশ্য সত্য, যথা “কোমল উত্তর ক্রোধ সম্বরণ করায়”, হিতোপদেশ ১৫ । ১ । “ধার্মিক ব্যক্তির একান্ত প্রার্থনা অতি সফল হয়”, যাকুবের পত্র ৫ । ১৬ । “স্বামী অবিশ্বাসী হইলেও বিশ্বাসিনী স্ত্রীর দ্বারা শুচি হয়”, ১ করিষ্টীয় ৭ । ১৪ । দেখ, তুমি যদি নিতান্ত খ্রীষ্টের লোক হইতা, তবে তুমি উত্তম ক্রিয়াতে আপন স্বামীর কুক্রিয়াকে পরাজয় করিতা; এবং তুমি অবশ্যই তাহার জন্যে প্রার্থনা করিতা, তাহাতে ঈশ্বর তোমার প্রার্থনাতে প্রসন্ন হইয়া তাহার মন ফিরাইয়া দিতে পারিতেন; কিন্তু এমত সুঘটনা যদিও না হইত, তবে কি জানি তোমার অনুরোধে ঈশ্বর তাহাকে এই সকল মহৎ দোষ হইতে ক্ষান্ত করাইতেন।

এই কথাতে করুণা কাঁদিতে ২ বলিতে লাগিল, না না, মেম সাহেব, সে যে দোষ হইতে ক্ষান্ত হইবে আমার এমত কিছু মাত্র বোধ হয় না। তাহার কথা দূরে থাকুক, কিন্তু সত্য খ্রীষ্টিয়ান হইতে আমার একান্ত ইচ্ছা আছে, কেননা ইহকালে আমি যত দুঃখ পাইতেছি তাহা কেবল ঈশ্বর জানেন; অতএব যদি পরকালে সুখ পাইবার ভরসা থাকিত, তবে আমি কিঞ্চিৎ সান্ত্বনা পাইয়া স্থির থাকিতাম। কিন্তু খ্রীষ্টের সেবা অতিশয় কঠিন, তাঁহার সকল আজ্ঞা যে আমি পালন করিতে পারিব, এমত আমার ক্ষমতা নাই!

আমি বলিলাম, হায় ২ করুণা! খ্রীষ্টের সেবা যে কঠিন তাহা তুমি কি বুবিয়া কহিলা? ধর্মপুস্তকে এই লেখা আছে, “প্রভু যীশুখ্রীষ্টতে বিশ্বাস কর, তাহাতেই তুমি ত্রাণ পাইবা।” এবং তিনি আপনি কহিয়াছেন, “আমার যোঁয়ালি অনায়স ও আমার ভার লঘু।”

করণা উত্তর করিল, মেম সাহেব, এ কথা তো সত্য বটে; বিশ্বাস করা অতি সহজ, আমি কি বিশ্বাস করি না? কিন্তু খ্রীষ্টের যে আজ্ঞা পালন তাহা আমা হইতে হয় না।

তাহাতে আমি বলিলাম, হায় করণা! তুমি ঐহিক ব্যক্তির ন্যায় কথা কহিতেছ। আমার এই প্রার্থনা, যেন সত্যময় আত্মা খ্রীষ্টের বিষয়ে কথা লইয়া তোমাকে বুঝাইয়া দেন। তুমি বলিতেছ, আমি বিশ্বাস করি; কিন্তু কি বিশ্বাস কর? তুমি যে পাপী ও দীনহীন ও নরকযোগ্য হইলেও খ্রীষ্ট যীশু আপন অমূল্য রক্তদ্বারা তোমাকে ক্রয় করিয়া বাঁচাইয়াছেন, এই সকল যদি বিশ্বাস করিতা তবে বিশ্বাসের সহিত তোমার প্রেমও জন্মিত; এবং খ্রীষ্টের প্রতি প্রেম জন্মিলে তাঁহার আজ্ঞা যে কঠিন নয় তাহা তোমার বোধ হইত। হে করণা! আমার ভয় হয় যে তোমার বিশ্বাস প্রকৃত বিশ্বাস নহে। বিশ্বাস দুই প্রকার আছে, তাহার দৃষ্টান্ত বলি। কোন গ্রামে একজনের ভয়ানক রোগ হইয়াছিল, কিন্তু তাহার সে রোগ বোধ হইত না; তাহাতে বন্ধু বান্ধবেরা তাহার ম্লান বদন দেখিয়া তাহাকে কহিল, ওগো, আমাদের এই গ্রামে একজন প্রসিদ্ধ কবিরাজ আছেন, তাহা তুমি জ্ঞাত আছ; অতএব তুমি শীত্র তাঁহার নিকটে গিয়া ঔষধ খাও, না খাইলে তুমি শীত্র মারা পড়িবা। ইহা শুনিয়া ঐ রোগী হাসিয়া উত্তর করিল, কবিরাজ যে আছেন, তাহা আমি জানি, এবং তিনি যে উত্তম কবিরাজ তাহাও বিশ্বাস করি; কিন্তু আমার কোন পীড়া হয় নাই, আমি তাঁহার নিকটে কেন যাইব? দেখ করণা! সে গ্রামে কবিরাজ থাকিলেও আর ঐ নির্বোধ মনুষ্য ইহা বিশ্বাস করিলেও তাহার পক্ষে কবিরাজ না থাকার মত হইল, সুতরাং সে অল্প দিনের মধ্যে ঐ রোগ দ্বারা নষ্ট হইল। সে গ্রামে আর একজন পীড়িত ব্যক্তি অন্য কবিরাজদের নানা প্রকার ঔষধাদি খাইলেও দিনে ২ ক্ষীণ হইতেছে, এবং

অত্যন্ত ক্লেশ পাইয়া মৃতপ্রায় হইয়াছে, এমত সময়ে একজন আসিয়া তাহাকে উক্ত প্রসিদ্ধ কবিরাজের গুণ সকল জ্ঞাত করিলে ঐ রোগগ্রস্ত ব্যক্তি বড় আহ্লাদপূর্বক এই সমাচারে বিশ্বাস করিয়া তৎক্ষণাৎ কবিরাজকে ডাকাইয়া পাঠাইল; এবং তিনি তাহাকে ঔষধাদি দিয়া তাহার পীড়া শান্তি করিলে, সে পীড়িত ব্যক্তি কবিরাজের প্রতি কৃতজ্ঞতা স্বীকার করিয়া যত্নপূর্বক তাঁহাকে যাবৎ জীবন প্রেম করিল।

দেখ করুণা, সেই গ্রামে ভাল কবিরাজ আছেন, উক্ত দুই পীড়িত লোকের এমত বিশ্বাস ছিল, কিন্তু প্রথম রোগীর কোন প্রকারে প্রেম জন্মিল না, কারণ সে তাহার নিকটে না যাওয়াতে কোন প্রতিকার পাইল না; তাহাতে ঐ ব্যক্তির বিশ্বাস নিতান্ত নিষ্ফল হইল। কিন্তু অন্য রোগীর বিশ্বাস তদ্রূপ নহে, এবং সে আপন বিশ্বাস প্রযুক্ত কবিরাজকে ডাকাইয়া রক্ষা পাইল; পরে আপন রক্ষাকর্ত্তার প্রতি তাহার এমত প্রেম জন্মিল যে তিনি যাহা আজ্ঞা করিতেন সে তাহাতেই আহ্লাদপূর্বক সম্মত হইত; ইহা কেবল নয়, অন্য লোকের নিকটেও সে কবিরাজের গুণকীর্তন করিত। কবিরাজের প্রতি এই দ্বিতীয় জনের যদ্রূপ বিশ্বাস ছিল, খীঢ়ির উপরে আমাদের তদ্রূপ বিশ্বাস না হইলে আমরা কোনরূপে ঈশ্বরের রাজ্যে প্রবেশ করিতে পারিব না। ওগো করুণা! তুমি ও আমি এবং পৃথিবীস্থ সকল লোকই পাপরূপ পীড়াতে পীড়িত আছে; অতএব আমার এই পরামর্শ শুন, তুমি পবিত্র আত্মার নিকটে প্রার্থনা কর যেন তিনি তোমাকে আপন পীড়ার বোধ জন্মাইয়া দেন। পীড়ার বোধ হইলে তুমি অবশ্য মহৎ চিকিৎসকের নিকটে গিয়া ত্রাণ যাঞ্চাঙ্গ করিবা, এবং তিনি যখন তোমাকে পাপরূপ যন্ত্রণা হইতে রক্ষা করিবেন, তখন তাঁহার

আজ্ঞা পালন করিবার কারণ তিনি তোমাকে অনুগ্রহ ও বল ও কৃতজ্ঞতা প্রদান করিবেন।

করুণা অধোবদন হইয়া এই সকল কথাতে কিছু উত্তর করিল না। পরমেশ্বর তাহার প্রতি দয়া করিবার মানস করিয়াছিলেন; অতএব সে যেন নির্মাল রূপার ন্যায় পরিষ্কৃতা হয়, এই হেতুক প্রথমে দুঃখরূপ অগ্নিতে তাহার পরীক্ষা করণ আবশ্যিক হইল।

যখন আমাদের পরম্পর আলাপ হইতেছিল, তখন আমরা গৃহের মধ্যে কেবল দুই জন ছিলাম, কিন্তু কথা সাঙ্গ হইলে করুণার পুত্রেরা দৌড়িয়া আসিয়া উপস্থিত হইল। নবীন আমাকে দেখিয়া সেলাম করিল। তাহার জ্যেষ্ঠ ভাতা মাচান হইতে একটা খালি বোতল লইয়া শীত্র পলায়ন করিতেছিল এমত সময়ে তাহার মাতা তাহার হাত ধরিয়া বলিল, ও বংশী! তোমার কাছে যদি কিছু পয়সা থাকে তবে আমাকে দেও, আমি তাহাতে তোমাদের খাদ্য সামগ্ৰী কিনি, কেননা আমাদের আজি কিছুই খাইবার নাই; এবং যাহা কর বাছা, তোমার বাপের মত কোন রূপে মদ কিনিয়া খাইও না।

ঐ দুষ্ট বালক উত্তর করিল, তোমার তো বড় ভাল কথা শুনিতে পাই; বুঝি তোমাকে দিবার জন্যে আমি সনগরসন খেলা করিয়া দুই আনা লাভ করিলাম? আমি তো এখন মদ খাইব, পরে আমার ভাত না হইলে কিছু ক্ষতি নাই; তুমি আপনার জন্যে চেষ্টা কর। ইহা বলিয়া বংশী আপন মায়ের হাত ছাড়াইয়া পলায়ন করিল। তাহার বয়স পোনের কিস্বা ঘোল বৎসরের অধিক ছিল না, তথাচ সে কেমন দুষ্ট ও লম্পট বালক, ইহা তার মুখ ও আচার ব্যবহার দ্বারা অতি স্পষ্ট বোধ হইল।

নবীন আপন ভাতার এইরূপ কর্ম দেখিয়া তাহার পশ্চাত্ যাইতেছিল, কিন্তু আমি তাহাকে ডাকিয়া বলিলাম, নবীন, তোমার ভাই অতিশয় দুষ্ট বালক। দেখ, তাহার কথা শুনিয়া তোমার মাতা কেমন কাঁদিতেছে; অতএব তুমিও যদি তাহার মত ব্যবহার কর, তবে তোমার মায়ের কি দশা হইবে?

নবীন বলিল, যদি আমার পয়সা থাকিত, তবে আমি মাকে দিতাম। মধুর ঘর দেখাইবার কারণ তুমি যে একবার আমাকে চারিটি পয়সা দিয়াছিলা, তাহার মধ্যে আমি তাহাকে দুইটি দিয়াছি। এখন আমার কাছে একটীও পয়সা নাই, কেননা সনগরসন খেলা করিতে গেলে আমার কেবল হারি হয়, কখন জিত হয় না।

ইহা শুনিয়া আমি বলিলাম, এ কথাতে আমি বড় সন্তুষ্ট হইয়াছি, কেননা ইহাতে তুমি এই জানিতে পারিবা যে জুয়া খেলা অপেক্ষা টাকা উপার্জন করিবার অন্যান্য ভাল উপায় আছে।

নবীন কহিল, মেম সাহেব, আমি কি কর্ম করিয়া টাকা লাভ করিব? কখন ২ সাহেবদের বাজার মাথায় করিয়া তাঁহাদের ঘরে পৌঁছিয়া দিই; কিন্তু তাহাতে কিছু লাভ নাই, কেননা খানসামারা আমাকে তিন পয়সা দিতে স্বীকার করিয়াও শেষে একটি পয়সা দিয়া আমাকে তাড়াইয়া দেয়।

পরে আমি জিজ্ঞাসিলাম, ভাল নবীন, তোমাকে আর মুটিয়ার কর্ম করিতে না বলিয়া যদি কেহ ছোট খানসামার পদে নিযুক্ত করে, ও তোমাকে একটি পাগড়ি ও চাপকান্ ও পাজামা দেয়, তবে কি তুমি সন্তুষ্ট হও?

ইহা শুনিয়া নবীনের মুখ প্রফুল্ল হইল, এবং সে হাস্য করিতে ২ বলিল, হাঁ, আমি তাহাতে অবশ্য বড় সন্তুষ্ট হই। মেম সাহেব, তুমি যদি আমাকে খানসামার কর্ম দেও, তবে আমি এখনি তোমার সঙ্গে যাই। তাহাতে তাহার মাতাও কহিল, হাঁ মেম সাহেব, আপনি যদি এই কর্মাটি অনুগ্রহ করিয়া দেন, তবে আমাদের বড় উপকার হয়।

নবীনের হিতার্থে আমি যে মানস করিয়াছিলাম, তাহা যে এমত সহজে সফল হইল, তাহা দেখিয়া আমি বড় আহ্লাদিতা হইলাম; তাহাতে তখনি বলিলাম, ভাল! নবীন আমার বাটীতে আইসুক, আমি উহাকে খাওয়া পরা দিয়া খানসামার কর্ম শিক্ষা করাইব; এবং সে যদি ভালরূপে চলে, ও জুয়া খেলা একেবারে ত্যাগ করে, তবে তিন মাস পরে আমি উহাকে প্রত্যেক মাসে এক টাকা করিয়া দিব।

নবীন উক্ত কথাতে আহ্লাদপূর্বক স্বীকৃত হইয়া কহিল, এক টাকা প্রতি মাসে পাইলে আমি আর কেন জুয়া খেলিব? তাহাতে আমি করুণাকে বলিলাম, তবে করুণা, কল্য তোমার পুত্রকে আমার নিকটে আনিও। এবং বংশী যদি কর্ম করিতে চাহিয়া আমার আজ্ঞানুসারে চলিতে স্বীকৃত হয়, তবে আমি তাহাকেও তিন মাসের নিমিত্তে পরীক্ষা করিতে প্রস্তুত আছি; কিন্তু তাহার ব্যবহার দেখিয়া ভয় হয়, পাছে সে আমাকে বড় দুঃখ দেয়।

তাহাতে করুণা নিশ্চাস ছাড়িয়া কহিল, হায় মেম সাহেব! বংশী কখনই কর্ম করিবে না। সে স্বাভাবিক দুষ্ট বালক, কেননা যতদিন আমার শাশুড়ী জীবিতা ছিলেন, ততদিন বংশীর বাপ তাঁহাকে ভালরূপে খাওয়া পরা দিতেন, কিন্তু আমার ছেল্যা আমার প্রতি

কিছুমাত্র প্রেম করেনা। তাহাকে একেবারে দূর করিয়া দিলে তাহার উপযুক্ত শাস্তি হইত বটে; কিন্তু সে তো আমার গর্ভজাত সন্তান, অতএব আমি এমত শাস্তি তাহাকে কি প্রকারে দিই?

আমি কহিলাম, করুণা, এই সকল শুনিয়া তোমার নিমিত্তে বড় দুঃখিতা আছি, কিন্তু ইহা তোমার নিজ দোষ প্রযুক্ত ঘটিয়াছে। আমি প্রথমবার যখন তোমার গৃহে আইলাম, তখন আমার বিলক্ষণরূপে স্মরণ হয় যে নবীন সত্য কথা কহিল, সেই প্রযুক্ত তুমি তাহাকে চড় মারিয়া মিথ্যাবাদী বলিলা। পিতা মাতা যদি এমত কর্ম করে, তবে সন্তানেরা কি প্রকারে ভাল হইয়া উঠিতে পারে?

এ কথাতে করুণা দীর্ঘ নিশ্চাস ত্যাগ পূর্বক কহিল, হাঁ! কি জানি আমারি দোষ হইয়া থাকিবে। কিন্তু ঐ বংশী আমার জ্যেষ্ঠ পুত্র, এবং পাঁচ বৎসর পর্যন্ত আমার আর ছেল্যা হইল না, অতএব আমি স্নেহ প্রযুক্ত তাহাকে কখন শাসন করিতে পারিতাম না, এই নিমিত্তে সে এমত অবাধ্য বালক হইয়াছে।

আমি বলিলাম, করুণা আমরা যখনি ঈশ্বরের আজ্ঞা লজ্জন করি, তখনি আমদের দুর্দশা ঘটে। ঈশ্বর কহিয়াছেন, “বালককে শাসন করিতে নির্ভুত হইও না; তুমি দণ্ডবারা তাহাকে প্রহার কর, তাহাতে তুমি তাহার প্রাণকে নরক হইতে রক্ষা করিবা।” হিতোপদেশ ২৩। ১৩, ১৪। কিন্তু তুমি অন্য প্রকার বুঝিয়া তাঁহার আদেশানুসারে চল নাই, তাহাতে যাহাকে তুমি প্রিয়পাত্র জ্ঞান করিয়া আদরের পুত্র করিয়াছ, সে পুত্র এখন তোমার বিরুদ্ধে উঠিয়া তোমাকে তুচ্ছ করে, এবং দুষ্টতাতে এমত প্রবল হইয়াছে যে তাহাকে দেখিলে ভয় হয়। অতএব তুমি আর তাহাকে দমন

করিতে পারিবা না; তথাচ আমার সাহেবকে আমি তাহার বিষয় জ্ঞাত করিব, তিনি যদি তাহার মঙ্গলার্থে কিছু করিতে পারেন তবে অবশ্য করিবেন।

বিদায় হইবার কাল উপস্থিত হইলে আমি বিবেচনা করিতে লাগিলাম, অদ্য করণাকে কিছু টাকা দিলে ভাল হইবে কি না; এমত সময়ে সে আপনি ভয় পূর্বক জিজ্ঞাসিল, মেম সাহেব, আপনি যে ঝাড়নগুলিন আমাকে একবার সিলাই করিতে দিতে চাহিয়াছিলেন, সে সকল কি এখন আপনার নিকটে আছে? আমি কহিলাম, না, অনেক দিন হইল তাহা সিলাই করা গিয়াছে; কিন্তু তুমি সে বিষয় জিজ্ঞাসা কর কেন? করণা বলিল, এখন যদি সে ঝাড়ন আপনার নিকটে থাকিত, তবে আমি লইয়া সিলাই করিতাম; কেননা আমার স্বামী এবং পুত্র আমার উপকার করিবে না, তাহা স্পষ্ট দেখিতেছি, অতএব আপনি কর্ম না করিলে সকলে মারা পড়িব।

করণার এই প্রকার নৃতন কথা শুনিয়া আমি বড় আহ্বাদিতা হইলাম, এবং তদ্বারা পূর্বাপেক্ষা সুন্দররূপে জানিতে পারিলাম, যে অবিবেচনা পূর্বক টাকা দান করিলে দরিদ্রের পক্ষে অতিশয় ক্ষতি জন্মে। ইহার দৃষ্টান্ত এই, আমি যখন প্রথমবার করণার দুঃখ দেখিয়াছিলাম, তখনই যদি তাহাকে টাকা কি পয়সা দিতাম, তবে এখন সে আমার নিকটে কর্ম যাঞ্চাও না করিয়া পুনর্বার তদ্দপ ভিক্ষাই চাহিত। দরিদ্রেরা যাহাতে কোন কর্ম করিয়া আপনাদের সাহায্য করিতে পারে, এমত শিক্ষা তাহাদিগকে দিলে তাহাদের পক্ষে সর্বাপেক্ষা উত্তম সাহায্য হয়।

ইহা জানিয়া আমি করণকে আশ্বাস দিতে চাহিয়া বলিলাম, কাড়ন সকল সিলাই হইয়াছে বটে, কিন্তু এখন আমার নিকটে একথান কোরা কাপড় আছে, তাহা ছিঁড়িয়া খাটের চাদর বানাইব। অতএব কল্য তুমি যখন নবীনকে আমার বাটীতে লইয়া যাইবা, তখন আমি সেই চাদর সকল তোমাকে সিলাই করিতে দিব। তুমি যে আপনি কর্ম করিতে মানস করিয়াছ, তাহাতে আমি বড় সন্তুষ্টা হইয়াছি; এবং অদ্য তোমার ঘরে কিছু নাই দেখিতেছি, অতএব এখন এক টাকা লও, পশ্চাত্ত আমার কাপড় সিলাই করিয়া তাহা পরিশোধ করিও। তাহাতে করণ টাকাটি দেখিয়া হষ্টচিত্ত হইয়া সেলাম করিয়া লইল।

আমি সাধু ও সত্যবতীর জন্য কতকগুলিন মিঠাই আনিয়াছিলাম, তাহাতে আপন বাটী যাইবার পূর্বে তাহাদিগকে সেই মিঠাই দিতে গেলাম। সাধুর পিতা প্রেমচাঁদ ঘরে ছিল; তখন সে আপন স্ত্রীর নিকটে বসিয়া তাহারা দুই জনে কতকগুলিন টাকা ও পয়সা গণিতেছিল। তাহাতে তাহাদের মন এমত নিমগ্ন হইয়াছিল যে আমি ঘরের মধ্যে প্রবেশ করিলেও তাহারা প্রথমে জানিতে পারিল না। কিন্তু আমাকে দেখিবামাত্র ফুলমণি শীত্র উঠিয়া সেলাম করিল, পরে টাকা ও পয়সা একত্র করিয়া এক পার্শ্বে রাখিয়া কহিল, মেম সাহেব, আমার স্বামী আজি মাহিনা পাইয়াছেন, অতএব আগত মাসে আমরা কি প্রকারে তাহা ভালরূপে খরচ করিতে পারি ইহাই বিবেচনা করিতেছিলাম।

আমি বলিলাম, যদি এমত হয়, তবে অনুগ্রহ করিয়া সে সকল হিসাব সাঙ্গ কর; কেননা আমি তোমাদের ঘরের কর্মেতে ব্যাঘাত করিতে চাহি না, আর তোমাদের প্রতিবাসিনী করণকে যেন পরিমিত ব্যয় বিষয়ে কিছু উপদেশ দিতে পারি, এই কারণ আমি

বাঙালিদের সাংসারিক খরচের বিষয়ে কিছু শিক্ষা করিতে বড় ইচ্ছা করি।

এ কথা শুনিলেও প্রেমচাঁদ এবং ফুলমণি আমার সাক্ষাতে আপনাদের হিসাব করিতে বড় অনিচ্ছুক হইল, কিন্তু তাহাদিগকে বিস্তর সাধ্যসাধনা করিলে তাহারা পুনর্বার লেখাযোথা করিতে লাগিল।

প্রেমচাঁদ আপন স্ত্রীকে বলিল, আমার সাত টাকা মাহিনার মধ্যে এক টাকা সাহেবের নিকটে জমা করিয়া রাখিয়াছি; তাহার স্থানে আমাদের এখন চৌদ্দ টাকা হইয়াছে। আর এই লও, ছয়টি টাকা আনিয়াছি, এখন তোমার কাছে কত আছে, তাহা দেখি।

ফুলমণি বলিল, আমি দুধ বেচিয়া ৩০. তিন টাকা বারো আনা পাইয়াছিলাম, তাহার মধ্যে গোরুর খোরাকের নিমিত্তে ১০. এক টাকা বারো আনা ব্যয় হইয়াছে; অতএব তাহা ধরিবার কোন আবশ্যক নাই, এই দুই টাকা মাত্র আছে।

প্রেমচাঁদ কহিল, ওগো, তবে ঐ পয়সাগুলিন কোথা হইতে আইল? ফুলমণি বলিল, করণার জন্যে একখানা মোটা শাড়ি কিনিতে তিন মাস পর্যন্ত দশ আনা পয়সা জড় করিতেছি। সে দুঃখিনী কাপড় ব্যতিরেকে যে ক্লেশ ভোগ করিতেছে তাহা আর দেখা যায় না। মহেন্দ্রবাবুর স্ত্রীর তিনটা কোর্তা সিলাই করিয়া দিয়াছিলাম, তাহাতে ছয় আনা পাইলাম; এবং এই মেম সাহেবে অনুগ্রহ করিয়া একবার সাধুকে ও সত্যবতীকে এক ২ সিকি দিয়াছিলেন, তাহার মধ্যে এই শাড়ি কিনিবার জন্যে তাহারা আমাকে দুই ২ আনা করিয়া দিল, তাহাতে দশ আনা হইয়াছে।

প্রেমচাঁদ বলিল, ভাল করিয়াছ ফুলমণি। আমি কল্য একখান কাপড় কিনিয়া আনিব, এবং তুমি করণাকে তাহা দিবার সময়ে বলিও, যে এই শাড়ি পরিয়া তোমাকে প্রত্যেক রবিবারে গীর্জায় যাইতে হইবেক; কেননা আমি যখনি গীর্জায় যাইবার কথা তাহার সাক্ষাতে বলি, তখনি সে কাপড়ের ছল করিয়া উত্তর করে, আমার বন্ধু নাই, আমি কি প্রকারে গীর্জায় যাইব? কিন্তু সে যাহা হউক, এখন আমি হিসাব লিখিতে আরম্ভ করি।

সর্বসুন্দর আমাদের আয় ৯।।।।। নয় টাকা দশ আনা আছে, তাহার মধ্যে সাহেবের নিকটে এক টাকা জমা করিয়াছি, করণার শাড়ির জন্যে দশ আনা, প্রভুর ভোজনের নিমিত্তে দুই আনা, মিশনরি সোসাইটির মাসিক চাঁদার নিমিত্তে দুই আনা ইহাতে ১।।।।। এক টাকা চৌদ্দ আনা হইল, বাকী থাকে ৭।।। সাত টাকা বারো আনা, না গো ফুলমণি?

ফুলমণি কিঞ্চিৎকাল হিসাব করিয়া কহিল, হাঁ, তাহা ঠিক হইয়াছে; কিন্তু সাধুর নিমিত্তে বড় ধর্মপুস্তক কিনিবার কারণ যে দুই আনা মাসে আমরা জমা করিয়া রাখি, তাহা লিখিতে ভুলিয়াছেন।

প্রেমচাঁদ বলিল, হাঁ গো, সে কথাতো সত্য। আরও আমি একজন হিন্দু স্ত্রীলোকের নিমিত্তে চারি আনা পয়সা লইব। আজি সাহেবের কর্মে আমাকে তেঘরি গ্রামে যাইতে হইয়াছিল, তথায় গিয়া দেখিলাম এক গাছতলায় একজন বিধবা স্ত্রী প্রসব হইয়াছে, এবং তাহাতে একটু জল দেয় এমত ব্যক্তি সেখানে নাই, তাহাতে আমি সেখানকার একজন দোকানির নিকটে আটটি পয়সা কর্জ করিয়া তাহাকে দিয়া আইলাম। অতএব কল্য যাইয়া সেই কর্জ

পরিশোধ করিতে হইবেক, এবং ঐ অনাথা স্ত্রীলোককে আর দুই আনা পয়সা দিয়া আসিব।

ফুলমণি বলিল, ভাল, তাহাই করিও। তবে আমাদের ঘর খরচের নিমিত্তে ৭।০/- সাত টাকা ছয় আনা রহিল। প্রেমচাঁদ উত্তর করিল, হাঁ গো তাহাতে কি কুলাইবে না? তাহার স্ত্রী হাসিয়া বলিল, বিবেচনা করিয়া খরচ করিলে কুলাইবে না কেন? কেবল কঠিন হইয়াছে এই, যে প্রিয়নাথের জন্যে দুইটা জামার কাপড় এই মাসে না কিনিলে নয়; কিন্তু ক্ষতি নাই, উহার কাপড় কিনিবার কারণ আমি সিলাই আদি করিয়া অবশ্য কোন প্রকারে চারিগঙ্গা পয়সা উপায় করিতে পারিব।

এমত কথা হইলে প্রেমচাঁদ দানাদির সকল টাকা পয়সা আপনি তুলিয়া রাখিল, এবং ঘর খরচের টাকাগুলিন ফুলমণিকে দিয়া কহিল, পরমেশ্বর আমাদের প্রতিপালক, আমাদের কিছুরই অভাব হইবে না; তিনি আমাদের প্রয়োজনীয় আহার অদ্য দিয়াছেন।

এই ধার্মিক পরিবারের সন্দ্যবহার ও সুখ দেখিয়া করঞ্চার দুঃখের অবস্থা আমার সুরণ হইল, তাহাতে আমি মনোমধ্যে বিবেচনা করিলাম, ঈশ্বরের সেবকেরা নিতান্ত সুখদায়ক পথে ভ্রমণ করে, এবং তাহাদের সকল গতি শান্তিকর; কিন্তু “যে সমুদ্র কখন স্থির হইতে পারে না, ও যাহার জলেতে মল ও কর্দম উঠে, দুষ্ট লোকেরা এমত আলোড়িত সমুদ্রের ন্যায় হয়। ঈশ্বর যথার্থ কহিয়াছেন, পাপীদের কিছুই মঙ্গল নাই।” যিশায়িয় ৫৭। ২০, ২১।

তদন্তৰ ফুলমণি কিঞ্চিৎ ভাবিতা হইয়া বলিতে লাগিল, বেলা গেল, আজি ছেল্যারা পাঠশালা হইতে ফিরিয়া আইসে না কেন? এই কথা শুনিয়া প্রেমচাঁদ দ্বারের বাহিরে গিয়া তাহাদের অপেক্ষায় দাঁড়াইয়া রহিল। কিছুকাল পরে সে অতিশয় বিষণ্ণ বদন হইয়া ভিতরে আসিয়া হঠাৎ মঞ্চ হইতে এক গাচা বেত্র নামাইল, এবং তাহা হাতে করিয়া শীত্র দৌড়িয়া বাহিরে গেল। ইহাতে আমরা জ্ঞাতা হইলাম, যে সে অবশ্য কোন অসন্তোষক ঘটনা দেখিতে পাইয়াছে, কেননা ইহার পূর্বে প্রেমচাঁদের সুশীল বদনে এত রাগ আমি কখন দেখি নাই। তখন ফুলমণি জানালা খুলিয়া দেখিবা মাত্র উচৈঃস্বরে বলিতে লাগিল, হে পরমেশ্বর! আমার ছেল্যাকে শয়তানের হস্ত হইতে উদ্ধার কর।

এই স্ত্রীপুরুষের মনের অঙ্গীরতা দেখিয়া আমি অতিশয় ভীতা হইলাম, এবং কি হইয়াছে, ইহা জ্ঞাত হইবার জন্যে শীত্র বাহিরে গেলাম। পরে দেখিলাম যে সাধু ও সত্যবতী গ্রামের মধ্যে প্রবেশ করিয়াছে, এবং করণার পুত্র বংশী তাহাদের সঙ্গে ২ চলিয়া কএক পয়সা উর্দ্ধে ফেলিয়া লুফিতেছে, তাহাতে সাধু ঐ পয়সা ধরিবার জন্যে যত্ন করিতেছে। প্রেমচাঁদ দৌড়িয়া তাহাদের নিকটে গেল, এবং বেত দিয়া সাধুকে দুই তিন ঘা মারিল, পরে তাহার হাত ধরিয়া টানিয়া ঘরে আনিল।

সাধু বলিতে লাগিল, বাবা, বিরক্ত হইও না ২! আমি সত্য বলিতেছি ইহাতে আমার কোন দোষ নাই। তাহার পিতা গভীর স্বরে কহিল, চুপ কর সাধু, তুমি আপন দোষ লুকাইতে চেষ্টা করিয়া কেবল পাপের বৃদ্ধি করিতেছ। তুমি দুষ্ট বালকের সহিত আলাপ করিয়া জুয়া খেলা শিখিতেছিলা, ইহাতে কি তোমার দোষ নাই?

এই কথাতে সত্যবতী কাঁদিতে ২ তাহার ভাতার গলা ধরিয়া  
বলিল, হায় দাদা! ঐ দুষ্ট বংশী যদি তোমার পয়সা কাড়িয়া না  
লইত, তবে এই সকল দুর্ঘটনা হইত না। বেগোঘাত বেদনা প্রযুক্ত  
সাধু কিছু মাত্র কাঁদে নাই, কিন্তু এখন তাহার ছেট ভগিনীর  
প্রেমিক ব্যবহার দেখিয়া সেও উচ্চেঃস্বরে ক্রন্দন করিতে লাগিল।

তখন প্রেমচাঁদ কহিল, সত্যবতী, তুমি এক পার্শ্বে বৈস, সাধুর  
সহিত আমার কিছু কথা আছে। ইহাতে সত্যবতী পিতার আজ্ঞা  
পালন করিয়া ফুলমণির বক্ষস্থলে হেলান দিয়া কাঁদিতে থাকিল।  
প্রেমচাঁদ সাধুকে জিজ্ঞাসিল, ঐ দুষ্ট বালকের সহিত কি জন্যে  
বেড়াইতেছিলা?

সাধু উত্তর করিল, আমি তাহার নিকটে যাই নাই বাবা; সে  
আমাদের নিকটে আসিয়া আমাদের সঙ্গে বেড়াইতে লাগিল।  
প্রেমচাঁদ বলিল, তবে তুমি তাহাকে একেবারে ছাড়িয়া কেন ঘরে  
দৌড়িয়া আইলা না? সাধু বলিল, ও পিতা, আমার পয়সাগুলিন  
তাহার নিকটে ছিল; আজি আমি পাঠশালায় পুরস্কারার্থে চারিটি  
পয়সা পাইলাম, সে পয়সা আমার হাত হইতে বংশী কাড়িয়া  
লইল। প্রেমচাঁদ কহিল, সাবধান হও সাধু আমি না স্বচক্ষে  
দেখিলাম যে তুমি পয়সা লইয়া জুয়া খেলা করিতেছিলা? সাধু  
বলিল, না বাবা, আমি তাহা কখন করি নাই; বংশী তো  
বলিয়াছিল, আইস, আমরা সনগরসন খেলা করি, তাহাতে তোমার  
কপালে যদি থাকে, তবে তুমি আপনার চারিটি সুন্দ আমার চারিটি  
পয়সাও লাভ করিতে পারিবা; কিন্তু আমি তাহা না করিয়া কেবল  
আপনার পয়সা পুনর্বার তাহার হাত হইতে কাড়িয়া লইতে চেষ্টা  
করিতেছিলাম।

এ কথা শুনিয়া প্রেমচাঁদ বলিল, ভাল সাধু, আমি তোমাকে যেরূপ দোষী বোধ করিয়াছিলাম, তাহা তুমি নও, এইজন্যে ঈশ্বরের ধন্যবাদ হউক। তথাপি তুমি যে কোন কারণে ঐ দুষ্ট বালকের সহিত এক নিমেষ পর্যন্ত ছিলা ইহাতেই অবশ্য তোমার অপরাধ হইয়াছে, কেননা লেখা আছে; “পাপের ছায়া হইতেও দূরে থাক।” এবং পয়সা পাইবার জন্যে যদি তোমাকে ঈশ্বরের আজ্ঞা লঙ্ঘন করিতে হয়, তবে সে পয়সা তখনি ছাড়িয়া দেওয়া উচিত; আরও দেখ, বংশী তোমা হইতে দ্বিগুণ বড় ও বলবান, অতএব তাহার নিকট হইতে তুমি বল করিয়া আপনার পয়সা পুনর্বার লইতে কি প্রকারে আশা করিয়াছিলা? আমি তো বলি, পয়সা গিয়াছে, ভাল হইয়াছে।

সাধুর মাতাও সেইরূপ ভাবিয়া বলিল, ও সাধু তুমি যদি একেবারে সে পয়সা ত্যাগ করিয়া ঘরে আসিতা, তবে ভালই হইত। তোমার পিতা তোমাকে কতবার বলিয়াছেন, যে বংশীর সহিত কোনরূপে আলাপ করিও না। তুমি সুন্দররূপে জান, তাবৎ মন্দের মূল ধনাশা, তাহাতেও আমার ভয় হয়, তুমি ঐ পয়সাগুলিন অতিশয় প্রিয়জ্ঞান কর।

সাধু উত্তর করিল, না মা, আমি পয়সাকে প্রিয়জ্ঞান করি না, কিন্তু বংশী যে তাহা বলপূর্বক আমার নিকট হইতে লইল, এইজন্যে আমি রাগ করিয়া পুনর্বার আপনার পয়সা লইতে চেষ্টা করিলাম। মা, ইহাতে বল দেখি, বংশীর ভারি দোষ হইয়াছে কিনা?

ফুলমণি বলিল, তাহার দোষ অবশ্য থাকিবে, কিন্তু তদ্বারা তুমি যে একেবারে নির্দোষী এমত বলা যায় না। তুমি আজি

প্রাতঃকালে এই প্রার্থনা করিয়াছিলা, হে পরমেশ্বর, আমাকে পরীক্ষায় আনিও না; তথাপি তুমি আপনি পরীক্ষাস্ত্রলে গেলা, এবং তোমার পিতা তোমাকে দেখিয়া যদি সে স্থান হইতে টানিয়া না আনিতেন, তবে কি জানি শেষে তুমি জুয়া খেলা আরস্ত করিতা, এবং তাহার পরে অন্যান্য ভারি পাপে পতিত হইতা।

মাতার এইরূপ কথা শুনিয়া সাধু আর আপনাকে নির্দোষী করিতে চেষ্টা না করিয়া বলিল, ও বাবা, এবার আমাকে ক্ষমা করুন, আমি এমত কর্ম আর করিব না।

তখন প্রেমচাঁদ ও ফুলমণি সাধুর হাত ধরিয়া তাহাকে ভিতরের কুঠরীতে লইয়া গেল। ইহাতে সত্যবতী সান্ত্বনা পাইয়া চক্ষের জল মুছিয়া আমাকে কহিল, মেম সাহেব, এখন বাপমা সাধুর সহিত প্রার্থনা করিবেন, এবং ঈশ্বর যেন তাহাকে ক্ষমা করেন এই যাঞ্চও করিবেন, তাহার পর তাঁহারা সকল চুকাইয়া দিয়া পুনর্বার তাহাকে প্রেম করিবেন। আমরা যখনি কোন দোষ করি, তখনি বাপমা এইরূপে আমাদের সহিত প্রার্থনা করেন।

হে বঙ্গদেশীয় শ্রীষ্টিয়ান পিতা মাতা সকল তোমরাও যাইয়া তদ্বপ কর। আমি দেখিলাম, যে উক্ত ঘটনা দ্বারা প্রেমচাঁদ ও ফুলমণির মন কিছু অস্ত্রির হইয়াছে, অতএব এখন বিদায় হওয়া ভাল বুঝিয়া আমি র্মিথাইগ্নিলিন সত্যবতীর হাতে দিয়া কহিলাম, তোমার পিতা মাতাকে আমার সেলাম দিও। ইহা বলিয়া আমি বাটীতে ফিরিয়া গেলাম।

চেল্যাদের অমর আত্মাকে সুপথে লওয়ান, এই যে গুরুতর ভার ঈশ্বর পিতা মাতাগণের হস্তে অর্পণ করিয়াছেন, ইহা যদি

তাহারা ভালুকপে নির্বাহ করিত তবে কেমন আনন্দজনক হইত! হে পিতা ও মাতা সকল! তোমাদের সন্তানদের ভাল মন্দ শিক্ষার বিষয়ে তোমরা ঈশ্বরের সাক্ষাতে দায়ী হইবা, ইহা নিশ্চয় জ্ঞাত হও। অতএব আমি বিনতি করি, তোমরা আপনাদের প্রিয় ছেল্যাদিগকে শাসন কর, তাহাদের নিমিত্তে প্রার্থনা কর, তাহাদিগকে সাধ্য পর্যন্ত মন্দ হইতে রক্ষা কর, কি ২ পাপ ও কি ২ পুণ্য ইহা তাহাদিগকে জ্ঞাত করাও, এবং বিশেষরূপে আপনারা এমত সন্দ্যবহারী হও, যে তাহারা তোমাদের সৎক্রিয়া দেখিয়া তোমাদের অনুকারী হইতে সতত চেষ্টা করে।

## ষষ্ঠ অধ্যায়।

পর দিবস অতি প্রত্যুষে ছোট নবীন ও তাহার মাতা আমার ঘরে উপস্থিত হইল। আমি তখনি আমার দরজীকে বলিলাম, এই বালকের জন্যে শীত্র চারি যোড়া চাপকান ও পাজামা সিলাই কর। যখন দরজী চাপকান বানাইবার কারণ নবীনের গায়ের মাপ লইতে লাগিল, তখন আমি তাহার অহঙ্কার দেখিয়া হাস্য সম্বরণ করিতে পারিলাম না; কেননা সে দীনহীন বালক এক ছেঁড়া নেকড়া ব্যতিরেকে আর কোন বস্ত্র কখন পরে নাই, অতএব সে দরজীর হাতে সরু কাপড় এবং লাল সালু দেখিয়া বোধ করিল যে ইহা পরিয়া আমি একেবারে বাবু হইব।

করুণা ভাবিতা ও মনোদুঃখিনী হইয়া নিরব থাকিল; কিন্তু খাটের চাদরগুলিন যখন ভাঁজ করিয়া ঘরে লইয়া যাইতেছিল, তখন সে বলিল, ও মেম সাহেব, আমি নবীনকে একেবারে আপনাকে দিলাম; সে আর আমার সন্তান নহে, এখন সে আপনকার হইল। তাহার বিষয়ে আমার আর কোন ভাবনা নাই; কেবল এই নিবেদন করি, যে আপনি আমার নিমিত্তে কখন ২ টাশ্বরের নিকটে প্রার্থনা করিবেন।

আমি উত্তর করিলাম, করুণা, যে দিবস তুমি ফুলমণির বাটীতে থাকিয়া তাহার গোলাপ চারা নষ্ট করিয়াছিলা, সেই দিবস অবধি আমি টাশ্বরের স্থানে তোমার জন্যে প্রার্থনা করিতেছি; এবং আমার দৃঢ় বিশ্বাস আছে যে তুমি ইহার পরে সত্য খ্রীষ্টিয়ান হইয়া আপন

স্বামীর সহিত সুখে বাস করিবা। এখন ভাল মনে পড়িল, সে কি  
কল্য রাত্রিতে ঘরে আসিয়াছিল?

করুণা বলিল, মেম সাহেব, কল্য কি সে আর আইসে? কিন্তু  
আজি সন্ধ্যার সময়ে সে আসিয়া পুনর্বার ভোজনের নিমিত্তে  
ঝকড়া করিবে, তাহাতে ভাত যদি থাকে তবে ভাল, নতুবা  
আরবার আমাকে মার খাইতে হইবে।

আমি কহিলাম, অদ্য তোমার মার খাইবার কোন আবশ্যক  
নাই; তোমার কাছে তো একটা টাকা আছে, তাহাতে ভাল মাছ  
কিনিয়া সুন্দররূপে ব্যঙ্গন রাঁধিয়া রাখ। এখন আমার নিকট এই  
প্রতিজ্ঞা কর যে এবার তুমি বাটী পরিষ্কার ও পরিপাটি করিবা, ও  
তোমার স্বামী ফিরিয়া আসিলে তাহার সহিত মিষ্ট কথা কহিয়া  
হাস্য মুখে সাক্ষাৎ করিবা; এমত করিলে সেও অবশ্য তোমার  
সহিত কোমল ব্যবহার করিবে। আমার এই কথা সত্য হয় কি না,  
তাহা দেখিও।

করুণা দীর্ঘ নিশাস ফেলিয়া বলিল, ভাল মেম সাহেব,  
আপনাকে সন্তুষ্ট করিবার জন্যে আমি আপনকার পরামর্শ মতে  
চলিব কিন্তু আমার স্বামী কখন ভাল হইবে না, তাহা আমি নিশ্চয়  
জানি।

আমি কহিলাম, এমত কথা বলিও না, চেষ্টাদ্বারা প্রায় সমস্ত  
কর্মই সিদ্ধ হয়। আর ইহাও স্মরণে রাখিও, ঈশ্বরের অসাধ্য  
কিছুই নাই।

করুণা বিদায় লইয়া গেল, কিন্তু সে পুনর্বার ফিরিয়া আসিয়া  
বলিল, মেম সাহেব আমি বড় ভুলিয়াছি, প্যারীর ভারি ব্যামোহ

হইয়াছে, এবং সে আমাকে বলিয়াছিল যে তুমি ইহা মেম  
সাহেবকে জানাইয়া এমত নিবেদন করিও, যেন তিনি আমাকে  
দেখিতে একবার আইসেন।

ইহা শুনিয়া আমি বলিলাম, আহা! এই বিষয় পূর্বে সম্বাদ  
পাইলে ভাল হইত। সে যাহা হউক, আজি সন্ধ্যাকালে আমি  
তাহাকে অবশ্য দেখিতে যাইব।

যে অবধি প্যারীর সহিত আমার জানাশুনা হইয়াছিল, সেই  
অবধি আমি বার ২ তাহার ঘরে যাইতাম, এবং তাহার সহিত  
অনেক কথোপকথন করিতাম, তদ্বারাই কেবল তাহার প্রতি  
আমার প্রেমের বৃদ্ধি হইত। অতএব সন্ধ্যাকাল উপস্থিত হইলে  
আমি প্যারীর নিমিত্তে কএকটি ডালিম আয়ার হাতে দিয়া তাহাকে  
সঙ্গে করিয়া খ্রীষ্টিয়ানদের গ্রামে গেলাম।

আয়ার বিষয়ে কিছু লিখিতে হইল। সে পূর্বে খ্রীষ্টীয় ধর্মের  
মধ্যে অনেক দোষ দেখাইত, কিন্তু যে অবধি ফুলমণির সহিত  
আমাদের পরিচয় হইয়াছিল, সেই অবধি দেখিলাম, যে ক্রমে ২  
সে কোন মিথ্যা আপত্তি না করিয়া অতিশয় নত্র হইয়াছে। আরও  
শুনিতে পাইলাম, যে সে আমার অজ্ঞাতসারে অনেকবার ফুলমণির  
গৃহে যাইয়া থাকে, এবং সাধু ও সত্যবতী যে তাহার বাসাতে নিত্য  
২ আসিয়া হালুয়া ও রুটী লইয়া যাইত, তাহা আমি স্বচক্ষে  
দেখিতাম। উক্ত সুলক্ষণদ্বারা এবং সকলের প্রতি আয়ার কোমল  
আচার ব্যবহার দেখিয়া আমি বোধ করিলাম, যে ঈশ্বরের আত্মা  
তাহার মনেতে আপন বাক্যরূপ বীজ ক্রমে ২ অঙ্কুরিত  
করিতেছেন। কিন্তু এমত দেখিলেও আমি সে বিষয়ে আয়াকে  
তখন কিছু বলিলাম না; কেননা পূর্বে যখন তাহাকে খ্রীষ্টীয় ধর্মের

বিষয়ে কোন কথা কহিতাম, তখন সে আমাকে আপন কঠী জানিয়া ভয় প্রযুক্ত কখন ২ সকল কথায় মৌখিক স্বীকার করিত, কিন্তু বাস্তবিক তাহার মনেতে অনেক প্রকার আপত্তি থাকিত। ইহা জানিয়া আমি বোধ করিলাম, যে আমা অপেক্ষা ফুলমণি ও তাহার ছেল্যারা আয়ার পক্ষে উত্তম শিক্ষক হইবে। কিন্তু সে যেন খ্রীষ্টীয় ধর্ম মনোনীত করে, এই অভিপ্রায়ে আমি সর্বদা তাহাকে প্যারীর ন্যায় প্রকৃত ধার্মিক খ্রীষ্টীয়ানদের নিকটে লইয়া যাইতে চেষ্টা করিতাম; কারণ আমি ভালুকপে জ্ঞাতা আছি যে লোকেরা আমাদের কথা দ্বারা নয়, বরং ভাল কর্মাদ্বারা ধর্মের বিষয়ে সত্য শিক্ষা প্রাপ্ত হয়।

পরে আমি প্যারীর ঘরে উপস্থিতা হইয়া দেখিলাম, ফুলমণি দাবায় বসিয়া আপন বৃন্দা বন্ধুর জন্যে কিছু সাঙ্গদানা পাক করিতেছে। বৃন্দা প্যারী পীড়া প্রযুক্ত অতিশয় দুর্বলা হইয়াছিল, তথাপি সে আমাকে দেখিবামাত্র প্রফুল্ল বদনে কহিতে লাগিল মেম সাহেব, আমার এই পীড়া কখন ভাল হইবে না; বোধ হয়, এইবার আমি আপন স্বর্গস্থ পিতার বাটীতে যাইব।

তখন আমি জিজ্ঞাসা করিলাম, প্যারী যদি ঈশ্বরের এমত ইচ্ছা হয় তবে তুমি যাইতে আহুদিতা হও কি না?

সে উত্তর করিল, আহা! স্বর্গে যাইতে অবশ্য আহুদিতা আছি। মেম সাহেব দেখুন, আমি হেথায় এই ক্ষুদ্র কুঁড়ে ঘরে বাস করি, সেথায় যীশুর সহিত রাজস্ব করিব; হেথায় আমি দুর্বল শরীর প্রাণ্ডা হইয়া পাপিষ্ঠ স্বভাব প্রযুক্ত নিত্য ২ ঈশ্বরের বিরংক্রে অপরাধ করি, সেথায় এই নশ্বর শরীর অনশ্বরতারূপ বস্ত্র পরিধান করিলে আমি ঈশ্বরের সিংহাসনের সম্মুখে নির্দোষী হইয়া দাঁড়াইব। আহা মেম

সাহেব! স্বর্গেতে পাপ নাই, অতএব যে স্থানে পাপ নাই সে কেমন  
সুখের স্থান হইবে!

আমি বলিলাম, হাঁ প্যারী, এ কথা সত্য বটে, কেননা এই  
পৃথিবীতে পাপ তাবৎ দুঃখের মূল; কিন্তু একটি কথা জিজ্ঞাসা  
করি, তুমি মৃত্যু ছায়ারূপ উপত্যকার মধ্য দিয়া গমন করিতেছ,  
অতএব যে প্রভু তোমাকে পাপের বশ হইতে রক্ষা করিয়া স্বর্গ  
লাভের আশা দিয়াছেন, তুমি কি এখন তাঁহাকে অতিশয় প্রিয়জ্ঞান  
কর?

প্যারী বলিল, আহা! মেম সাহেব, আমার ত্রাণকর্তা দশ সহস্র  
জনের মধ্যে অগ্রগণ্য। তিনি সর্বতোভাবে মনোহর; তিনি আমার  
সহিত থাকিয়া আমাকে সান্ত্বনা করিতেছেন, ও তাঁহার মৃত্যু  
ব্যতিরেকে আমার আর কোন ভরসা নাই। হে যীশু! ধন্য ২  
তোমার নাম, যে হেতুক তুমি আপন বহুমূল্য রক্তদ্বারা আমাকে  
শয়তানের হস্ত হইতে ক্রয় করিয়াছ। হে যীশু! তোমার কেমন  
আশ্চর্য প্রেম; সেই প্রেমের কি পর্যন্ত দীর্ঘতা ও প্রশংস্ততা ও  
গভীরতা এবং উচ্চতা, তাহা কে বর্ণনা করিতে পারে?

প্যারী অতিশয় উৎসাহ পূর্বক এই সকল কথা কহাতে  
বলহীনা হইয়া বালিশে পড়িল, ইহা দেখিয়া আমার আয়া তাহার  
জন্যে একটি ডালিমের দানা খুলিয়া দিতে লাগিল। প্যারী আয়ার  
হাত হইতে সেই ডালিম লইল, পরে তাহার মুখের প্রতি তাকাইয়া  
অতিশয় চিন্তিতা হইয়া বলিল, আয়াগো! তুমি বুঝি খ্রীষ্টিয়ান নও?  
আয়া বলিল, না, আমি মুসলমান।

ইহা শুনিয়া ঐ বৃন্দা স্ত্রী উঠিয়া বসিয়া বলিল, ওগো আয়া! তুমি যদি গ্রীষ্মিয়ান নও, তবে আমার কথা শুন। আমার অবশিষ্ট যৎকিঞ্চিত্বে বল আছে, তদ্বারা আমি এই সাক্ষ্য দিব, যে প্রভু যীশুখ্রীষ্ট সত্য ত্রাণকর্তা, আর আমি যে তোমার সাক্ষাতে ইহা বলিতে সুযোগ পাইলাম তাহার নিমিত্তে ঈশ্বরের ধন্যবাদ করিব। আয়া আমার প্রতি দৃষ্টি কর, দুই তিন দিনের মধ্যে লোকেরা আমাকে কবর দিতে লইয়া যাইবে, কিন্তু তাহাতে আমার কোন ভয় জনিতেছে না, বরং আমাকে যদি কেহ এই জগতে থাকিবার হেতু লোভ দেখাইয়া সহস্র ২ টাকা দেয়, তথাপি আমি মরিতে ইচ্ছা করি। কি জন্যে আমার এমন ইচ্ছা আছে, তাহাও বলি। আমি যে কোন ধর্ম করিয়া স্বর্গ লাভ করিয়াছি তাহা নয়। ও আয়া! তোমাদের কোরাগে এইরূপ লেখা আছে, তোমরা ধর্ম কর্ম করিও তাহাতে স্বর্গ প্রাপ্ত হইবা; কিন্তু যদি পাপ কর, তবে নরকে নিষ্ক্রিয় হইবা। এই উপায় ভিন্ন মুসলমানদের মধ্যে ত্রাণ পাইবার আর কোন উপায় নাই। অতএব আয়া, তুমি বুবিয়া দেখ, এমত কঠিন আদেশ ধরিয়া ঈশ্বর যদি আমাদের বিচার করেন, তবে কে তাহার সম্মুখে নির্দোষী হইবে? তুমি এবং আমি সে বিচারস্থানে কখন দাঁড়াইতে পারিব না, কেননা সকলেই পাপ করাতে ঈশ্বরের নিকটে দোষী হইয়াছে। আমরা আপনা আপনি কোন ভাল কর্ম করিতে পারি না, অতএব মনুষ্যেরা যাহা করিতে অক্ষম এমত কর্ম না করিলে তোমাদের পয়গম্বর তাহাদিগকে স্বর্গ দিতে পারেন না। যদি কেহ একজন খোঁড়া ব্যক্তিকে বলে, তুমি এখনই লম্ফ দিয়া বেড়াও, না বেড়াইলে তোমাকে কাটিয়া ফেলিব; কিন্তু একজন অন্ধকে যদি বলে, তুমি নিকটস্থ অট্টালিকা দেখিয়া তাহার একটি অবিকল নকসা তুলিয়া দেও, না দিলে তোমার প্রাণ নষ্ট করিব; বিবেচনা কর, ঐ মনুষ্যেরা প্রাণের ভয়ে কি লম্ফ দিতে

কিস্বা নকসা তুলিতে পারিবে? কখন না; সুতরাং তাহারা উক্ত কর্ম করিতে আপনাদিগকে অশক্ত জানিয়া মরিতে প্রস্তুত হইবে। সেইরূপে মহম্মদ পয়গম্বর ভাল কর্ম বিনা তোমাদিগকে আর কোন ত্রাণের উপায় দেখাইতে পারেন নাই, অতএব যদি তোমা হইতে নিশ্চিন্দ ধর্ম কর্ম না হয়, তবে নরক যন্ত্রণা ভুগিতে প্রস্তুত থাকিও। কিন্তু আর একটি কথাও আছে; কোন ২ মুসলমানেরা বলিয়া থাকে, পরমেশ্বর অতিশয় দয়ালু, অতএব তিনি আমাদের পাপ সকল ক্ষমা করিবেন। ইহাতে আমি বলি, পরমেশ্বর যদি প্রায়শিত্ব বিনা একটিও পাপ ক্ষমা করেন, তবে তাঁহার এক প্রধান গুণ নষ্ট হয়। সেই গুণ কি? ন্যায় বিচার। ইহার দৃষ্টান্ত বলি, শুন; এই জেলার জজ সাহেব চোর ডাকাইতদের ক্রন্দন ও বিলাপ শুনিয়া যদি এক জনকেও ছাড়িয়া দিতেন, তবে কি লোকেরা তাহার প্রশংসা করিত? না, কোন প্রকারেই নয়। বরং তাঁহাকে অকর্মণ্য বিচারকর্তা বুঝিয়া কোম্পানির নিকটে এই আবেদন করিত, আমাদের গ্রামে একজন ভাল জজ সাহেবকে পাঠাইয়া দিউন, নতুবা দস্যদের দল ক্রমে ২ বৰ্দ্ধি হইবে। ইহাতে সুন্দররূপে বোধ হইতেছে যে স্বর্গের ও পৃথিবীর মহৎ বিচারকর্তা অন্যায় পূর্বক কখনও কাহার পাপ ক্ষমা করিবেন না।

এই সকল কথা বলিবার সময়ে আয়া প্যারীর প্রতি তাকাইয়া অতি মনোযোগ পূর্বক শুনিল; কিন্তু আমি দেখিলাম যে প্যারী বড় দুর্বলা হইতেছে, এই জন্যে তাহাকে ক্ষান্তা হইতে বলিলাম। কিন্তু সে বলিল, হাঁ মেম সাহেব, ক্ষান্তা হইব না। আমি আয়াকে কেবল মুসলমান ধর্মের দোষ দেখাইয়াছি, অতএব এখন আমাকে খ্রীষ্টীয় ধর্মের মহৎ গুণ প্রকাশ করিতে দিউন।

সে সময়ে ফুলমণি সাগু রাঁধিয়া ভিতরে আনিলে প্যারী তাহা  
কিছু খাইয়া সবল হইল। পরে সে বলিতে লাগিল, শুন আয়া, শুন!  
যীশুখ্রীষ্ট ঈশ্বরের পুত্র, তিনি স্বযং ঈশ্বর, এবং দয়ার সাগর;  
অতএব তিনি জানিলেন যে সকল মনুষ্যেরা পাপিষ্ঠ স্বভাব প্রযুক্ত  
ঈশ্বরের আজ্ঞা পালন করিতে না পারিয়া নরকে পতিত হইবে;  
অতএব তিনি যেন আপন প্রাণ দিয়া পাপী লোকদের প্রায়শিত্ব  
করিতে পারেন; এই অভিপ্রায়ে তিনি স্বর্গ হইতে নামিয়া  
মনুষ্যদেহ ধারণ করিলেন। তিনি স্বযং ধার্মিক হইয়া ধার্মিকদের  
পরিবর্তে প্রাণদণ্ড ভোগ করিলেন। আরও কহি, খ্রীষ্ট ভিন্ন এমত  
মহৎ প্রায়শিত্ব কোন মনুষ্য করিতে পারে না, কারণ প্রত্যেক  
মনুষ্যকে আপন ২ পাপের হিসাব দিতে হইবেক। স্বর্গের দূতেরাও  
পাপের প্রায়শিত্ব করিতে পারে না, কেননা দূতেরা ঈশ্বরের স্মৃতি  
প্রাণী মাত্র। কিন্তু যীশুখ্রীষ্ট জগতের তাবৎ দেশীয় লোকদিগকে  
রক্ষা করিতে চাহিলেন, এই জন্য তাঁহার যে প্রাণ কোটি ২  
লোকদের প্রাণ হইতেও বহুমূল্য তাহা তিনি উৎসর্গ করিয়া  
ঈশ্বরের নিকটে আমাদিগের সকল পাপরূপ খণ্ড আদায় করিলেন।  
ও আয়া! এমত আশ্চর্য্য প্রেম কোথা পাইবা?

যীশুর প্রেমের তুলনা দিব কিসে?  
খুজিলে এমন মিলিবে না কোন দেশে!

যীশু আপন শক্রদের নিমিত্তে মরিলেন; যে কোন ব্যক্তি ইহা  
স্বীকার করিয়া এমত প্রার্থনা করে, হে ঈশ্বর! আমি দীনহীন ও  
পাপী, কেবল যীশুতে আমার বিশ্বাস আছে, তিনি আমার ধার  
পরিশোধ করিয়াছেন, অতএব এখন তাহার গুণের নিমিত্তে আমার  
পাপ মার্জনা কর; ঈশ্বর সেই ব্যক্তির পাপ সকল ক্ষমা করত  
তাহাকে পুণ্যবান জ্ঞান করিয়া গ্রাহ্য করেন।

পরে প্যারী আয়াকে উৎসাহ পূর্বক বলিল, ও আয়া, তুমি শ্রীষ্টিয়ান হও! যীশুর উপরে বিশ্বাস কর; তিনি যে তোমার পাপের প্রায়শিত্ত করিয়াছেন তাহা স্বীকার কর। তিনি তো আমারই পাপের ভার লইয়াছেন, তাহা আমি নিশ্চয় জানি, এই জন্যে আপন বিচারকর্তার সহিত সাক্ষাৎ করিতে আমার কিছু ভয় নাই। তিনি আমাকে দোষী করিবেন না, কেননা তিনি আমার ত্রাণকর্তা, ও আমার দোষের নিমিত্তে পূর্বে দণ্ড ভোগ করিয়াছেন। না আয়া, আমি ভয় করি না, বরং উল্লাসিতা হই, কারণ যীশু অবশ্য আমাকে এই কথা কহিবেন, আইস হে আমার পিতার অনুগ্রহের পাত্র, তোমার জন্যে জগতের পতন অবধি যে রাজ্য প্রস্তুত করা গিয়াছে তাহার অধিকারিণী হও। ও আয়া, স্বর্গেতে তোমার সহিত যেন আমার সাক্ষাৎ হয়, ইহা আমি অতিশয় অভিলাষ করিতেছি।

আয়া এই কথা শুনিয়া বড় ক্রন্দন করিতে ২ বলিল, ওগো মা, তুমি ও ফুলমণি ও ফুলমণির ছোট ছেলেয়ারা পর্যন্ত সকলে মিলিয়া আমাকে প্রায় শ্রীষ্টিয়ান করিলা; কিন্তু আমি শ্রীষ্টিয়ান হইব কি না, তাহা এখন বলিতে পারিনা। সে যাহা হউক, তোমার মৃত্যুর ন্যায় যদি আমারও মৃত্যু হয়, তবে আমার বড় সৌভাগ্য।

প্যারী বলিল, ও গো আয়া! যদি ধার্মিক লোকদের ন্যায় সুস্থিরমনা হইয়া মরিতে বাঞ্ছি কর, তবে বিশ্বাস কর। এই কথা বলিয়া সে অচৈতন্য হইয়া বালিশের উপরে পড়িল।

তখন আমি প্যারীর ব্যামোহের বিষয় ফুলমণিকে জিজ্ঞাসা করিতে লাগিলাম, তাহাতে সে বলিল; মেম সাহেবে, আপনি কল্য ঘরে গেলে প্যারী আমাকে ডাকিয়া পাঠাইল। আমি এখানে আসিয়া দেখিলাম, সে সমস্ত দিন জ্বর ভোগ করিয়াছে, তথাপি

কাহাকে কিছু বলে নাই। তাহাতে আমি পাদরী সাহেবের নিকটে সমাচার দিবার জন্য তখনি সাধুর বাপকে পাঠাইয়া দিলাম। সাহেব প্যারীর ধার্মিক আচরণের বিষয় এখানকার ইংরাজ ডাক্তর সাহেবকে বলাতে তিনি অদ্য প্রাতঃকালে আসিয়া তাহাকে অনেক প্রকার গুষ্ঠাদি দিয়াছিলেন বটে; কিন্তু তিনি পাদরী সাহেবকে বলিলেন, প্যারী অতিশয় বৃদ্ধ হইয়াছে, বোধ হয় সে এই পীড়া হইতে সুস্থা হইতে পারিবে না। ফুলমণি আরও বলিল, পাড়ার প্রায় সকল স্ত্রীলোকেরা অদ্য এখানে আসিয়া প্যারীর কিছু কর্ম করিয়া দিয়াছে, তাহাতে সে এক মুহূর্তও একাকী থাকে নাই, কল্য আমি সমস্ত রাত্রি তাহার নিকটে ছিলাম, এবং অদ্য রাত্রিতে রাণী আসিয়া এখানে থাকিবে, ইহা সে আমাকে বলিয়াছে।

রাণীর কথা শুনিয়া আমি জিজ্ঞাসিলাম, ফুলমণি, রাণী এখনে কিরূপ ব্যবহার করিতেছে? আমি প্রায় তাহাকে দুই মাস পর্যন্ত দেখি নাই।

ফুলমণি বলিল, মেম সাহেব, রাণী এখন অতি উত্তম আচার ব্যবহার করিতেছে; বোধ হয় সে নৃতন জন্ম প্রাপ্ত হইয়া সত্য শ্রীষ্টিয়ান হইল। সে আমাকে অনেকবার বলে, মেম সাহেবের শিক্ষাদ্বারা আমার বিস্তর উপকার হইয়াছে। এবং মেম সাহেব, কেবল রাণীর উপকার হইয়াছে তাহা নয়, এই গ্রামের মধ্যে অনেক লোক আপনকার উপদেশ শুনিয়া পূর্বাপেক্ষা এখন ধর্মের বিষয়ে কিছু ২ মনোযোগ করিতেছে।

আমি উত্তর করিলাম, আমাদের নয়, কিন্তু পরমেশ্বরের অনুগ্রহ ও সত্যতার নিমিত্তে তাঁহার নামের মহিমা বৃদ্ধি হউক! তথাপি ফুলমণি, তোমাকে খোশামদ করিতে না চাহিলেও আমি এই কথা

বলিব; যে স্থানে আমি ধর্মরূপ বীজ বপন করিয়াছি, সে স্থানে তুমি যদি উত্তম পরামর্শ ও প্রার্থনারূপ জল সেচনদ্বারা তাহা সিঞ্চ না করিতা, তবে বোধ হয় সে বীজ অঙ্কুরিত না হইয়া নষ্ট হইত। হায়! আমাদের বাঙালা দেশস্থ মণ্ডলীগণের মধ্যে যদি অনেক ধার্মিকা স্ত্রীলোক থাকিত, তবে তাহাদের দ্বারা খ্রিষ্টিয়ান লোকদের সংখ্যা কেমন শীঘ্র বৃদ্ধি হইত! যে স্ত্রীলোকেরা অজ্ঞান ব্যক্তিদের শিক্ষা দিতে ও দুর্বল শিষ্যগণের সাহায্য করিতে পারে, মণ্ডলীর মধ্যে এমত স্ত্রীলোকদের অভাব আছে। হিন্দুদের সহিত আমাদের প্রতিদিন সাক্ষাৎ হয়, অতএব তাহাদিগকে কিছু শিক্ষা দেওয়া খ্রিষ্টিয়ান স্ত্রীলোকদের উচিত। তাহারা যদি এমত করিত, তবে বোধ হয় হিন্দুরা ইংরাজদের কথা অপেক্ষা স্বদেশীয় লোকদের কথা উত্তমরূপে শুনিত; সুতরাং তাহারা মনে করিবে, পূর্বে ইহারা আমাদের ন্যায় হিন্দু ছিল, এখন বুঝি পরীক্ষা করিয়া দেখিয়াছে যে নৃতন ধর্ম পুরাতন ধর্ম হইতে উত্তম।

ফুলমণি বলিল, মেম সাহেব, একথা সত্য। কিন্তু এই দুঃখের বিষয় যে মণ্ডলীর মধ্যে অনেক স্ত্রীলোকেরা ধর্মকে প্রিয়জ্ঞান করে না, তবে তাহারা পরকে কি প্রকারে শিক্ষা দিবে? খ্রিষ্টধর্ম কেমন সুমিষ্ট ইহা যদি আপনারা আস্বাদন করিয়া দেখিত, তবে তাহারা অবশ্য অন্য লোকদিগকে সেই পথে আনিতে চেষ্টা করিত। আ মেম সাহেব! চিকিৎসকদ্বারা ভয়ানক রোগ হইতে মৃত্যু হইয়া পরের নিকটে তাহার প্রশংসা না করে, এমত কোন্ ব্যক্তি আছে? তেমনি যে মনুষ্য মহাচিকিৎসক কর্তৃক পাপ রূপ রোগ হইতে উদ্ধার হইয়া মনের সান্ত্বনা পাইয়াছে, সেই মনুষ্য অন্য পাপী লোকদের নিকটে তাঁহার গুণ অবশ্য কীর্তন করিবে। অতএব যদি শুনিতে পাই যে অনুক খ্রিষ্টিয়ান ধর্মের বিষয়ে কাহাকে কিছু বলে

না, তবে আমি মনে ২ ভাবি সে ব্যক্তি কোন প্রকারে প্রকৃত শ্রীষ্টিয়ান নহে।

আমি কহিলাম ফুলমণি, তুমি ভাল বলিয়াছ; কেননা যদ্যপিও কোন ২ শ্রীষ্টিয়ানেরা ভীরুৎ স্বভাব প্রযুক্ত ধর্মের বিষয়ে কথা কহিতে কিছু ভয় করে, তথাপি যখন পাপীরা প্রকাশ রূপে ঈশ্বরের আজ্ঞা লজ্জন করে, তখন এমত ভীরুৎ ব্যক্তিগণও চুপ করিয়া থাকিতে পারে না।

আমাদের কথোপকথনের সময়ে বৃদ্ধা প্যারী ঘোরতর নিদ্রা গিয়াছিল; অতএব তাহার ভাল সেবা হইতেছে, ইহা দেখিয়া আমি কেবল তাহার সুখাদ্য সামগ্ৰী কিনিবার কারণ ফুলমণির হাতে দুইটি টাকা দিয়া বিদায় হইলাম। পথের মধ্যে যাইতে ২ আমি ইহা ভাবিলাম, যীশু আপন লোকদিগের প্রতি যে অঙ্গীকার করিয়াছেন, “আমি তোমাদের স্থানে শান্তি রাখিয়া যাইতেছি, আমি নিজের শান্তি তোমাদিগকে প্রদান করিতেছি, জগতের লোক যেমন দান করে আমি তদ্রপ দান করি না; তোমরা মনোদুঃখী ও ভীত হইও না,” যোহন ১৪। ২৭। এই অঙ্গীকার তাঁহার দাসীর প্রতি কেমন আশ্চর্য্যরূপে সফল হইতেছে।

পরে করুণার ঘর দিয়া আমাকে যাইতে হইল, অতএব তাহার স্বামী ফিরিয়া আসিয়াছে কি না, ইহা দেখিতে আমি ভিতরে গেলাম। তথায় গিয়া দেখিলাম, বংশীর পিতা দাবায় তোজন করিতেছে, এবং তাহার স্ত্রী তাহার নিকটে বসিয়া নবীনের কর্মের বিষয়ে এবং আমার বড় কোঠা ঘরের বিষয়ে তাবৎ বৃত্তান্ত কহিতেছে। আমাকে দেখিবামাত্র করুণা শীত্র উঠিয়া একটা নৃতন মোড়া বাহিরে আনিয়া বলিল, মেম সাহেব, আপনি যে টাকাটি

দিয়াছিলেন, তাহা ভাঙ্গাইয়া চারি পয়সা দিয়া প্রথমে এই মোড়াটি কিনিলাম, যেন আপনি এখানে আইলে বসিবার স্থান পান।

এ ক্ষুদ্র বিষয় ছিল বটে, তথাপি ইহা শুনিয়া আমি বড় সন্তুষ্টা হইলাম, কেননা তদ্বারা জানা গেল যে করুণা আমাকে দেখিতে অতিশয় ইচ্ছুক আছে। কিন্তু তাহার স্বামীর সহিত অদ্য মিলন হইয়াছে, অতএব তাহাদের কাছে থাকা এখন আমার উচিত নয়, ইহা ভাবিয়া আমি সেই দিনে তাহার ঘরে বসিতে স্বীকৃতা হইলাম না। আমি করুণাকে বলিলাম, তোমার নবীন আমার ঘরে থাকিতে সন্তুষ্ট আছে; আমি যখন বাহিরে আইসি তখন দেখিলাম সে মসালচির নিকটে ছুরি কাঁটা পরিষ্কার করিতে শিখিতেছে। ইহা বলিয়া আমি ঘরে ফিরিয়া গেলাম।

করুণার ব্যবহার পূর্বাপেক্ষা কিঞ্চিৎ ভাল হইয়াছে, ইহা দেখিয়া আমার মন অতিশয় আনন্দযুক্ত হইল, এবং তাহার নিমিত্তে আমি ঈশ্বরের স্থানে এই প্রার্থনা করিলাম, হে পরমেশ্বর, আপন দাসীর প্রতি তোমার কর্ম সিদ্ধ কর, তুমি আপন হস্তকৃত কর্ম পরিত্যাগ করিও না। কিন্তু ঈশ্বর কিরূপ ভয়ানক এবং দুঃখজনক ঘটনাদ্বারা করুণার প্রতি আমার এই প্রার্থনা সফল করিবেন, তাহা আমি তখন জানিলাম না।

পর দিবস প্রত্যুষে উঠিয়া আমি আপন রীত্যানুসারে ঘর হইতে বাহিরে আসিয়া বায়ু সেবনার্থে গাড়ীতে আরোহণ করিতেছি, এমন সময়ে ছোট নবীন অতিশয় ক্রন্দন করিতে ২ আমার নিকটে আসিয়া বলিল; ও মেম সাহেব, আমাকে ঘরে যাইতে ছুটি দেও। আমাদের পাড়ার একজন ছেল্যা আমাকে এখনই বলিল, কাল রাত্রির মধ্যে দাদা জলে ডুবিয়া মরিয়াছে। ইহা শুনিয়া আমি ঐ

অধার্মিক ও দুষ্ট বালকের ব্যবহার সূরণ করিয়া পরকালে তাহার কি দুর্গতি হইবে ইহা ভাবিয়া অতিশয় কম্পান্তিতা হইলাম; কিন্তু সে বিষয় নবীনকে কিছু না বলিয়া আমি তাহাকে গাড়ীতে চড়িয়া কোচমানের নিকটে বসিতে কহিলাম, এবং কোচমানকে খ্রীষ্টিয়ান পাড়াতে শীত্র গাড়ী চালাইতে আজ্ঞা করিলাম।

পরে আমি করণার বাটীতে পৌঁছিয়া দেখিলাম তথায় বড় জনতা হইয়াছে, আর তাহাদের সহিত কএক জন চৌকিদার ও বরকন্দাজ দাঁড়াইয়া আছে। সকলে অতিশয় গোল করিয়া ডাকাইতি, খুন ও চৌর্যের বিষয়ে কথোপকথন করিতেছিল। এক জন বলিল, বা! খ্রীষ্টিয়ানদের মধ্যে নাকি ধর্ম আছে, তবে তাহারা এমত কর্ম কেন করে?

নবীন পৌঁছিবা মাত্র একেবারে দৌড়িয়া ঘরের ভিতরে গেল; কিন্তু আমি জনতার মধ্যে প্রবেশ করিতে অনিচ্ছুক ছিলাম, এই জন্যে এক পার্শ্বে দাঁড়াইয়া ঐ গোলমালের কারণ জ্ঞাত হইবার নিমিত্তে একজন বরকন্দাজকে ডাকাইয়া জিজ্ঞাসা করিলাম, এই খ্রীষ্টিয়ানদের পুত্র কি ডুবিয়া মরিয়াছে?

তাহাতে বরকন্দাজ কহিল, হাঁ মেম সাহেব, তাহার মৃতদেহ আজি প্রাতঃকালে ঘরে আনা গিয়াছে। কাল রাত্রিতে এক জন হিন্দুলোক ঐ ছেল্যাকে সঙ্গে লইয়া মহেন্দ্র বাবুর ঘরে সিঁধ কাটিয়া প্রবেশ করিয়াছিল। বোধ হয় বংশী তাহাকে পথ দেখাইবার জন্যে গিয়াছিল, কেননা সে বাবুর এক জাতি হওয়াতে তাঁহার গৃহের সমুদয় সন্ধান জানিত। সে যাহা হউক, তাহারা দুই জনে প্রবেশ করিয়া বাবুর স্ত্রীর সকল গহনা খুলিতে লাগিল। সে তখন নিন্দিতা ছিল, কিন্তু চেতনা পাইয়া চীৎকার শব্দ করিয়া

উঠিল, তাহাতে একজন চোর তাহার কুক্ষিদেশে আঘাত করিল; এমত সময় বাবুও জাগিয়া উঠিয়া চোরদিগকে ধরিতে চেষ্টা করিলে তাহারা পলাইয়া গেল, কিন্তু বাবুও বাহির হইয়া তাহাদের পশ্চাং ২ দৌড়িলেন। কল্য রাত্রিতে ঘোরতর কুঞ্জটিকা হইয়াছিল, অতএব মাঠের মধ্যে কিছুই দৃশ্য হয় নাই, কেবল সে স্থানে চোরদের গমনের শব্দ শুনিয়া বাবু তাহা লক্ষ্য করিয়া তাহাদের পশ্চাং ২ যাইতে লাগিলেন। দৌড়িতে ২ এক জন অকস্মাং জলে পড়িল, এমত শব্দ হওয়াতে বাবু জানিতে পারিলেন, মাঠের বড় পুক্ষরিণীর ধারে আসিয়াছি। অন্য চোরও পাকা ঘাটের শিঁড়িতে আছাড় খাইয়া পড়িল, তাহাতে বাবু তখনি তাহাকে ধরিলেন; এমত সময়ে আমরা উপস্থিত হইয়া তাহাকে থানায় লইয়া গেলাম। কল্য রাত্রিতে আমরা বোধ করিয়াছিলাম, যে ব্যক্তি জলে পড়িল সে অবশ্য সাঁতার দিয়া পলায়ন করিয়াছে; কিন্তু আজি প্রাতঃকালে তাহার মৃতদেহ উক্ত পুক্ষরিণীতে ভাসিয়া উঠিল, এবং তাহার বাপ আসিয়া তাহাকে আপন পুত্র বলিয়া ঘরে আনিল। সে বলে, আমার ছেল্যা যে চুরি করিতে গিয়াছিল, তাহা আমি কিছু জানিনা; সে যাহা হউক, তাহাকে একবার মেজিষ্ট্রেট সাহেবের সাক্ষাতে লইয়া যাইতে হইবে। আমরা যে চোরকে থানায় রাখিয়াছি, যদি সাহেব তাহাকে একেবারে ফাঁসি দিতে আজ্ঞা দেন তবে বড় ভাল হয়; কেননা সে একবার পাঁচ বৎসর পর্যন্ত কয়েদ ছিল, তথাপি সে কোন প্রকারে শিক্ষা পায় নাই। বাবুর স্ত্রী এমত আঘাতিতা হইয়াছে যে তাহার বাঁচা ভার, তাহাতে প্রাণের ভয়ে ঐ দুষ্ট বলে, আমি তো তাহাকে কাটি নাই বংশী তাহা করিয়াছে। কিন্তু এ কথা নিতান্ত মিথ্যা বোধ হয়, কেননা বংশী ছেল্যা বইতো না, মানুষকে খুন করিতে কখন তাহার সাহস হয় না। অতএব স্পষ্ট বোধ হইতেছে যে তাহার সঙ্গি লোক ঐ কর্ম করিয়াছে।

বরকন্দাজের নিকটে এইরূপ খেদজনক সমাচার পাইয়া  
করুণার অসহ্য দুঃখ আমি কি প্রকারে দেখিব, ইহা ভাবিতে  
লাগিলাম। ঘরের ভিতর হইতে তাহার ক্রন্দন ও বিলাপের শব্দ  
স্পষ্টরূপে আমার কর্ণগোচর হইল, অতএব সেদিন অমনি বাটী  
ফিরিয়া যাইতে ইচ্ছা করিলাম, কিন্তু শেষে আমি মনে ভাবিলাম,  
এমত করা অকর্তব্য, কারণ এখন করুণা দুঃখে পড়িয়াছে; এই  
জন্যে যদ্যপিও তাহার নিকটে যাওয়াতে আমার ক্লেশ হয়, তথাপি  
তাহাকে সান্ত্বনা করা উচিত হইয়াছে।

এই দুর্ঘটনা যদি এক বৎসর পূর্বে হইত, তবে করুণার মনে  
এত দুঃখ জন্মিত না; কেবল সাধারণ পুত্রশোকের মত তাহার  
শোক হইত, এবং তাহার ছেল্যা চোরুরূপে ধরা পড়াতে তাহার  
অখ্যাতি হইল, কি জানি ইহাতেও তাহার দুঃখ জন্মিত; কিন্তু  
পরলোকে তাহার দুর্গতির বিষয়ে সে তখনই কোন চিন্তা করিত  
না। এখন তাহার মনরূপ চক্ষুঃ কিছু প্রসন্ন হইয়াছিল, ইহাতে সে  
ধর্মজ্ঞান প্রাপ্তা হইয়া আপন পুত্রকে যে শিক্ষা দেয় নাই, এ বিষয়ে  
বড় ভাবিতা হইল।

আমি করুণাকে দেখিবামাত্র বোধ করিলাম, সে অবশ্য  
হতজ্ঞান হইয়াছে; কেননা মনের অসহ্য যন্ত্রণাদ্বারা সে আপন কেশ  
ছিঁড়িয়া বলিতে লাগিল, কে বলে যে আমার ছেল্যা হত্যাকারী? না  
না, সে হত্যাকারী নয়, আমিই হত্যাকারী; আমাকে মাজিষ্ট্রেট  
সাহেবের নিকটে লইয়া যাও, তিনি আমাকেই ফাঁসি দিউন।  
পরমেশ্বরের সাক্ষাতে আমি নরহত্যা করিয়াছি, অতএব তিনি যদি  
আমাকে একেবারে নরকে ফেলিয়া দেন, তবে তাহা আমার  
উপযুক্ত শাস্তি হয় বটে। হায়! আমি মা হইয়া আপন ছেল্যার শরীর  
ও আত্মা উভয় নষ্ট করিয়াছি। আমি তাহাকে গন্তব্য পথে চলিতে

শিক্ষা দিই নাই, ঈশ্বরের আজ্ঞা লঙ্ঘন করিতে নিষেধ করি নাই; প্রথমে তাহার মনেতে রাগ, দ্বেষ, লোভাদি প্রবল হইতে দিয়াছিলাম, শেষে তাহাকে কোন প্রকারে উপরাইয়া ফেলাইতে পারিলাম না। সে আমার নিকটে পয়সা চুরি করিত, ও আপন ছোট ভাইয়ের প্রতি অন্যায় করিত, তথাপি আমি স্নেহ প্রযুক্ত তাহাকে একবারও বলি নাই, যে এ সকল করিলে তোমাকে নরকে যাইতে হইবে। হায়! ইহাকে কি প্রেম বলা যায়? ধিক্ এমত মিথ্যা প্রেম! তদ্বারা আমার ছেল্যা নষ্ট হইল। হায় ২! আমি কি করিব? লোকদের প্রতি চক্ষুঃ তুলিয়া আর দেখিতে পারিব না; এবং ঈশ্বরের নিকটে প্রার্থনা করিতে সাহস হইবে না। এই জগতে আমার সুখ নাই, আর পরলোকেও যাইতে আমার ভয় হইতেছে, কেননা সেখানে আমার ছেল্যা আমাকে দেখিবে, আর তাহাকে শিক্ষা দিই নাই বলিয়া সে আমাকে দোষ দিবে। হে পরমেশ্বর, তোমার আত্মা হইতে কোথায় যাইব, ও তোমার সাক্ষাৎ হইতে কোথায় পলায়ন করিব? নবীন গো, আমি তোমার ভাইয়ের আত্মাকে নষ্ট করিয়াছি, কিন্তু তোমারই আত্মাকে হত্যা করিব না; মেম সাহেবের হস্তে তোমাকে সমর্পণ করিলাম, তিনি তোমাকে উত্তম শিক্ষা দিবেন, আমি তাহা দিতে অক্ষম। হায়! আমার যে ছেল্যা থাকে আমি এমত যোগ্যপাত্র নহি।

বংশীর মৃতদেহ সকলের সাক্ষাতে ঘৃণার্হ বস্তু ছিল বটে, তথাপি তাহার মা উক্ত কথা বলিয়া ঐ শবের মাথা আপন কোলে রাখিয়া তাহার মুখে চুম্বন করত অধিক ক্রন্দন করিয়া বলিতে লাগিল, যে মায়ের নিষ্পাপি শিশু তাহার বক্ষঃস্থলে পড়িয়া প্রাণ ত্যাগ করে, সেই মা উল্লাস করুক! সে যখন ছোট শবকে ধুইয়া তৈল মাখায় ও তাহার কবর সিন্দুকে ফুল ছড়ায়, তখন সে এমত জ্ঞান করুক, আমার ছেল্যা বিবাহের বাটীতে যাইতেছে; ও যে সময়ে তাহার

বন্ধু বান্ধবেরা তাহার বাছাকে লইয়া কবরে রাখে, সেই সময়ে তাহার মাও কবরস্থানে যাইয়া আনন্দযুক্ত হউক, কারণ তাহার সন্তানের দুঃখের শেষ হইল! সেই ছেল্যা আপন স্বর্গস্থ পিতার স্বর্ণময় অট্টালিকাতে থাকিয়া প্রতিপালিত হইবে; অতএব তাহার মা ক্রন্দন না করুক। কিন্তু হায়! আমার যে প্রকার পুত্রশোক, তেমন পুত্রশোক জগতে খুজিয়া পাইব না। হায় আমার বংশী! তুমি এখন কোথায় আছ? হায় আমার বাছা! কে তোমার আত্মাকে নষ্ট করিল? আমি তাহা করিলাম। আমাকে ধিক্, আমি মা হইয়া আপন ছেল্যার শরীর ও আত্মা উভয়কে নষ্ট করিলাম।

এ কথা কহিয়া দৃঢ়িনি করুণা আপন মনের যন্ত্রণা আর সহ্য করিতে না পারিয়া একেবারে অচৈতন্য হইয়া ভূমিতে পড়িল। সেই সময়ে একটিও শব্দ শুনা গেল না, বরং প্রত্যেক স্ত্রীলোকের চক্ষে জল ছল ২ করিতেছিল ও প্রত্যেক পুরুষ স্বর্গের প্রতি দৃষ্টি করিয়া মনে ২ প্রার্থনা করিল, হে ঈশ্বর আমাদের পরিবারের মধ্যে যেন এমত দুর্ঘটনা না হয়। সেই সময়ে অধর্ম্মের ফল স্পষ্টরূপে প্রকাশ পাইল।

বংশীর পিতা গত রাত্রিতে গৃহে আসিয়া মদ্যপানাদি করে নাই, অতএব কি ২ ঘটিয়াছে তাহা সে ভালরূপে জ্ঞাত ছিল; তথাচ সে আপন স্ত্রীর ন্যায় মনোদুঃখী হইল না, কারণ যদ্যপি সে ছেল্যার নিমিত্তে বিস্তর কাঁদিল, তথাপি আপনাকে কোন প্রকার দোষ না দিয়া এই মাত্র বলিল, আমরা কি করিব? ঈশ্বরের যাহা ইচ্ছা তাহাই তিনি করেন। পরে করুণার অবস্থা দেখিয়া সে দীর্ঘ নিশ্চাস ত্যাগ করিয়া তাহাকে ভূমি হইতে তুলিল, এবং আমি তাহার মুখে সুশীতল জল দিয়া বিলাতীয় নস্য সুঙ্গাইয়া তাহাকে চেতন করিতে চেষ্টা করিলাম।

কিঞ্চিৎকাল পরে সে চক্ষুঃ খুলিয়া চতুর্দিকে দেখিতে লাগিল। তখন তাহার স্বামী বলিল, ওগো তুমি বড় নির্বোধ ব্যক্তির ন্যায় কথা কহিয়াছ। আমাদের কেবল নয়, অন্য লোকদের ছেল্যাও ডুবিয়া মরিয়া থাকে, অতএব তাহাতে আমাদের দোষ কি? তাহা পরমেশ্বরের ইচ্ছা। কিন্তু করুণা বলিল, নাগো! আমি নির্বোধ নই। কল্য আমি ধর্মপুস্তকে পড়িয়াছিলাম, যে ঈশ্বর ধার্মিক এলির তাবৎ বৎশ একেবারে উচ্ছিন্ন করিলেন; কারণ তাহার পুত্রগণ দুষ্টামি করিত, এবৎ সে তাহা জ্ঞাত হইয়াও তাহাদিগকে নিষেধ করিত না। তুমি যদি সেই কথা পাঠ করিতা, তবে আমাকে কখন নির্বোধ বলিতা না। সে যাহা হউক, আমি আপন অন্তঃকরণের মধ্যে এই অগ্নি আপনি জ্বালাইয়াছি, অতএব সে এখন চিরকাল জ্বলিতে থাকিবে।

সেই সময়ে ফুলমণি ঘরের মধ্যে আসিয়া আমার কানে ২ বলিল, মেম সাহেব, দুঃখিনি করুণার দুর্গতির বিষয় আমি জ্ঞাতা আছি বটে, কিন্তু এতক্ষণ প্যারীকে ছাড়িয়া আসিতে পারিলাম না, কারণ তাহার বাঁচিবার আর বিস্তর সময় নাই, অতএব সে আপনাকে ডাকাইবার জন্যে আমাকে পাঠাইয়াছে। আর মেম সাহেব, যদি করুণাকে সেখানে লইয়া যাইতে পারেন, তবে প্যারীর নিকটে সুন্দর সান্ত্বনার বাক্য শুনিয়া বোধ হয় তাহারও মন কিছু সুস্থির হইতে পারিবে। কিন্তু যে কোন রূপে আমাদিগকে শীত্র ফিরিয়া যাইতে হইবে, কেননা আপনকার আয়া ব্যতিরেকে প্যারীর কাছে আর কেহ নাই; পাড়ার সমস্ত লোক বৎশীর গোলমালেতে মন্ত্র হইয়াছে।

আয়ার বিষয় শুনিয়া আমি আশ্চর্য্য জ্ঞান করিয়া জিজ্ঞাসা করিলাম, আমি আয়াকে ঘরে রাখিয়া আসিয়াছিলাম, সে এখানে

কখন আইল? ফুলমণি কহিল, বোধ হয় প্রায় অর্দ্ধঘণ্টা হইল, এবং যেমন শুষ্ক ভূমি আকাশের জল চুম্বিয়া লয়, তেমনি আয়া সেই অবধি প্যারীর মুখ হইতে জীবন দায়ক বাক্য অতি যত্ন পূর্বক গ্রহণ করিতেছে।

ফুলমণি এই কথা কহিতে ২ তাহার স্বামী প্রেমচাঁদ আসিয়া উপস্থিত হইল। সে তিন দিন পূর্বে পাদরী সাহেবের কোন কর্মের উপলক্ষে কলিকাতায় গিয়া এই মাত্র ঘরে পৌঁছিল, তাহাতে সে বংশীর মৃত্যুর সংবাদ শুনিয়া অতিশয় দুঃখিত হইয়া তাহাদের বাটীতে তৎক্ষণাত্মে আইল। পরে ফুলমণির নিকটে প্যারীর বিষয় জ্ঞাত হইয়া প্রেমচাঁদ তাহাকে পুনরায় দেখিবার নিমিত্তে আমাদের সহিত যাইতে স্থির করিল। তাহাতে আমি কহিলাম, ভাল প্রেমচাঁদ, তুমি ও ফুলমণি দুঃখিনি করণাকে সঙ্গে করিয়া লইয়া যাও। আমরা তখনই করণার নিকটে গিয়া তাহার হাত ধরিয়া সকলেই প্যারীর গৃহে গেলাম। করণ নিরাশ হইয়া আপন মৃত সন্তানের মুখের প্রতি এক দৃষ্টিতে চাহিয়া বসিয়াছিল, তাহাতে আমরা যখন সেখান হইতে তাহাকে তুলিলাম, তখন আমাকে কোথায় লইয়া যাইবে, একথা জিজ্ঞাসা না করিয়া সে নিরব হইয়া আমাদের সঙ্গে ২ চলিল। বংশীর বাপও কিছু না বলিয়া ঘরে বসিয়া রহিল, কিন্তু নবীন আমাদের সহিত প্যারীর বাটীতে গেল।

অনন্তর আমাদের বৃদ্ধা বন্ধুর গৃহে পৌঁছিলে প্যারী চক্ষুঃ খুলিয়া মৃদুস্বরে বলিল, আ মেম সাহেব! আপনি আমার মৃত্যু দেখিতে আসিয়াছেন। আমি বলিলাম, হাঁ প্যারী, যে পর্যন্ত আমাদের স্বর্গস্থ পিতার বাটীতে তোমার সহিত সাক্ষাৎ না হয় সেই পর্যন্ত তোমার নিকটে বিদায় লইতে আসিয়াছি। তখন স্পষ্ট বোধ হইল যে

প্যারীর গমন কাল সন্ধিকট, কেননা সে এককালীন মৃদুস্বরে চারি  
পাঁচটি কথা ব্যতিরেকে আর বলিতে পারিল না।

ফুলমণি ভালুকপে বিবেচনা করিয়াছিল, যে এমত সময়ে  
বংশীর ভয়ানক মৃত্যুর বিষয় বলিয়া প্যারীর মনকে অঙ্গীর করা  
কর্তব্য নয়, এই কারণ প্রাতঃকালের তাবৎ ঘটনার বিষয়ে সে  
নিতান্ত অজ্ঞাতা ছিল। তথাপি আমি বড় ইচ্ছুক হইলাম, যে প্যারী  
করণাকে এই সময়ে একটি সান্ত্বনার বাক্য কহে; এই জন্যে  
তাহার হাত ধরিয়া বলিলাম, প্যারী, এই স্থানে একজন আছে, যে  
আপনাকে অতিশয় পাপিষ্ঠ জানিয়া বোধ করে, পরমেশ্বর  
আমাকেই ক্ষমা করিবেন না; এমত ব্যক্তিকে তুমি কি পরামর্শ  
দিয়া যাইবা?

তখন প্যারী করণাকে আর চিনিতে পারিল না, কিন্তু এই  
কথাতে সে মন্তক তুলিল, এবং তাহার অবশিষ্ট ষৎকিঞ্চিত্ব বল  
ছিল, তদ্বারা সে বলিতে লাগিল, ওগো! যীশুখ্রীষ্টের প্রতি দৃঢ়  
বিশ্বাস কর, তাহা করিলে ঈশ্বরের স্মরণ পুস্তকের মধ্যে যে পৃষ্ঠায়  
তোমার সকল পাপ লেখা আছে, সেই পৃষ্ঠ যীশুখ্রীষ্ট ত্রঃ বিন্দ  
রক্তময় আপন হস্তবারা মুচাইয়া ফেলিবেন; তাহাতে যে স্থানে  
তোমার দোষ লেখা ছিল, সে স্থানে খ্রীষ্টের রক্ত ব্যতিরেকে আর  
কিছু দেখিতে না পাইয়া ঈশ্বর তোমাকে পুণ্যবান् জ্ঞান করিবেন।

করণা ইহাতেও নিরাশ হইয়া বলিল, না না, আমার পাপ অতি  
ভারী হইয়াছে, তিনি আমাকে কখন পুণ্যবান্ জ্ঞান করিবেন না;  
আমাকে নরকে যাইতে হইবে, ইহা আমি নিশ্চয় জানিতেছি।  
প্যারী পুনর্বার কহিল, কোন প্রকারেই নয়, ঈশ্বর আপনি  
বলিয়াছেন, “তোমাদের পাপ রক্তবর্ণ হইলেও হিমের ন্যায়

শুক্রবর্ণ হইবে, ও সিন্দুরের ন্যায় রাঙ্গা হইলেও মেষ লোমের  
ন্যায় শাদা হইবে।” বিশয়িয় ১ । ১৮ ।

ইহা বলিয়া প্যারী চক্ষুঃ মুদ্রিত করিয়া কিছুকাল স্থির হইয়া  
রহিল, পরে আমরা শুনিতে পাইলাম, সে অতি ক্ষীণ রবে ধীরে ২  
বলিতেছে, হে যশী, তুমি কেমন প্রিয়! আহা, স্বর্গ কেমন সুখের  
স্থান! যীশু, তোমার পুণ্য রক্ত আমার সুন্দর পরিধান; সকল জগৎ  
লুপ্ত হইলে সেই আমার ভরসা থাকিবে। হে মৃত্যু, তোমার হৃল  
কোথায়? হে পরলোক, তোমার জয় কোথায়? যীশুখ্রীষ্ট দ্বারা  
আমিই জয়যুক্ত হইয়াছি।

আয়া এমত সময়ে বসিয়া ২ অতিশয় কাঁদিতেছিল, পরে সে  
প্যারীর হাত ধরিয়া বলিল, ও গো মা! আমার কথা শুন, আমার  
কথা শুন। তুমি কেমন সুস্থিরনূপে মরিতেছ, ইহা দেখিয়া আমি  
খীটিয়ান হইলাম।

বোধ হইল প্যারী এই কথা বুঝিতে পারিয়াছিল, কারণ তখনি  
তাহার ম্লান বদন প্রফুল্ল হইয়া উঠিল, এবং সে স্বর্গের প্রতি দৃষ্টি  
করিয়া কহিল, যদি এমত হয়, তবে হে পিতঃ, আমি তোমার  
ধন্যবাদ করি। ও আয়া! আমি স্বর্গে তোমার সহিত সাক্ষাৎ করিব।  
পরে সে ফুলমণির প্রতি ফিরিয়া বলিল, এইবার যাইতেছি।  
ফুলমণি গো! আমি তোমার বক্ষস্থলে মাথা রাখিয়া মরিতে চাহি;  
তুমি সপরিবারে আশীর্বাদ প্রাপ্ত হও। ও মেম সাহেব, ঈশ্বর  
আপনাকে আশীর্বাদ করুন! হে প্রভো যীশু, আইস! তাঁহার বাম  
হস্ত আমার মস্তকের নীচে আছে, ও তাহার দক্ষিণ হস্ত আমাকে  
আলিঙ্গন করিতেছে। আহা! ঈশ্বরের প্রিয় লোকদের কেমন শান্তি!  
কেমন সুখ!

এই বৃদ্ধা প্যারীর শেষ কথা, ফলতঃ ঐ বিশ্বস্ত দাসী এই সকল কথা বলিয়া আপন প্রভুর সুখের ভাগিনী হইতে লাগিল।

আমি তাহার মৃত দেহের সুস্থির মুখ পানে চাহিয়া ক্রন্দন করিতে পারিলাম না, বরং যে আত্মা ঐ দেহ ত্যাগ করিয়া পলায়ন করিয়াছে, সেই আত্মার সুখ ও শান্তি ও গৌরবের অবস্থা মনে করিয়া উল্লিঙ্গিতা হইলাম। এই ক্ষণে সহস্র ২ দৃতগণ প্যারীকে স্বর্গের দ্বারে অভ্যর্থনা করিতেছে, যীশু তাহাকে স্বর্গময় মুকুট পরাইতেছেন, এবং ঈশ্বর আপনি তাহার চক্ষের জল মুচাইয়া ফেলিতেছেন; ইহা নিশ্চয় জানিয়া আমি আহ্লাদ পূর্বক উচৈঃস্বরে কহিলাম, ধার্মিকের ন্যায় আমার মৃত্যু হউক! ও তাহার শেষ অবস্থার তুল্য আমার শেষ অবস্থা হউক!

পরে আমরা সকলে আপন মৃত বন্ধুর খাটের নিকটে হাঁটু পাতিয়া এই ক্ষুদ্র প্রার্থনা করিলাম, হে পিতঃ ঈশ্বর! এই দিবসের দুই প্রকার ঘটনা আমরা যেন কোনরূপে ভুলিয়া না যাই। বিশেষতঃ যে দুই ব্যক্তি এখন তোমাকে অন্বেষণ করিতেছে, তাহাদের মনকে শান্ত ও আনন্দযুক্ত কর, যেন তাহারা তোমার মৃত দাসীর ন্যায় বলিতে পারে, আহা! ঈশ্বরের প্রিয় লোকদের কেমন শান্তি ও কেমন সুখ!

এমন সময়ে পাদরী সাহেব গৃহে আইলেন। তিনি প্যারীর ব্যামোহ হওয়া অবধি প্রতিদিবস দুইবার তাহাকে দেখিয়া যাইতেন, ও তাহার সহিত প্রার্থনা করিতেন; কিন্তু সেই দিন বংশীর মৃত্যুর বিষয় শুনিয়া তাহাদের ঘরে গিয়াছিলেন, তাহাতে প্যারীর নিকটে আসিতে তাঁহার কিছু বিলম্ব হইয়াছিল। প্যারীর শেষ কথার বিষয় আমার নিকটে শুনিয়া তাঁহার চক্ষুঃ জলেতে

পরিপূর্ণ হইল; পরে তিনি তাহার মৃত দেহের প্রতি চাহিয়া কহিল,  
আ প্যারী! তুমি একজন প্রকৃত খ্রীষ্টিয়ান লোক ছিলা বটে।

পরে সন্ধ্যাকালে প্যারীকে কবর দেওয়া গেল। খ্রীষ্টিয়ান  
লোকদের মধ্যে চারি জন পুরুষ তাহার কাল সিন্দুক কাঁধে করিয়া  
কবর স্থানে লইয়া গেল। পাদরী সাহেবের পরিবার এবং আমি ও  
পাড়ার প্রায় সমস্ত লোক তাহা পশ্চাত্ ক্রন্দন করিতে ২ গেলাম;  
কিছুকাল পরে আমার স্বামী প্যারীর নিমিত্তে একটি পাকা গোর  
নির্মাণ করিয়া তাহার উপরে একখানা শ্বেতবর্ণ প্রস্তর স্থাপন  
করিলেন। ঐ প্রস্তরে প্যারীর নাম ও প্রভু যীশুখ্রীষ্টের এই বাক্য  
খোদিত করা গেল, যথা, “আমি তোমাদিগকে যথার্থ কহিতেছি,  
ইস্রায়েল লোকদের মধ্যেও এমন বিশ্বাস পাই নাই। আর অনেকে  
পূর্ব ও পশ্চিম হইতে আসিয়া ইব্রাহীম ও ইসহাক ও যাকুবের  
সহিত স্বর্গরাজ্যে একত্র বসিবে; কিন্তু যে স্থানে ক্রন্দন ও দণ্ডের  
ঘৰ্ষণ হয়, সেই বহির্ভূত অন্ধকারে রাজ্যের সন্তানেরা নিষ্ক্রিয়  
হইবে।” মথি ৮। ১০, ১১।

## সপ্তম অধ্যায়।

উক্ত সকল ঘটনা দেখিয়া আমার মন অতিশয় ব্যাকুল হওয়াতে আমি প্যারীর কবরস্থান হইতে ঘরে গিয়া ব্যামোহে পড়িলাম। সেই পীড়াতে আমি প্রায় দেড় মাস পর্যন্ত শ্যাগতা হইয়া রহিলাম; ইতোমধ্যে খ্রীষ্টিয়ান পাড়াতে আর যাইতে পারিলাম না, কিন্তু আমার আয়ার সহিত ধর্মের বিষয়ে বিস্তর মিষ্ট আলাপ করিতাম। সে ব্যক্তি সর্বদা যত্নপূর্বক আমার সেবা করিত, কিন্তু এখন পূর্বাপেক্ষা শ্রমী হইয়া যাহাতে আমি সন্তুষ্ট হইব কেবল এমত কর্ম করিতে চেষ্টান্বিত হইত। আর সে খ্রীষ্টিয়ান হওয়াতে আমারই প্রভুর দাসী এবং আমার সহিত একই স্বর্গের অধিকারিণী হইল, ইহা জানিয়া তাহার প্রতি আমারও পূর্বাপেক্ষা অধিক প্রেম জন্মিল। অনেক বৎসর পূর্বে আয়া আমার সহিত কানপুর হইতে আসিয়াছিল, এই হেতুক আমরা যে গ্রামে তখন ছিলাম সেই গ্রামে তাহার আত্মীয় লোক কেহই ছিল না; বরং তাহার স্বামী ও সন্তান না থাকাতে সে কানপুরে আর ফিরিয়া যাইতে ইচ্ছা না করিয়া আমারই সহিত থাকিতে স্থির করিয়াছিল; এই কারণ তাহার খ্রীষ্টিয়ান হওয়া এক প্রকার সহজ কর্ম। তথাপি শিশু কালাবধি সে মুসলমান জাতির নিয়ম সকল পালন করাতে ভিন্ন জাতীয় লোকদের সহিত আহারাদি করিতে তাহাকে অতিশয় কঠিন বোধ হইল; এমত দেখিয়া আমি তাহাকে এই পরামর্শ দিলাম, যে তুমি হঠাৎ জাতি ত্যাগ না করিয়া বরং কিছু দিন এ বিষয়ে বিবেচনা কর, পাছে লোকে বলে সাহেবে লোকেরা ফাঁদ পাতিয়া তোমাকে খ্রীষ্টিয়ান করিয়াছেন।

এক দিবস আয়া আমার খাটের নিকটে বসিয়া বর্ণমালা পড়িতেছিল, কারণ সে যে অবধি খ্রীষ্টিয়ান হইতে মানস

করিয়াছিল সেই অবধি পাঠ শিক্ষা করিতে আরস্ত করিল; এমত  
সময়ে আমি তাহাকে জিজ্ঞাসা করিলাম, আয়া! প্রথমে খীষ্ট ধর্ম  
গ্রহণ করিতে তোমার মনে কে প্রবৃত্তি দিল?

আয়া বলিল, মেম সাহেব, ফুলমণির সন্তানেরা ধর্মকে কিরূপ  
ভাবি বিষয় জ্ঞান করে আমি ইহা দেখিয়া চেতনা পাইয়াছিলাম;  
কেননা আমি ভাবিলাম, ইহারা শিশুমাত্র, অতএব এই শিশুগণ  
কোন ক্ষুদ্র দোষ করিলে যদি এমত উদ্বিগ্ন ও ব্যাকুল হয়, তবে  
নিত্য ঈশ্বরের আজ্ঞা লজ্জন করিতেছি যে আমি, আমি কি প্রকারে  
প্রভুর কোপ এড়াইতে পারিব? ধর্মাত্মা এরূপে আমার মনের  
মধ্যে পাপের বোধ জন্মাইয়া আমাকে ইহা জ্ঞাত করাইলেন, যে  
প্রায়শিত্ব বিনা ঐ পাপ কখন ক্ষমা হইতে পারিবে না। সাধু ও  
সত্যবতী এমত প্রায়শিত্বের বিষয় আমাকে অনেকবার কহিত,  
তাহাতে আমি আরও শুনিতে ইচ্ছুক হইয়া তাহাদিগকে বিনতি  
করিলাম, তোমরা যীশুখ্রীষ্টের তাবৎ বৃত্তান্ত আমার সাক্ষাতে পাঠ  
কর। আমি তাঁহার মহা দয়ার বিষয়ে যত শুনিলাম, ততই আমার  
মন তাঁহার প্রতি আকৰ্ষিত হইল; কিন্তু খ্রীষ্টের মৃত্যুদ্বারা পাপী  
লোকেরা কি প্রকারে নির্দোষী হইতে পারে, ইহা তখন আমি ভাল  
বুঝিতাম না। পরে প্যারী মরণ কালে খ্রীষ্টের রক্তময় হস্তের দৃষ্টান্ত  
দিয়া যখন করণাকে তাহা বুঝাইয়া দিল, তখন আমিও  
সুন্দররূপে জ্ঞাতা হইলাম যে যীশুর পতিত রক্তদ্বারা পাপিষ্ঠ  
ব্যক্তিরা কেবল ক্ষমা পায় তাহা নয়, ঈশ্বর তাহাদিগকে নির্দোষী  
জ্ঞান করেন; ইহা জানিয়া আমি এমন মহা পরিভ্রান্ত অবজ্ঞা  
করিতে আর পারিলাম না।

আমি কহিলাম, হাঁ আয়া! ঈশ্বরের স্মরণ পুস্তক হইতে যীশুর  
রক্তময় হস্ত যে আমাদের পাপ মুচাইয়া ফেলে, তাহা অতি সুন্দর

দৃষ্টান্ত। আর আমার নিজ পাপ সকল এইরূপে মোচন হইয়াছে, ইহা আমাদের প্রিয়া প্যারী কেমন দৃঢ় বিশ্বাস করিত।

প্যারীর মৃত্যুর কথা সুরণ হওয়াতে আয়া কাঁদিতে ২ বলিল, আ মেম সাহেব! প্যারীর পীড়া হইলে পর তাহার সহিত আমার যে দুই বার সাক্ষাৎ হইল, তদ্বারা আমার কেমন লাভ জন্মিয়াছে। আহা! সকল খ্রীষ্টিয়ান স্ত্রীলোকেরা যদি প্যারী ও ফুলমণির মত হইত, তবে বোধ করি অল্প দিনের মধ্যে একটিও হিন্দু কিঞ্চা মুসলমান আর থাকিত না।

এমত সময়ে এক জন বাহিরে দাঁড়াইয়া আয়াকে ডাকিলে আমাদের কথোপকথন ভঙ্গ হইল; তাহাতে আমি তৎক্ষণাত্ম সেই মিষ্ট রব শুনিয়া জানিলাম যে সত্যবতী আসিয়াছে, অতএব তাহাকে ঘরের ভিতরে ডাকিলাম। সত্যবতী আসিয়া বলিল, মেম সাহেব, মা আমাদিগকে কহিলেন, যে স্কুল হইতে ফিরিয়া আসিবার সময়ে আয়ার নিকটে গিয়া মেম সাহেব কেমন আছেন ইহা জিজ্ঞাসা করিয়া আইস; এই নিমিত্তে আমরা আসিয়াছি।

আমি বলিলাম, সত্যবতী, অদ্য আমি কিছু ভাল আছি, অতএব তোমার ভাই যদি বাহিরে থাকে, তবে তাহাকে ডাকিয়া আন। তাহাতে সাধু আসিয়া আমাকে আপন রীত্যানুসারে অতি শিষ্টরূপে সেলাম করিয়া দাঁড়াইল। পরে আমার মেজের উপর বড় একখান আর্শি দেখিয়া তাহারা দুইজনে অত্যন্ত আশ্চর্য জ্ঞান করিল, কারণ পূর্বে তাহারা এমন বস্ত্র কখন দেখে নাই। তখন সত্যবতী আনন্দপূর্বক করতালি দিয়া বলিল, ও দাদা! আমি মাকে গিয়া বলিব, যে এখানে আসিয়া আমরা এক আকৃতি দুইজন মেম ও দুইজন আয়াকে দেখিতে পাইলাম; এ কথার ভাব মা কখন

বুঝিতে পারিবেন না। পরে মেজের উপর যে গোলাপ জল ও আতরাদির শিশি ছিল, তাহাও দেখিয়া ছেল্যারা বড় প্রশংসা করিল, এবং আমি কিঞ্চিৎ আতর তাহাদের কাপড়ে ঢালিয়া দিলে তাহারা অত্যন্ত আহ্লাদে পুলকিত হইয়া কি করিবে তাহা জানিল না। কিন্তু এমত হইলেও তাহারা বড় শিষ্ট ব্যবহার করিয়া কোন দ্রব্যেতে হাত দিল না, এবং কোন সামগ্ৰী আমার নিকটে চাহিল না।

পরে আমি যে পীড়িতা ছিলাম, তাহা সাধু স্মৃতণে রাখিয়া বলিল, মেম সাহেব, বোধ করি আমরা এখন ঘরে গেলে ভাল হয়, এখানে থাকিয়া কেবল আপনাকে ব্যামোহ দিতেছি। কিন্তু তাহা না হইয়া বরং তাহাদের নিষ্কপট কথা শুনিয়া আমার মনে আমোদ জন্মিতেছিল, এই হেতু আমি কহিলাম, না না, এখন তোমরা ঘরে যাইও না। আজি স্কুলে কি শিখিয়াছ, তাহা বসিয়া আমাকে বল।

এই কথা শুনিয়া সত্যবতী কহিল, ও মেম সাহেব, আপনি অনেকদিন হইল একবার বলিয়াছিলেন, কোন রবিবার দিনে আমি গিয়া ধর্মপুস্তকের পদ তোমাদের মুখস্থ শুনিব; কিন্তু একবারও যান নাই, অতএব যদি আজ্ঞা করেন, তবে স্কুলের পাঠ না দিয়া, গত রবিবারের শিক্ষিত পদগুলিন আপনার সাক্ষাতে বলি; তাহার মধ্যে অনেক উত্তম ২ কথা আছে। আমি কহিলাম, ভাল তাহাই বল; পরে তোমার পিতা কি প্রকারে সে সকল পদ তোমাদিগকে বুঝাইয়া দিয়াছেন, তাহাও বলিতে হইবে। সত্যবতী প্রথমে আরম্ভ করিতে চাহিল, তাহাতে তাহার ভাই হাসিয়া বলিল, সত্যবতী, আমি প্রথমে মুখস্থ বলিলে বলিতে পারিতাম; কিন্তু ক্ষতি নাই, তুমি বলিতে চাহিতেছ, অতএব তুমিই বল।

তখন সত্যবতী শুন্দরপে এই ২ পদ সকল মুখস্থ বলিতে  
লাগিল, যথা; “বালকের গন্তব্য পথে তাহাকে শিক্ষা দেও, তাহাতে  
সে প্রাচীন হইলে তাহা হইতে বিমুখ হইবে না।” হিতোপদেশ ২২  
। ৬ ।

“বালকের মনে অজ্ঞানতা বন্ধ থাকে, কিন্তু শাসনদণ্ড দ্বারা  
তাহা তাহা হইতে দূরে যায়।” হিতোপদেশ ২২ । ১৫ ।

“হে বালকগণ, পরমেশ্বরের বাক্যানুসারে তোমার পিতা  
মাতার আজ্ঞাবহ হও, কেননা ইহা উপযুক্ত।” ইফিষীয় মণ্ডলীর  
প্রতি পত্র ৬ । ১ ।

“যীশু শিশুগণকে দেখিয়া কহিলেন, শিশুদিগকে আমার  
নিকটে আসিতে দেও, তাহাদিগকে বারণ করিও না, কেননা এমত  
ব্যক্তিরা ঈশ্বরের রাজ্যের অধিকারী।” মার্ক ১০ । ১৪ ।

সত্যবতী আপন পাঠ সাঙ্গ করিলে পর আমার মুখ পানে দৃষ্টি  
করিয়া বলিল, ঐ শেষ পদটি সকল হইতে ভাল। যীশুর্ণীষ্ট বলেন,  
শিশুদিগকে আমার নিকটে আসিতে দেও, ইহাতে তাঁহার কত বড়  
দয়া প্রকাশ পায়! আহা! আমি যীশুর প্রতি অতিশয় প্রেম করি।  
এই প্রিয়া বালিকার বাক্য শুনিয়া আমার চক্ষুঃ জলেতে ছল্ ২  
করিল, তাহাতে সে তাহা টের পাইয়া আপন ছোট শাড়ির অঞ্চল  
দিয়া শীত্র মুচাইয়া ফেলিল।

পরে সাধু কহিল, সত্যবতী, যে বালকেরা আপন পিতা মাতার আজ্ঞাবহ হইয়া ইহকালে পুরস্কার পাইয়াছিল, তাহাদের কথা ধর্মপুস্তকের মধ্যে আমরা কি প্রকারে খুজিয়া বাহির করিলাম, সে বিষয়ও মেমকে জানাও।

সত্যবতী কহিল, সকল কথা এখন আমার মনে নাই, কিন্তু যে দুই জন বালকের বৃত্তান্ত আমি ধর্মপুস্তকের মধ্যে আপনি খুজিয়া বাহির করিলাম, তাহা মেম সাহেবকে বলিতে পারি। যুষফ ও শৌল আপন ২ পিতার আজ্ঞা পালন করাতে শেষে রাজা হইয়াছিল। যুষফ আপন পিতার কথা শুনিয়া ভাতাদের তত্ত্ব করিতে গিয়াছিল, তাহাতে সে মিসর দেশে নীত হইয়া দেশাধ্যক্ষ হইল। তদ্দুপ শৌল আপন ২ পিতার গর্দভ অন্বেষণ করিতে গেলে, শিমূয়েল ভবিষ্যদ্বত্তা তাহার সহিত সাক্ষাৎ করিয়া তাহাকে ইস্রায়েল দেশের রাজপদে অভিষিক্ত করিলেন।

আমি এই কথাতে ঈষৎ হাসিয়া বলিলাম, ভাল সত্যবতী, তুমি ভারি দৃষ্টান্ত বাহির করিয়াছ বটে! এখন বল দেখি, যদি তুমি আপনার পিতা মাতার কথা শুন, তবে কি একটি ছোট রাণী হইবার অপেক্ষা কর?

সত্যবতী অতিশয় গন্তীর হইয়া কহিল, না মেম, এমত নয়; কিন্তু মা বাপের কথা শুনিলে ঈশ্বর আমার প্রতি প্রেম করিবেন, তাহা হইলে আমি আর কোন পুরস্কার চাহি না। এখন দাদার পাঠ লড়ন, ইনি আমা অপেক্ষা অনেক পদ জানেন।

তখন সাধু স্থির হইয়া দাঁড়াইয়া স্পষ্টরূপে বলিতে লাগিল, যথা; “পরমেশ্বর বিষয়ক যে ভয়, সেই জ্ঞানের আরস্তক; কিন্তু

অজ্ঞানেরা বিদ্যা ও উপদেশ তুচ্ছ বোধ করে।” হিতোপদেশ ১ ।  
৭ ।

“হে আমার পুত্র, পাপিগণ তোমাকে কৃপথে লওয়াইলে তুমি  
সম্মত হইও না। তাহাদের সহিত সে পথে যাইও না, তাহাদের  
পথ হইতে তোমার চরণ ফিরাও।” হিতোপদেশ ১ । ১০, ১৫ ।

“মূর্খ পুত্র আপন পিতার মনস্তাপ ও মাতার দুঃখজনক হয়।”  
হিতোপদেশ ১৭ । ২৫ ।

“আমিই প্রকৃত মেষপালক; যে জন প্রকৃত মেষপালক, সে  
মেষের নিমিত্তে আপন প্রাণ সমর্পণ করে। আমার মেষগণ আমার  
রব শুনে; আমি তাহাদিগকে জানি, এবং তাহারা আমার পশ্চাত  
গমন করে। আমি তাহাদিগকে অনন্ত পরমায়ু দি; তাহারা কখনো  
বিনষ্ট হইবে না, এবং কেহ আমার হস্ত হইতে তাহাদিগকে হরণ  
করিতে পারিবে না।” যোহন ১০ । ১১, ২৭ । ২৮ ।

“আমি দ্রাক্ষালতাস্ত্ররূপ, তোমরা শাখাস্ত্ররূপ; যে জন আমাতে  
থাকে, এবং যাহাতে আমি থাকি, সে প্রচুর ফলেতে ফলবান् হয়;  
কিন্তু আমা ভিন্ন তোমরা কিছুই করিতে পার না।” যোহন ১৫ । ৫ ।

সাধুর পাঠ সাঙ্গ হইলে পর আমি জিজ্ঞাসিলাম, ভাল সাধু, প্রভু  
যীশুশ্রীষ্ট কি তাবে আপনাকে মেষপালক বলিলেন, তাহা কি তুমি  
জান?

সাধু উত্তর করিল, হাঁ মেম সাহেব, জানি। যেমন মেষপালক আপন মেষগণকে রক্ষা করে, তদ্বপ যীশু আপন বিশ্বস্ত লোকদিগকে সকল আপদ হইতে ত্রাণ করেন। ধর্মপুস্তকের এক স্থানে লেখা আছে, শয়তান গর্জনকারি সিংহ; যীশু সেই গর্জনকারি সিংহ হইতে আপন শিষ্যদিগকে রক্ষা করেন, অর্থাৎ তাহাদিগকে এমত শক্তি দেন যে তাহারা শয়তানের পরীক্ষায় উত্তীর্ণ হইতে পারে।

তখন সত্যবতী বলিল, ও দাদা! তুমি মেষশাবকের বিষয়ে মেম সাহেবকে বলিতে ভুলিয়াছ। দেখ, ছোট বাচ্চাগুলিন ক্লান্ত হইলে মেষপালক যেমন তাহাদিগকে ক্রোড়ে করিয়া লইয়া যায়, তদ্বপ যীশু আপন লোকদের ছোট ছেল্যাদিগকে প্রেম করিয়া বলেন, শিশুদিগকে আমার নিকটে আসিতে দেও।

তাহাতে আমি কহিলাম, সত্যবতী, একথা যথার্থ বটে; এবং যীশুখ্রীষ্ট এক বার আপনি বালক ছিলেন, অতএব তিনি ছেল্যাদের সুখ ও দুঃখ সকল ভালুকপে জ্ঞাত আছেন।

ইহা শুনিয়া সত্যবতী প্রফুল্ল বদনে বলিল, ও মেম সাহেব, আমি যখন যীশুর নিকটে প্রার্থনা করি, তখন ঐ কথা আমার মনে উঠে। একবার পাদরী সাহেবের মেম প্রতিজ্ঞা করিয়াছিলেন, যদি বৃষ্টি না হয়, তবে সন্ধ্যাকালে আমি তাবৎ স্কুলে বালক বালিকাকে ওপারে লইয়া যাইয়া এক সাহেবের পোষা চিত্র বাঘ দেখাইব; তাহাতে আমি প্রার্থনা করিলাম যেন সেদিন বৃষ্টি না হয়। প্রার্থনা করিয়া আমি ভাবিতে লাগিলাম, কি জানি এমত ক্ষুদ্র বিষয়ে প্রার্থনা করিলে ঈশ্বর আমার প্রতি ক্রুদ্ধ হইবেন; কিন্তু পরে মনে করিলাম, যীশু যখন বালক ছিলেন, তখন বোধ হয় তিনিও পোষা

বাঘ দেখিয়া সন্তুষ্ট হইতেন, অতএব আমি ঐরূপ প্রার্থনা করিতে আর ভয় করিলাম না। আমার প্রার্থনাও সফল হইল, কারণ সে দিবসে বৃষ্টি হইল না, তাহাতে আমরা বাঘকে স্বচ্ছন্দে দেখিলাম।

তখন সাধু বলিল, মেম সাহেব, পিতা সেই কথা শুনিয়া কহিলেন, সত্যবতী ভাল করিয়াছে। পৌল প্রেরিত লিখিয়াছেন; যথা, “দৌর্বল্যেতে আমাদের সহিত দুঃখভোগ করিতে অক্ষম, এমন মহাযাজক আমাদের নহেন।” ইতী ৪ । ১৫ । অতএব বয়ঃপ্রাপ্ত লোকেরা যাহা চাহে তাহার নিমিত্তে যদি প্রার্থনা করিতে আজ্ঞা পাইয়াছে, তবে অবশ্য শিশুরাও যাহা ২ ইচ্ছা করে তাহার জন্যে প্রার্থনা করিতে পারে।

আমি কহিলাম, তোমার পিতা যথার্থ বুঝিয়াছে। এখন বল দেখি, “তোমরা আমাতে থাক,” এই যে আজ্ঞা খ্রীষ্ট আপনার শিষ্যগণকে দিয়াছেন ইহার অভিপ্রায় কি?

সাধু বলিল, ইহার অর্থ এই, আমাদিগকে খ্রীষ্টের পশ্চাত ২ গমন করিতে হইবে, ও তাঁহার নিকটে থাকিতে হইবে। আমি জিজ্ঞাসিলাম, তিনি এমত আজ্ঞা কেন দিলেন? সাধু কহিল, যেমন তাল গাছের মূল হইতে রস না পাইলে শুক্র হইয়া যায়, সেইরূপ খ্রীষ্টের লোকেরা যদি তাঁহাদের সঙ্গ ছাড়ে, তবে তাহাদের ধর্ম নষ্ট হয়; কারণ শয়তান আসিয়া সতত মনুষ্যদের মনকে পরীক্ষা করে, তাহাতে তাহারা যদি খ্রীষ্টের অনুগ্রহ ও শক্তি না পায়, তবে শয়তানকে জয় করিতে না পারিয়া পাপে পতিত হইবে।

এমত কথোপকথন হইতে ২ অনেক সময় বহিয়া গেল; ইতোমধ্যে আমি ও ছেল্যারা সকলই ভুলিয়া গিয়াছিলাম, যে

তাহাদের মাতা তাহাদের অপেক্ষাতে ভাবিতা হইয়া থাকিবে। কিঞ্চিৎকাল পরে ফুলমণি আপন হারাণ ধনকে আপনি খুজিতে আইল। সে ছেল্যাদিগকে আমার সহিত দেখিয়া কিছু মাত্র অসন্তুষ্টা না হইয়া বলিল, মেম সাহেব, আপনি পীড়িতা আছেন, অতএব ভয় হয় ছেল্যারা আপনাকে বিস্তর ব্যামোহ দিয়া থাকিবে; আমি এখন উহাদিগকে একেবারে ঘরে লইয়া যাই।

ফুলমণির এইরূপ ব্যবহারদ্বারা বাঙালাদেশস্থ স্ত্রীলোকেরা শিক্ষা পাইতে পারে, বিশেষতঃ অনেকেই সাহেব লোকদের কিম্বা আপন ২ প্রতিবাসিদের ঘরে অসময়ে উপস্থিতা হইয়া তাহাদিগকে নির্থক ব্যস্ত করে।

আমি ফুলমণিকে বলিলাম, না ফুলমণি, তোমার ছেল্যারা আমাকে কিছু মাত্র ব্যামোহ দেয় নাই; আমি ইহাদিগকে ধর্মের বিষয় জিজ্ঞাসা করিতেছিলাম, কেননা আমার বোধে খ্রীষ্টের খোঁয়াড়ের মেষশাবকগণকে শিক্ষা দেওয়া অপেক্ষা পৃথিবীর মধ্যে আর উত্তম কর্ম নাই।

এমত সময়ে সাধু ও সত্যবতী আমার হিরামন তোতাকে দেখিবার জন্যে বারাণ্ডায় দৌড়িয়া গেল। তাহাতে আমি তাহাদের প্রশংসা করিতে ভয় না করিয়া বলিলাম, ফুলমণি, আমি দেখিতেছি যে তোমার সন্তানেরা ধর্মকে ভালবাসে, এবং তাহাদের স্বর্গস্থ পিতা যাহাতে সন্তুষ্ট হইবেন কেবল এমত কর্ম করিতে চেষ্টা করে অতএব স্পষ্ট বোধ হয়, যে ঈশ্বর তোমার সকল সুশিক্ষাতে আশীর্বাদ করিতেছেন।

ফুলমণি কহিল, আঃ মেম সাহেব! আমি এই প্রার্থনা করি, যেন আমি শিমুয়েল ও তীমথির মায়ের ন্যায ছেল্যাদিগকে শিশুকাল অবধি ধর্ম পথে লওয়াইতে পারি, এবং শিমুয়েল ও তীমথি যেরূপ ঈশ্বরপরায়ণ হইয়া উঠিল, সেইরূপ আমার সন্তানেরাও যদি ধার্মিক হইয়া উঠে, তবে আমার মনোবাঞ্ছা সিদ্ধ হইবে।

আমি উত্তর করিলাম, ভয় নাই ফুলমণি, তুমি অবশ্য সেই বর পাইবা; কারণ ঈশ্বর বলিয়াছেন, “যাহারা আমার প্রতি প্রেম করে তাহাদিগের প্রতি আমিও প্রেম করি,” এবং তিনি তাহাদিগকে কখন রিক্ত হস্তে বিদায় করেন না। করুণা যদি আপন সন্তানদিগকে শিক্ষা দিয়া তাহাদের নিমিত্তে প্রার্থনা করিত, তবে এখন তাহার পুত্রের বিনাশের বিষয়ে সে আপনাকে নির্দোষী জানিয়া কিছু শাস্তা হইত।

এই কথা সাঙ্গ হইলে পর সাধু ও সত্যবতী ভিতরে আইলে ফুলমণি তাহাদিগকে সঙ্গে করিয়া বিদায় লইয়া ঘরে গেল।

আহা! এই দরিদ্রা খ্রিস্টিয়ান স্ত্রীলোক ও তাহার প্রিয় সন্তানদের সহিত সাক্ষাৎ করণদ্বারা আমার মন কেমন উল্লাসিত হইল। ভারতবর্ষের তাবৎ লোক এক দিবস প্রভুর সেবা করিবে, ফুলমণির পরিবার এমত সুদিবসের বায়না স্বরূপ হইয়াছে, আমি ইহা ভাবিয়া মনে ২ এই প্রার্থনা করিলাম, হে প্রভো, এমত কাল শীত্র উপস্থিত কর; এবং সুস্থকারি কিরণবিশিষ্ট ধর্মরূপ সূর্য উদয় করাইয়া এই দেশের ভ্রমান্বকার নষ্ট কর। হে প্রভো, যদ্যপি আমি কেবল কাষ্ঠচেদক ও জলবাহক স্বরূপ হই, তথাপি আমাদ্বারা যেন এই মহৎ কর্মের কিছু ২ বৃদ্ধি হয়!

প্রায় দেড় মাস গত হইলে পর আমি স্বাস্থ্য পাইয়া পুনর্বার বাহিরে যাইতে পারিলাম; তাহাতে প্রথমে দুঃখিনী করুণার সহিত সাক্ষাৎ করিতে বাঞ্ছা করিয়া তাহার বাটীতে উপস্থিতা হইয়া দেখিলাম, তাহার মুখ অতিশয় ম্লান এবং মনের দুঃখ প্রযুক্ত বড় কৃশ হইয়াছে।

করুণা আমাকে দেখিবামাত্র আপন পুত্রের মৃত্যুর দিবস মনে করিয়া তৎক্ষণাত্ম ক্রন্দন করিতে ২ বলিল, আ মেম সাহেব! আমার কেমন মন্দ কপাল, দুঃখেতেই আমার কাল বহিয়া যাইতেছে। তাহাতে আমি বংশীর বিষয়ে আর কিছু বলিতে ভাল না বুঝিয়া কহিলাম, করুণা, তোমার মন যাহাতে শোক হইতে বিশ্রাম পায় এমত চেষ্টা কর। আপন কপালকে দোষ দেওয়াতে কোন ফল নাই, বরং তদ্বারা অন্তঃকরণ কঠিন হয়, এবং তাহাতে তোমার প্রতি ঈশ্বরের গ্রেগ জন্মে। বল দেখি করুণা, পৃথিবীর মধ্যে দুঃখ কি প্রকারে প্রবেশ করিল?

করুণা উত্তর করিল, পাপদ্বারা দুঃখ হইল।

আমি কহিলাম, একথা সত্য; তবে দুখ ঘুচাইবার জন্যে দুঃখের কারণকে দূর করিতে হয়, অর্থাৎ কপালকে দোষ না দিয়া আপন পাপের বিষয়ে ক্রন্দন ও বিলাপ করত তাহা ত্যাগ করিতে হয়। যীশু বলিয়াছেন, খিদ্যমান লোকেরা ধন্য, কারণ তাহারা সান্ত্বনা পাইবে; অর্থাৎ যাহারা পাপের বিষয়ে খেদ করে তাহারাই ধন্য, যেমন আমি পূর্বে বলিয়াছিলাম, যে জন আপন পীড়ার নিমিত্তে খেদ করিয়া ঔষধাদি খায় সে ব্যক্তি অবশ্য সুস্থ হইতে পারে। পাপ মনের রোগ, শ্রীষ্ট তাহার চিকিৎসক হইয়াছেন, তুমি তাঁহার প্রতি বিশ্বাস রাখিলে পাপ হইতে মুক্ত হইবা।

করণা কহিল, হাঁ মেম সাহেব, সে সত্য বটে; কিন্তু আমার তাবৎ দুঃখ আপনা হইতে জন্মে না, ইহাতে আমার স্বামীর অধিক দোষ আছে। দেখুন, আজি আমি সুঁড়ির দোকান পর্যন্ত পয়সা চাহিবার জন্যে তাহার পিছে ২ গিয়াছিলাম, তথাচ একটি কড়াও পাইলাম না, বরং সে আমাকে গালি দিয়া তাড়াইয়া দিল।

আমি কহিলাম, করণা, তুমি যদি পারিপাট্য ও মিষ্ট কথাদ্বারা আপনার বাটীকে রম্যস্থান করিতা, তবে সে অন্য স্থানে কেন চৰ্খল হইয়া বেড়াইবে? কিন্তু তুমি তাহাই করিলে সেও তোমাকে ভালুকপে প্রতিপালন করিবে।

করণা বলিল, বোধ হয় তাহা কেবল আমা হইতে হইবে না। কেহ যদি আমাকে শিক্ষা দেয়, তবে কি জানি হইলেও হইতে পারে।

পরে আমি কহিলাম, করণা, আমার পরামর্শে যদি চলিতে পার, তবে আমি তোমাকে শিক্ষা দিই। তুমি প্রথমে ঈশ্বরের দশ আজ্ঞা মুখস্থ কর, পরে সে সকল আজ্ঞা পালন করিতে যত্নবতী হও, বিশেষতঃ বিশ্রামবারকে পবিত্র রূপে মানিয়া প্রভুর গীর্জা ঘরে যাও। আহা করণা! তুমি যদি এত দিন গীর্জায় যাইতা, তবে এখন ধর্মের বিষয়ে এমত অজ্ঞান হইয়া থাকিতা না। করণা বলিল, মেম সাহেব, আমার একখানিও ভাল কাপড় নাই, এই জন্যে গীর্জায় যাইতে লজ্জা করি। সকলে রবিবার দিনে ভাল কাপড় পরিয়া আইসে, কেবল আমি কি মলিন বন্দু পরিয়া যাইব?

আমি উত্তর করিলাম, করণা, “প্রভুর গৃহে পরিষ্কার বন্দু পরিয়া যাওয়া উচিত বটে, তথাচ যদি কোন প্রকারে এমন বন্দু

যোগাইতে না পার, তবে গীর্জা ত্যাগ করা অপেক্ষা সামান্য বন্দ  
পরিয়া যাওয়া ভাল; কেননা শরীর এক প্রকার তুচ্ছনীয় বন্দ, আত্মা  
অতিশয় দুর্লভ, অতএব তোমার আত্মা যেন খ্রীষ্টের পবিত্রতাতে  
ভূষিত হয়, এমত চেষ্টা কর। দায়ুদ রাজা যখন জিজ্ঞাসিলেন,  
“পরমেশ্বরের পর্বতে কে আরোহণ করিবে? ও তাঁহার ধর্মাধামে  
কে অধিষ্ঠান করিবে?” তখন ধর্মাত্মা উত্তর করিলেন, “যাহার  
পরিষ্কৃত করতল ও পবিত্র অন্তঃকরণ আছে; যে জন মিথ্যা কথাতে  
মনোনিবেশ ও মিথ্যা শপথ না করে; এমত ব্যক্তি পরমেশ্বর  
হইতে আশীর্বাদ প্রাপ্ত হইবে।” গীত ২৪। ৩, ৪, ৫। আর  
করণা, বিবেচনা কর, তুমি যদি এখন মনুষ্যদের সমাজে মলিন  
বন্দ পরিয়া যাইতে লজ্জা কর, তবে শেষ বিচারে তাবৎ পৃথিবীস্থ  
লোকদের ও দিব্য দৃতগণের সাক্ষাতে পাপরূপ মলিন নেকড়া  
পরিয়া কি প্রকারে দাঁড়াইবা? সে যাহা হউক, তুমি কি গীর্জায়  
যাইবার জন্যে কোন প্রকারে একখনা উপযুক্ত কাপড় কিনিয়া  
রাখিতে পার না?

করণা কহিল, মেম সাহেব, চারিটি ভাত খাইয়া যে তৃপ্তা হই,  
এমন কড়ি স্বামী আমাকে আনিয়া দেয় না, তবে কোথা হইতে  
ভাল শাড়ি কিনিব? এবং এখন গীর্জায় গেলে আমার কি ফল  
হইবে? আমি আপন দুর্ভাগ্য ছেল্যার আত্মা নষ্ট করিয়াছি, অতএব  
ঈশ্বর আমার প্রার্থনা কখন শুনিবেন না। ঐ ছেল্যার সহিত  
আমাকে অনন্তকাল নরকাগ্নিতে পুড়িতে হইবে।

ইহা শুনিয়া আমি কহিলাম, হায় ২ করণা! তুমি কি এত শীত্র  
প্যারীর শেষ বাক্য ভুলিয়া গেলা?

করণা বলিল, না না মেম, তাহা ভুলি নাই, বরং আমি অনেকবার আপন অন্তঃকরণের মধ্যে সেই মিষ্ট কথা গুলিন আন্দোলন করিয়া থাকি; তথাচ খীষ্ট যে আমাকে ত্রাণ করিবেন আমার এমত ভরসা হয় না।

আমি কহিলাম, করণা, তুমি ভয় করিও না; তিনি অবশ্য তোমাকে ত্রাণ করিবেন। তুমি প্রতিদিন এইরূপ প্রার্থনা করিও, হে পরমেশ্বর! তোমার পুত্র যীশুখ্রিস্টের রক্ত যে তাবৎ পাপ হইতে আমাদিগকে পরিষ্কৃত করে, আমার মনে এমত দৃঢ় বিশ্বাস জন্মাইয়া দেও। করণা স্বীকার করিয়া কহিল, ভাল মেম সাহেব, তাহাই করিব।

পরে আমি বলিতে লাগিলাম, তোমার গৃহ যেন সুখের স্থান হয়, এই জন্যে আমি তোমাকে আর দুই একটি উপদেশ দিই। তোমার নিজ ব্যবহার পূর্বাপেক্ষা উত্তম হউক, তাহা হইলে যদ্যপি তোমার স্বামী তাহাতে হঠাত মনোযোগ না করে, তথাপি শেষে তাহা দেখিয়া তোমার প্রশংসা অবশ্য করিবে। তুমি সকল প্রকার রাগ ত্যাগ করিয়া ঘরের উচিত কর্ম সকল নির্বাহ কর; এবং প্রেমচাঁদ কর্ম হইতে ফিরিয়া আইলে ফুলমণি যেমন তাহার ঘরে পরিবার কাপড় ও ছুকা ইত্যাদি প্রস্তুত করিয়া রাখে, তেমনি তুমি ও সর্ব প্রকারে আপনার স্বামীর সন্তোষ জন্মাইতে চেষ্টা কর। বিশেষতঃ প্রতিদিন পরমেশ্বরের নিকটে প্রার্থনা কর, তিনি যেন তোমাকে এই সকল করিতে সুমতি ও শক্তি দিয়া তোমাদের দুই জনের মন ফিরাইয়া দেন। আহা! ঈশ্বর এই প্রার্থনা শুনিলে তোমরা কেমন সুখে বাস করিবা। নবীন এখন আমার নিকটে প্রায় থাকে, তথাপি সে তোমারি সন্তান, এবং তাহার শিক্ষার বিষয়ে ঈশ্বর তোমার নিকটে হিসাব লইবেন, এই জন্যে তুমি তাহাকে

এমত কথা বল; আমি এতদিন পর্যন্ত ঈশ্বরকে না জানিয়া তাঁহার আজ্ঞা লজ্জন করিয়াছি, কিন্তু এখন ধর্মপথে চলিতে ইচ্ছা করি, ও তোমাকেও সেই পথে আনিতে চাহি। নবীন এমত কথা শুনিয়া তোমাকে তুচ্ছ না করিয়া আরও সম্মান করিবে; কেননা খ্রীষ্টিয়ানদের কিরণ ব্যবহার করা উচিত তাহা সে সুন্দররূপে জ্ঞাত আছে। এই নৃতন পথ তোমার পক্ষে প্রথমে কঠিন বোধ হইবে তাহা আমি জানি, তথাপি তাহা ত্যাগ করিও না, বরং অদ্যাবধি আপন ব্যবহার সুধরাইতে আরম্ভ কর। কি জানি তোমার স্বামী এই সময়ে সুঁড়ির দোকানে মাতাল হইয়া পড়িয়া রহিয়াছে; কিন্তু তদ্বারা নিরাশ না হইয়া তাহার প্রত্যাগমনের নিমিত্তে সকল দ্রব্য সুন্দর রূপে আয়োজন করিয়া রাখ। তোমার নিকটে খরচের জন্যে টাকা পয়সা কিছু নাই, তাহা আমি জানি, অতএব এই দুইটি টাকা লও; এবং যাবৎ তোমরা দুই জনে সুখে বাস না কর, ও এক সঙ্গে প্রভুর ভজনালয়ে না যাও, তাবৎ আমি তোমাদের জন্যে ঈশ্বরের নিকটে প্রার্থনা করিতে ক্ষত্বা হইব না।

এই কথা শুনিয়া করুণার মুখ কিছু প্রফুল্ল হইল, কিন্তু পরে সে নিশাস ত্যাগ করিয়া বলিল, আহা! এমন সুগতি কি আমার হইবে?

আমার গৃহ কি কখন ফুলমণির গৃহের মত হইবে?

আমি কহিলাম, করুণা, অবশ্য হইতে পারে, কিন্তু এই নিমিত্তে তোমাকে চৌকি দিয়া প্রার্থনা করিতে হইবে। তুমি আপনার মনকে নিত্য ২ চৌকি দেও, যেন কোন প্রকারে পাপ তাহাতে প্রবেশ করিতে না পারে; এবং কোন বিপদে পড়িলে ফুলমণির নিকটে গিয়া তাহার পরামর্শ লও, সে তোমাকে অবশ্য সদুপদেশ দিবে।

এই সকল কথা সাঙ্গ হইবা মাত্র একজন চৌকিদার নবীনের বাপকে ধরিয়া ঘরে লইয়া আইল। তখন সে অতিশয় মাতাল হইয়া প্রায় অচৈতন্য হইয়াছিল। চৌকিদার করুণাকে বলিল, তোর ভাতারকে লও, গো। আমি না থাকিলে সে এখনি গাড়ীতে চাপা পড়িয়া মরিত। স্বামীর অবস্থা দেখিয়া করুণার মুখ রাগেতে রক্তবর্ণ হইয়া উঠিল; তাহাতে আমি বলিলাম, সাবধান! করুণা সাবধান, অচৈতন্য মানুষকে অনুযোগ করাতে কোন ফল দশিবে না। উহাকে ধীরে ২ বিছানাতে শয়ন করাইয়া দেও, এবং প্রাতঃকালেও উহাকে ভর্তসনা করিও না।

আমি সেখানে দাঁড়াইয়া করুণা কি করে তাহা দেখিতে লাগিলাম; তাহাতে সে একখান মাদুর ও কাঁথা ঘরের মধ্যে বিছাইয়া মিষ্ট রবে বলিল, ওগো, এখানে শুইয়া যুমাও। করুণার এমত নৃতন ব্যবহার দেখিয়া তাহার মাতাল স্বামী তাহাকে কিছু মাত্র চিনিতে না পারিয়া বিছানাতে শুইয়া আপনা আপনি বলিতে লাগিল, এ বেটী বড় ভাল মানুষ, ইহার ঘরে বরাবর আসিব। পরে সে শীত্র যুমাইয়া পড়িল, তাহাতে করুণা পুনর্বার বাহিরে আসিয়া দাবাতে আমার সহিত কথা কহিতে লাগিল।

আমি কহিলাম, দেখ, এখন বেলা গেল বটে, তথাপি বোধ করি শীত্র বাজারে গেলে কিছু মাছ পাইতে পারিবা, তাহা আনিয়া কল্য তোমার স্বামীকে ভালুকপে খাওয়াও। এবং করুণা, এ সকল কর্মেতে তোমাকে অতি চেষ্টান্বিত ও অনবরত যত্নবতী হইতে হইবে; তাহা না হইলে একেবারে তুমি উত্তম কর্ম কি প্রকারে করিতে পারিবা? যেমন পূর্বে বলিলাম, উত্তম ব্যবহার করা প্রথমে তোমার অতিশয় কঠিন বোধ হইবে; কিন্তু ভয় নাই, কেবল আপনার দুর্বলতা ও পাপিষ্ঠ স্বভাব মনে রাখিয়া নিত্য ২ ঈশ্বরের

নিকটে শক্তি ও অনুগ্রহ ঘাষণা কর, তাহাতে তিনি অবশ্য তাহা  
প্রদান করিবেন।

করুণা কিঞ্চিংৎ কাল চিন্তিতা হইয়া রহিল, শেষে সে দীর্ঘ  
নিশাস ফেলিয়া কহিল, আ মেম সাহেব! যদ্যপি আমি  
পূর্বাপেক্ষা সন্দ্যবহারিণী হই, তথাপি নবীনের বাপ ভাল না হইলে  
আমার ইহকালে কোন প্রকারে সুখ হইবে না।

আমি উত্তর করিলাম, করুণা, তোমার সন্দ্যবহার ও মৃদু স্বভাব  
দেখিয়া বোধ হয় সেও ক্রমে ২ ভাল হইতে পারিবে। কিন্তু যদ্যপি  
এমত সুঘটনা না হয়, তবে কি তুমি নিশ্চিন্তা হইয়া থাকিবা? তুমি  
ঈশ্বরের সৃষ্টি বস্তু, ইহা মনে রাখিও। অতএব যাহা ঘটে, ঘটুক;  
ঈশ্বরকে প্রেম ও সেবা করা তোমার অবশ্য কর্তব্য, ইহা যদি মনে  
না রাখ, তবে তুমি ধর্মের পথে কিঞ্চিংৎ ক্লেশ পাইলে বিরক্তা  
হইয়া তাহা ত্যাগ করিবা। যাহারা সুখ কি মান কিম্বা আর কোন  
সাংসারিক বস্তু পাইবার জন্যে সাধুদের পথে চলে, তাহারা যদি  
সে বস্তু না পায়, তবে নিরাশ হইয়া পূর্বকালীন যিহুদীয়দের ন্যয়  
বলে, ঈশ্বরের সেবা করা বৃথা, এবং সৈন্যাধ্যক্ষ পরমেশ্বরের  
আজ্ঞা পালন করাতে ও তাঁহার সমুখে শোকাচার করাতে  
আমাদের লাভ কি? কিন্তু যাহারা ঈশ্বরের বিশেষতঃ তাঁহার পুত্রের  
প্রতি প্রেম করিয়া সদাচারী হয়, তাহারা কোন আপদ প্রযুক্ত পিছে  
হাঁটিয়া যায় না; কারণ তাহারা জ্ঞাত আছে, যে ইহকালে যদ্যপি  
আমরা প্রকাশরূপে লাভ না পাই, তথাপি স্বর্গেতে প্রচুর ধন অবশ্য  
পাইব।

করুণা কাঁদিতে ২ কহিল, হাঁ মেম সাহেব! এই কথা সত্য  
বটে। আহা! ঈশ্বর যদি আমার পাপ ক্ষমা করিয়া শেষে আমাকে

স্বর্গে লন, তবে এই জগতে দুঃখ পাইলেও কিছু ক্ষতি নাই। আমি অনেক দোষ করিয়াছি তাহা জানি, তথাপি এখন আমার মনে এক প্রকার ভরসা উঠিতেছে যে ঈশ্বর আমার প্রতি দয়া করিলেও করিতে পারেন। আজ অবধি আমি প্রাতঃকালে ও সন্ধ্যাকালে তাঁহার নিকটে প্রার্থনা করিব। ও মেম সাহেব, দীনহীনা পাপিষ্ঠা যে আমি, আমাকেও যে আপনি শিক্ষা দিয়াছেন এই কারণ পরমেশ্বর আপনাকে আশীর্বাদ করুন।

অনন্তর আমি কহিলাম, আইশ করুণা, আমরা এখনি হাঁটু পাতিয়া প্রার্থনা করি, যেন প্রভু তোমার প্রতি প্রসন্ন হইয়া তোমার চেষ্টা সকল গ্রাহ্য করেন, ও তোমার স্বামীর এবং তোমার সন্তানের মনকে পরিবর্ত্তন করান। করুণা কহিল, হাঁ মেম সাহেব, তাহাই করুন; কেননা আমি আপনা আপনি ভাল কর্ম করিতে পারিব না। তখন আমরা উভয়ই হাঁটু গাড়িয়া করুণার যে ২ পারমার্থিক দ্রব্যের প্রয়োজন ছিল, তাহা আমি এক ২ করিয়া পরমেশ্বরকে জানাইলাম, এবং সেই প্রার্থনা সমাপ্ত হইলে পর করুণা ক্রন্দন করত আর কথা কহিতে পারিল না।

সে সময়ে প্রায় সন্ধ্যা হইয়াছিল, অতএব আমি করুণার নিকটে বিদায় লইয়া ঘরে গেলাম। তাহার সহিত সাক্ষাৎ করাতে আমার অন্তঃকরণ উল্লাসিত হইল, কারণ তখন বোধ করিলাম, যে ঈশ্বর তারি যন্ত্রণাদ্বারা তাহার মনকে আপনার প্রতি আকর্ষণ করাইতে মনস্ত করিয়াছেন, এবং সান্ত্বনা বাক্য কহিবার জন্যে তাহাকে দুঃখরূপ অরণ্যেতে আনিয়াছেন; যেমন এই দেশস্ত একজন কবি কহিয়াছেন, যথা,

ধার্মিক লোকের এই নিশ্চয়, দুঃখ পাইলে সুখ হয়,

হানা ক্যাথেরিন ম্যুলেঙ

তাহার সাক্ষী দেখ না, আকাশে।  
আগে রাত্রি পিছে দিন, জান সবে তাহার চিন,  
সোনা রূপা অনলে পরশে ॥

## অষ্টম অধ্যায়।

করুণা উক্ত সকল উপদেশ পাইয়া কিরূপ ব্যবহার করিবে, তাহা দেখিতে আমি এমত ইচ্ছুক ছিলাম, যে দুই দিন পরে পুনর্বার তাহার গৃহে যাইয়া উপস্থিতা হইলাম। ফুলমণি এবং করুণার ঘরের মধ্যে বিস্তর বিশেষ ছিল বটে, তথাপি দেখিলাম যে করুণা ঘরের সকল বস্ত্র পূর্বাপেক্ষা কিছু পরিপাতি করিয়া রাখিয়াছে। উঠানে ঝাঁটি দেওয়া গিয়াছিল, কিন্তু ফুলমণি যেমন তাবৎ জঙ্গল বাহিরে ফেলিয়া দিত, করুণা তেমন না করিয়া উঠানের এক কোণে তাহা টিপী করিয়া রাখিয়াছিল। সেও ঘরটি লেপন করিয়াছিল বটে, কিন্তু ফুলমণি যেমন লেপন করিয়া গোলা হাঁড়ি ঘরের পিছনে রাখিত, করুণা তেমন না করিয়া তাহা সমুখে ফেলিয়া রাখিয়াছিল।

করুণা আমাকে দেখিবা মাত্র যে মোটা শাড়িখানি ফুলমণি তাহাকে দিয়াছিল, সে তাহা পরিয়া হাস্যমুখে বাহিরে আইল, এবং তাহার মাথাও সুন্দররূপে বাঁধা ছিল। আমি ঘরের মধ্যে গিয়া দেখিলাম যে করুণা কিছু পুরাতন কাপড় লইয়া একটি কোর্তা সিলাই করিতেছিল। যদ্যপি সেই কোর্তা ভাল করিয়া কাটা হয় নাই, এবং সিলাই বড় মোটা, তথাপি তাহা দেখিয়া আমি অতিশয় সন্তুষ্ট হইয়া হাসিয়া কহিলাম, করুণা, তুমি তো বড় নিপুণ দরজী হইতেছ। ইহাতে করুণাও হাসিয়া উত্তর করিল, মেম সাহেব, যেমন পারি তেমনি করিতেছি। আগত রবিবারে গীর্জায় যাইব, অতএব ভাবিলাম, যে সেথায় যাইবার জন্যে একটি কোর্তা তৈয়ার করিলে ভাল হয়।

আমি কহিলাম, তুমি উত্তম বুঝিয়াছ, এবং বোধ হয় কোন কর্ম চেষ্টা করিলে অল্পদিনের মধ্যে একখান ভাল শাড়িও কিনিতে পারিব। ইংলণ্ডেশে আমাদের একটি চলিত কথা আছে, যথা,

যেখানে যাইবার ইচ্ছা হয়।  
সেখানে যাইবার পথ করয় ॥

করুণা কহিল, হাঁ মেম সাহেব, আপনি সত্য বলিয়াছেন। ফুলমণি আমাকে এক উপায় দেখাইয়াছে, যাহাতে আমি এক মাসের মধ্যে একটি টাকা সঞ্চয় করিয়া গীর্জায় যাইবার নিমিত্তে একখান শাড়ি কিনিতে পারিব!

এমত কথা শুনিয়া আমি সন্তুষ্টা হইয়া জিজ্ঞাসিলাম, সে কেমন উপায় বল দেখি?

করুণা কহিল, আমাদের পাড়াতে কোন ২ ধনী স্ত্রীলোকেরা সপ্তাহের মধ্যে একবার চারিটি পয়সা দিয়া পরের দ্বারা ঘর লেপিয়া লন। ফুলমণি বলিয়াছে যে আমি মহেন্দ্র বাবুর স্ত্রীকে এবং আর দুই তিন জনকে তোমার দুঃখের বিষয় জানাইব, তাহাতে তাঁহারা অবশ্য তোমাকে প্রতি সপ্তাহে ঐ কর্ম করিতে ডাকিবেন। এমত হইলে আমার ভাবনা কি? সপ্তাহ গেলে চারি ঘরে যদি ১° চারি আনা পাই, তবে স্বচ্ছন্দে মাসে এক টাকা উপার্জন করিতে পারিব। করুণা আরও জিজ্ঞাসিল, মেম সাহেব, আপনি কি শুনিয়াছেন যে মহেন্দ্রবাবুর স্ত্রী সম্পূর্ণ রূপে সুস্থা হইয়াছেন, এবং তিনি সকলের সাক্ষাতে বলিয়াছেন যে আমার বংশী তাঁহাকে মারে নাই, কিন্তু যে ব্যক্তির সঙ্গে বংশী গিয়াছিল সেই লোক ছুরিদ্বারা তাঁহার কুক্ষিদেশে আঘাত করিয়াছিল?

আমি কহিলাম, হাঁ করুণা, আমি কল্য তাহা শুনিয়া বড় সন্তুষ্টা হইলাম, কারণ, যদ্যপি সে স্ত্রীলোকের সঙ্গে আমার পরিচয় নাই, তথাপি সকলের মুখে তাঁহার প্রশংসা শুনিয়া থাকি।

করুণা বলিল, হাঁ মেম সাহেব, তাঁহার প্রশংসা আমাকেও করিতে হইবে, কেননা তিনি দরিদ্রের প্রতি বড় দয়ালু।

তাহাতে আমি হাস্য করত কহিলাম, করুণা তুমি যদি মাসে এক টাকা উপার্জন কর, তবে আপনাকে আর দরিদ্র বলিও না, তুমি ক্রমে ২ ধনী হইয়া উঠিবা।

করুণা বলিল, আ মেম সাহেব! এ কর্ম করা যে সে কেবল পেটের জ্বালায়। ঘর লেপন করা বড় কঠিন কর্ম, তাহা করিবার ভয়ে আমি আপনার ঘরটি ফেলিয়া রাখিতাম। এখন পরের ঘর লেপন করিতে হইল; তাহা পারি কি না, সে আগে দেখা যাউক।

আমি বলিলাম, করুণা, পারিবা না কেন? তুমি অবশ্য পারিবা। ঘর লেপিবার সময়ে ইহা মনে রাখিও, এখন আমি কর্তব্য কর্ম করিতেছি, তাহাতে তোমার পরিশ্রম লঘুতর বোধ হইবে; এবং কর্ম করাতে আর একটি লাভ আছে, তদ্বারা তুমি নিজ মনের দুঃখ বিস্মৃতা হইবা।

তদন্তর আমি বলিলাম, করুণা, কল্য প্রাতঃকালে তোমার স্বামী জাগ্রত হইলে কি ঘটিল, তাহাই বিশেষরূপে শুনিতে আসিয়াছি।

তাহাতে করুণা কহিল, ও মেম সাহেব, তাহার বিষয়ে অনেক কথা আছে। সে যখন সন্ধ্যাকালে মাতাল হয়, তখন পরদিবসে

সর্বদা তাহার মাথা বড় ভারী হয়, ও সে উঠিয়া বসিলেও  
ঝিমাইতে থাকে। তেমনি কল্য সে উঠিয়া কাহাকেও কিছু না  
বলিয়া ঝিমাইতে ২ দাবায় তামাক খাইতে লাগিল; এমত সময়ে  
আমি তাহাকে গামছা ও তৈল আনিয়া দিয়া কহিলাম, ও গো, যদি  
তোমার মাথার ব্যথা হইয়া থাকে, তবে পুক্ষরিণীতে স্নান করিয়া  
আইস, বোধ হয়, তাহাতে ভাল হইবে; তুমি ফিরিয়া না আসিতে  
২ তোমার জন্য ভাত রাঁধিয়া রাখিব। নবীনের বাপ উত্তর করিল,  
কি ভাগ্য করণা! আজি তোমার কি হইয়াছে? আমার সুখ  
জন্মাইতে কেন এত যত্ন করিতেছ? বোধ হয়, তুমি আমাকে  
ফুসলাইয়া আমার কাছে পয়সা লইতে চাও; কিন্তু তাহা কখনও  
হইবে না, সে আগে থাকিতে বলি। যাহা হউক, আমি তোমার  
কথা শুনিয়া স্নান করিতে যাই, পরে আসিয়া ভাত খাইব। মেম  
সাহেব, আমি ভোরে উঠিয়া ঘর ঝাঁটি দিয়া সকল দ্রব্য সুন্দররূপে  
পরিষ্কার করিয়া রাখিয়াছিলাম, তাহাতে বোধ করিলাম, যে  
নবীনের বাপ তদ্বারা সন্তুষ্ট হইবে; কিন্তু তাহার এইরূপ কঠিন  
বাক্য শুনিয়া আমি কিছু রাগান্বিতা হইয়া তাহাকে ভর্তসনা করিবার  
মানস করিতেছিলাম, এমত সময়ে আপনকার উপদেশ আমার  
স্মরণ হইল, তাহাতে আমি কিছু না বলিয়া চুপ করিয়া রহিলাম।  
পরে সে পুক্ষরিণী হইতে ফিরিয়া আইলে আমি একটা মাদুর  
দাবায় বিছাইয়া তাহাকে ইলিস মাছের ব্যঞ্জন ও ভাল অম্ব ও ভাত  
আনিয়া দিলাম। সে তাহা দেখিয়া বড় আশ্চর্য জ্ঞান করিয়া কহিল,  
করণা, আজি কি হইয়াছে, তাহা কিছু বুঝিতে পারিতেছি না।  
এমত ভাল খাওয়া তিন মাস পর্যন্ত পাই নাই; এই সকল  
আয়োজন কেন করিলা? এবং কোথায় বা পাইলা? তখন আমি  
কহিলাম, কেবল তোমাকে সন্তুষ্ট করিবার জন্য এই সকল প্রস্তুত  
করিয়াছি। এই কথাতে সে আমার মুখের পানে চাহিয়া আরও

চমৎকৃত হইয়া কহিল, তুমি তো একেবারে নৃতন মানুষ হইয়াছ! এমন স্বভাব যদি তোমার বরাবর থাকে তবে, আমার বড় ভাগ্য। পরে কোমর হইতে গেঁজিয়া বাহির করিয়া সে তাহা আমার সমুখে ফেলিয়া হাসিয়া কহিল, যাহা হউক করণা, আজি তুমি ভুলাইয়া আমার পয়সা গুলিন লইলা; অতএব যাহা উহাতে থাকে তাহা বাহির করিয়া লও। গেঁজিয়াতে কেবল চারিটি পয়সা ছিল, তথাপি তাহা লইয়া নবীনের বাপকে বলিলাম, তোমার নিকটে এই যে চারিটি পয়সা পাইলাম, ইহাতে আমার বিস্তর বোধ হইল। পরে সে কহিল, আমার মাথা বড় বেদনা করিতেছে, অতএব তুমি যদি ওবেলাও আমাকে এইরূপ খাওয়াইতে পার, তবে আমি আজি কর্ম্ম না গিয়া ঘরে থাকি। মেম সাহেব, আপনি যে দুই টাকা দিয়াছিলেন, আমি তাহার বিষয় তাহাকে বলিতে ভয় করিলাম, পাছে যতদিন ঘরে কড়ি থাকে ততদিন সে কর্ম্মতে না যায়; এই জন্যে কহিলাম, ভাল, আজি গৃহে থাক, আর কিছু ইলিস মাছ আছে, তাহাই সন্ধ্যাকালে রাঁধিয়া দিব।

ইহাতে আমি কহিলাম, করণা, তুমি জ্ঞানীর মত কর্ম্ম করিলা বটে। সে কথা শুনিয়া তোমার স্বামী কি সমস্ত দিন ঘরে রাহিল?

করণা উত্তর করিল, হাঁ মেম সাহেব, আর কি জানি কিসে তাহার মনে প্রবৃত্তি হইল, সে গোটা কতক বাঁস আনিয়া ঘরের বেড়া মেরামত করিতে লাগিল, তাহাতেই সকল আজি এমত শোভা দেখাইতেছে।

আমি কহিলাম, করণা, তোমার বড় সৌভাগ্য দেখিতে পাই; ধর্ম্মপথে চলিতে তোমার স্বামী বাধা না দিয়া বরং তোমার উপকার করিতেছে।

করণা কহিল, না মেম সাহেব, সম্পূর্ণরূপে এমত বলা যায় না; কিন্তু তাহার কথা আরও কিছু শুনুন। সন্ধ্যার সময়ে তাহার দুই তিন জন দুষ্ট সঙ্গিরা আসিয়া তাহাকে লইয়া যাইবার নিমিত্তে বিনতি করিতে লাগিল। প্রথমে সে যাইতে চাহিল না, কিন্তু ক্ষণেক পরে তাহারা সাধ্য সাধনা করাতে সে গেল। তথাপি সে যে তাহাদের সহিত গিয়া নিতান্ত মাতওয়ালা হইল এমত নয়, কিঞ্চিৎ মদ খাইয়া নয়টা বাজিলে ঘরে ফিরিয়া আইল।

তাহাতে আমি জিজ্ঞাসিলাম, আজি সে কোথায়? করণা কহিল, মেম সাহেব, আহারাদি করিয়া আমি কর্মেতে যাই বলিয়া সে প্রাতঃকালে বাহিরে গিয়াছে; এখন সে কি করে তাহা দেখা যাইবে।

আমি জিজ্ঞাসিলাম, তবে পরশু অবধি সে কি তোমাকে আর কোন প্রকারে কঠিন কথা কহে নাই? করণা মাথা হেট করিয়া বলিল, না মেম। আমি আপন স্বামীর ন্তৰ ব্যবহার দেখিয়া টের পাইয়াছি, যদি পূর্বাবধি তাহার প্রতি কোমল আচরণ করিয়া আসিতাম, তবে আমাদের এত দুঃখ কখন হইত না। করণা এমত ভাবিয়া সে বিষয়ে কিঞ্চিৎ লজ্জিতা হইল।

অনন্তর আমি জিজ্ঞাসিলাম, এই দুই দিনের মধ্যে কি ফুলমণি তোমার গৃহে আসিয়াছিল?

করণা বলিল, হাঁ মেম সাহেব, আজি প্রাতঃকালে সে প্রায় দুই ঘণ্টা পর্যন্ত এখানে ছিল। আমার পরিষ্কার কাপড় ও ঘরের পারিপাট্য দেখিয়া প্রথমে সে আশ্চর্য জ্ঞান করিয়া কহিল, করণা, তুমি কি এত দিনের পর ভাল গৃহিণী হইলা? আপনকার সহিত

পরশু যে সকল কথা হইয়াছিল, আমি সে সকল তাহাকে জ্ঞাত করিয়া কহিলাম; ফুলমণি, এই অবধি আমি তোমাকে নির্দশন স্বরূপ জ্ঞান করিয়া ঈশ্বরের আদেশ পালন করিতে চেষ্টা করিব। ফুলমণি এই কথা শুনিয়া বড় আহ্বাদ পূর্বক বলিল, আহা করণ্ণা! তুমি আমার মনকে কেমন প্রফুল্ল করিলা। আমি সাধুর পিতার নিকটে প্রিয়নাথকে রাখিয়া আসিয়াছি, অতএব এক দণ্ড স্বচ্ছন্দে বসিয়া তোমার সহিত কথা কহিতে পারিব। তাহাতে সে আমাকে ধর্মপুস্তকের অনেক বচন কহিয়া এই পদটি মুখস্থ করাইল, যথা; “কঠিন বাক্য ও কোপ ও রাগ ও কলহ ও নিন্দা এবং তাবৎ জিঘাঃসা, এই সকল তোমাদের হইতে দূর হউক। আর খ্রীষ্টের অনুরোধে ঈশ্বর তোমাদিগকে যেমন ক্ষমা করিয়াছেন, তোমরা তেমনি দয়ালু ও কোমল অন্তঃকরণ হইয়া পরম্পর ক্ষমা কর।”

পরে ফুলমণি আমার নিকটে অনেকক্ষণ বসিয়া যীশুখ্রীষ্টের প্রেমের বিষয় কহিতে লাগিল, তাহাতে সে সকল মিষ্ট কথা আমি পূর্বাপেক্ষা ভালৱাপে বুঝিতে পারিয়া বোধ করিলাম, কি জানি যীশু আমাকেও ক্ষমা করিয়া স্বর্গে লইয়া যাইবেন। কিন্তু ফুলমণি গেলে পর একজন স্ত্রীলোক আমাকে বংশীর মা বলিয়া উচ্চেঃস্বরে ডাকিল। সে সময়ে আমি পরিত্বাগের বিষয়ে ভাবিতেছিলাম, এই জন্যে ত্রি কথাতে আমার মনে বড় ভয় হইল; তাহাতে আমি কাঁদিতে ২ বলিলাম, হায়! আমি বংশীর মা বটে, কিন্তু আপন ছেল্যাকে নষ্ট করিয়াছি, অতএব এখন যে স্বর্গ পাইবার ভরসা করিতেছি, ইহা আমার নিতান্ত ভ্রম।

আমি কহিলাম, না করণ্ণা, ভ্রম কেন হইবে? তোমার পাপ ভারী হইয়াছে বটে, অতএব পাপকে যে ক্ষুদ্র বিষয় বোধ কর, ইহা আমার কোন প্রকারে ইচ্ছা নয়; তথাপি একটি সান্ত্বনার কথা

কহিতে হয়, যে সময়ে তুমি আপন ছেল্যার পরিবারের বিষয়ে নিশ্চিন্তা ছিলা, সে সময়ে তুমি আপনি ধর্মের বিষয়ে এক প্রকার অজ্ঞান ছিলা; কিন্তু যে খ্রীষ্টিয়ান লোক প্রভুর মহানুগ্রহের আস্বাদন করিয়াও আপন শিশুদিগকে সুশিক্ষা না দেয়, ও ভালুকপে শাসন না করে, তাহাদের দোষ তোমার দোষ অপেক্ষা শত গুণে বড়। হায়! ঈশ্বরের বিচার স্থানে দাঁড়াইয়া এমত ব্যক্তিগণকে কেমন ভয়ানক হিসাব দিতে হইবে। কিন্তু করুণা, তুমি ভয় না করিয়া এই ২ কর্ম কর, মন ফিরাইয়া প্রভু যীশুখ্রীষ্টের প্রতি বিশ্বাস কর, এবং আগত কালে পাপ ত্যাগ করিয়া সৎক্রিয়া কর। তোমার এখন একটি সন্তান আছে, তাহাকেই ধর্মের পথে লওয়াও। এই সকল করিলে ঈশ্বর তোমার পূর্ব দোষ মুচিয়া ফেলিয়া খ্রীষ্টের অনুরোধে তোমাকে অবশ্য গ্রাহ্য করিবেন।

করুণা উক্ত কথা শুনিয়া আপন চক্ষের জল মুচিয়া কহিল, ও মেম সাহেব! সন্তানদিগকে শিক্ষা দি নাই, ইহাতে যে আমার ভারি দোষ হইয়াছে, তাহা আমি নবীনকে বলিয়াছি; আর যীশুখ্রীষ্ট কে, ও তিনি বা কি করিলেন, তাহা সাধ্য পর্যন্ত তাহাকে বুঝাইয়া দিয়া তাঁহার প্রতি বিশ্বাস করিতে বিনয় করিয়াছি।

আমি কহিলাম, করুণা, তুমি ভাল করিয়াছ। এমত কর্মাদ্বারা যে আমরা স্বর্গ লাভ করি, ইহা নয়; তথাপি কর্ণালিয়ের প্রার্থনা ও দানাদি যেরূপ ঈশ্বরের গোচরে সাক্ষীস্বরূপ হইল, সেইরূপ তুমি যে প্রভু যীশুখ্রীষ্টের সেবা করিতে বাঞ্ছা কর তোমার এই কর্ম তাহারি সাক্ষী হইয়াছে।

পরে আমি করুণাকে জিজ্ঞাসিলাম, ফুলমণি কি আর কিছু বলিয়া যায় নাই?

করণা উত্তর করিল, হাঁ মেম, সে আমাকে অনেক সুপরামৰ্শ দিয়া শেষে আমার সহিত প্রার্থনা করিল যেন ঈশ্বর, আমাকে সৎক্রিয়া করিতে শক্তি দেন, ও আমি যেন তাঁহাকে পূর্বাপেক্ষা ভালুকপে সেবা করিতে পারি। পরে সে বিদায় লওনের সময়ে বলিল, করণা, তোমার প্রতিদিনের সামান্য আচার ব্যবহার যাহাতে ঈশ্বরের ইচ্ছানুসারে হইতে পারে, এই অভিপ্রায়ে ধর্মপুস্তকের কএকটি নিয়ম তোমাকে লিখিয়া দিতে সাধুর বাপকে বলিব; এবং এই দেখ, মেম সাহেব, দুই ঘণ্টা হইল সাধু এই তকতিখানি আমাকে দিয়া গিয়াছে।

আমি সে তকতি হাতে করিয়া দেখিলাম, যে প্রেমচাঁদ তাহাতে এক খান শাদা কাগজ বসাইয়া অতি স্পষ্ট রূপে বড় ২ অঙ্করে ধর্মপুস্তক হইতে তেরটা পদ লিখিয়াছে। ঐ বাক্য সকল বাঙালা দেশস্থ খ্রীষ্টিয়ান স্ত্রীলোকদের প্রতি অতি সুন্দররূপে খাটে, ইহা বুঝিয়া ধর্মপুস্তকের কোন্ স্থানে সেই পদ পাওয়া যায় তাহা সে সময়ে লিখিয়া লইলাম, এবং এখন পাঠকবর্গের হিতার্থে বিস্তারিত রূপে ব্যাখ্যা করি। যথা,

খ্রীষ্টিয়ান স্ত্রীলোকদের ব্যবহার্যের ধারা।

### ১ ঈশ্বরের প্রতি যাহা কর্তব্য।

১. “তুমি সর্বদাই পরমেশ্বরকে সম্মুখে রাখ।” দায়ুদের গীত।

১৬। ৮।

২. “নিরন্তর প্রার্থনা কর।” থিষ্টলনীকীয়দের প্রতি প্রথম পত্র।

৫। ১৭।

৩. “তুমি সমস্ত অন্তঃকরণের সহিত পরমেশ্বরের বিশ্বাস কর; এবং আপন বুদ্ধিতে নির্ভর দিও না। আপন তাৰৎ গতিতে তাঁহাকে স্বীকার কর; তাহাতে তিনি তোমার পথ সৱল কৱিবেন।”  
হিতোপদেশ। ৩। ৫, ৬।

৪. স্মৃতে রাখিও যে “তোমরা খ্রীষ্টের।” কৱিন্হীয় মণ্ডলীর  
প্রতি প্রথম পত্র। ৩। ২৩।

৫. “তোমরা ভোজন পান প্রভৃতি যে কোন কর্ম কর, সে  
সকলি ঈশ্বরের মহিমা প্রকাশের নিমিত্তে কর।” ১ কৱিন্হীয়। ১০  
। ৩১।

## ২ পরিবারের প্রতি যাহা কর্তব্য।

৬. “তোমরা আপন ২ পরিবারের প্রতি মনোযোগ কর, ও  
আলস্যের খাদ্য, খাইও না।” হিতোপদেশ। ৩১। ২৭।

৭. “কার্য্যেতে নিরালস্য ও আত্মাতে উদ্যোগী হইয়া প্রভুর  
সেবা কর।” রোমায়। ১২। ১১।

৮. “হে নারী সকল, তোমরা যেমন প্রভুর বশীভূতা তেমনি  
নিজ ২ স্বামীরও বশতাপন্না হও।” ইফিষীয়। ৫। ২২।

৯. “তোমরা আপন ২ সন্তানদিগকে প্রভুর শিক্ষা ও উপদেশ  
দিয়া প্রতিপালন কর।” ইফিষীয়। ৬। ৪।

### ৩ প্রতিবাসির প্রতি যাহা কর্তব্য।

১০. “তুমি মুখ খুলিয়া জ্ঞানের কথা কহ, এবং তোমার জিহ্বাগ্রে অনুগ্রহের ব্যবস্থা থাকুক।” হিতোপদেশ। ৩। ২৬।

১১. “তোমরা একজন অন্যের প্রতি মিথ্যা কথা কহিও না; কেননা তোমরা কর্মের সহিত পুরাতন স্বভাব পরিত্যাগ করিয়া সৃষ্টিকর্তার প্রতিমূর্তি অনুসারে জ্ঞানেতে পুনর্নির্মিত যে নৃতন স্বভাব তাহা গ্রহণ করিয়াছ।” কলসীয়। ৩। ৯, ১০।

১২. “তোমরা পরম্পর প্রেম বিনা আর কিছুতে কাহার ঝণী হইও না; এবং কেবল আত্মবিষয়ে নহে, কিন্তু পরের বিষয়েও মনোযোগ কর।” রোমীয়। ১৩। ৮। ফিলীপীয়। ২। ৪।

১৩. “তোমরা সুযোগ পাইলে সকল লোকের বিশেষতঃ বিশ্বাসকারি পরিবারের মঙ্গল করিও।” গলাতীয়। ৬। ১০।

উক্ত বাক্য পড়িয়া আমি করণাকে কহিলাম, করণা, তুমি যদি এই নিয়মানুসারে চল, তবে তুমি ধন্যা বট; এই ফুলমণি যে তোমার বন্ধু, এও বড় আহ্লাদের বিষয়। কিন্তু ইহা স্মরণে রাখিও, যদ্যপি তুমি তাহার পরামর্শে না চল ও তাহার সম্বুদ্ধার দেখিয়া আপনার ব্যবহার পরিবর্তন না কর, তবে ঈশ্বরের নিকট ভয়ঙ্কর হিসাব দিতে হইবে।

এই কথাতে করণা চিন্তিতা ও মৌনী হইয়া থাকিল। পরে আমি তাহাকে জিজ্ঞাসিলাম, তুমি কি এই সকল ঈশ্বরীয় বচন

ভালুকপে বুঝিয়াছ? করণা বলিল, মেম সাহেব, যে অবধি সাধু ঐ তকতি খানি আমাকে দিয়া গিয়াছে, সেই অবধি আমি ঐ বাক্যের মর্ম মনেতে আন্দোলন করিতেছি; কিন্তু তাহার মধ্যে দুইটি পদ আমাকে কিছু কঠিন বোধ হইতেছে। আমি জিজ্ঞাসিলাম, কোন ২ পদ, তাহা আমাকে বল; আমি আহুদপূর্বক তাহা বুঝাইয়া দিব, এবং ঈশ্বরের নিকটে প্রার্থনা করিব যেন তিনি আপন নিগৃঢ় বাক্য তোমার বোধগম্য করিয়া দেন।

করণা বলিল, মেম সাহেব, চতুর্থ নিয়ম এই, “তোমরা শ্রীষ্টের” ইহা স্মরণে রাখিও; কিন্তু এই কথা কি নিমিত্তে স্মরণে রাখিতে হয়, তাহা ভালুকপে বুঝিলাম না।

আমি কহিলাম, করণা, তোমাকে একটি দৃষ্টান্ত বলি শুন। অন্য দেশীয় একজন রাজা তোমাকে ধরিয়া কারাগারে রাখিয়া যদি এই কথা বলে, তুমি আমাকে ১০০০০ দশ সহস্র টাকা আনিয়া না দিলে আমি তোমাকে মারিয়া ফেলিব। এমত হইলে তুমি কি করিবা? তোমার কাছে টাকা নাই, এবং তোমার দরিদ্র বন্ধু বাঙ্কবেরা যে দশ সহস্র টাকা দিতে পারিবে, ইহা নিতান্ত অসম্ভব কথা। তাহারা তোমাকে রক্ষা করিতে চাহিলেও কি জানি সকলে একত্র হইয়া এক শত ১০০ টাকা পর্যন্ত যোগাইতে পারিবে না, সুতরাং তোমার আর কোন উপায় না থাকাতে তোমাকে মরিতে হইবে। প্রাণদণ্ড কারক হাতে খড়গ লইয়া তোমাকে ধরিয়াছে, এমত সময়ে যদি একজন ধনী ব্যক্তি আসিয়া উপস্থিত হন; এবং তিনি অসীম দয়া প্রকাশ করিয়া প্রেমিক ও মন্দুরবে বলেন, ও দুর্ভাগ্য স্ত্রী! তোমার যদি বাঁচিবার ইচ্ছা থাকে, তবে আমার কথা শুন। আমি তোমার শক্রকে দশ সহস্র টাকা দিয়া তোমাকে রক্ষা

করি, কিন্তু এমত করিলে তুমি চিরকাল আমার দাসী হইবা; আমি তোমাকে কিনিয়া লওয়াতে তুমি আর কোন কর্ত্তার সেবা করিতে পারিবা না। আমার নিকটে যদি এই স্বীকার কর, তবে আমি তোমাকে রক্ষা করি; কিন্তু আমার আজ্ঞা যে কঠিন হইবে, এমত বোধ করিও না, কেননা যাহাতে তোমারই হিত জন্মে কেবল এমত আজ্ঞা করিব। করণা, এখন জিজ্ঞাসা করি; তুমি এমত দয়ালু ব্যক্তিকে কি উত্তর দিবা?

করণা বলিল, ও মেম সাহেব, আমি তখনি তাঁহার নিয়মে স্বীকৃতা হইয়া সর্বদা তাঁহার নিকটে বাধ্য হইয়া থাকিতাম।

আমি কহিলাম, হাঁ করণা, ঐ প্রকার কর্ম করা তোমার উচিত হইত বটে; কিন্তু কিছু দিন পরে তুমি যদি ঐ ব্যক্তির সেবা ছাড়িয়া তাঁহার একজন শক্তির নিকটে কর্ম করিতে যাইতা, তবে তোমার বিষয়ে কি বলা যাইত? করণা কহিল, মেম সাহেব, এমত যদি করিতাম, তবে আমাকে অবশ্য দুষ্টা ও অকৃতজ্ঞা স্ত্রী বলিত। আমি কহিলাম, করণা, তবে বল দেখি, এমত অকৃতজ্ঞের মত কর্ম যেন তোমাহইতে না হয়, এই অভিপ্রায়ে আপন মনকে কি প্রকারে রক্ষা করিতা? করণা উত্তর করিল, মেম সাহেব, আমি সর্বদা ইহা মনে রাখিতাম, যে আমি মৃতপ্রায় হইয়াছিলাম, এমত সময়ে আমার দয়ালু কর্তা টাকা দিয়া আমাকে মৃত্যু হইতে বাঁচাইলেন, তাহাতে আমি এক প্রকার তাঁহার ক্রীতা দাসী হইয়াছি, অতএব এখন যদি তাঁহাকে ছাড়িয়া পরের সেবা করি, তবে উহাতে বড় অধর্ম হইবে।

আমি বলিলাম, ভাল কহিয়াছ করণা, তুমি আমার দ্রষ্টান্তের তাৎপর্য সুন্দররূপে বুঝিয়াছ। এখন বোধ করি, “তোমরা খীঁষ্টের, ইহা সুরণে রাখিও,” এই কথা সাধুর বাপ কি অভিপ্রায়ে লিখিল তাহাও বুঝিতে পারিব।

করণা প্রফুল্ল বদন হইয়া কহিল, হাঁ ২, এখন আমি বুঝিয়াছি বটে। আমি পাপ রোগে মৃত্যুর হইয়া নরকের পথে যাইতেছিলাম, এমত সময়ে খীঁষ্ট দশ সহস্র টাকা না দিয়া আপন বহুমূল্য রক্ত ব্যয় করিয়া আমাকে রক্ষা করিলেন; অতএব এখন আমি তাঁহারি হইয়াছি, ইহা সর্বদা সুরণে রাখিলে আমি শয়তানের সেবা কোন প্রকারে না করিয়া কেবল আপন দয়ালু আণকর্ত্তার নিকটে বাধ্য হইয়া থাকিব।

করণার এইরূপ বাক্য শুনিয়া আমি অতিশয় আহ্বাদিতা হইলাম, যেহেতুক তদ্বারা বোধ করিলাম, এ ব্যক্তি যদি ধর্মাত্মাহইতে শিক্ষিতা না হইত, তবে সে এমত কথা কহিতে পারিত না।

ঈশ্বর যে আমার প্রার্থনা শুনিয়া করণাকে এরূপ শিক্ষা দিলেন, এই জন্যে আমি মনে ২ তাঁহার ধন্যবাদ করিয়া কহিলাম, এখন করণা, তুমি আর কোন্ কথা বুঝিতে পার নাই, তাহা আমাকে বল।

করণা কহিল, মেম সাহেব, পঞ্চম নিয়ম এই, “তোমরা ভোজন পান প্রতি যে কোন কর্ম কর, সে সকলি ঈশ্বরের মহিমা প্রকাশের নিমিত্তে কর;” কিন্তু আমাদিগকে দিনে ২ আপন

সন্তোষের নিমিত্তে অনেক প্রকার ক্ষুদ্র ২ কর্ম করিতে হয়, তবে সে সকল কর্মাদ্বারা ঈশ্বরের মহিমা কিরণে প্রকাশ হইবে?

আমি কহিলাম, করণা, বোধ করি পৌল প্রেরিত ঐ বিধি দৃঢ়রূপে স্থাপন করিবার জন্যে এই প্রকার কথা লিখিলেন। সেই কথার অভিপ্রায় এই, কেবল মহৎ কর্মে নয় বরং ক্ষুদ্র কর্মেও ঈশ্বরের মহিমা প্রকাশ করা উচিত; তাহাতে বোধ হয়, তিনি দৃষ্টান্তভাবে ভোজন পান করিবার বিষয় কহিলেন। ভোজন পানদ্বারা যে ঈশ্বরের মহিমা প্রকাশ করা যায় না, এমত অনুমান করিও না। অনেক শ্রীষ্টিয়ান লোকেরা এই বাক্যেতে মনোযোগ না করিয়া কেবল আত্মসুখের জন্যে আহারাদি করে, কিন্তু এমত করা উচিত নয়। ইন্দ্রিয়গণের বশীভূত ব্যক্তি পেটুক হইয়া অপরিমিত ভোজন পান করে, তাহাতে তাহার শরীর ক্রমে ২ নিষ্ঠেজ ও স্তুল হইলে সে ঈশ্বরের সেবা করিতে অক্ষম হয়। কিন্তু সত্য শ্রীষ্টিয়ান ব্যক্তি সেইরূপ না করিয়া পরিমিত আচরণ করে; ফলতঃ সে ঈশ্বরের দ্বন্দ্ব বন্ধ ভোজন পান করিবার সময়ে ইহা মনে রাখে, যে আমার শরীর পরমেশ্বরের খাদ্য দ্রব্যদ্বারা প্রতিপালিত ও সবল হইতেছে, অতএব সে শরীর তাঁহারি হইল, এবং তাঁহারি কার্যে তাহা ব্যয় করা কর্তব্য। পেয় দ্রব্যের বিষয়েও এইরূপ বলা যায়। পরমেশ্বর মনুষ্যদের পান করিবার জন্যে জল ও দুঃখ আদি নানা প্রকার সদগুণ্যকৃত উত্তম দ্রব্য দান করিয়াছেন, এবং যতকাল মনুষ্যেরা কেবল ঐ সকল দ্রব্য পান করে, ততদিন তাহাদের জ্ঞানচক্ষুঃ নির্মাল থাকে, ও তাহারা সেই জ্ঞান ও বুদ্ধিদ্বারা ঈশ্বরের মহিমা প্রকাশ করিতে পারে; কিন্তু যখন তাহারা মদ্যাদি পান করিতে আরম্ভ করে, ও তদ্বারা মাতওয়ালা হয়, তখন তাহারা শয়তানের বশীভূত হইয়া তাহারই মহিমা প্রকাশ করিবার হেতু পান করে, ও আপনার শরীর ও আত্মা উভয়কে নষ্ট করে। আরও

বলি, করণা, যাহাতে ঈশ্বরের মহিমা প্রকাশ হয়, এমত আর ২ অনেক ক্ষুদ্র কর্ম আছে। দেখ, আমি তোমার ঘরে আসিয়া দেখিলাম, তুমি একটা কোর্টা সিলাই করিতেছে, তাহাতে তুমি আমাকে কহিলা, গীর্জায় যাওয়া আমার কর্তব্য, এবং যাহারা গীর্জায় যায়, তাহাদিগকে উপযুক্ত বস্ত্র পরিয়া যাইতে হয়, কারণ ঈশ্বর কহিয়াছেন, বিহিতরূপে সকল কর্ম কর; তুমি এই আজ্ঞা পালন করিতে চাহিয়া ঐ কোর্টাটি সিলাই করিতে লাগিয়াছ। অতএব বোধ হয়, এই ক্ষুদ্র কর্মের বিষয়ে বলা যায় যে তদ্বারা ঈশ্বরের মহিমা প্রকাশ হইতেছে। এই প্রকার আরও অনেক দৃষ্টান্ত দেখাইতে পারি। তুমি আপন স্বামীর বশীভূতা হও, কেননা ঈশ্বর এমত আজ্ঞা করিয়াছেন; এবং সন্তানদিগকে সুশিক্ষা দেও, যেন তাহারা ঈশ্বরের সেবা করিতে পারে, ও আত্মসুখের নিমিত্তে কিম্বা মান্য হইবার জন্যে নয়, কিন্তু ঈশ্বরের সন্তোষ জন্মাইবার জন্যে দরিদ্রদের প্রতি দয়া কর; এবং বিশেষরূপে খ্রীষ্টিয়ানদের প্রতি প্রেমিক ব্যবহার কর, কারণ তাহারা প্রভুর পরিবার, সকলের প্রতি সরল আচরণ কর, মনুষ্যের ভয়ে তাহা নয়, কিন্তু ঈশ্বর এমত আদেশ করিয়াছেন, এই নিমিত্তে তাহা কর। এই ২ সকল করিলে তদ্বারা ঈশ্বরের মহিমা অবশ্য প্রকাশ হইবে। এখন করণা, তুমি ঐ পঞ্চম নিয়ম বুবিয়াছি কি না?

করণা বলিল, হাঁ মেম সাহেব, বুবিয়াছি।

আমি তাহার সহিত আরও কথোপকথন করিতে ইচ্ছুক ছিলাম, কিন্তু সেই সময়ে দূরে দেখিলাম, যে নবীনের বাপ ক্ষেত্রের উপর দিয়া ঘরে আসিতেছে। তাহাতে করণা শীত্ব উঠিয়া দ্বারের নিকটে গেল, এবং তাহার স্বামীকে দেখিবা মাত্র সে প্রফুল্ল বদনে কহিল, ও মেম সাহেব, তাহার সঙ্গে কোন দুষ্ট লোক নাই, এবং সে

টলমল্ না করিয়া ভাল মানুষের মত আসিতেছে। আজি সে মাতওয়ালা হয় নাই। হায়! সে যদি মদ্যপান ত্যাগ করে, তবে আমার ভাবনা কি? আমি তাহার সহিত অতি সুখে বাস করিতে পারিব, কেননা মাতওয়ালা না হইলে নবীনের বাপ আমার প্রতি কোন দৌরাত্ম্য করে না।

স্বামীকে ভাল হইবার লক্ষণ দেখিবা মাত্র তাহার স্ত্রী যে এইরূপ প্রেমের কথা কহিল, তাহাতে আমি উল্লাসিতা হইলেও আশ্চর্যজ্ঞান করিলাম না, কারণ যৌবন কালে বিবাহিত স্বামী অপেক্ষা এই জগতের মধ্যে এমত প্রিয়তম সম্বন্ধ আর কাহারও সহিত হয় না। আমি করুণার নিকটে এই কথা বলিয়া বিদায় হইলাম, করুণা, তুমি শীত্র তোমার স্বামীর জন্যে তামাক্ সাজিয়া রাখ; সে প্রায় এক ক্রোশ পথ হাঁটিয়া আসিতেছে, অতএব বোধ হয় আসিবা মাত্র তামাক্ খাইতে চাহিবে। পরে ঘরের বাহির হইলে নবীনের পিতার সহিত আমার সাক্ষাৎ হইল, সে আমাকে অতি নগ্নতা পূর্বক সেলাম করিয়া বাটীর ভিতরে প্রবেশ করিল। করুণা যেমত বলিয়াছিল, আমি সেই মত দেখিলাম, সে এখন মাতওয়ালা হয় নাই বটে। হে স্ত্রীগণ, তোমরা মন দিয়া শুন; যে ব্যক্তি প্রতিদিবস মাতাল হইয়া অর্দ্ধ রাত্রি পর্যন্ত পথে পড়িয়া থাকিত, এখন সে ব্যক্তি কিছু মদ্যাদি পান না করিয়া বেলা থাকিতে ২ ঘরে ফিরিয়া আইল। কি জন্যে এমত করিল তাহা বলি, শুন; তাহার স্ত্রী তিন দিবস পর্যন্ত তাহার গৃহ পরিপাটি করিয়া তাহাকে প্রেমের বাক্য কহিয়াছিল।

পরে গাড়ীতে উঠিবার সময়ে ফুলমণি শীত্র আসিয়া আমাকে আপন ঘরে ডাকিল, তাহাতে আমি নামিয়া তাহার নিকটে গেলাম। তাহার চক্ষে জল ছল ২ করিতেছিল বটে, তথাপি আমি টের

পাইলাম যে, সে জল দুঃখ প্রযুক্তি নয়, কিন্তু অত্যন্ত আনন্দদ্বারা জনিয়াছে। ফুলমণি অতিশয় প্রফুল্ল বদনে কহিল, ও মেম সাহেব! এতদিন পরে আপনি আমার সুন্দরীকে দেখিতে পাইবেন; আজি পাদরী সাহেব আমাকে বলিলেন, আমার ভগিনী এই সপ্তাহের মধ্যে আসিবেন, এবং বোধ করি তিনি তিন মাস পর্যন্ত এখানে থাকিবেন। মেম সাহেব, আপনি আমাসকলের প্রতি বড় প্রেম করেন, এই জন্যে আমার মেয়েকে আপনাকে দেখাইতে অতিশয় বাঞ্ছা আছে। লোকে তাহাকে পরম সুন্দরী কহে, কিন্তু আপনি তাহাকে দেখিলে সে বিষয় বিচার করিবেন। সুন্দরী আইলে পর আপনাকে সেলাম করিবার জন্যে আমি কি তাহাকে আপনার বাটীতে লইয়া যাইব, কি আপনি অনুগ্রহ করিয়া আমাদের ঘরে আসিবেন?

আমি কহিলাম, ফুলমণি, তোমার মেয়েকে আমার বাটীতে লইয়া যাইও না; আমি তোমাদের ঘরে আসিব, কারণ আমি সুন্দরীকে তাহার ভাই ভগিনীর সহিত দেখিতে চাহি। বোধ হয়, সাধু ও সত্যবতী বড় আহ্লাদিত হইয়াছে।

ফুলমণি কহিল, ও মেম সাহেব, তাহাদের আমোদের সীমা নাই; আজি সমস্ত দিন সত্যবতী নাচিতে ২ দিদি আসিতেছে ২ এই কথা সকলকে বলিয়াছে।

আমি কহিলাম, ফুলমণি, আমিও তোমার সহিত আনন্দ করি। যে দিন তোমার সহিত প্রথমে আমার সাক্ষাৎ হইল, সেই দিন অবধি আমি সুন্দরীকে দেখিতে ইচ্ছুক আছি; তাহার ভঙ্গা গোলাপ চারার বিষয় আমি অদ্যাবধি ভুলি নাই।

ফুলমণি বলিল, ও মেম সাহেব, সে অনেক দিনের কথা, বোধ করিতেছিলাম যে সে আপনকার মনে পড়িবে না।

আমি বলিলাম, হাঁ ফুলমণি, সে এক বৎসরের কথা হইল বটে, তথাপি ঐ গোলাপ চারার বিষয় তোমার মেয়্যার যে সুন্দর উপদেশ, তাহা আমি কখন ভুলিব না। ফুলমণি, ইহাও তোমাকে বলি, যদ্যপিও আমি ইংরাজি বিবি এবং তুমি বাঙালি স্ত্রীলোক, তথাপি তোমার সহিত যে আমার সাক্ষাৎ হইল, এই জন্যে আমি অনেকবার ঈশ্বরের ধন্যবাদ করিয়াছি। তোমার সহিত আলাপ করিয়া আমার মন বিস্তর সান্ত্বনা পাইয়াছে, এবং সকল ধর্মকর্মে তুমি আমাকে সর্বদা সাহায্য করিয়াছ।

এই কথা শুনিয়া ফুলমণির চক্ষু হইতে জল পড়িতে লাগিল। পরে সে কহিল, মেম সাহেব, আপনি আমাদিগকে বড় প্রেম করেন, তাহা আমি জানি, কিন্তু আমরা তাহার যোগ্যপাত্র নহি। আমি আপনকার সাহায্যার্থে কি করিয়াছি? যাহারা ভাল হইয়াছে তাহারা আপনারই শিক্ষাদ্বারা হইয়াছে।

আমি কহিলাম, না না ফুলমণি, এমত কথা বলিও না। আমি নয়, কিন্তু ধর্মাত্মার তাহাদের মনে আপন বাক্যরূপ বীজ ফলবান् করিয়াছেন; ফলতঃ আমরা সে বীজ বপন করিতে পারিয়াছিলাম, এই হেতুক পরমেশ্বরের ধন্যবাদ করা আমাদের কর্তব্য। আমি যেরূপ পূর্বে একবার বলিয়াছিলাম, সেইরূপ আরবার বলি, আমি যে স্থানে বীজ বপন করিয়াছি, সেই স্থানে তুমি প্রার্থনা ও সদুপদেশরূপ জল সেচন করিয়াছ; তাহাতে যদি কোন ফল উৎপন্ন হইয়া থাকে, তবে আমরা উভয়ে মিলিয়া উল্লাসিতা হইতে পারি। গত বৎসরের মধ্যে ঈশ্বর আমাদিগকে কেমন ধর্মরূপ

ফসল দিয়াছেন, তাহা আমরা বিবেচনা করিয়া দেখি; কেননা তাঁহার অনুগ্রহ চিন্তা করণদ্বারা আমাদের মনে তাঁহার প্রতি কৃতজ্ঞতা জন্মে। প্রথমে আয়ার কথা বলিতে হয়। আমি যখন এই স্থানে আইলাম, তখন সে মিথ্যা পয়গম্বরের মতাবলম্বী ছিল; এখন সে যীশুর প্রতি দৃঢ় বিশ্বাস রাখিতেছে। আয়া আমাকে অনেকবার বলিয়াছে, আমি প্রথমে ফুলমণির ছেল্যাদের ব্যবহার দেখিয়া ও তাহাদের কথাবার্তা শুনিয়া ধর্মের বিষয়ে ভাবিতে লাগিলাম।

ইহা শুনিয়া ফুলমণি স্বর্গের প্রতি দৃষ্টিপাত করিয়া মৃদুস্বরে বলিল, হে দয়ালু পিতৎ! আমি তোমার ধন্যবাদ করি।

পরে আমি কহিলাম, রাণীর বিষয়েও মনোযোগ কর। সে এখন কিরূপ সদাচরণ করিতেছে, ও তাহার দুষ্টা ঘকড়াটে শাঙ্গড়ীর প্রতি কেমন সহিষ্ণুতা প্রকাশ করিয়া তাহার সকল আজ্ঞা পালন করিতেছে। ফুলমণি, রাণী তোমারই ধর্ম মেয়ে; তাহার সহিত ধর্মের বিষয়ে আমার তো প্রায় কথা হয় নাই।

ফুলমণি কহিল, মেম সাহেব, সে আপনার স্বামী মধুর ভয়ানক মৃত্যু দেখিয়া আপন আত্মার বিষয়ে প্রথমে চিন্তা করিতে লাগিল; এবং দুই দিবস পরে তাহার প্রসব হওনের সময়ে ঈশ্বর তাহার প্রতি অতি দয়া প্রকাশ করিলেন, তদ্বারা তাহার মন বিশেষরূপে নত্র হইল, ইহা সে আপনি আমাকে বলিয়াছে। সে যাহা হউক, মেম সাহেব, রাণী যদ্যপি আমার ধর্ম মেয়ে হয়, তবে আমাদের প্রিয়া করণাকে আপনকার শিষ্য অবশ্য বলিতে হইবে। ও মেম সাহেব, শেষ দিবসে সে আপনকার পক্ষে আনন্দরূপ মুকুট হইবে; কারণ করণার মন অতিশয় প্রেমিক, এবং সে যদি সত্য খ্রীষ্টিয়ান

হয়, তবে বোধ হয় অনেকের ন্যায় খ্রীষ্টের প্রতি তাহার প্রেম কখন  
শীতল হইবে না।

আমি কহিলাম, ফুলমণি, করুণার শিক্ষাতে তুমি আমাকে কি  
পর্যন্ত সাহায্য করিয়াছ, তাহা আমি কখন ভুলিব না। কিন্তু তোমার  
মনে এখন কেমন লয়? করুণা যে সত্য খ্রীষ্টিয়ান হইবে, এমত কি  
তোমার ভরসা আছে?

ফুলমণি উত্তর করিল, মেম সাহেব, অবশ্য আছে। করুণা  
আমাদের প্রভুর উপর নির্ভর দিয়া অসৎকর্ম্ম ত্যাগ করিতে ও  
সৎকর্ম্ম করিতে চেষ্টান্বিতা আছে; এবং সে যে কৃতকার্য্য হইবে  
ইহার কোন সন্দেহ নাই; কারণ প্রভু আপনি কহিয়াছেন, “আমি  
তোমাদিগকে এক নৃতন অন্তঃকরণ দিব, ও তোমাদের অন্তরে এক  
নৃতন আত্মা স্থাপন করিব।” যিহিস্কেল ৩৬। ২৬।

আমি কহিলাম, হাঁ ফুলমণি, সে সত্য বটে, কেননা প্রভু আপন  
বাক্য সফল করণার্থে তাহার মনকে দুঃখদ্বারা এখন অনেক নম্র  
করিয়াছেন।

ফুলমণি বলিল, আ মেম সাহেব! এ কেমন খেদের বিষয়, যে  
পর্যন্ত আমরা দুঃখরূপ দণ্ড ভোগ না করি, সেই পর্যন্ত আমরা  
খ্রীষ্টের ঘোঁয়ালি বহিতে অসমৃত হই; কিন্তু দুঃখদ্বারা যদি তিনি  
আপনার প্রতি আমাদের মনকে আকর্ষণ করেন, তবে সেই দুঃখের  
নিমিত্তে ঈশ্বরকে ধন্যবাদ করিতে হয়। তিনি করুণার প্রতি এমত  
করিয়াছেন; আর সে যদি সত্য খ্রীষ্টিয়ান হয়, তবে তাহার স্বামীও  
ধর্মের বিষয়ে মনোযোগ করিবে, আমার এমত ভরসা আছে।

আমি কহিলাম, হঁ ফুলমণি, আমিও এইরূপ ভাবিয়াছিলাম; অতএব আইস, আমাদের বাঞ্ছা সফল করণার্থে আমরা দুই জনে আজি অবধি নবীনের পিতার নিমিত্তে প্রার্থনা করিতে আরম্ভ করি। তাহার সহিত আমাদের বড় একটা আলাপ নাই বটে, কিন্তু প্রভু বলিয়াছেন, পৃথিবীতে তোমাদের মধ্যে দুই জন যদি এক পরামর্শ হইয়া কিছু প্রার্থনা করে, তবে আমার স্বর্গস্থ পিতাদ্বারা তাহা তাহাদের জন্যে সম্পন্ন হইবে। এমত অঙ্গীকার পাইয়া আমরা যেন কিছু ভয় না করি, কারণ ঈশ্বরের বাক্যানুসারে আমাদের প্রার্থনা অবশ্য সফল হইবে। এই কথা বলিয়া আমি বিদায় হইলাম, এবং নিশ্চয় বলিতে পারি যে সে রাত্রিতে ফুলমণি ও আমি দয়ার সিংহাসনের নিকটে ঐ দুষ্ট ব্যক্তির পরিদ্রাঘ চাহিতে বিস্মৃতা হইলাম না।

## নবম অধ্যায়।

পূর্বোক্ত পরিবারগণের বিবরণ বাহুল্যরূপে লেখা অনাবশ্যক; কিন্তু তাহা সমাপ্ত করিবার পূর্বে ফুলমণির জ্যেষ্ঠা কন্যার চরিত্রের বিষয় পাঠকদিগকে কিঞ্চিং জ্ঞাত করিতে আমার বড় ইচ্ছা হয়। তাঁহাদের অবশ্য স্মরণ থাকিবে যে এই ইতিহাসের আরম্ভে এ কন্যার বৃত্তান্ত কিছু লিখিত আছে; ভরসা করি সুন্দরীর নিষ্কপট ধর্মের ও পিতা মাতার প্রতি অত্যন্ত প্রেমের বিষয় পড়িয়া তাঁহারা তাহার বিষয়ে আরও কিঞ্চিং শুনিতে ইচ্ছুক হইবেন।

সুন্দরীর আসিবার বিষয়ে ফুলমণির সহিত কথা হইলে পর রবিবারে আমি গীর্জাতে পাদরী সাহেবের পরিবারের সহিত একজন নৃতন মেমকে দেখিলাম, এবং দেখিয়া তৎক্ষণাত বোধ করিলাম, ইনি অবশ্য সুন্দরীর কর্তৃ হইবেন। এমত হইলে আমি ফুলমণির গৃহে শীত্র যাইতে মনস্ত করিলাম, কেননা তাহাকে সন্তুষ্টা করিতে ও তাহার কন্যাকে দেখিতে আমার বড় ইচ্ছা ছিল। অতএব পর দিন সন্ধ্যাকালে আমি তথায় গিয়া উপস্থিতা হইলাম। ফুলমণি আমাকে গাড়ী হইতে নামিতে দেখিবামাত্র বাহিরে আসিয়া আমার সহিত সাক্ষাৎ করিল। আমি তাহার প্রফুল্ল বদন দেখিয়া কহিলাম, ফুলমণি, কেমন? তোমার মেয়েকে কুশলে পাইলা?

সে উত্তর করিল, হঁ মেম সাহেব, ঈশ্বরের অনুগ্রহেতে পাইয়াছি বটে, এবং আমার দৃষ্টিতে বোধ হয়, তাহার শরীরের

সৌন্দর্য ও তাহা হইতে অধিক মূল্যবান্ যে মনের সৌন্দর্য এই উভয়েতে আমার মেয়া পূর্বাপেক্ষা বিস্তর বাড়িয়াছে।

আমি বলিলাম, ফুলমণি, ঈশ্বর কহিয়াছেন, “হে ধার্মিকগণ, তোমাদের মঙ্গল হইবে, ও তোমরা আপন ২ ক্লিয়ার ফল ভোগ করিবা। আমি আপন মর্যাদাকারিদিগকে মর্যাদা করিব, কিন্তু আমার তুচ্ছকারিগণ তুচ্ছীকৃত হইবে।” তুমি আপন মেয়াকে প্রভুর শিক্ষা ও উপদেশ দিয়া ঈশ্বরের মর্যাদা করিলা, তাহাতে তিনি এখন ঐ কন্যাকে ধার্মিকা ও সুশীলা করিয়া সকলের সাক্ষাতে তোমার মর্যাদা করিতেছেন।

এই কথা বলিয়া আমি উঠানে প্রবেশ করিলাম। সুন্দরী দাবাতে একটা মাদুর বিছাইয়া ঘরের প্রতি মুখ ফিরাইয়া বসিয়াছিল, তাহাতে সে প্রথমে আমাকে দেখিতে পাইল না। সাধু তাহার পার্শ্বে বসিয়াছে, এবং সত্যবতী আপন ভগিনীর গালে হাত বুলাইয়া বলিতেছে, ও দিদি! তুমি পূর্বে যেমন সুন্দর গল্প বলিতা, তেমন একটি গল্প এখন আমাদিগকে বল। পরে সে আমাকে টের পাইয়া শীত্র উঠিয়া কহিল, ওগো দিদি! সেই মেম সাহেব আসিয়াছেন।

ইহাতে সুন্দরী উঠিয়া আমাকে সেলাম করিল। আমি তাহার সৌন্দর্যের বিষয়ে যাহা শুনিয়াছিলাম, তাহা যথার্থ বোধ হইল। সে অতিশয় রূপবতী ছিল বটে; বিশেষতঃ তাহার বর্ণ গৌর, এবং তাহার যেমন সুন্দর ও বড় চক্ষুঃ তেমন আমি আর কাহারো দেখি নাই। তাহার বদন লাবণ্যযুক্ত, এবং সে সুন্দররূপে গমন করিত। সুন্দরী কিছু মাত্র অসভ্য না হইয়া বড় লজ্জাবতী ছিল, কিন্তু কোন

কপট লজ্জা প্রকাশ করিত না, কারণ মেম সাহেবের সহিত আলাপ করা তাহার অভ্যাস ছিল।

আমি তাহাকে বলিলাম, সুন্দরী, আমি তোমাকে দেখিয়া সন্তুষ্টা হইলাম; আমি অনেক দিন পর্যন্ত তোমার আগমনের অপেক্ষাতে আছি। বোধ হয়, আমি কে তাহা তুমি শুনিয়া থাকিবা।

সুন্দরী উত্তর করিল, হাঁ মেম সাহেব, আমার পিতা মাতার প্রতি আপনকার সকল অনুগ্রহের বিষয় আমার ছোট ভাই ও ভগিনী আমাকে বলিয়াছে। মেম সাহেব, এই জন্যে ঈশ্বর আপনাকে আশীর্বাদ করুন! ইহা বলিয়া তাহার চক্ষুঃ জলেতে পরিপূর্ণ হইল। সত্যবতী ইহা দেখিয়া অঞ্চল লইয়া তাহার ভগিনীর চক্ষুঃ শীত্র মুছাইয়া কহিল, না না দিদি! এখন তোমার কাঁদা উচিত নয়, কেননা এই আমাদের আনন্দের সময়। পরে ঐ কথা যেন সকলে ভুলিয়া যায়, এই অভিপ্রায়ে সে আমার প্রতি ফিরিয়া কহিল, মেম সাহেব, দিদি কলিকাতা হইতে আমাদের জন্যে যে সকল সুন্দর দ্রব্যাদি আনিয়াছে তাহা কি আপনি দেখিতে চাহেন?

আমি উত্তর করিলাম, হাঁ, অবশ্য দেখিতে চাহি। তখন সত্যবতী শীত্র ঘরের ভিতরে গিয়া ঐ সকল দ্রব্য বাহির করিয়া আনিল, তাহাতে আমি দেখিলাম সুন্দরী সত্যবতীর জন্যে ইংরাজ বিবিদের মত পোষাক পরা একটি কাষ্ঠের পুত্রলিকা, আর এক যোড়া পুতি বসান চুড়ি আনিয়াছে; ও সাধুকে বিদ্যুর্ধি বালক জানিয়া সে তাহার নিমিত্তে পুস্তক রাখিবার সিন্দুক আর একখান খ্রীষ্টিয় মণ্ডলীর ইতিহাস পুস্তক, এবং পিতার জন্যে একটি মের্জাই আনিয়াছে। সুন্দরী আপন মনিবের তিনটি শাটিন কাপড়ের

পুরাতন জামা পাইয়া তাহাতে ঘোড় দিয়া অতি নিপুণতা প্রকাশ করত সেই মের্জাইটিকে বড় সুন্দররূপে সিলাই করিয়াছিল।

সত্যবতী তাহা আমাকে দেখাইয়া বলিল, মেম সাহেব, বাবা এই জামাটি পরিলে ঠিক বাবুর মত দেখায়। তাহার বড় ভগিনী কহিল, সত্যবতী, বাবা কি বাবু নয়? তাঁহাকে অবশ্য বাবু বলিতে হইবে; কেননা কলিকাতায় আমি অনেক বাবু দেখিয়াছি, কিন্তু আমাদের পিতা যেমন সেই নাম পাইবার যোগ্যপাত্র, তেমনি আর একজনকেও দেখি নাই। আমার বোধ হয়, যিনি ধার্মিক ও শিষ্টাচারী হইয়া ধনী ও দরিদ্র সকলের প্রতি দয়া করেন, এমত ব্যক্তিকেই প্রকৃত বাবু বলা যায়। তোমরা বল দেখি আমাদের পিতা এই প্রকার বাবু আছেন কি না? সাধু ও সত্যবতী উভয়ে উত্তর করিল, হঁ অবশ্য ২, আমাদের পিতা যেমন ভাল, তেমন আর কোন মানুষকে দেখি না।

উক্ত কথোপকথনের সময়ে ফুলমণি কিছু বলিল না বটে, কিন্তু আপন সন্তানদের ঐ সকল বাক্য শুনিয়া সে অতিশয় সন্তুষ্টা হইয়াছে, ইহা আমি তাহার প্রফুল্ল বদনের প্রতি দৃষ্টি করিয়া টের পাইলাম। পরে তাহার মেয়ে তাহার নিমিত্তে যে বিলাতীয় শাড়ি আনিয়াছিল, তাহা সে আমাকে দেখাইয়া বলিল, মেম সাহেব, আমার সুন্দরী যে বাবার কর্ম করে তাহার জন্মদিন হইলে মেম তাহাকে তিনটি টাকা পারিতোষিক দিয়াছিলেন, সে ঐ টাকা লইয়া আমার নিমিত্তে এই শাড়িখানি কিনিয়া আনিয়াছে; এমন উত্তম শাড়ি এ স্থানে পাওয়া যায় না।

অতঃপর সত্যবতী কহিল, আর দেখুন মেম সাহেব! দিদি আমাদের ছোট প্রিয়নাথকে কখন দেখে নাই, তথাপি তাহার জন্মে

সে দুইটি ছিটের কোর্তা ও একটি গরম টুপি সিলাই করিয়া আনিয়াছে, এবং সেই কোর্তা ও টুপি তাহার গায়ে ঠিক হইয়াছে। আমি ঐ সকল বস্ত্রাদি দেখিয়া বড় প্রশংসা করিলাম, কেননা সকলই সুন্দর ছিল বটে; কিন্তু তদ্বারা সুন্দরীর মনের যে ভাব (অর্থাৎ পিতা মাতার প্রতি তাহার অত্যন্ত প্রেম) প্রকাশ হইল, সে সকল অপেক্ষা উত্তম; কেননা দ্রব্যগুলিন ক্ষয়ণীয়, কিন্তু সুন্দরী যে অভিপ্রায়ে তাহা প্রস্তুত করিয়াছিল সেই অভিপ্রায় ঈশ্বরের সিংহাসনের নিকটে উদ্বোধন করিয়া সুগন্ধি নৈবেদ্য ও বলিরূপে তৎকর্তৃক অবশ্য গৃহীত হইল।

পরে আমি সুন্দরীর সহিত কথোপকথন আরম্ভ করিতে চাহিয়া বলিলাম, সুন্দরী, বোধ হয় এই মের্জাই সিলাই করিতে তোমাকে অনেক দিন লাগিয়া থাকিবে; কারণ দেখিতেছি যে তাহাতে আস্তর দেওয়া গিয়াছে, এবং ঐ সকল শাটিনের মগজি ঠিক রাখিতে অবশ্য বড় ক্লেশ পাইয়া থাকিবা।

সুন্দরী উত্তর করিল, মেম সাহেব, তাহা সিলাই করিতে অনেক দিন লাগিয়াছিল বটে, কারণ রাত্রিতে বাবারা শয়ন না করিলে আমার অবকাশ হইত না; বোধ হয় প্রায় দেড় মাস হইয়া থাকিবে। কিন্তু তাহা সিলাই করিতে যে ক্লেশ পাইলাম, এমত বলিতে পারিনা। সিলাই করিবার সময়ে আমি কেবল ঘরের কথা মনে করিয়া বলিতাম, আমার পিতা যে দিবসে এই মের্জাইটি গায়ে দিবেন, সে আমার পক্ষে কেমন আমোদের দিবস হইবে! ইহা মনে করিয়া আমার কিছু ক্লেশ বোধ হইত না। যাহা হউক, কল্য যখন আমার পিতা গীর্জায় যাইবার সময়ে ঐ মের্জাই পরিয়া আমার মস্তকে হাত দিয়া কহিলেন, ঈশ্বর আমার প্রিয়া কন্যাকে

আশীর্বাদ করুন! তখন আমি তাবৎ পরিশ্রমের প্রচুর ফল প্রাপ্তা  
হইলাম।

এই কথা শুনিয়া আমি মনে ২ ভাবিলাম, আহা সুন্দরী! তোমার  
মত আর অনেক মেয়ে যদি আমাদের মণ্ডলীগণের অলঙ্কার স্বরূপ  
হইয়া এই দুষ্ট জাতিদের মধ্যে ঈশ্বরের সেবা করিত, তবে কেমন  
আনন্দের বিষয় হইত।

পরে আমি সুন্দরীকে জিজ্ঞাসিলাম, তুমি কি একাকিনী রাত্রে  
বসিয়া সিলাই করিতা? সুন্দরী কহিল, হাঁ মেম সাহেব, প্রথমে  
আমার সঙ্গে এক মুসলমানী আয়া থাকিত, কিন্তু প্রায় আট মাস  
হইল সে বাবাদের সাক্ষাতে অনেক অপবিত্র কথা কহাতে আমার  
মেম তাহাকে ছাড়াইয়া দিয়াছেন।

আমি কহিলাম, সুন্দরী, ভাল মনে পড়িল; আমি এই বিষয়  
তোমাকে জিজ্ঞাসা করিতে চাহি, অন্য চাকরদের সহিত তোমার  
কেমন ঐক্য আছে? তাহারা সকলে হিন্দু ও মুসলমান না কি?

সুন্দরী কহিল, হাঁ মেম সাহেব, কেবল একজন বৃদ্ধ মালী  
খ্রীষ্টিয়ান আছে; সেই ব্যক্তি ও তাহার স্ত্রী বড় ভাল লোক, এবং  
তাহারা আমার প্রতি অতিশয় দয়া প্রকাশ করিত। আমি যখন  
প্রথমে ঐ গ্রহে গেলাম, তখন সকল চাকরেরা বড় অসন্তুষ্ট হইল;  
কেননা তাহারা বোধ হয় করিল, যখন একজন খ্রীষ্টিয়ান  
আসিয়াছে, তখন আরও অনেকে আসিয়া আমাদের উপায়ের স্থান  
নষ্ট করিতে পারিবে। কিন্তু এখন তাহারা ঐ সকল মনে করে না,  
তাহাতে তাহাদের সহিত আমার ভালুকপে মেল হইয়াছে। আমি  
যত দুঃখ পাইলাম তাহা প্রথমেই পাইলাম। একজন যুব

খিদমৎগার আমাকে ভষ্টা করিতে অনেক চেষ্টা করিয়াছিল, তাহাতে আমি তাহার কথা আর সহ্য করিতে না পারিয়া মেম সাহেবকে জ্ঞাত করিলাম। তখন সাহেব অন্য সকল দাসদের সাক্ষাতে তাহাকে বিস্তর ধর্মকাইয়া ও লজ্জা দিয়া ছাড়াইয়া দিলেন। সেই দিন অবধি সকলে ভয় পাইয়া আমাকে আর একটিও মন্দ কথা কখন কহে নাই; কিন্তু আমি অন্য প্রকারে দুই তিন বার বড় পরীক্ষিতা হইয়াছি।

একজন সরদার বেহারা ছিল, সে ব্যক্তি বড় চোর, মেম সাহেবকে অতিশয় ঠকাইত। ছুরি কাঁচি পয়সা অঙ্গুরী এবং সকল ছোট দ্রব্য কোন স্থানে ফেলিয়া রাখিলে তখনি অদ্রশ্য হইত। ঐ সরদারের প্রতি সন্দেহ হইত বটে, কিন্তু কেহ তাহাকে ধরিতে পারিত না। পরে এক দিবস সে তিন মোন নারিকেল তৈল বাজার হইতে আনিল; তাহাতে মেম সাহেব আমাকে কহিলেন, সুন্দরী, আজি তুমি গুদামে গিয়া ঐ তৈল ওজন করিয়া লও, কেননা অল্পদিন হইল সরদার আর তিন মোন তৈল আনিয়াছিল, তাহা যে ইহারি মধ্যে ফুরাইয়া গেল, ইহাতে আমার বড় সন্দেহ হইতেছে। সরদার এই কথা শুনিয়া বড় অসন্তুষ্ট হইল, এবং আমি গুদামে গেলে সে বলিল, তৈল ওজন করিতে অনেক ক্ষণ লাগিবে, ইহা ঠিক তিন মোন আছে, তাহাতে তোমার কেবল বৃথা পরিশ্রম হইবে; তুমি যদি ওজন না করিয়াও মেম সাহেবকে বল, আমি তৈল ওজন করিয়া ঠিক পাইলাম, তবে আমি তোমাকে মিঠাই খাইবার জন্যে আট আনা পয়সা দিব। কিন্তু আমি এই কর্ম করিতে স্বীকার করিলাম না; কেননা আমি ভাবিলাম, ইহাতে ঈশ্বরের আজ্ঞা লজ্জন হইবে, এবং এই দেবপূজক বেহারার সাক্ষাতে খ্রীষ্টীয় ধর্ম অপমানিত হইবে। আরও আমি সুন্দররূপে জানিতাম, যে ঐ আট আনা লইলে তদ্বারা আমার সন্তোষ কখন

জন্মিবে না, কেবল দুঃখই জন্মিবে; এমত বুঝিয়া আমি তৈল ওজন করিয়া দেখিলাম, যে তিন মোনের মধ্যে অর্ধ মোন কম আছে। তৈলের দর তখন দশ টাকা মোন, অতএব সরদার একেবারে পাঁচ টাকা চুরি করিয়াছে। আমি মেম সাহেবকে এই কথা বলাতে সরদার ওজর করিয়া বলিল, আমি সুন্দরীকে অর্দেক দস্তরী দিতে চাহিলাম না, এই জন্যে সে আমার প্রতি মিথ্যা অপবাদ দিতেছে। মেম সাহেব যে পুনর্বার আপন সাক্ষাতে তৈল ওজন করাইবেন, সরদার এমত মনে করিল না; ফলতঃ মেম সর্বদা ন্যায় বিচার করেন, বিনা প্রমাণে কাহাকেও দোষী জ্ঞান করেন না, কিন্তু একবার প্রমাণ পাইলে তিনি দোষী ব্যক্তির প্রতি যথার্থ শাসন করেন। তাহাতে মেম সাহেব আপনি তৈল ওজন করিয়া দেখিলেন যে অর্ধমোন কম আছে, তখনি ঐ দুষ্ট সরদার বেহারা জবাব পাইল।

ইহার পর কেবল একজন বৃন্দা আয়ার কথা বাকী আছে। মেম সাহেব তাহাকে বড় ভালবাসিতেন, কারণ সে অনেকদিনের চাকর, এবং বাবাদিগকে অতিশয় প্রেম করিত। কিন্তু তাহার এই একটি দোষ ছিল, মেম সাহেব বাহিরে গেলে সে বাবাদিগকে বাঙালা মিঠাই আনিয়া খাওয়াইত। মেম সাহেব তাহাকে এমত কর্ম করিতে অনেকবার বারণ করিয়াছিলেন, কিন্তু সে কিছু না মানিয়া গোপনে মিঠাই আনিয়া দিয়া বাবালোককে কহিত, তোমরা এ কথা মামাকে বলিও না। এইরূপে বাবারা ক্রমে ২ প্রবঞ্চনা শিখিতে লাগিল, এবং আমার নিকটে গোপনে মিঠাই না পাওয়াতে তাহারা আমাকে কিছু ভালবাসিত না। বুড়ি আয়ার বিষয়ে আমার কি করা কর্তব্য, তাহা আমি মনে স্থির করিতে পারিলাম না, তাহাতে ঈশ্বর যেন গন্তব্য পথে চালান् আমি তাঁহার নিকটে এই প্রার্থনা বার ২ করিতাম। আয়ার প্রবঞ্চনার বিষয়

আমি মেমকে জ্ঞাত করিতে অনিচ্ছুক ছিলাম, কেননা আয়া আমাকে বড় ভালবাসিয়া অনেক কর্ম শিখাইয়াছিল; কিন্তু শেষে মেম সাহেবে আপনি তাহার কুক্রিয়ার উদ্দেশ পাইলেন। যে দিনে দুর্গাপ্রতিমা গঙ্গায় ভাসান যায়, সে দিনে তিনি বাবাদিগকে ঘরে রাখিয়া বাহিরে গেলেন। আয়া বুড়ি আমাকে বলিল, চল, বাবালোককে লইয়া আমরা তামাসা দেখিতে যাই। আমি এই কথাতে চমৎকৃতা হইয়া উত্তর করিলাম, ও আয়া দিদি! মেম সাহেব যদি এই কথা শুনেন, তবে তিনি কেমন রাগান্বিতা হইবেন। আয়া কহিল, তুমি যদি তাঁহাকে না বল, তবে তিনি কাহারো মুখে শুনিতে পাইবেন না; আর আপত্তি করিও না, চল, আমরা যাই। আমি কহিলাম, না আয়া, এমত হইবে না; তুমি যদি যাইতে চাহ তবে বাবাদিগকে আমার নিকটে রাখিয়া আপনি যাও। তখন আয়া কহিল, সুন্দরী, তুমি যদি না যাও, তবে তুমি আমার নামে বলিয়া দিবা। আমি কহিলাম, না আয়া, বাবারা গেলে আমার বলা উচিত হইত বটে; কিন্তু তাহারা যদি আমার নিকটে থাকে, তবে আমার বলিবার কোন প্রয়োজন নাই; এই কথাতে আয়া চলিয়া গেল। আমরা বোধ করিয়াছিলাম যে ছোট মেরি বাবা আমাদের কথা সকল বুঝিবে না। কিন্তু সে এই মাত্র বুঝিয়াছিল, আয়া আমাকে দুর্গা বলিয়া কোন সুন্দর বস্ত্র দেখাইতে চাহিয়াছিল, কিন্তু সুন্দরী তাহা আমাকে দেখাইতে দিল না; এই হেতু সে বড় কাঁদিয়া উচ্ছেঃস্বরে আয়াকে ডাকিতে লাগিল। এমন সময়ে মেম সাহেব ফিরিয়া আইলেন; তাহাতে মেরি বাবা তাঁহার নিকটে গিয়া কান্দিতে ২ বলিল, মামা! সুন্দরী বড় দুষ্টা, বুড়ি আয়া বড় ভাল মানুষ, সে আমাকে সুন্দর দুর্গা দেখাইতে চাহিল, কিন্তু সুন্দরী বলিল, না না, যাইও না; আমি সুন্দরীকে কিছু প্রেম করি না। ইহা শুনিয়া মেম সাহেবে আমার প্রতি ফিরিয়া জিজ্ঞাসিলেন, সুন্দরী,

এই কথার ভাব কি? আমি কহিলাম, মেম সাহেব, এই বিষয়ে আমি কিছু বলিতে পারিব না, কেননা আমি একটা প্রতিজ্ঞা করিয়াছি। কিন্তু সেখানে দরওয়ান্ দাঁড়াইয়া ছিল, আয়ার সহিত সে আমার সকল কথা শুনিয়া মেম সাহেবকে সন্তুষ্ট করিবার জন্যে তাবৎ বৃত্তান্ত জানাইল। ইহা শুনিয়া মেম সাহেব পর দিবস আয়াকে ছাড়াইয়া দিলেন বটে; কিন্তু সে পুরাতন চাকর, এই হেতু তিনি তাহার জন্যে একটি ঘর বাঁধিলেন, ও মাসে ২ তাহাকে দুই টাকা করিয়া দেন। যখনি বুড়ি সেই টাকা লইতে আইসে, তখন বাবাদিগকে দেখিয়া যায়, এবং আমার সহিত এখনও তাহার বড় সন্দৰ্ভ আছে। নৃতন আয়া কিছু দিন ভাল ব্যবহার করিয়াছিল, কিন্তু শেষে আমি শুনিতে পাইলাম, সে মেরি বাবাকে মন্দ গল্প বলিয়া তাহার মনকে অপবিত্র করিতেছে; অতএব আমি মেমকে বলিলাম, ইহা অপেক্ষা আমার একাকি কর্ম করা ভাল, তাহাতে আয়া বিদায় পাইল। সেই সময় অবধি ঐ ঘরে থাকিতে আমার মন কিঞ্চিৎ উদাস হয় বটে, কিন্তু মেম সাহেব অনুগ্রহ করিয়া বলিয়াছেন, যে আমি ফিরিয়া যাইবার সময়ে তোমার সঙ্গনী হইবার জন্যে একজন খ্রীষ্টিয়ান মেয়েকে লইয়া যাইব।

অতঃপর সুন্দরী আরও কহিল, মেম সাহেব, এ দেশীয় লোকেরা কন্যাদিগকে বাটীর বাহিরে যাইতে দেয় না। তাহারা বলে, মেয়েরা সর্বদা পরদার ভিতরে তালা চাবি দিয়া থাকিবে; কিন্তু মনের যে তালা চাবি, তাহার মত ভাল তালা চাবি কোন স্থানে পাওয়া যাইবে না। আমরা মনকে যদি খ্রীষ্টের হস্তে সমর্পণ করিয়া তাঁহার সঙ্গাতে সঙ্গীভূতা হই, তবে শয়তান আমাদিগকে কখন আক্রমণ করিতে পারিবে না।

আমি কহিলাম, সুন্দরী, একথা যথার্থ বটে। আমি বোধ করি যদ্যপি শ্রীষ্টিয়ান স্ত্রীলোকেরা অন্য শ্রীষ্টিয়ান স্ত্রী ও পুরুষদের সহিত আরও আলাপ করিত, তবে তাহাদের বিস্তর উপকার হইতে পারিত। বিবেচনা করিয়া দেখ, এখন পুরুষেরা যত সতী ও অসতী স্ত্রী সকলকেই বদ্ধ করিয়া রাখে, তাহাতে সতী স্ত্রীরা অবশ্য মনে নৈরাশ হইয়া বলিতে পারে, আমাদের সতী হইবার ফল কি? আমাদের স্বামী তো আমাদিগকে বিশ্বাস করে না, অতএব আমাদের যাহা ইচ্ছা হইবে তাহাই করিব। কিন্তু যদ্যপি স্বামী আপন স্ত্রীকে সতী জানিয়া তাহাকে নিঃসন্দেহে স্থানে ২ যাইবার অনুমতি দিত, তবে সে অবশ্য মনে আছাদিতা হইয়া আপন স্বামীকে আরও সন্তুষ্ট করিতে চেষ্টাব্বিতা হইত। আরও বলি, পুরুষদের সহিত আলাপ করাতে তাহাদের কথোপকথনদ্বারা স্ত্রীরা কিছু বুদ্ধিমতী হইতে পারিত। ঈশ্বর যখন আদমের নিমিত্তে হ্বাকে সৃষ্টি করিতে চাহিলেন, তখন তিনি এমত বলিলেন না, আমি আদমের গৃহ কর্ম চালাইবার কারণ একজন দাসী সৃষ্টি করিব, কিম্বা তাহার পক্ষে সন্তান উৎপত্তি করিতে এক স্ত্রীকে সৃষ্টি করিব। তিনি এমন কথা না বলিয়া ইহা কহিলেন, আমি আদমের নিমিত্তে একজন উপযুক্ত সহকারিণীকে নির্মাণ করিব। এখন বিবেচনা করিয়া দেখ, স্ত্রী কিছু জ্ঞানিনী না হইলে এবং জগতের বিষয় কিছু না জানিলে কেমন করিয়া স্বামীর উপযুক্ত সহকারিণী হইতে পারে? পাঁচ প্রকার ভাল লোকদের সহিত আলাপ করাতে অবশ্য জ্ঞান উৎপন্ন হয়, অতএব স্ত্রীরা যাহাতে জ্ঞানবতী হয়, স্বামীদের ইহা চেষ্টা করা কর্তব্য। কোন ২ বাঙালি শ্রীষ্টিয়ানেরা এমত নির্বোধ আছে যে তাহাদের স্ত্রীরা পাছে গৃহের কর্ম ত্যাগ করে এই ভয়ে তাহাদিগকে ধর্মপুস্তকও পাঠ করিতে দিতে চাহে না; কিন্তু এমত লোকদিগকে মানুষ না বলিয়া বরং পশু বলিতে

হয়। তাহারা আপনারা স্বর্গে যাইতে অপেক্ষা করে, কিন্তু পাছে তাহাদের গৃহের কর্মেতে কিছু ব্যাঘাত হয়, এই হেতু তাহারা আপন স্ত্রীদিগকে ধর্মের বিষয়ে শিক্ষা না দিয়া নরকে যাইতে দেয়। আমি ভরসা করি যে খ্রীষ্টিয়ান মণ্ডলীগণের মধ্যে এমত ব্যক্তিদের সংখ্যা দিনে ২ হ্রাস হইতেছে।

পরে আমি ফুলমণির প্রতি ফিরিয়া জিজ্ঞাসিলাম, ফুলমণি, তুমি এ বিষয়ে কিছু বল না কেন? তোমার বিবেচনাতে আমার কথা কি ভাল বোধ হয় না?

ফুলমণি উত্তর করিল, মেম সাহেব, ভাল বোধ হইবে না কেন? কেবল এই একটা কথা বলিতে হয়, কোন বাঙালি স্ত্রী যদি একেবারে ইংরাজ বিবির মত ব্যবহার করে, তবে অন্য লোকেরা তাহাকে কখন সতী স্ত্রী জ্ঞান করিবে না। মেম সাহেব, আপনি বিবেচনা করিয়া দেখুন, আপনারা সাহেবদের সহিত বেড়াইয়া থাকেন ও একাকিনী বসিয়া তাহাদের সহিত কথোপকথন করিতে পারেন; কিন্তু বাঙালি স্ত্রী যদি এমত করিত, তবে সে কি আপনার দৃষ্টিতে ভাল বোধ হইত?

আমি কহিলাম, না ফুলমণি, বাঙালি স্ত্রীলোকেরা যে একবারে ইংরাজ বিবির ন্যায় হয় আমার তো এমত বাঞ্ছা নাই; কেননা তাহারা পুরুষদের সহিত হিতজনক আলাপ করিতে চাহিলে এক প্রকার লজ্জার আবশ্যক আছে, কিন্তু সেই লজ্জা ঘোমটাদ্বারা নয়, বরং মনের শুন্দতাদ্বারা প্রকাশ পায়। যে স্ত্রীর এমত লজ্জা থাকে, সে কখন কোন পুরুষের সাক্ষাতে অপবিত্র বাক্য ও মন্দ কৌতুকের কথা কহিবে না; এবং যদ্বারা ঐ পুরুষের মন তাহাতে আসন্ত হইতে পারে, সে এমত ক্রিয়া কখন করিবে না। এই

প্রকারে স্ত্রীলোকেরা পুরুষদের সহিত স্বচ্ছন্দে আলাপ করিয়া নির্দোষী থাকিতে পারে। কিন্তু যদ্যপি বাঙালি মেয়েরা ঘোমটাদি দিয়া অন্তঃপুরে থাকে, তথাপি যত লজ্জা ইংরাজ বিবিদের মধ্যে পাওয়া যায়, তত অন্তঃপুরের মেয়েদের মধ্যে পাওয়া যাইবে না। বাঙালি স্ত্রীলোকেরা অন্য পুরুষদের সাক্ষাতে অনায়াসে গর্ভ হওয়া ইত্যাদি বিষয় বলিতে পারে; কিন্তু ইংরাজদের মধ্যে যদি স্বামী ছাড়া পুরুষের নিকটে স্ত্রীলোক এমত বাক্য মুখে লয়, তবে সকলে তাহাকে বড় অসভ্য বলিয়া তুচ্ছ জ্ঞান করে। এই সকল বিষয়ে খ্রীষ্টিয়ান স্ত্রীলোকেরা হিন্দুদের অপেক্ষা অনেক ভাল হইয়াছে বটে, তথাপি তাহাদের কিছু গ্রন্তি আছে; এবং যতদিন ঐ গ্রন্তি থাকে, ততদিন পর্যন্ত পুরুষদের সহিত তাহাদের বড় আলাপ করা আবশ্যিক নাই। ক্রমে ২ তাহারা যখন ইংরাজদের বিদ্যাদি শিক্ষা করিবে, তখন তাহারাও আমাদের মত হইয়া উঠিবে; কিন্তু বোধ হয়, ইহা সম্পূর্ণ রূপে সাধন করিতে আর এক শত বৎসর লাগিবে। এখন আমার বাঙ্গা এই যেন খ্রীষ্টিয়ান স্ত্রীগণ লোক দেখান মিথ্যা লজ্জা সকল ত্যাগ করিয়া সৎক্রিয়া করে।

এখন আমি যাহা বলিতেছি, তাহা স্বচক্ষে দেখিয়াছিলাম। একজন খ্রীষ্টিয়ান শিক্ষক আপন যুবতী স্ত্রীকে ঘরে রাখিয়া কোন কর্মের নিমিত্তে বাহিরে গিয়াছিল, এমত সময়ে তাহার বন্ধু ইহা না জানিয়া তাহাকে দেখিবার কারণ শিক্ষকের ঘরে গেল। সেই স্ত্রী আপন স্বামীর বন্ধুকে ব্যাপ্তের মত দেখিয়া শীত্র অন্তঃপুরে দৌড়িয়া গিয়া দ্বার বন্ধ করিল; তাহাতে ঐ বন্ধু লজ্জিত হইয়া ধীরে ২ আপন গৃহে ফিরিয়া গেল। পরে স্বামী ঘরে আইলে ঐ স্ত্রী আপন সতীত্বের বিষয় তাহাকে জানাইয়া আপনাকে বড় সাধু বোধ করিল; এবং তাহার স্বামী বন্ধুর সহিত বিবাদ করিয়া তাহাকে আপন ঘরে আসিতে নিষেধ করিল। ফুলমণি, এমত হাস্যজনক

লজ্জা ভাল কি মন্দ, তাহা তুমিই বুঝ। তুমি কহিতেছ, বাঙালি স্ত্রীগণ যদি ইংরাজ বিবিদের ন্যায় ব্যবহার করে, তবে লোকেরা তাহাদিগকে তুচ্ছজ্ঞান করিবে। কোন ইংরাজ বিবির ঘরে যদি আপন স্বামীর বন্ধু যান, তবে তিনি তাঁহার সহিত অতিশয় সমাদর পূর্বক কথোপকথন করেন, এবং যাহাতে ঐ সময় তাঁহার পক্ষে আমোদে যাপন হয়, এমত চেষ্টা করেন; আর কথা সঙ্গ হইলে কি জানি সেই বিবি এক দণ্ড বসিয়া বাদ্য করেন, কিন্তু যদি সাহেবের পড়িবার ইচ্ছা হয়, তবে তাঁহার হস্তে একখান পুস্তক দিয়া আপনি শিল্পকর্মের দ্রব্যাদি আনিয়া তথায় বসিয়া সিলাই করেন। বাঙালি স্ত্রীর এমত করিবার প্রয়োজন নাই বটে, তথাপি তাহার গৃহে যদি কোন পুরুষ আইসে, তবে সে শিষ্টরূপে তাহাকে এই কথা বলুক, এখন কর্ত্তা ঘরে নাই, অতএব আপনি যদি অন্য সময়ে আসিতে পারেন, তবে ভাল হয়। কিন্তু সে ব্যক্তি পথ শ্রান্ত প্রযুক্ত তাহার ঘরে যদি বিশ্রাম করিতে চাহে, তবে সে দাবাতে তাহার জন্যে একখান আসন রাখুক, পরে তাহাকে তামাক ও জলাদি দিয়া আপন অন্তঃপুরে যাউক। এই প্রকার ব্যবহার না করিলে খ্রীষ্টীয় ধর্ম প্রায় পালন করা যায় না, কেননা ঈশ্বর কহেন, “সুযোগ পাইলে সকল লোকের বিশেষতঃ বিশ্বাসকারি পরিবারের মঙ্গল কর।” গলাতীয় ৬। ১০।

কিন্তু এদেশীয় লোকেরা আপন ২ স্ত্রীদিগকে বন্ধ করিলে তাহারা এমত সুযোগ পায় না; অতএব বঙ্গদেশীয় লোক আপন ২ ব্যবহারেতে ঈশ্বরের আজ্ঞা লজ্জন করে।

আরও বলি, এদেশীয় খ্রীষ্টিয়ানেরা ইংরাজ বিবিদের রীতিকে নিন্দা করে, করুক; কিন্তু যে ধার্মিকা স্ত্রীলোকদিগকে ঈশ্বর আপনি

প্রশংসা করিয়াছেন, তাহারা কি তাহাদিগকেও নিন্দা করিবে? শিমুয়েলের মাতা হন্নাকে স্মৃতণ কর; সে আপন পরিবারের সহিত ঈশ্বরের মন্দিরে যাত্রা করিত, এবং তৎকালের লোকেরা পদ্ব্রজেই গমনাদি করিত, অতএব হন্না অন্তঃপুরে বদ্ধ থাকিত না, তথাপি সে ঈশ্বরের কেমন প্রিয়পাত্র ছিল। আরও যীশুর মাতা মরিয়ম যিনি সকল স্ত্রীলোকদের মধ্যে ধন্যা, তিনি বিবাহের অগ্রে এবং পশ্চাতে স্থানে ২ বেড়াইতেন, এবং যীশুর শিষ্যদের সহিত তাঁহার বন্ধুতা ছিল। ইলিয়াসর মরিলে পর যিহুদীয়েরা তাহার দুই ভগিনীকে সান্ত্বনা দিতে গেল, এবং তাহারা ঐ যিহুদীয়দিগকে আপন বাটীতে গ্রহণ করিল। আক্রিলা ও তাহার স্ত্রী প্রিস্কিল্লা একজন যুব উপদেশককে আপন বাটীতে আনিয়া বিশেষরূপে ঈশ্বরের পথ তাহাকে বুঝাইয়া দিল। আর পৌল রোমীয় খ্রীষ্টিয়ানদের প্রতি লেখেন, “কিংক্রিয়া নগরীয় মণ্ডলীর সেবিকা ফৈবী নামণী আমাদের ধর্ম্মভগিনীর বিষয়ে তোমাদের নিকটে এই উপরোধ করিতেছি, সে তোমাদের নিকটে উপস্থিতা হইলে তোমরা তাহাকে প্রভুর আশ্রিতা জ্ঞান করিয়া ভক্তলোকদের বিহিত মতে অতিথি করিবা, এবং তাহার প্রয়োজনানুসারে তোমাদের হইতে যে উপকার হইতে পারে তাহা করিবা; কেননা তাহা হইতে অনেকের বিশেষতঃ আমার উপকার হইয়াছে।” তদ্রূপে মরিয়মের এবং অন্যান্য কত স্ত্রীলোকের প্রশংসা ও লিখিয়াছেন। রোমীয় ১৬। ১, ২। আরও লেখা আছে যে পিতর কারাগার হইতে রক্ষা পাইয়া মার্কের মাতা মরিয়মের বাটীতে চলিয়া গেল; এবং তথায় অনেকে একত্র হইয়া প্রার্থনা করিতেছিল। প্রেরিতদের ক্রিয়া ১২। ১২। এখন বুবিয়া দেখ, এই সকল ধার্মিকা স্ত্রীলোকেরা যদি অন্তঃপুরের বিবি হইতেন, তবে উক্ত তাবৎ ধর্মকর্ম তাঁহারা কখন

সাধন করিতে পারিতেন না। অতএব ঈশ্বর যাহার প্রশংসা  
করিয়াছেন তাহা মনুষ্যেরা নিন্দা না করুক।

শুণুর ও ভাসুরদের প্রতি যে অত্যন্ত লজ্জা করা, ইহাও বাঙালি  
স্ত্রীদের একটি বড় মন্দ রীতি আছে; কেননা কোন স্ত্রী পুরুষকে  
বিবাহ করিলে স্বামীর পিতা তাহার পিতা হয়, এবং স্বামীর ভাতা  
তাহার ভাতা হয়। কিন্তু সে যদি তাহাদের সহিত কোন কথা না  
কহিয়া মুখ আচ্ছাদন দিয়া বেড়ায়, তবে পিতার ও ভাতার প্রতি  
যেরূপ প্রেম করা কর্তব্য, ইহা কি তাহাদের প্রতি জন্মিতে  
পারিবে? কখন না। আমি এবিষয়ে ভালুরপে বিবেচনা করিয়া  
দেখিয়াছি, স্ত্রীলোকদের মধ্যে অনেকের কপট লজ্জা আছে কেননা  
তাহারা স্বামীর ঘরে এক প্রকার ও পিতা মাতার ঘরে অন্য প্রকার  
ব্যবহার করে। একবার আমি কোন যুবতী শ্রীষ্টিয়ান স্ত্রীর বাটীতে  
গিয়া তাহার শুণুরের ও স্বামীর একজন বন্ধুর প্রতি অত্যন্ত লজ্জা  
দেখিয়া বড় দুঃখিতা হইলাম; কিন্তু সে স্ত্রী অল্প দিন পরে আপন  
মাতার ঘরে আইলে আমি স্বচক্ষে দেখিলাম, সে মাতার কাপড়  
খুলিয়া একজন হিন্দু পুরুষের নিকটে দাঁড়াইয়া তাহার সহিত  
অনেকক্ষণ পর্যন্ত হাস্য করত কথা কহিতেছিল। আর ফুলমণি,  
ইহাতে জানা যায়, স্ত্রীলোকদিগকে তালা চাবি দিয়া রাখিবার কোন  
ফল নাই, কেননা তদ্বারা তাহাদের মন শুচি থাকে না, এবং  
তাহাদের মনকে রক্ষা করিতে না পারিলে তাহাতে কি লাভ?  
এদেশীয় স্ত্রীদের অন্তঃপুরে যে প্রকার অপবিত্র কৌতুকাদি হয়, ও  
যে প্রকার গালাগালি করে, সেই সকল ইংরাজ বিবিরা কখন  
মুখেতেও আনেন না। আমি এক মেমকে চিনি, যিনি বঙ্গদেশীয়  
ভাষাতে অতি নিপুণ ও বাঙালিদের গালাগালির অর্থ অনেক  
জানিতেন; কিন্তু তাঁহার স্বামী সে অর্থ তাঁহাকে বলিতে অনেকবার  
সাধ্যসাধনা করিলেও তিনি অস্বীকৃতা হইয়া বলিতেন, ক্ষমা করুন,

আমি এই কথা মুখে আনিতে পারিব না। ফুলমণি, যাহাতে মন শুচি  
থাকে, বাঙালি শ্রীষ্টিয়ানেরা এমত উপায় চেষ্টা করুক; সে উপায়  
অন্তঃপুরে পাওয়া যায় না, কিন্তু সদুপদেশ ও ধার্মিক লোকদের  
সহিত আলাপন দ্বারা পাওয়া যাইতে পারে। আইস, আমরা  
প্রেরিতের আদেশানুসারে ব্যবহার করি, তাহাতে কখন ভান্তিতে  
পতিতা হইব না। তিনি বলিতেছেন, “হে নারীগণ, তোমরা  
কেশবেশ ও স্বর্ণ মুক্তাদি আভরণ ও বহুমূল্য পরিচ্ছদদ্বারা  
আপনাদিগকে ভূষিতা না করিয়া লজ্জা ও সতর্কতা পূর্বক উপযুক্ত  
বন্ধু পরিধান করিয়া ঈশ্বরসেবিকা স্ত্রীগণের ন্যায় সৎক্রিয়ারূপ  
ভূষণে ভূষিতা হও।” ১ তীমথিয়ের ২। ৯।

ফুলমণি কহিল, মেম সাহেব, আমি যেন সেই আজ্ঞামতে  
চলিতে পারি এমত চেষ্টা আছে, এবং সুন্দরীকেও সেইরূপ শিক্ষা  
দিয়াছি।

তাহাতে আমি কহিলাম, ওঁ আমার প্রিয়া বন্ধু, তুমি যে ইহা  
করিয়াছ তাহা আমি সুন্দরূপে জ্ঞাতা আছি। আর আমি যে ২  
শক্ত কথা কহিয়াছি তাহা তোমারই প্রতি কহিলাম, এমত অনুমান  
করিও না; কেননা তুমি যে লৌকিক রিত্যনুসারে না চলিয়া  
ঈশ্বরের আজ্ঞা পালন করিতেছে, তাহা সুন্দরীর কলিকাতায়  
যাওয়াতেই সুপ্রমাণ হইয়াছে। বিশেষতঃ সে ঈশ্বরের সজ্জাতে  
সুসজ্জিভূতা হইয়া শয়তানের নানাবিধি খলতা নিবারণ করিতে  
সক্ষম হইবে, ইহা তোমরা দৃঢ় বিশ্বাস করিয়া আপনাদিগকে ঝণ  
হইতে উদ্ধার করিবার জন্যে তাহাকে দূরে পাঠাইয়া দিয়াছিলা।  
দেখ, ঈশ্বর তোমার আশা ভঙ্গ করেন নাই, কেননা তোমার মেয়া  
যাওয়াতে তাহার কোন ক্ষতি হয় নাই, বরং হিতমাত্র জন্মিয়াছে।

ফুলমণি প্রফুল্ল বদনে কহিল, হাঁ মেম সাহেব, ঈশ্বর অনুগ্রহ  
করিয়া আমাদের হস্তকৃত কর্ম সফল করিয়াছেন বটে।

সেই দিবস আমি সুন্দরীর সহিত আলাপ করত ফুলমণির গৃহে  
অতি আমোদে আরও অনেক কাল ঘাপন করিতাম, কিন্তু উক্ত  
সকল কথা সাঙ্গ হইলে পর দেখিলাম, আমার আগমনেতে যে  
গল্পের ব্যাঘাত হইয়াছিল, সেই গল্প সুন্দরীর নিকটে শুনিতে  
সত্যবতী বড় ব্যস্তা আছে, এই হেতু আমি তখন বিদায় হইলাম।

## দশম অধ্যায়।

সুন্দরীর সহিত প্রথমবার সাক্ষাৎ হইলে পর আমি অনেকবার তাহার দেখা পাইতাম। কখন আমি তাহার গৃহে যাইতাম, কখন বা সে আমার বাটীতে আসিয়া আমার আয়াকে মোজা বুনিতে শিক্ষা দিত। এমত সময়ে তাহার সহিত আমার বিস্তর কথা হওয়াতে ধর্মের বিষয়ে তাহার জ্ঞান ও বুদ্ধি দেখিয়া আমি বড় চমৎকৃত হইলাম, তাঁহাতে যখন তাহার কলিকাতায় যাইবার সময় সন্নিকট হইল, তখন আমি অতিশয় দুঃখিত হইলাম। ডাক্তর সাহেবের মেম সুন্দরীকে যে বেতন দিতেন, আমি তাহার দ্বিগুণ বেতন দিয়া তাহাকে আপনার নিকটে রাখিতে বড় সন্তুষ্ট হইতাম, কিন্তু তাহার পুরাতন কঢ়ীর প্রতি এমত অন্যায় করিতে পারিলাম না; এবং বোধ হয় সুন্দরীও তাঁহাকে কখন ছাড়িত না, কেননা তাহার মনে অকৃতজ্ঞতার লেশমাত্র ছিল না। সুন্দরীর কঢ়ী বড় জ্ঞানী ও ধার্মিকা বিবি ছিলেন, এবং ঐ নগরে আমার ইংরাজ বন্ধু অল্প থাকাতে তিনি যত দিন আমাদের নিকটে বাস করিলেন, তত দিন আমি অনেকবার পাদরী সাহেবের গৃহে গিয়া তাঁহার সহিত আলাপ করিতাম।

এক দিবস আমি এই রূপে তাঁহাদের গৃহে যাওয়াতে পাদরী সাহেব আমাকে দেখিবামাত্র কহিলেন, বিবি সাহেব, আপনকার

সুখশালা<sup>১</sup> নিবাসি বন্দুরা কিছু দুঃখিত আছে, তাহাদের কন্যা সুন্দরী তাহাদিগকে বড় লেটায় ফেলিয়াছে।

আমি সাহেবের হাস্যমুখ দেখিয়া জানিলাম, যে ফুলমণির পরিবারের কোন ভারি দুর্ঘটনা হয় নাই; তথাপি আমি চমৎকৃত হইয়া বলিলাম, মহাশয়, সুন্দরী যে আপন পিতা মাতাকে ঝঁঝাটে ফেলিয়াছে, ইহা নিতান্ত অসম্ভব কথা।

সাহেব উত্তর করিলেন, ও! তাহার বিবাহের বিষয়ে একটি গোল উপস্থিত হইয়াছে। আমাদের যুবতী কন্যাগণ যেরূপ কখন ২ বোধ করে আমরা বিবাহের বিষয় পিতা মাতা অপেক্ষা ভাল জানি, সুন্দরীও সেইরূপ বুঝিয়া প্রেমচাঁদ ও ফুলমণি তাহার নিমিত্তে যে বরকে মনোনীত করিয়াছে, তাঁহাকে সে কোনরূপে বিবাহ করিতে চাহে না। কিন্তু এই সকল ব্রহ্মান্ত প্রথম অবধি আপনাকে না বলিলে আপনি কিছু বুঝিতে পারিবেন না, অতএব শুনুন। গত বুধবারে একজন সুশ্রী যুব বাবু বিবাহার্থে কন্যা অঙ্গৰণ করিতে কলিকাতা হইতে এই স্থানে আসিয়াছিলেন। তিনি আপন পাদরী সাহেবের নিকট হইতে একখান অনুরোধ পত্র আনিয়াছিলেন, তাহাতে লেখা আছে, এই যুব পুরুষ পূর্বে ব্রাক্ষণ ছিলেন, কিন্তু তিন বৎসর হইল তিনি শ্রীষ্ট ধর্ম গ্রহণ করিয়া আছেন, সে অবধি বড় সদ্যবহার পূর্বক চলিতেছেন। তিনি ইংরাজ স্কুলের প্রধান শিক্ষক, এবং মাসে ২ পঁচিশ টাকা বেতন পান এই অনুরোধ পত্র পড়িয়া আমি আপন ভগিনীর প্রতি ফিরিয়া বলিলাম ও লুসি! এই ব্যক্তি বুঝি সুন্দরীর যোগ্যপাত্র হইবে, তুমি কি তাহাকে ছাড়িয়া দিতে সম্মতা

---

১ ফুলমণির ঘর সুখশালা নামে বিখ্যাত ছিল।

হও? তিনি বলিলেন, যাহাতে সুন্দরীর মঙ্গল হইবে আমি তাহা করিতে অবশ্য সম্মতা আছি। ইহা শুনিয়া আমি প্রেমচাঁদ ও ফুলমণিকে ডাকাইয়া ঐ যুব পুরুষ যে অনুরোধ পত্র আনিয়াছিল, তাহার অর্থ তাহাদিগকে জানাইলাম। পরে তিনি আসিলে তাহারা অনেকক্ষণ পর্যন্ত তাঁহার সহিত বিশেষরূপে ধর্মের বিষয়ে কথোপকথন করিয়া দেখিল, তিনি প্রভুর সত্য শিষ্য বটে; তথাপি প্রেমচাঁদ আমাকে বলিল, পাদরী সাহেব তাঁহার ধর্মের বিষয়ে পত্রেতে কি লিখিয়াছেন, তাহা অনুগ্রহ করিয়া পুনর্বার পড়ুন। তখন আমি সেই পত্রে পড়িলাম, যথা; ‘আমি দৃঢ় বিশ্বাস করিতেছি যে এই যুব পুরুষ নিতান্ত যীশুখ্রীষ্টের একজন মনোনীত পাত্র; ইহার একটি প্রত্যক্ষ প্রমাণ আছে, অর্থাৎ তিনি পরের পরিত্রাণের বিষয়ে অতিশয় চেষ্টান্বিত হন।’ প্রেমচাঁদ ও ফুলমণি ইহা শুনিয়া বড় আহ্বান্তি হইল, কারণ তাহারা অনেক দিন অবধি সুন্দরীর নিমিত্তে একজন ধার্মিক এবং উপযুক্ত বর অন্বেষণ করিতেছে। পরে আমার পরামর্শানুসারে তাহারা ঐ বাবুকে কল্য তাহাদের গৃহে সুন্দরীকে দেখাইবার কারণ ভোজনের নিমন্ত্রণ করিল। তাহাতে কল্য সন্ধ্যার সময়ে তিনি অত্যুত্তম পরিচ্ছদ পরিধান করিয়া এখান হইতে প্রেমচাঁদের বাটীতে গমন করিলেন। যাইবার পূর্বে আমি তাহাকে সুন্দরীর ধার্মিক চরিত্রের বিষয় জ্ঞাত করিলাম। তিনি কি কারণে প্রেমচাঁদের ঘরে যাইবেন, তাহা ফুলমণি আপন মেয়েকে না জানাইয়া কেবল এই কথা কহিল, যে বাবু কলিকাতা হইতে আসিয়া পাদরী সাহেবের গৃহে রহিয়াছেন, আমরা তাঁহাকে অদ্য নিমন্ত্রণ করিয়াছি। বাবু সেখানে উপস্থিত হইয়া সুন্দরীর সৌন্দর্য দেখিবামাত্র তাহাতে অতিশয় আসক্ত হইয়া ফুলমণিকে কহিলেন, আমি গেলে পর এবিষয়ে তোমার মেয়ের কি ইচ্ছা হয়, তাহা তুমি জিজ্ঞাসা করিও; সে যদি আমাকে

বিবাহ করিতে সম্মতা হয়, তবে আমি সন্তুষ্ট হইয়া এই কর্ম করিব। কিন্তু অদ্য প্রাতঃকালে সুন্দরীর পিতা মাতা তাহাকে সেই কথা জানাইলে সে একেবারে ঐ বাবুকে বিবাহ করিতে অস্বীকার করিয়া আর কোন কারণ না দিয়া কেবল ইহাই কহিল; আমি তাঁহাকে চিনি না এবং তিনিও আমার মনকে জানেন না, অতএব বিবাহ করিলে পশ্চাতে আমাদের সুখ কি দুঃখ হইবে তাহা নিশ্চয় নাই। ফুলমণি এমত কথা বুঝিতে না পারিয়া বলে, আমি তো বিবাহের পূর্বে সুন্দরীর পিতাকে চিনিতাম না, তবে আমার কেন এত সুখ হইয়াছে? সকলে যাহাকে ধার্মিক বলে এমত স্বামীকে পাইলে হয়, তাহাকে চিনিবার কোন আবশ্যক নাই।

তখন আমি পাদরী সাহেবকে কহিলাম, বোধ হয়, এবার আমাদের বন্ধু ফুলমণি বড় ভালুকপে বিবেচনা করে নাই; আপনি কি বুঝোন, মহাশয়?

পাদরী সাহেব বলিলেন, মেম সাহেব, ইংরাজদের মধ্যে ধর্মাভিন্ন স্ত্রী ও স্বামীতে আর অনেক গুণ অঙ্গেষণ করা যায় বটে। যে স্ত্রী পুরুষের মনের রূচি ও স্বভাব ও বাঞ্ছা এবং রীতি সকল এক হয়, সেই স্ত্রী পুরুষ অবশ্য অন্যদের অপেক্ষা সুখে কাল যাপন করিয়া থাকে, এবং বিবাহ করিতে গেলে এমত ঐক্যতা আমাদের অঙ্গেষণ করা উচিত বটে। কিন্তু বিবেচনা করিয়া দেখুন, বাঙালি মেয়েরা ইংরাজদের মত বিবাহের পূর্বে পুরুষদের সহিত আলাপ করিতে পায় না, এবং আলাপ না করিলে তাহাদের মনের ভাব কেমন তাহা তাহারা কি প্রকারে জ্ঞাত হইতে পারিবে? এই জন্যে বলি, যে পর্যন্ত বাঙালি মেয়েরা আপনাদের স্বামীকে আপনারা মনোনীত করিতে না পারে, সেই পর্যন্ত তাহারা

বিবাহের বিষয়ে স্ব ২ পিতা মাতাদের ও মণ্ডলীর অধ্যক্ষগণের  
পরামর্শানুসারে চলুক।

আমি বলিলাম, হাঁ মহাশয়, একথা সত্য হইতে পারে বটে,  
তথাপি আমি স্বীকার করিতেছি, যে এই দেশীয় মেয়েরা যখন  
বিবাহের বিষয়ে কিঞ্চিৎ স্বাধীনতা প্রকাশ করিতে আরম্ভ করিবে,  
তখন আমি বড় আহ্বানিতা হইব; কিন্তু সে যাহা হউক, উক্ত বিষয়  
কিছু স্থির হইয়াছে কি না?

পাদরী সাহেব উত্তর করিলেন, মেম সাহেব, সন্ধ্যাকালে  
ফুলমণি আপন মেয়েকে লইয়া এখানে আসিবে, তখন বোধ হয়  
এবিষয়ে কিছু স্থির করিতে পারিব। ফুলমণির অভিলাষ এই যে  
আমি সুন্দরীকে বুঝাইয়া কেন্দ্ৰপে সম্মত কৱাই; কিন্তু আমি তাহা  
কখন করিব না, কেননা বিবাহের কথাবার্তাতে হাত দেওয়া বড়  
কঠিন বিষয়। যাহা হউক, সুন্দরী কি জন্যে এই ব্যক্তিতে সম্মতা  
হয় না, তাহা আমি তাহাকে জিজ্ঞাসা করিব; বোধ হয় তাহার মনে  
কোন বিশেষ কারণ থাকিবে।

পরে এই বিষয়ে কি হইবে, তাহা শুনিতে অতিশয় ইচ্ছুক  
হইয়া আমি ফুলমণির অপেক্ষায় পাদরী সাহেবের বাটীতে  
রহিলাম।

প্রায় এক ঘণ্টা গত হইলে ফুলমণি সুন্দরীকে লইয়া আইল।  
অন্য বিষয়ের কিছু কথাবার্তা হইলে পর সাহেব সুন্দরীকে  
কহিলেন, দেখ সুন্দরী, তুমি এই বাবুকে বিবাহ করিতে অসম্মতা  
হইয়া আপন মাতাকে বলিয়াছ, যে আমি তাঁহাকে চিনি না। ভাল,  
তুমি কিছু দিন তাঁহার সহিত আলাপ করিয়া পরে এবিষয়ে যথার্থ

উত্তর দিও। কিন্তু ইহা যদি করিতে না চাহ, তবে তুমি কি নিমিত্তে  
তাঁহাকে বিবাহ করিবা না, তাহা সত্য করিয়া আমাকে বল।

বাবুর সহিত যে আলাপ হয়, সুন্দরীর এমত ইচ্ছা ছিল না;  
বরং সে মাথা হেট করিয়া কহিল, মহাশয়! আপনি যদি এমত  
স্পষ্টরূপে জিজ্ঞাসা করেন, তবে আমাকে বলিতে হইল। এ  
ব্যক্তিকে যে বিবাহ করিতে চাহি না আমার মনে ইহার একটি  
বিশেষ কারণ আছে বটে; কিন্তু তাহা প্রকাশ করিলে আমি  
স্বদেশীয় লোকদের নিকট অবশ্য নিন্দিতা হইব, তথাচ আমি  
নিশ্চয় জানি যে এ বিষয়েতে আমার কোন দোষ নাই।

এই কথা শুনিয়া ফুলমণি কহিল, সুন্দরী তোমার মনে যাহা  
আছে তাহা নির্ভর্যে বল। তুমি যদি ঈশ্বরের ব্যবস্থার বিরুদ্ধে কোন  
কর্ম না করিয়া থাক, তবে তোমার পিতা মাতা তোমাকে কখন  
দোষ দিবে না; অন্য লোকেরা যাহা বলে বলুক, তাহাতে তোমার  
কিছু আইসে যায় না।

আমি কহিলাম, সুন্দরী একথা সত্য, তোমার পিতা মাতার  
নিকটে কোন কথা গোপন রাখা বিহিত নয়; অতএব তুমি এ  
ব্যক্তিকে কেন বিবাহ করিতে চাহ না, ইহার কারণ স্পষ্ট করিয়া  
বল।

সুন্দরী অধোদৃষ্টি করিয়া কহিল, তাহার কারণ এই, আমি অন্য  
একজনকে প্রেম করিতেছি। আমার মেম তাঁহাকে চিনেন, সে যুবা  
তাঁহার বৃন্দ মালির পুত্র।

ডাক্তার সাহেবের বিবি একথা শুনিয়া কহিলেন, আহা! আমি কতবার মনে করিয়াছি যে চন্দ্রকান্ত সুন্দরীর উপযুক্ত স্বামী হইত বটে কিন্তু ডাক্তার কহিতেন আর দুই তিন বৎসর পর্যন্ত চন্দ্রকান্তকে শিক্ষা করিতে হইবে, তাহার পর সে কোন লাভজনক পদে নিযুক্ত হইতে পারিবে। ইহা শুনিয়া আমি ভাবিতাম, সুন্দরীর বয়ঃক্রম এখন প্রায় পোনের বৎসর হইয়াছে, অতএব তাহার পিতা মাতা তাহাকে বিবাহ না দিয়া আর দুই তিন বৎসর কখন রাখিবে না।

আমি জিজ্ঞাসিলাম, মেম সাহেব, এই চন্দ্রকান্ত কি প্রকার লোক? বিবি উভর করিলেন, সে আমাদের মালির পুত্র বটে, ও তাহার সহিত থাকিয়া প্রথমতঃ বাগানের কর্ম শিখিত, কিন্তু এখন সে আপন পিতা অপেক্ষা বড় জ্ঞানী হইয়া উঠিয়াছে। বৎসর তিনিক হইল, আমার স্বামী ছবিযুক্ত একখান ইংরাজি পুস্প বৃত্তান্ত পুস্তক বৃন্দ মালীকে দিয়া কহিয়াছিলেন, শুন মালী, যে সকল বিলাতীয় ফুল এদেশে জন্মিতে পারে তাহা আমি আপন বাগানে আনিয়া রাখিতে ইচ্ছা করি। অতএব তুমি এই সকল ফুলের ছবি ভাল করিয়া দেখ; পরে ইহার মধ্যে যত ফুল এদেশীয় ফুলের সমান হয়, তাহা আমাকে বলিও। চন্দ্রকান্ত সর্বদা নানা প্রকার বৃক্ষের নামাদি ও বিশেষ ২ গুণ তত্ত্ব করিত, তাহাতে ঐ পুস্তক পাইয়া সে ঘরে বসিয়া পুস্পের ছবি সকল আপনা আপনি তুলিতে লাগিল, পরে সাহেবের কাছে আনিয়া দেখাইল। সাহেব তাহা দেখিয়া আশ্চর্য জ্ঞান করিলেন, কারণ ঐ বালক নকসা তুলিতে কখন কিছু শিক্ষা পায় নাই, আর সে কেবল নীল ও আলতা দিয়া ঐ সকল ছবি লিখিয়াছিল, তথাপি সে দেখিতে মন্দ হয় নাই। ইহাতে সাহেব সন্তুষ্ট হইয়া চন্দ্রকান্তকে উদ্ধিদ্বিদ্যা শিক্ষা করাইতে মনস্ত করিলেন। চন্দ্রকান্ত স্বভাবতঃ অতি গুণশীল ব্যক্তি। সে প্রথমে সপ্তাহের মধ্যে দুইবার আমার স্বামীর নিকটে গিয়া

উদ্ভিদিদ্যা এবং নকসার বিদ্যা শিক্ষা করিত; পরে ডাক্তর সাহেবদের গৃহে যে প্রকার ছবি থাকে, (অর্থাৎ মানুষের অঙ্গ ও কলিজা ইত্যাদির ছবি) তাহা দেখিয়া চন্দ্রকান্ত আপনা আপনি সেইরূপ ছবি তুলিতে লাগিল, এবং মনুষ্যের শরীরের মধ্যে কি ২ আছে, তাহা ও শিক্ষা করিত। সাহেব তাহার এই প্রকার অনুশীলন দেখিয়া তাহাকে ডাক্তরের কর্ম শিখাইতে আরম্ভ করিলেন, তাহাতে সে ঐ বিদ্যাতে এমত নিপুণ হইয়া উঠিয়াছে, যে সাহেব অনুমান করেন দুই তিন বৎসরের মধ্যে সে কোম্পানির কোন ডাক্তরখানায় প্রধান চিকিৎসক হইয়া মাসে ২ দেড়শত টাকা উপার্জন করিতে পারিবে। চন্দ্রকান্ত বিদ্যাতে নিপুণ তাহা কেবল নয়, ধর্মের বিষয়েও তাহার বড় অনুরাগ আছে, এবং সে আপন বৃন্দ পিতা মাতার প্রতি অতিশয় প্রেম ও ভক্তি করে।

পরে বিবি সুন্দরীর প্রতি ফিরিয়া বলিলেন, সে যাহা হউক, সুন্দরী, চন্দ্রকান্তের সদগুণের বিষয় তুমি কি প্রকারে জ্ঞাত হইলা, ইহা আমি বুঝিতে পারিলাম না; কারণ আমি তোমার সাক্ষাতে তাহার প্রশংসা কখন করি নাই, এবং তাহার সহিত কথোপকথন করিতে তোমাকে নিষেধ করিয়াছি। অতএব তাহার প্রতি তোমার প্রেম কি প্রকারে জন্মিল, তাহা তুমি বল।

সুন্দরী কহিল, মেম সাহেব, আমি তাঁহার সহিত কথোপকথন কখন করি নাই, কিন্তু তাঁহার মাতা আমাকে অনেকবার বলিয়াছে, যে আমার পুত্র তোমা বিনা আর কাহাকেও বিবাহ করিবে না; এবং তাহার এই ইচ্ছা ছিল, যেন আমি প্রতিজ্ঞা করি, তিন বৎসর পরে চন্দ্রকান্তকে বিবাহ করিব। কিন্তু আমি কহিলাম, পিতা মাতাকে জিজ্ঞাসা না করিলে কোন প্রতিজ্ঞা করিব না। আমি কলিকাতায় ফিরিয়া যাওনের অগ্রে মাকে এই কথা বলিতে মানস

করিয়াছিলাম, কিন্তু এতদিন ভয় প্রযুক্তি বলিতে পারি নাই, পাছে তিনি বলেন, তোমার বিবাহ দিতে আমরা এত বিলম্ব করিব না।

পাদরী সাহেবে ইহা শুনিয়া কহিলেন, তবে সুন্দরী, তোমার নিজ কথাদ্বারা জানা যাইতেছে যে তুমি এই বাবু অপেক্ষা চন্দ্রকান্তকে ভালুকপে চিন না।

সুন্দরী কহিল, না মহাশয়, এমত নয়। আমি চন্দ্রকান্তকে প্রত্যহ দেখি, ও তাঁহার পিতা মাতার প্রতি তাঁহার প্রেমিক ব্যবহার জানি; এবং ধর্মের বিষয়ে তাঁহার যেরূপ অনুরাগ আছে, তাহাও আমি জ্ঞাতা আছি, কারণ তিনি প্রতিদিবস সন্ধ্যাকালে তেঁতুল গাছতলায় বসিয়া হিন্দু ও মুসলমান দাসদিগকে ঘীশুঙ্গীষ্টের বিষয় বলিয়া সদুপদেশ দিয়া থাকেন। তিনি কেবল এক বার আমাকে একটি কথা মাত্র বলিয়াছিলেন। যে দিবস মেম সাহেবের ছোট বাবা মরিল, সেই দিবস আমি কবর সিন্দুকের নিকটে দাঁড়াইয়া কাঁদিতেছিলাম, এমত সময়ে চন্দ্রকান্ত ভিতরে আসিয়া এক পার্শ্বে দাঁড়াইয়া মৃদুরবে কহিলেন, সুন্দরী, তুমি কাঁদিও না; ঈশ্বর তোমার ছোট কোমল চারাকে আপন উদ্যানে তুলিয়া লইয়াছেন, যেন সে বৃক্ষি পাইয়া ফুলেতে ও ফলেতে পরিপূর্ণ হয়। আমাদের বাটীর উত্তরে যে বড় বাগান আছে, তাহাতে সাহেব যদি কোন অত্যুত্তম কিঞ্চিৎ কোমল ফুলগাছ দেখেন, তবে তিনি আমার পিতাকে বলেন, মালী, এই চারাটি আমার দক্ষিণদিকস্থ ছোট বাগানে রাখিতে হইবে, তাহাতে আমি আপনি তাহার তত্ত্বাবধারণ করিয়া তাহার সৌরভে আমোদিত হইব। সেই রূপে ঈশ্বর আমাদের ছোট মিসিবাবাকে লইয়া ইহা অপেক্ষা ভাল স্থানে রাখিয়াছেন।

এই কথা শুনিয়া ডাক্তর সাহেবের মেম কহিলেন, আহা! এ কেমন সুন্দর দৃষ্টান্ত! ইহা কহিয়া তাঁহার চক্ষুঃ জলেতে পূর্ণ হইল, কারণ তিনি ইহার আট মাস পূর্বে সেই প্রিয় সন্ততিকে কবরে রাখিয়াছিলেন, তখন ইহা তাঁহার মনে পড়িল।

সুন্দরী কহিল, হাঁ মেম সাহেব, ঐ দৃষ্টান্ত অতি সুন্দর বটে। আমি সেই দিন অবধি চন্দ্রকান্তকে পূর্বাপেক্ষা ভাল বোধ করিলাম; আর ঐ কথা শুনিবামাত্র আমার প্রিয় মাতাকে স্মরণ হইল, কারণ তিনি সর্বদা আপন ফুলগাছের সহিত পারমার্থিক বিষয়ের তুলনা দিয়া থাকেন।

তখন পাদরী সাহেব জিজ্ঞাসিলেন, ফুলমণি, তুমি এবিষয় শুনিলা, এখন কি বল?

ফুলমণি উত্তর করিল, মহাশয়, আমার মেয়ে যদি দুই তিন বৎসর পর্যন্ত এমত ধার্মিক স্বামীর অপেক্ষাতে থাকে, তবে তাহাতে আমি সম্মতা আছি। কিন্তু তখন সুন্দরীর আঠারো বৎসর হইবে, অতএব চন্দ্রকান্তের সহিত তাহার বিবাহের বিষয় সকল যদি স্থির করিয়া রাখা যায়, তবে কিছু বিলম্ব হইলে ক্ষতি নাই।

ডাক্তর সাহেবের বিবি কহিলেন, দেখ ফুলমণি, তোমার মেয়ে আপনি বলিতেছে যে চন্দ্রকান্ত তাহাকে বিবাহ করিতে চাহে; এমত যদি হয়, তবে আমি তোমার সাক্ষাতে বলিয়া যাইতেছি, আমি ঘরে পৌঁছিবা মাত্র চন্দ্রকান্ত ও তাহার পিতা মাতার সহিত এবিষয় স্থির করিব; এবং ঐ যুব পুরুষের বিষয় আমি সাহসপূর্বক বলিতে পারি, সে যদি বাঁচিয়া থাকে, তবে যাহা অঙ্গীকার করিবে তাহা সাধ্য পর্যন্ত সিদ্ধ করিবে।

তখন সুন্দরী প্রফুল্ল বদন হইয়া ফুলমণিকে কহিল, দেখ মা, এবিষয়েও বিবেচনা করিও, যুবতী স্ত্রীলোকেরা আপন শৃঙ্গের শাঙ্গড়ী কর্তৃক অনেকবার বিরঙ্গা হয়, কারণ তাহারা বধুর প্রতি প্রায় ত্রুর ব্যবহার করিয়া থাকে; কিন্তু চন্দ্রকান্তের পিতা মাতা ধার্মিক লোক, এবং যে অবধি আমি কলিকাতায় গিয়াছিলাম, সেই অবধি তাঁহারা আমার প্রতি অতিশয় প্রেমিক ব্যবহার করিয়াছেন, অতএব তাঁহারা পশ্চাতে যে আমাকে দুঃখ দিবেন, এমত কখন বোধ হয় না। ও মা! কলিকাতার বাবু অপেক্ষা চন্দ্রকান্তকে বিবাহ করা ভাল, ইহার আর একটি কারণ দেখাইতে পারি; ঐ বাবু কেবল আমার মুখ দেখিয়া আমাকে বিবাহ করিতে চাহেন, কিন্তু ইহা করা বিহিত নয়, কারণ এ এক প্রকার স্ত্রীর নিমিত্তে গুলিবাট করা হইল। গুলিতে ভাল কি মন্দ স্ত্রী উঠিবে তাহা তো জানা যায় না, অতএব কন্যাদের মনের গুণ সকল তত্ত্ব করিয়া পরে তাহাদিগকে বিবাহ করিলে ভাল হয়। দেখ, মালীর পুত্র এমত করিয়াছে; এক বৎসর পর্যন্ত প্রত্যহ তিনি আমার ব্যবহার দেখিয়া আমাকে বিবাহ করিতে ইচ্ছা করিয়াছেন। এখন আমি ভাল হই কি মন্দ হই তাহা যদি জানিয়া বিবাহ করেন, তবে পশ্চাতে তাঁহার আশা ভঙ্গ হইবে না।

এই কথা শুনিয়া আমরা সকলে কহিলাম, সুন্দরী, তুমি এ বিষয় উত্তমরূপে বিবেচনা করিয়াছ। পরে ফুলমণি আপন মেয়েকে সঙ্গে করিয়া বিদায় লইল।

তাহারা প্রস্থান করিলে পর আমি পাদরী সাহেবকে জিজ্ঞাসা করিলাম, মহাশয়, আপনি কি সুন্দরীকে দোষ দিতে পারেন? তিনি বলিলেন, না, তাহাকে দোষ দেওয়া যায় না, কারণ সে অকপট রূপে সাধু ব্যবহার করিয়াছে। বঙ্গদেশস্থ সকল শ্রীষ্টিয়ান

মেয়েরা যদি সুন্দরীর ন্যায় হইত, তবে তাহারা প্রায় ইংরাজদের  
মত বিবাহের পূর্বে আপনাদের স্বামীদিগকে মনোনীত করিয়া  
লইতে পারিত।

ডাক্তর সাহেবের বিবি কহিলেন, আহা! আমি কেমন আহ্বাদিত  
হইলাম, যে ঐ প্রিয়া কন্যা আমার নিকটে নিত্য থাকিতে পারিবে।  
চন্দ্রকান্তের সহিত তাহার বিবাহ হইলে পর আমি আপন বাটীর  
সীমার মধ্যে তাহাদের জন্যে এক খান ঘর বাঁধাইয়া সর্বদা  
তাহাদিগকে সেই খানে রাখিব।

পরে পাদরী সাহেবে পুনর্বার বলিলেন, ভাল, এখন দেখিতেছি  
যে সকলে আহ্বাদিত হইয়াছে, কেবল আমার যুব বন্ধুর বিষয়ে  
কেহ কিছু মনোযোগ করে নাই। তিনি স্ত্রী খুজিতে এত দূর  
আসিয়াছেন, এখন আমি কি বলিয়া তাঁহাকে রিক্ত হস্তে ফিরাইয়া  
দিব?

আমি কহিলাম, মহাশয়, আমি ইহার একটি উপায় দেখাইতে  
পারি। যদি সে বাবু বিধবা স্ত্রীকে বিবাহ করিতে সম্মত হন, তবে  
রাণীকে বিবাহ করুন, সুন্দরী ছাড়া তেমন মেয়ে আর কোন স্থানে  
পাইবেন না।

পাদরী সাহেব ঐ কথাতে বড় সন্তুষ্ট হইয়া কহিলেন, হাঁ মেম  
সাহেব, আপনি ভাল বলিয়াছেন। রাণীর বিষয় এতক্ষণ স্মরণ হয়  
নাই, সে বাবুর পক্ষে উত্তম স্ত্রী হইবে বটে, কারণ রাণী জ্ঞানী  
মেয়ে, এবং এখন দেখিতেছি যে সে সম্পূর্ণরূপে খীঁষ্টের লোক  
হইয়াছে। তাহার পূর্ব স্বামীর মৃত্যু ও দুষ্টতা প্রযুক্ত সে তাহার  
সহিত সুখে বাস করিতে পারিত না বটে; কিন্তু যদ্যপি উপযুক্ত

স্বামীকে পাইত, তবে ঐ সকল গোলমাল কখন হইত না। বোধ হয়, যদি বাবু তাহাকে বিবাহ করেন, তবে তাঁহারা উভয়ে বড় সুখে কাল যাপন করিবেন।

অতঃপর রাণীর বিষয় বাবুকে জ্ঞাত করা গেল, তাহাতে তিনি দুই তিন বার তাহার সহিত কথোপকথন করিয়া তাহাকে বিবাহ করিতে ইচ্ছা প্রকাশ করিলেন; এবং রাণীও তাহাতে আহ্লাদ পূর্বক সম্মতা হইল, কারণ তাহার দৃষ্টা শাশুড়ী তাহাকে বড় ক্লেশ দিত। বাবুর আগমনের প্রায় এক মাস পরে রাণীর সহিত তাহার বিবাহের কথা গীর্জা ঘরে তিনি রবিবার পর্যন্ত প্রচার হইলে কেহ তাহাতে বাধা না দেওয়াতে, আগত বৃহস্পতিবারে তাহাদিগের বিবাহ দিতে স্থির করা গেল। কেবল এক বিষয়ে একটি গোল উপস্থিত হইল। রাণী আপনার ছেট মেয়ে সুমতিকে সঙ্গে লইয়া কলিকাতায় যাইতে চাহিল, কিন্তু ঐ মেয়ের পিতা মধু মৃত্যুকালে বলিয়া গিয়াছিল, যে আমার ছেল্যাকে এস্থানের পাদরী সাহেবের মেমের স্কুলে দিও; এবং রাণীর শাশুড়ী বড় রাগ প্রকাশ করিয়া কহিল, ঐ মেয়ে আমার, তুমি তাহাকে কখন লইয়া যাইতে পারিবা না। রাণী ইহাতে অতিশয় দুঃখিতা হইয়া কাঁদিতে লাগিল।

তখন ফুলমণি বলিল, মধু আমাকে আপনার সন্তানের ভার দিয়া ইহা কহিল, সে যেন ধর্মের বিষয় শিক্ষা পায় এই জন্যে তাহাকে পাদরী সাহেবের মেমের স্কুলে দিও; ইহাতে স্পষ্ট বোধ হয় যে মধুর কেবল এই বাঞ্ছা ছিল, যেন আমার ছেল্যা ধার্মিক হয়। অতএব সুমতি কাহার নিকটে থাকে কিন্তু কোন্ স্কুলে যায়, ইহা অতিক্ষুদ্র বিষয়, মেয়েটি ধার্মিকা হইলে হয়। আমি বোধ করি, ইহাই সাধন করণার্থে তাহাকে আপন মাতার কাছে রাখিলে ভাল হয়, কেননা যে সময়ে মধু মরিল, সে সময়ে রাণী ধর্মের

বিষয়ে বড় একটা মনোযোগ করিত না; কিন্তু এখন সে ধর্মকে  
অতিশয় প্রিয়জ্ঞান করে, অতএব সে আপন মেয়াকে সুপথে  
লওয়াতে অবশ্য চেষ্টা করিবে।

ফুলমণির এই কথাতে আমরা সকলে সম্মত হইলে ইহা স্থির  
হইল যে ছোট সুমতি আপন মায়ের সহিত কলিকাতায় যাইবে।  
রাণীর শাশুড়ী ইহাতে বড় রাগান্বিতা হইল, কিন্তু তাহার সান্ত্বনার্থে  
রাণী আপন পূর্ব স্বামীর ঘর জমী ইত্যাদি যাহা ছিল, সকলি  
তাহাকে দিয়া কহিল, ওগো! যতদিন তুমি বাঁচিয়া থাক ততদিন  
তুমি জমী আদির খাজনা ভোগ করিও; এবং যখন মরিবা তখন  
তোমার নাতনীকে সকলি দিয়া যাইও; আমি ঐ ধনের লেশ মাত্র  
স্পর্শ করিব না। রাণীর এই সুশীল ব্যবহার প্রযুক্ত তাহার শাশুড়ীর  
যাবজ্জীবন কোন দ্রব্যের অভাব ছিল না।

পাঠকবর্গেরা অনেকক্ষণ পর্যন্ত আমার আয়ার বিষয়ে কিছু  
কথা শ্রবণ করেন নাই, কিন্তু এখন লিখিতে হইল, আয়া অনেক  
কাল ধার্মিক আচরণ করিয়া সম্প্রতি বাপটাইজ<sup>2</sup> হইতে অতিশয়  
ইচ্ছুক হইল। তাহাতে পাদরী সাহেব স্থির করিলেন, যে দিবসে  
রাণীর বিবাহ দেওয়া যাইবে, সেই দিবসে আয়া বাপটাইজিতা  
হবে।

আহা! ঐ দিবস আমার পক্ষে কেমন আনন্দের দিন হইল;  
কেবল আমার পক্ষে হইল তাহা নয়, বরং সমুদয় খ্রীষ্টিয়ান পাড়ার  
লোক সকল সেই দিনে উল্লাসিত হইল।

---

<sup>2</sup> বাপটাইজ। কেহ ২ বলে, এই শব্দের অর্থ অবগাহন; আর কেহ ২ বলে,  
তাহার অর্থ জলছিটান বা স্নান।

রাণীর পিতা মাতা না থাকাতে আমি তাহার জন্যে বিবাহের ভোজ প্রস্তুত করিতে চাহিয়া পাদরী সাহেবকে জিজ্ঞাসিলাম, মহাশয়, আপনার মণ্ডলীর লোকেরা যদি সেই দিবসে কিঞ্চিৎও উৎসব করে, তবে আপনি কি তাহাতে অসন্তুষ্ট হইবেন? তিনি কহিলেন, না, আমি অসন্তুষ্ট হইব কেন? আমাদের প্রভু আপনি বিবাহের ভোজে উপস্থিত হইয়া তাহা সন্তুষ্ট করিলেন। অতএব আপনি আমার লোকদের জন্যে যদি ভোজ প্রস্তুত করেন, তবে ভাল; আমিও তাহাদের আমোদ দেখিয়া আমোদিত হইব। কিন্তু যাহারা অতিশয় দরিদ্র কিম্বা যাহারা ঋগে বন্ধ আছে, এমত ব্যক্তিরা যদি বিবাহের সময়ে অন্যের টাকা লইয়া উৎসব করে, কিম্বা স্ত্রীর নিমিত্তে গহনা ক্রয় করে, তবে আমি তাহাদের ব্যবহারে অসন্তুষ্ট হই বটে।

এই কথা শুনিয়া আমি প্রেমচাঁদকে টাকা দিয়া তাবৎ আবশ্যক দ্রব্যসামগ্ৰী ক্রয় করিতে বলিলাম। পরে বিবাহের দিন উপস্থিত হইলে পাড়ার মধ্যে কোন পরিষ্কার স্থানে একটি বৃহৎ লাল ও শাদা কাপড়ের চন্দ্ৰাতপ টাঙ্গান গেল, এবং ভূমিতে বিছাইবার জন্যে আমি কএকটি শপ পাঠাইয়া দিলাম। ফুলমণির সন্তানেরা ছোট নবীনকে সঙ্গে করিয়া সুদৃশ্য ফুল ও পাতার হার গাঁথিয়া ঐ চন্দ্ৰাতপের চতুর্পার্শ্বে টাঙ্গাইয়া দিল। নবীনের বিষয়ে এ স্থানে বলিতে হয়, যদ্যপি সে লেখা পড়াতে বড় নিপুণ ছিলনা, তথাপি ক্রমে ২ অত্যুত্তম বালক হইয়া খানসামার কর্ম উত্তম রূপে শিখিয়াছিল। ফুলমণি এবং আর চারি জন স্ত্রীলোক বিবাহে না গিয়া ভোর অবধি ঐ ভোজ প্রস্তুত করিতে লাগিল। এগার ঘণ্টা হইলে আমি আয়াকে আপন গাড়ীতে লইয়া রাণীকে গীর্জায় লইবার নিমিত্তে খ্ৰীষ্টিয়ান পাড়াতে গেলাম। রাণী অতি সুন্দর গোলাপি রঙের একখানা রেসমের শাড়ি পরিয়া প্রস্তুত হইয়া

আমার অপেক্ষায় ফুলমণির ঘরে বসিয়াছিল; তাহাতে আমার গাড়ী দেখিবামাত্র সে প্রফুল্ল বদন হইয়া বাহিরে আইল। রাণী যদ্যপি সুন্দরীর সমান রূপবতী ছিলনা, তথাপি সে দিবসে যাহারা তাহাকে দেখিল, সকলে অতি সুরূপা বলিয়া সর্ব প্রকারে তাহার প্রশংসা করিল। আমার বিশ্বস্তা আয়া প্রায় তাবৎ পথ কাঁদিতে ২ গেল; কিন্তু ঐ অশ্রুপাত দুঃখপ্রযুক্ত নয়, কেবল ঈশ্বরের প্রতি কৃতজ্ঞতাদ্বারা হইল। সে একবার আপনা আপনি উচ্চেঃস্বরে বলিল, হে পরমেশ্বর! দীনহীন পাপিষ্ঠা যে আমি, আমার প্রতি তুমি কেমন দয়া প্রকাশ করিয়াছ; এবং যাইতে ২ সে আর দুই তিন বার কহিল, হে পিতঃ, তোমার ধন্যবাদ করি!

পরে আমরা গীর্জায় উপস্থিতা হইয়া দেখিলাম, পাদরী সাহেব বরকে লইয়া আমাদের অপেক্ষায় বসিয়া আছেন, অতএব তিনি প্রথমে আয়াকে বাপটাইজ করিয়া পরে রাণীর বিবাহ দিলেন। বিবাহ হইলে পর আমরা পুনরায় সকলে খ্রীষ্টিয়ান পাড়ায় ফিরিয়া গেলাম। বিবাহের ভোজ প্রস্তুত হইবামাত্র পাড়ার তাবৎ লোক উক্ত চন্দ্রাতপের নীচে বসিয়া ভোজন করিতে লাগিল। সকল নিমন্ত্রিত লোকদের মুখ প্রফুল্লিত ছিল, এক জনেরও বিষগ্ন বদন দৃশ্য হইল না।

ভোজন সাঙ্গ হইলে লোকেরা বিবাহের গীত গাইল, পরে পাদরী সাহেব গাত্রোথান করিয়া নৃতন খ্রীষ্টিয়ানীর এবং বর কন্যার অনুরোধে ঈশ্বরের স্থানে প্রার্থনা করিলেন। তখন রাণী ও তাহার স্বামী ফুলমণির বাটীতে গমন করিল।

ফুলমণি রাণীর প্রতি মাতাস্বরূপ ব্যবহার করিয়াছিল, এতএব সে এখন তাহাদিগকে রাখিতে চাহিলে তাহারা কলিকাতায়

যাইবার পূর্বে তাহার গৃহে দুই তিন দিন থাকিতে স্থির করিল। রাণীর নিকটে বিদায় হইবার সময়ে আমি তাহাকে একাকিনী কিছু সদুপদেশ দিতে চাহিয়া তাহার সঙ্গে ২ ফুলমণির গৃহে গেলাম। কুঠরীর মধ্যে আমরা উভয়ে বিস্তর অশ্রুপাত করিলাম; শেষে তাহাকে অনেক প্রেমের কথা কহিয়া আমি বাহিরে আসিয়া শীত্র গাড়ীতে উঠিতেছিলাম, এমন সময়ে করুণা একখানা উত্তম তসর শাড়ি পরিয়া উপস্থিতা হইল।

করুণা আমাকে দেখিয়া বলিতে লাগিল, ও মেম সাহেব, একটু বিলম্ব করিয়া আমার সৌভাগ্যের কথা শুনুন! ও ফুলমণি দেখ, নবীনের বাপ আমাকে এই শাড়ি খানি কিনিয়া দিয়াছে। ইহার মূল্য চারি টাকা, কিন্তু সে টাকা তাহার ধার করিতে হয় নাই, কেননা আমার স্বামী এখন প্রত্যহ কর্মে যাইয়া আট দশ টাকা মাসে উপার্জন করে। অদ্য গীর্জায় যাইবার সময়ে সে এই শাড়ি খানি বাহির করিয়া বলিল, এই লও করুণা, সকলের স্ত্রী অদ্য ভাল কাপড় পরিবে, অতএব তুমি কেন মোটা কাপড় পরিয়া যাইবা? আমার যদি শক্তি থাকিত, তবে আমি তোমাকে দশ টাকার শাড়ি আনিয়া দিতাম, কেননা তুমি তাহার যোগাপাত্র বটে। পরে করুণা আরও উল্লাসিতা হইয়া বলিতে লাগিল, মেম সাহেব, দশ টাকার শাড়ি আমার কি আবশ্যক? তাহার নিকটে যে এমত প্রেমিক কথা শুনিলাম, সেই আমার যথেষ্ট হইল। এবং এই শাড়ি খানি যে মন্দ তাহাও নয়; আমার বিবাহের দিবস অবধি আজি পর্যন্ত আমি রেসমের কাপড় কখন পরি নাই, কিন্তু অদ্য আমার এই সৌভাগ্য হইল।

এই ক্ষুদ্র ঘটনাতে প্রকাশ হইল যে করুণা মৃদু ব্যবহার ও শিষ্ট কথাদ্বারা আপন দুষ্ট স্বামীকে নিতান্ত বশীভূত করিয়াছিল। হে

পাঠকবর্গেরা! তোমাদের মধ্যে কাহারও পতি যদি অশিষ্ট থাকে, তবে সে করণার অনুকারিণী হউক।

ফুলমণি আপন বন্ধুর কথা শুনিয়া আহ্লাদপূর্বক স্বর্গের প্রতি দৃষ্টি করিয়া কহিল, পরমেশ্বরের নাম ধন্য হউক, কারণ তিনিই মনুষ্যদের মনকে পরিবর্ত্তন করেন। আমি আনন্দ প্রযুক্ত কান্দিতে ২ কিছুই বলিতে পারিলাম না, কিন্তু করণার এমত কথা শুনিয়া আমার মন প্রভুর প্রতি কৃতজ্ঞতাতে পরিপূর্ণ হইল। পরে গাড়ীতে আরোহণ করিয়া আমি ঐ দিবসে সকল ঘটনার নিমিত্তে ঈশ্বরের ধন্যবাদ করিতে ২ আপন বাটীতে গেলাম।

উক্ত খ্রীষ্টিয়ান পরিবারগণের সহিত আমার প্রায় আরও দুই বৎসর পর্যন্ত নিত্য ২ আলাপ হইত, কিন্তু তাহার পর আমাকে সপরিবারে সে নগর ছাড়িয়া অন্যস্থানে যাইতে হইল। তাহাতে আমরা পৃথক হইলে পরম্পর দুঃখিত হইলাম বটে, কিন্তু সাংসারিক লোকদের মত বিলাপ করিলাম না; কেননা এই দৃঢ় ভরসা ছিল, যে আমরা পুনর্বার ঈশ্বরের সিংহাসনের সমুখে মিলিত হইয়া অনন্তকাল পর্যন্ত প্রভুর উদ্দেশ্যে স্ব স্তুতির গীত গাইব।

করণা শেষে সত্য খ্রীষ্টিয়ান হইল, কিন্তু সে ধর্মেতে কখন প্রফুল্লিতা হইতে পারিল না; কেননা তাহার জ্যেষ্ঠ পুত্রের মৃত্যু অনেকবার মনে পড়িত, তাহাতে সে কখন ২ ভাবিত, ঈশ্বর আমাকে গ্রাহ্য করিবে না। এমত সময়ে সে কেবল প্রভুর বাক্য পাঠ করিয়া সান্ত্বনা পাইত। ফুলমণি আমাকে বলিয়াছে, করণা কখন ২ পাঁচ সাত ঘণ্টা পর্যন্ত বসিয়া ধর্মপুস্তক পাঠ করিয়া থাকে। অল্প দিন হইল আমি কোন ব্যক্তির প্রমুখাংশ শুনিলাম, যে

সুন্দরী আপন মনোনীত স্বামীকে বিবাহ করিয়া এক্ষণে বড় সুখে কাল যাপন করিতেছে; আর সে ব্যক্তি কহিল, যে সুন্দরীর দুই পুত্র এক কন্যা হইয়াছে, এবং সে আপন মাতার মত তাহাদিগকে ঈশ্বরের বিষয় শিক্ষা দিয়া ধর্ম পথে লওয়াইতেছে।

এক্ষণে পাঠকবর্গের প্রতি আমার একটি নিবেদন আছে। তোমরা যে সকল লোকদের ইতিহাস পড়িয়াছ, তাহারা তোমাদেরই দেশের লোক; তোমাদের ন্যায় তাহারাও পূর্বে হিন্দু ছিল, এবং তোমাদের আচার ব্যবহার ও রীতি মত তাহাদের আচার ব্যবহার ও রীতি ছিল, কিন্তু পশ্চাত তাহারা শ্রীষ্টীয় ধর্ম গ্রহণ করিল। চেষ্টা করিলে তোমরা অনায়াসে ফুলমণির অনুগামী হইতে পার, কেন না সে কোন আশ্র্য কর্ম করিল না; অতএব যে কোন ব্যক্তির মন শ্রীষ্টের প্রতি নিতান্ত আসক্ত আছে, সে অবশ্য তাহার মত সম্ব্যবহার করিতে পারিবে। এই হেতু আমি তোমাদিগকে বিনয় করিয়া বলি, ফুলমণি যেমন শ্রীষ্টের অনুকারী ছিল, তেমনি তোমরাও তাহার অনুকারী হও। সে দরিদ্রের প্রতি কিরূপ দয়া করিত, ও অন্য লোকদের পারমার্থিক মঙ্গল কেমন চেষ্টা করিত তাহা তোমরা বিবেচনা করিয়া তাহার পশ্চাদগামী হও। বিশেষতঃ, হে স্ত্রীগণ! সে যেরূপ আপন স্বামীকে প্রেম করিয়া তাহার গৃহ পরিষ্কার রাখিত, ও সকলের প্রতি সরল আচরণ করিয়া কেবল মিষ্ট বাক্য কহিত, তেমনি তোমরাও করিও। হে মাতাগণ! ফুলমণি যেরূপ আপন সন্তানদিগকে সুশিক্ষা দিয়া তাহাদের নিমিত্তে নিত্য ২ প্রার্থনা করিত, ও তাহাদের সাক্ষাতে সর্বদা সম্ব্যবহার করিত, তেমনি তোমরাও করিও। আর বৃদ্ধা প্যারীর ইতিহাস বিস্মৃতা হইও না। সে নিত্য ২ ধর্মপুস্তক পাঠ ও প্রার্থনা করিত, ইহাতে তোমরা তাহার অনুকারণী হও। মধুর ভয়ানক মৃত্যু স্মরণ করিয়া তোমরা সাবধান ও সতর্ক হইয়া থাক,

কেননা কোনদণ্ডে মৃত্যু আসিবে তাহা তোমরা জান না। আর করণা যে সন্তানকে শিক্ষা দেয় নাই, তাহার মৃতদেহের উপর পড়িয়া সে যে রূপ বিলাপ করিল, তাহাও তোমাদের মনে থাকুক; এবং তোমরা যদি করণার মত দোষী হইয়া এ পর্যন্ত আপন সন্তানদিগকে ধর্মোপদেশ না দিয়া থাক, তবে আমি বিনয় করি, তোমরা এই কৃপথ হইতে শীত্র ফির, এবং করণা যেমন শেষে করিল, তেমনি তোমরাও যীশুখ্রিষ্টের চরণ ধরিয়া তাঁহার সত্য শিষ্য হও। তিনি কহেন, “হে পরিশ্রান্ত ও ভারাক্রান্ত লোক সকল! তোমরা আমার নিকটে আইস আমি তোমাদিগকে বিশ্রাম দিব।”

উক্ত পরামর্শানুসারে যদি চল, তবে এই ক্ষুদ্র পুস্তক রচনা করণ তোমাদের পক্ষে বৃথা হইবে না, এবং রচনা কালে যে সকল প্রার্থনা পাঠকবর্গের নিমিত্তে ঈশ্বরের সিংহাসনের সমুখে করা গিয়াছে, তাহা সফলা হইবে। ইতি।

ফুলমণি ও করণার বৃত্তান্ত সমাপ্ত।

## নামকরণের বিষয়

এই দেশীয় অনেক শ্রীষ্টিয়ানেরা আপন ২ সন্তানগণের নাম রাখিবার সময়ে ভালুকপে বিবেচনা করে না। কেহ ২ সন্তানদিগকে ইংরাজি নাম দিয়া থাকে, কিন্তু বাঙালিরা প্রায় তাহা স্পষ্টরূপে উচ্চারণ করিতে না পারাতে ঐ নাম সকল ইংরাজ ও বাঙালি উভয়ের কর্ণগোচরে হাস্যজনক হয়। আরও দুঃখের বিষয় এই, যে অনেকে নামকরণ সময়ে ঈশ্বরের আজ্ঞার বিষয় অজ্ঞাত হইয়া কিম্বা তাহা তাচ্ছল্য করিয়া শিব, কৃষ্ণ, হরি ইত্যাদি নানা দেবদেবীর নামানুসারে আপন ২ ছেল্যাদের নাম রাখে। দেব পূজকেরা যে তন্মুত করে ইহাতে কোন আশ্র্য্য নাই, কেননা তাহারা আপনাদের দেবদেবীর সুরণার্থে তাহা করে; কিন্তু শ্রীষ্টাশ্রিত লোকেরা ঐ সকলকে মিথ্যা এবং পাপিষ্ঠ জানে, অতএব তাহাদের নাম ঘৃণা পূর্বক ত্যাগ করা কর্তব্য। ইহাতে শাস্ত্রীয় প্রমাণ এই, “তাবদেশীয় লোকেরা আপন ২ দেবগণের নামানুসারে আচরণ করে; আমরাও আপনাদের প্রভু পরমেশ্বরের নামানুসারে এখন ও সদাকালে আচরণ করিব।” মীথা ৩ । ৫ । ঈশ্বর আপন প্রাচীন ভক্তদের প্রতি এমত আজ্ঞা করিয়াছেন, “আমি তোমাদিগকে যাহা ২ কহিলাম, তদ্বিষয়ে সাবধান হও; অন্য দেবগণের নাম সুরণ করাইও না, তোমাদের মুখ হইতেও তাহার উচ্চারণ না হউক।” যাত্রাপুস্তক ২৩ । ২৪ । পুনশ্চ “সৈন্যাধ্যক্ষ পরমেশ্বর কহেন, সেই দিনে আমি দেশ হইতে প্রতিমাগণের নাম লুপ্ত করিব, তাহারা আর সুরণে আসিবে না।” সিখরিয় ১৩ । ২ । অতএব ঐ সকল দেবগণের নাম যাহাতে সুরণে থাকে এবং নিত্য ২ উচ্চারণ হয়, এমত কর্ম্ম সত্য

খ্রীষ্টিয়ানেরা জানিয়া শুনিয়া কদাচ করিবে না; বরং দায়ুদ রাজার ন্যায় মনের মধ্যে স্থির করিবে, “আমি আপন ওষ্ঠাধরে তাহাদের নামও লইব না।” গীত ১৬। ৪।

দেব দেবীর নাম ছাড়া আরও অনেক নাম এদেশে প্রচলিত আছে বটে, কিন্তু নাম করণের সময়ে তাহা সুরণ হয় না, এই জন্যে অনেকে ছেল্যাদের কি নাম রাখা যাইবে তাহা স্থির করিতে না পারিয়া প্রসিদ্ধ দেবদেবীর নামানুসারে কৃষ্ণচন্দ, রামগোপাল, কালীচরণ, ইত্যাদি নাম রাখে। ফলতঃ যে খ্রীষ্টিয়ান লোকেরা ঈশ্বরের আজ্ঞা পালন করিতে চেষ্টা করে, তাহাদের উপকারার্থে পশ্চাত্ লিখিত বালক বালিকাদের নামাবলি প্রস্তুত করা গেল। এবং এই সকল নাম ভিন্ন উত্তম পুষ্প ও বহুপুষ্প ধাতু ও রত্ন এবং সদগুণ ইত্যাদি আদরণীয় বস্ত্রের নাম ব্যবহার করিলে আরও অনেক ২ ভাল নাম এই ২ রূপে অনায়াসে করা যায়। বিশেষতঃ

১. সদগুণের নাম দেওয়া যায়; যথা, প্রেম, দয়া, ক্ষমা, সহ ইত্যাদি।

২. মন্দগুণের বিপরীতার্থক শব্দ; যথা, অভয়, নির্মাল, অমৃত, অক্ষয় ইত্যাদি।

৩. পুষ্পের নাম; যথা, ফুলমণি, চাঁপা, পদু ইত্যাদি।

৪. বহুমূল্য ধাতু এবং রত্নের নাম; যথা, স্বর্ণ, রূপা, মুক্তা, মণি, হীরা ইত্যাদি।

৫. প্রাচীন রাজা ও রাণী ইত্যাদির নাম; যথা, বিরাট, বিক্রম;  
দময়ন্তী ইত্যাদি।

৬. অন্যান্য শব্দের শেষে চন্দ, চাঁদ, কুমার, কান্ত, লাল, নাথ,  
মোহন, আনন্দ, মণি, বতী, ময়ী, লু, ই ইত্যাদি শব্দ যোগ করিলে  
অনেক নাম হয়; যথা, অভয়চন্দ, ধর্মচাঁদ, রাজকুমার, সত্যবতী,  
করুণাময়ী, দয়ালু, নয়নী, কুলানন্দ, অমৃতলাল, চন্দ্রকান্ত,  
প্রিয়নাথ, লালমোহন, নীলমণি, ইত্যাদি।

## নামাবলি।

### ১ বালকদের নাম

অক্ষুরচন্দ্র, অতুলচন্দ্র, অপূর্বলাল, অবিনাশচন্দ্র, অভয়চন্দ্র,  
অমরচন্দ্র, অমৃতলাল, অমৃতানন্দ, অশ্বরনাথ, অক্ষয়লাল, অরূণ,  
আনন্দচন্দ্র, আনন্দচাঁদ, আলাপচাঁদ, আশুতোষ, আশ্রয়চাঁদ,  
উত্তমচন্দ্র, উত্তমচাঁদ, উদয়চন্দ্র, উদয়চাঁদ।

কালাচাঁদ, কিশোর, কীর্তিচন্দ্র, কুঞ্জলাল, কুন্দলাল, কুলানন্দ,  
কুশলচন্দ্র, কৃপানাথ, কৈলাসচন্দ্র, কোমলচন্দ্র।

গগনচাঁদ, গন্ধরাজ, গুণনিধি, গোরাচাঁদ, গোপালচাঁদ।

ঘনশ্যাম।

চন্দ্রকান্ত, চন্দ্রকুমার, চিন্তামণি, চুণীলাল।

জগচন্দ্র, জগন্মোহন, জগবন্ধু, জয়চন্দ্র, জয়চাঁদ।

জ্ঞানচন্দ্র।

টগরকান্ত।

তারাকান্ত, তারাচাঁদ, তারানাথ, তেজচন্দ্র।

দয়ালচন্দ্র, দয়ালচাঁদ, দক্ষিণারঞ্জন, দীনদয়াল, দীননাথ,  
দীনবন্ধু।

ধর্ম্মচন্দ্র, ধর্ম্মচাঁদ, ধীরচাঁদ।

নন্দকুমার, নন্দলাল, নবকিশোর, নবকুমার, নবীনচাঁদ,  
নলচন্দ্র, নিত্যানন্দ, নৃত্যলাল, নিমাইচাঁদ, নিবারণচন্দ্র, নির্মলচন্দ্র,  
নীলকান্ত, নীলমণি, নীলরত্ন।

পদ্মলোচন, পরমানন্দ, পান্মালাল, পূর্ণচন্দ্র, প্রণয়চাঁদ,  
প্রতাপচন্দ্র, প্রতাপচাঁদ, প্রত্যয়চাঁদ, প্রসন্নকুমার, প্রসাদচন্দ্র,  
প্রশ্রয়চাঁদ, প্রাণকুমার, প্রাণচন্দ্র, প্রাণনাথ, প্রিয়নাথ, প্রিয়বাদী,  
প্রিয়লাল, প্রেমচাঁদ, প্রেমদয়াল।

বংশীচাঁদ, বদনচন্দ্র, বসন্তকুমার, বাহাদুর, বিক্রম, বিজয়চাঁদ,  
বিনয়চাঁদ, বিনোদলাল, বিমলচাঁদ, বিরাট, বিরাজমোহন,  
বিশ্বাসচন্দ্র, বীরচন্দ্র, বেহারিলাল। ভদ্রচাঁদ, ভবানন্দ, ভূবনমোহন।

মণিলাল, মতিলাল, মধু, মনমোহন, মনোরঞ্জন, মনোরথ,  
মহিমাচন্দ্র, মানচাঁদ, মানিকলাল, মিত্রনাথ, মিলন, মুক্তানাথ,  
মুচুকুন্দ, মৃদুনাথ, মোহনলাল।

যত্ত্বময়, যশোনাথ, যুগল।

রজনীকান্ত, রত্নচন্দ্র, রত্নলাল, রসময়, রসিকচন্দ্র, রসিকলাল,  
রাখালচন্দ্র, রাজকিশোর, রাজকুমার, রাজচন্দ্র, রাজীবলোচন,  
রূপচাঁদ, রূপলাল।

হানা ক্যাথেরিন ম্যুলেঙ

ললিতচন্দ্র, ললিতমোহন, লালচাঁদ, লালবেহারি, লালমোহন।

শশিভূষণ, শান্তলাল, শিশুপাল, শ্রীমন্ত।

সত্যনাথ, সত্যবাদী, সদাচারী, সদানন্দ, সনাতন, সন্তোষ,  
সরলচাঁদ, সাগরলাল, সাধু, সার্থক, সুখদ, সুজনলাল, সুধন,  
সুনয়ন, সুবল, সুলোচন, সূর্যকান্ত, সূর্যকুমার, সূর্যমোহন,  
স্বাধীননাথ।

হারানচন্দ্র, হারাধন, হারানন্দ, হীরামোহন, হীরালাল, হেমচন্দ্র,  
হেমনাথ। ক্ষেত্রচন্দ্র, ক্ষেত্রনাথ, ক্ষেত্রমোহন।

## ২ বালিকাদের নাম

অতসী, অধীরা, অনঙ্গমণি, অনুসূয়া, অনুগ্রহ, অপূর্বা, অমলা,  
অলকা, অহল্যা, আদরমণি, আনন্দী, আলাপী, আশা, আশ্চর্য্যা,  
ইচ্ছাময়ী।

ইন্দুমতী, ইন্দুমুখী।

উলাবতী।

উজ্জ্বলমুখী, উজ্জ্বলা, উত্তমা।

কনকমণি, কমলকামিনী, কমলকুমারী, কমলমণি, কমলমুখী,  
কমলিনী, করঞ্জা, কাঞ্চনেমালা, কাঞ্চনী, কাদম্বিনী, কান্তি, কামিনী,  
কালিন্দী, কিশোরী, কীর্তি, কুটিলা, কুমারী, কুমুদিনী, কৃতজ্ঞা,  
কৃপাময়ী, কেতকী, কৌশল্যা।

খুল্লনা।

গগনমণি, গুণমণি, গোলাপী, গৌরমণি, চন্দ্ৰকলা, চন্দ্ৰমণি,  
চন্দ্ৰমুখী, চপলা, চম্পকলতা, চাতকিনী, চাঁদবদনী, চাঁদমণি, চাঁপা,  
চিত্রেখা, চিত্রাণী, চুণী।

জগন্মোহিনী, জটিলা, জয়মণি, জাতি, জীবনমণি।

টগৱৰমণি।

তরঞ্জিতা, তারামণি, তিলকা, তিলোত্তমা, তুষ্টি।

দময়ন্তী, দয়ামণি, দয়াময়ী, দাসী, দিনমণি, দৃতী।

ধনঞ্জয়ী, ধনমণি, ধনী।

নন্দিনী, নবীনাকিশোরী, নবীনা, নয়নী, নলিনী, নিরোধবরণী,  
নীলবরণী, নেত্রেমণী।

পদ্মবতী, পদ্মমণি, পদ্মমুখী, পলাশী, পান্না, পারিজাত,  
পারঞ্জলী, পালনী, প্যারী, পুষ্টি, পুষ্পময়ী, প্রণয়নী, প্রত্যাশা,  
প্রশংস, প্রসন্নকুমারী, প্রসন্নময়ী, প্রিয়ম্বদা, প্রীতি।

ফুলকিশোরী, ফুলকুমারী, ফুলমণি।

বকুলমণি, বদনী, বসন্তকুমারী, বাতাসী, বিদ্যাবতী, বিদ্যাময়ী,  
বিদ্যুৎবরণী বিদ্যুৎলতা, বিধুমুখী, বিনতি, বিনয়নী, বিনোদনী,  
বুদ্ধিমতী।

ভক্তি, ভরসা, ভাগ্যবতী, ভানুমতী, ভুবনমোহিনী।

মঙ্গলা, মণি, মতি, মধুবতী, মনমোহিনী, মনোরঞ্জনী, মলিকা,  
মাধবী, মালতী, মিলনী, মুক্তা, মুক্তি, মুন্ধকারিণী, মৃগনয়নী,  
মৌনবতী।

যত্ত্বময়ী, যমুনা, যামিনী।

রঙ্গিনী, রঞ্জনীগন্ধা, রত্নমণি, রত্নাবলী, রমণী, রন্ধা, রসকলি, রসবতী, রসময়ী, রসমুঞ্জরী, রাজকুমারী, রাজমণি, রাজমহিষী, রাণী, রূপবতী, রূপসী, লবঙ্গমণি, লবঙ্গলতা, লালনী, লীলাবতী।

শকুন্তলা, শক্তি, শশিকলা, শশিমুখী, শান্তি, শুভক্ষরী, শেফালিকা।

সখি, সখিমণি, সত্যবতী, সন্ধ্যামণি, সহচরী, সারল্যা, সুকুমারী, সুখদা, সুখময়ী, সুদক্ষিণা, সুধামুখী, সুনন্দা, সুন্দরী, সুনয়নী, সুবর্ণা, সুমতি, সুমিত্রা, সুলোচনা, সুশীলা, সূর্যমণি, সূর্যমুখী, সূতি, সোনামণি, সৌদামিনী।

হারামণি, হীরামণি, হেমলতা, হেমাঙ্গিনী।

ক্ষমা, ক্ষমাসুন্দরী, ক্ষান্তময়ী, ক্ষান্তি, ক্ষীরদা, ক্ষুদ্রমণি, ক্ষেত্রমণি, ক্ষেত্রমোহিনী, ক্ষেমক্ষরী।

### ৩ মিত্রাক্ষরান্ত নাম

মানিক, রসিক। অলকা, তিলকা, মল্লিকা, শেফালিকা।

ইন্দুমুখী, উজ্জ্বলমুখী, ইত্যাদি যে সকল নামের অন্তে মুখী শব্দ থাকে।

অনঙ্গ, লবঙ্গ।

রাজ, বিরাজ, তেজ।

তুষ্টি, পুষ্টি।

অমৃত, নিত্য, ন্ত্য, সত্য। শ্রীমন্ত, বসন্ত, কান্ত, শান্ত ইত্যাদি কান্তান্ত নাম সকল। লতা, চিত্তা। মতি, দৃতী, স্মৃতি, প্রীতি, কীর্তি, জাতি, বিনতি, মালতী, কান্তি, শান্তি, ক্ষান্তি, দময়ন্তী। ভক্তি, মুক্তি, শক্তি, ঈলাবতী, লীলাবতী, ইন্দুমতী, সত্যবতী ইত্যাদি যে সকল নামের শেষে বতী বা মতী থাকে।

মনোরথ, নাথ, চন্দনাথ, প্রিয়নাথ, ইত্যাদি যে যে নামের শেষে নাথ থাকে। চাঁদ, ইত্যাদি চাঁদান্তর নাম সকল। নন্দ, কুন্দ, মুচুকুন্দ, আনন্দ, ইত্যাদি আনন্দান্ত নাম সকল। প্রিয়ম্বদা, সুখদা, ক্ষিরদা, সদা, সুনন্দা। নিরোদি, বিনোদি, প্রিয়বাদী, সত্যবাদী, আনন্দী, কালিন্দী।

মধু, সাধু, বিধু। জগবন্ধু, দীনবন্ধু।

গগন, বদন, ভুবন, ভূষণ, সুজন, সুধন, সুনয়ন, সনাতন, মিলন, মোহন, লোচন ইত্যাদি লোচন বা মোহনান্ত নাম সকল। দক্ষিণারঞ্জন, মনোরঞ্জন। যত্ন, রত্ন। জ্ঞান, মান, প্রাণ, হারাণ। দীন, নবীন, স্বাধীন। গুণ, অরুণ। পান্না, সোনা, প্রসন্না, যমুনা, করুণা, সুদক্ষিণা, সুলোচনা, খুল্লনা। ধনী, মণি, চুণী, বদনী, নয়নী, রমণী, নীলবরণী, মনোরঞ্জনী, কাঞ্চনী, মিলনী, লালনী, পালনী। রাণী, চিত্রাণী। কমলিনী, নলিনী, পদ্মিনী, রঙিনী, হেমাঙ্গিনী, প্রণয়িনী, বিনয়িনী, বিনোদিনী, কুমুদিনী, নন্দিনী, মোহিনী, কামিনী, যামিনী, সৌদামিনী, কাদম্বিনী, চাতকিনী, মুন্ডকারিণী। চিত্তামণি, ফুলমণি ইত্যাদি যে ২ নামের অন্তে মণি থাকে।

আলাপ, গোলাপ, প্রতাপ। কৃপা, চাঁপা। আলাপী, গোলাপী।

নব, ভব।

উত্তম, বিক্রম, ঘনশ্যাম। প্রেম, ক্ষেম। মহিমা, উত্তমা, তিলোত্তমা, ক্ষমা।

অভয়, অক্ষয়, উদয়, জয়, বিজয়, প্রণয়, বিনয়, আশ্রয়, প্রশ্রয়, প্রত্যয়। দয়া, বিদ্যা। ধনঞ্জয়ী, ইচ্ছাময়ী ইত্যাদি যে ২ নামের শেষে ময়ী হইবে।

টগর, সাগর। কিশোর, কুমার, কিশোর ও কুমারান্ত নাম সকল। ধীর, বীর। অক্তুর, বাহাদুর। ক্ষেত্র, নেত্র, মিত্র, চিত্র, ভদ্র, ক্ষুদ্র, চন্দ্র, ইত্যাদি চন্দ্রান্ত নাম সকল। তারা, হারা, গোরা, হীরা, অধীরা। আদরি, সুন্দরী, শুভক্ষরী, ক্ষেমক্ষরী, রসমুঞ্জরী, সহচরী, প্যারী, কুমারী, কিশোরী, বেহারী, সদাচারী।

যুগল, সরল, নল, সুবল, কমল, কোমল, নির্মল। নীল, তিল,  
কুল, অতুল, বকুল, পারুল, শিশুপাল, রাখাল, দয়াল, লাল,  
ইত্যাদি লালান্ত নাম সকল। অমলা, নির্মলা, উজ্জ্বলা, চপলা,  
মঙ্গলা, শকুন্তলা, শশিকলা, কালা, কাঞ্চনমালা, কুটিলা, জটিলা,  
সুশীলা, অহল্যা, সারল্যা, কৌশল্যা। রসকলি, রত্নাবলী। দয়ালু,  
কৃপালু।

যশ, রস, সন্তোষ, আশুতোষ। কৈলাস, অবিনাশ, বিশ্বাস।  
আশা, প্রত্যাশা, ভরসা প্রশংসা। শশি, বংশী, অতসী, পলাশী,  
দাসী, বাতাসী, রাজমহিষী, রূপসী।

নামাবলী সমাপ্ত।

ইতি।